



DS

E. v

18/m

38734/B/1

Baral
11/11/28
40th



Digitized by the Internet Archive
in 2019 with funding from
Wellcome Library

https://archive.org/details/b30517680_0001

ELEMENTA
PATHOLOGICÆ
UNIVERSÆ

AUCTORE

D. ADAMO NIETZKI



EBRODUNI IN HELVETIA

MDCCCLXVI.

HIPPOCRATES

LIB. DE ARTE.

— Τῆς (γὰρ) αὐτῆς ξυνέσιός ἐστιν, ἥσπερ τὸ εἰδέναι
τῶν νόσων τὰ αἷτια, καὶ τὸ θεραπεύειν αὐτὰς ἐπίσασθαι.
i. e. ejusdem prudentiæ, cujus est cognoscere morbo-
rum causas, etiam est nosse morbos sanare.



REVERENDISSIMO AC PERILLUSTRI

DOMINO

CONR. FRIDERICO

DE KLEIST

SACR. REG. MAI. IN BOR. A CONS. SANCTIORIBUS

ECCLESIAE CATHEDRAL. BRANDENB. DECANO

PROCERUM PROVINC. LEGATO PRIMARIO ORDINIS

S. JOANNIS HIEROSOLYMITANI EQUI TI DOMINO

HÆREDITAR. IN STAVENOV ETC.

PATRONO OPTIMO MAXIMO.

Non levi animadversione dignus profecto mihi viderer, si eam occasionem, quæ mihi nunc suboritur votis meis accommodatissima, prætermitterem sine publica honoris erga TE testificatione. Jus enim habes, REVERENDISSIME AC PERILLUSTRIS DOMINE, hoc officii genus nunc a me postulandi; quod nisi explerem, me a conditione hominis liberalis discessisse putarem, mihi que ipsi non satisfacerem. Libellus enim iste, quem nunc

*in lucem emitto, sibi præposito NOMINE TUO super-
bire audet, haud immemor primæ suæ originis,
quam adhortationibus Tuis debet, quibus me ex
eo jam tempore, quo studiorum causa in hac Mu-
sarum sede commoratus es, una cum aliis ami-
cis, (quorum memoria nobis erit numquam non
honorifica) adiisti, ne mea deficeret opera, in doc-
trinis medicis reducendis ad notiones distinctas, illis-
que redigendis in ordinem cum ratione magis con-
venientem. Ne vero ejusdem rei studium tunc tem-
poris a me inchoatum mox languescere videretur:
me quoque ad dogmata medica aliis coram tradenda
permovisti, eaque proponentem IPSE audivisti, tam-
quam cognitionis rerum naturalium cupidissimus;
talique modo conatibus meis præclara addidisti in-
citamenta. En primam originem libelli, nunc pro-
deuntis in lucem, ac PERILLUSTRI NOMINI TUO
a me inscripti! Nam cui ille magis consecrari po-
tuisset, quam TIBI, PATRONE OPTIME MAXIME
qui, TE hortatorè, ad existentiam pervenit. At-
que hoc eo lubentius a me nunc perficitur, quia*

D E D I C A T I O.

longius jam est illud tempus, ex quo gestit animus
 NOMINI TUO erigere monumentum. Neque vero
 nunc, qua fide, qua cura, qua assiduitate uti so-
 leas in muneribus obeundis, prædicabo; neque alias
 virtutes TUAS, gravitatem, constantiam, æquita-
 tem, integritatem, modestiam, animi magnitudi-
 nem, miramque facilitatem ac humanitatem lauda-
 bo. Quamvis enim magna ista sint, summisque
 laudibus dignissima, TE que non minus admirabi-
 lem, quam jucundum acceptumque omnibus efficiant;
 præterquam iis, qui, quoniam virtute sua non sa-
 tis confidere possunt, invidere solent alienæ: eorum
 tamen laudes hujus loci angustia non comprehendunt.
 Sed illa huic loco magis respondebit ac consilio meo
 accommodatissima erit laus, quæ a singulari TUO,
 neque satis prædicando omnium litterarum amore
 proficiscitur. Præclara enim est illa varii generis
 litterarum cognitio, qua IPSE polles, quam adeo
 augere conaris, ut nullum tempus melius collocari
 posse existimes, quam quod in studiis consumitur.
 Quod TIBI eo gloriosius est, quo rarius deprehen-

dantur oboriri tam præstantia exempla inter homines TIBI similis status. Quantum vero illud est, quod quidem puto maximum; si eos etiam, quotquot operam suam navant studiis, ac eniti in iisdem conantur præ aliis, tam liberaliter, tamque humaniter tractas, ut satis intelligant, se rem hic ita habere, ut fieri solet inter amicos veri nominis; quorum numero me quoque a TE adscriptum esse, valdopere gaudeo. Quam præclara, quam laudabilis hæc jam in TE est cogitandi ratio! Verissimum enim illud est atque rei ipsius naturæ convenientissimum, quod jam de hominum dignitate judicas: eam scilicet non divitiis, quibus sæpe turpissimi ac stultissimi abundant, neque honorum titulis, qui sæpe a divitiis, sæpe a genere, sæpe a machinationibus proficiscuntur, sed ingenio, doctrina, animoque metiendam potius esse. Serva mihi hunc ~~animum~~ animum, PATRONE OPTIME MAXIME, idque de me etiam atque etiam persuasum habeas velim, me nihil intermissurum esse, quo efficere possim, ut TIBI ea amicitia ac benevolentia dignior esse videar, qua

me hæcenus tam liberaliter es prosequutus. Accipe igitur benevole libellum præsentem, quem PERILLUSTRI NOMINI TUO inscriptum consecratumque esse volui, tamquam publicum, illudque verissimum meæ erga TE reverentiæ testimonium! Nec dubito, PATRONE OPTIME MAXIME, futurum esse, ut id quoque a TE obtineam; tot speciminibus singularis TUAE erga me benevolentiae jam perceptis, TIBIQUE etiam aliunde cognita animi mei indole. Habeas me etiam in posterum, uti hucusque fecisti, commendatissimum eidem benevolentiae TUAE singulari, qua mihi nihil gloriosius, nihil exoptatius erit; existimesque, fore, ut nunquam in me desideretur studium sibi magis promerendi has benevoli animi TUI, PATRONE OPTIME MAXIME, erga me testificationes! Quod jam reliquum erit, DEUM T. O. M. ex animo precor, ut ille in TE largiter conferat, quæ ad vitam humanam quam maxime felicem requiruntur, TEQUE ita omni felicitatis genere exornatissimum, UNA CUM PERILLUSTRI FAMILIA TUA, per longam adhuc annorum seriem quam clementissime con-

*servet! Vive itaque felix! vive diu! gentis TUÆ
ac societatis humanæ verum decus ac ornamentum!
Quo animo erga TE, PATRONE OPTIME MAXI-
ME, nunquam non perseverabit.*

PERILLUTRIS NOMINIS TUI

Scrip. Halæ ad Salam

Cal. Maii MDCCCLXVI.

studiosissimus cultor

ADAMUS NIETZKI



P R A E F A T I O .

Qui nunc quidem in lucem prodit libellus, L. B. elementa Pathologiæ universæ in se comprehendens, ille jam ante complures annos exstiterat manu scriptus, qui abhinc etiam in complurium manibus versatur. Primam ejus conficiendi occasionem mihi dederunt amici, a me petentes, ut eorum omnium, quæ ad Pathologiam systematicam pertinent, elementa conciperem, conceptaque ipsis explicarem; ratione ubivis habita veræ utilitatis quæ inde rediret ad Medicinam practicam. Satisfactorius itaque his votis amicorum commissum mihi laborem in me suscepi, eumque absolvere curavi. Placuit etiam pluribus aliis, studio medico deditis, eadem adumbrata ratio tradendi Pathologiam; quam ideo illis explicandi quotannis mihi data erat occasio.

Etsi vero non ita alienum erat a consilio meo,

publici tandem juris facere hæc elementa Pathologiæ universæ: neque tamen hoc prius facere apud me constitui, quam eo tempore, quo mihi plus otii superesset, ad emendandas magis ac polliendas hæc lucubrationes. Sed venit tempus, quod mihi necessitatem imposuisse videtur citius edendi librum, quam opinatus eram. Nam primum auditores mei summo cum studio instabant atque urgebant, ut ipsis tædium illud demerem, quod perciperent ex describendis exemplis libri; eumque igitur typis excudendum committerem. Quibus postulationibus eo magis dandum erat, quo sæpius contingere soleat, ut in ejusmodi descriptionibus exemplorum vitia oboriantur, erroribus varii generis ansam suppeditantia. Deinde etiam a viris doctissimis per litteras aliquoties monitus eram, ut elementa Pathologiæ universæ a me adumbrata, quorum exempla descripta perlustrandi copiam se habuisse mihi significabant, quam primum ederem, putaremque æquum fore ac honestum, ne ejusmodi liber, qui & discipulis Medicinam, & facientibus eam, ita utilis esse

possit, quam quis alius, tamdiu luci subtrahatur, ac plagiis adeo pateat; prout fieri plerumque solet cum eruditorum in academiis degentium lucubrationibus, quæ typis nondum excusæ sunt, sed modo oberrant in exemplis descriptis. Nolui igitur, neque etiam potui amplius resistere his admonitionibus fautorum ac amicorum. Cepi ergo consilium elementa ista Pathologiæ universæ edendi; quamvis hic labor in tempus perquam incommodum mihi incidisse videretur. Nam, ut ingenuè fatear, per omne illud tempus, quo occupatus eram in edendo libro hocce pathologico, negotia mea practica adeo increverant, ut mihi necessitatem imponerent hunc laborem inceptum sæpius relinquendi per integros menses. Nunc totus tandem typis excusus in lucem prodit, auctior in locis permultis, in aliis brevior, quam fuit in exemplo primum scripto; in aliis denique parum mutatus: prouti nimirum mihi licuerat per alias occupationes meas ejusmodi emendationes suscipere, quæ mihi e re præsentē esse videbantur. Sed jam dicendum erit de ipsa tractatione opus-

culi hujus pathologici, cujus conspectus sub fine præfationis apparebit. Priusquam vero id a me perficiatur, necesse fore judico, ut de eo fine antea L. B. satis certum faciam, quem sibi præfixum habui circa opusculi præsentis confectionem. Nam ita constabit de principio, ex quo elementa ista Pathologiæ universæ dijudicari debeant.

Nunc vero ibidem propositum mihi erat, omnia momenta doctrinæ pathologicæ breviter ac distincte tradere, quæ sufficerent ad morborum talem cognitionem sibi comparandam, qualis ea foret, qua facile effici possit, ut satis perspectum habeatur, quid ad morbi essentiam ac naturam pertineat; in quo unus ab alio differat; a quibus causis ille proveniat; per quæ signa dignoscatur; tandemque rebus ita comparatis inveniantur principia, ad artem sanandi intelligendam necessaria. Ut itaque compendium istud pathologicum, quia nec adeo prolixum est, nec ita mancum, finibus eorum bene respondere videatur, qui ad Pathologiam discendam prius accedunt; recte intellectis omnibus doctrinæ hujus principiis congruo ordi-

ne inter se collocatis, in eodem studii genere ulterius progressuri. Atque ad hos potissimum usus, ut in principio præfationis jam indicavi, a me destinata sunt hæc Pathologiæ universæ elementa; utpote quæ etiam frequentantibus scholas meas hæctenus explicavi quotannis. Sed ne illis quidem, qui jam in exercitio artis salutaris versantur, ingratum fore puto idem opusculum. Licet enim eruditorum hominum res non agatur in elementis disciplinarum; iis tamen placere solet, si videant, ea omnia doctrinæ, quam profitentur, momenta proposita facili ad intelligendum ordine contineri in libro mediocris molis. Quod jam præstare ita conatus sum.

Per totam nempe opusculi hujus tractationem ea in genere primum locum tenere jussi, a quorum cognitione subsequantium cognitio dependet; generalibus ubique præmissis specialibus. Quibus id efficitur, ut nexus veritatis cum suo principio, a quo illa dependet, facilius intelligatur, & argumenti tractatio brevior fieri possit. Nam omnibus in disciplina aliqua inter se ita confusis,

ut difficulter intelligatur, quid primum sit, quid secundum: illius certa cognitio, si etiam sperari possit, difficulter tamen obtinebitur. Quod si etiam negligatur in doctrina morborum specialibus generalia præmittere: tunc illa præter necessitatem proluxior fiet; tot odiosis repetitionibus ad se admissis.

Neque vero congruum sibi ordinem solum vindicant disciplinæ ad sui faciliorem intelligentiam, sed hic etiam opus est veritate principiorum cognoscendi. Quare mearum quoque partium fore duxi, ne hoc quoque studium in opusculo præsentem desiderari videatur. Observationes, quæ principem fere locum in Pathologia tenent, e scriptis atque aliis relationibus auctorum probatæ fidei collegi, iisdem meas addidi, singulas tam inter se, quam etiam cum aliis veritatibus certis probe contuli, in conscribendis historiis morborum accuratus esse studui; principio similitudinis decenter ubivis observato. Judicia inde deduxi, hæc iterum inter se comparavi, eoque modo principia stabilire curavi, ad doctrinam morborum necessa-

ria. Quibus porro adjeci accuratas morborum definitiones, quæ omnino vim habere poterunt principiorum cognoscendi in Pathologia; si eorum hic habeatur ratio, quæ, ut Philosophi dicunt, ad notionis realitatem requiruntur. Quod non solum observasse, sed etiam rationem simul habuisse brevitas ac perspicuitatis in definiendo mihi videor; ratus, definitiones breves ac satis perspicuas esse debere in disciplinis, dum earum principia sunt, memoriæ commendanda. Ubi veroprehenditur, me in vocabulis quibusdam definitis a significato, inter quos aut plures Medicos recepto, alienum factum esse: hoc inter alia vel ideo necesse fore mihi videbatur, ut omnis ambiguitas evitaretur; cui nullum locum in systemate concedere licet. Ratione vero eorum principiorum, quæ ex aliis disciplinis, præcipue Physiologia, petuntur ad cognoscendas propositiones pathologicas: tunc ea solum hic admisi, quæ satis certa sunt, atque argumentis congruis comprobata; ea vero consulto omisi, quæ dubia sunt, magisque ad hypotheses referenda. Malui enim in

simplici potius acquiescere observatione, quam dogmata pathologica hypothefibus inquinare; iis maxime, quarum translationes ad morborum sanationes factæ nocumento esse possent. Nec dubito, quin in eadem re mecum consentiant Medici probatæ fidei.

Ad ipsas denique propositionum pathologicarum demonstrationes quod attinet, earum plenas enuntiationes verbis exprimere prohibuit instituti ratio; siquidem exiguæ molis hunc librum oportebat esse, ea tamen omnia in se comprehendere, quæ ad elementa Pathologiæ universæ requiruntur. Hinc aliter fieri non poterat quam ut defectus iste apparet per indicationem brevem principii, a quo demonstratio proficiscitur, propositioni demonstrandæ adjunctam, suppleretur (quo etiam nomine habendæ erunt paragraphorum citationes) reservata ad prælectiones uberiore evolutione demonstrationum. Quilibet vero legentium hæc elementa Pathologiæ universæ fusiores propositionum demonstrationes simili ratione inveniet; eoque facilius, quo magis ille polleat iis studiis,

quæ


quæ ad Pathologiæ fontes ac subsidia referri solent, ac commemorantur eo loco tractationis, ubi de Pathologia in genere differitur.

Quibus jam omnibus convenienter instruxi argumentorum tractandorum ordinem, quem conspectus præfationi subnexus exhibet. De cuius vero ratione dicendum nunc erit. In omni systemate veri nominis, in quo disciplina quædam pertractatur, id effici solet, ut de illius indole ac principiis statim sub initio constet. Nam hoc modo intelligere licebit, utrumne eis in tractatione ipsa ab auctore fatis fiat. Necesse itaque mihi esse videbatur, in ipso quasi limine systematis pathologici agere generatim de Pathologia, ejus vera conditione ac principiis, de morbo, de hujus causis & signis. Atque hæc etiam momenta expedire curavi in prolegomenis; hic æque, ac in aliis opusculi hujus locis ratione eorum modo habita, quæ veram utilitatem spondent. Sequitur jam tractatio ipsa morborum, & quidem primo simplicium; quia eorum cognitio, ut jam præcepit GALENUS, necessaria est ad morbos compo-

fitos recte intelligendos. Factum hoc a me est in libro primo. Videtur quidem hæc theoria morborum simplicium ibidem contenta perquam tenuis esse ac jejuna, sed vix dici potest, quantum illa conferat ad morborum compositorum cognitionem solidam, immo profundam. Dum hoc modo optime discimus nexum introspicere, qui morborum causas proximas ac remotas intercedit, illorumque magnitudinem intelligere; facta nimirum morbi cujusdam compositi certæ speciei resolutione in morbos simplices, e quibus ille constat. Quibus præmissis, jam progredior ad morborum compositorum considerationem, quam in libro secundo ita exhibendam curavi, ut eorum symptomata, causas remotas, harumque nexum cum causis proximis, una cum signis pathognomicis & prognosticis sufficientibus exponerem. Quibus peractis ad librum quartum venio, in quo, præmissa morborum complicatorum doctrina generali, notiores tantum febrium complicatarum species proponuntur; fusiore hujus argumenti tractatione in aliud tempus reservata. Quia vero suis

locis opusculi hujus dictum erat, opus etiam esse, ut in Pathologia de morte agatur: volui itaque huic argumento separatum locum destinare. Unde liber quartus de morte. Indicantur ibidem principia quædam generalia, quorum accurata applicatione ad casus obvios in morbis signa mortis prognostica facile invenire licebit.

Atque hæc jam erant, L. B. quæ tibi significanda esse putavi in præfatione; iisdem insuper accedente ea fide, fore mihi non mediocri incitamento ad artem salutarem in posterum quoque magis colendam, si judicio tuo præsentis conatus meos probari intellexerim. Scr. Halæ ad Salam
Cal. Maii MDCCCLXVI.



CONSPECTUS
ELEMENTORUM
PATHOLOGIAE
UNIVERSÆ.

PROLEGOMENA PATHOLOGIAE.

CAP.

Pag

I. De Pathologia in genere

II. De Morbo in genere

III. De causis morborum in genere

2

IV. De morborum horumque causarum signis in
genere

4

LIBER PRIMUS.
DE MORBIS SIMPLICIBUS.

SECTIO PRIMA.

DE MORBIS SOLIDORUM SIMPLICIBUS.

CAP.

Pa

I. De morbis solidorum simplicibus in genere

II. De morbis ossium simplicibus

CAP.

Pag.

III. De morbis simplicibus cartilaginum	57
IV. De morbis simplicibus fibrarum partium flexilium non cartilaginearum & vasorum in genere	59
V. De morbis simplicibus vasorum in specie	66

SECTIO SECUNDA.

DE MORBIS FLUIDORUM SIMPLICIBUS

TAM IN GENERE QUAM IN SPECIE. Pag. 77

SECTIO TERTIA.

DE PARTIUM FLEXILIUM INTEGRUM

QUID EFFICIENTIUM MORBIS INSTAR SIMPLICIUM CONSIDERANDIS.

I. De partium flexilium integrum quid constituentium morbis simplicibus in genere	84
II. De morbis cutis simplicibus	89
III. De morbis partium muscularium simplicibus	99
IV. De cavitatum & partium intra illas contentarum morbis simplicibus	105
V. De morbis sensuum externorum simplicibus	122
VI. De morbis sensuum internorum simplicibus	127

LIBER SECUNDUS.

DE MORBIS COMPOSITIS.

CAP.	Pag.
I. De rigiditate & debilitate solidorum in genere	133
II. De plethora generatim	135
III. De spissitudine humorum in genere	137
IV. De cacochymia in genere	138
V. De stasibus & obstructionibus generaliter	139
VI. De congestionibus in genere	140
VII. De inflammatione, gangræna & sphacelo generatim	142
VIII. De vulneribus in genere	145
IX. De ulceribus in genere	148
X. De scirrhis in genere, & in specie de cancro, tam occulto, quam aperto	151
XI. De carie ossium & spina ventosa generatim	156
XII. De fractura & fissura ossium in genere	158
XIII. De luxatione ossium generaliter	160
XIV. De spasmo in genere	162
XV. De hemicrania	170
XVI. De pleuritide spuria	174
XVII. De spasmo paracelsi fixo	176
XVIII. De lumbagine	178
XIX. De malo ischiadico	180
XX. De chiragra, gonagra & podagra	182
XXI. De asthmate spastico, seu convulsivo	187
XXII. De convulsionibus.	190
XXIII. De paralyfi in genere	195
XXIV. De asthmate defectivo.	199
XXV. De apoplexia	201
XXVI. De hæmorrhagiis in genere	204

CAP.	Pag.
XXVII. De hæmorrhagia narium	209
XXVIII. De hæmoptysi	211
XXIX. De vomitu cruento	214
XXX. De sputo cruento	219
XXXI. De mictu cruento	221
XXXII. De fluxu menstruo	223
XXXIII. De hæmorrhagia uteri in specie sic dicta	230
XXXIV. De fluxu lochiali	231
XXXV. De hæmorrhoidibus fluentibus internis in specie talibus	234
XXXVI. De hæmorrhoidibus externis fluentibus	237
XXXVII. De hæmorrhoidibus mucidis	239
XXXVIII. De hæmorrhoidibus cœcis, turgenti- bus & tumentibus	240
XXXIX. De hæmorrhoidibus serpiginosis	241
XL. De fluxu hepatico	243
XLI. De palpitatione cordis	245
XLII. De phthisi pulmonali	248
XLIII. De tophis pulmonum	255
XLIV. De vomica pulmonum	257
XLV. De empyemate in specie tali	258
XLVI. De catarrho suffocativo	261
XLVII. De tussi	265
XLVIII. De malo hypochondriaco.	269
XLIX. De malo hysterico	274
L. De cardialgia	277
LI. De vomitu in genere	280
LII. De anorexia & nausea	283
LIII. De addephagia & orexi canina	285
LIV. De spasmo oesophagi, sive gulæ	286
LV. De flatulentia	288
LVI. De colica	291
LVII. De passione iliaca	293
LVIII. De obstructione alvi	296

CAP.	Pag.
LIX. De diarrhoea	298
LX. De debilitate ventriculi & intestinorum	300
LXI. De foda	302
LXII. De tenesmo, paralyfi & procidentia ani	304
LXIII. De vermibus	306
LXIV. De infarctu hepatis	309
LXV. De scirrho hepatis	312
LXVI. De infarctu lienis	313
LXVII. De scirrho lienis	315
LXVIII. De obstructione, infarctu & scirrho glandularum mesenterii & intestinorum	316
LXIX. De calculo renum & vesicæ	318
LXX. De stranguria & dysuria	322
LXXI. De ischuria	324
LXXII. De incontinentia urinæ	325
LXXIII. De diabete	327
LXXIV. De ictero	329
LXXV. De hydropse in genere	333
LXXVI. De leucophlegmatia & anasarca	340
LXXVII. De ascite & tympanite	342
LXXVIII. De oedemate	344
LXXIX. De fluore albo benigno	346
LXXX. De fluore albo maligno	351
LXXXI. De gonorrhoea benigna	354
LXXXII. De gonorrhoea maligna	357
LXXXIII. De lue venerea	360
LXXXIV. De scabie	364
LXXXV. De impetigine & lepra	368
LXXXVI. De herpette & zona	371
LXXXVII. De varis & gutta rosacea	373
LXXXVIII. De crusta lactea	376
LXXXIX. De gravedine, coryza & phlegma- torrhagia	377
XC. De broncho & raucitate.	380

CAP.	Pag.
XCI. De scorbuto	382
XCII. De herrniis	387
XCIII. De dolore generatim	390
XCIV. De cephalalgia	392
XCV. De odontalgia	394
XCVI. De lipothymia & syncope	395
XCVII. De affectibus soporosis	398
XCVIII. De ophthalmia & lippitudine	400
XCIX. De cæcitate	402
C. De vertigine	403
CI. De otalgia	405
CII. De fasurru & tinnitu aurium	406
CIII. De surditate	407
CIV. De olfactus defectu	408
CV. De gustus defectu	410
CVI. De aphonia	411
CVII. De melancholia	412
CVIII. De mania	416
CIX. De noctambulatione	418
CX. De nostalgia	419
CXI. De hydrophobia	421
CXII. De tarantismo	423
CXIII. De chorea S. Viti	425
CXIV. De furore poetico	426
CXV. De erotomania & furore uterino	427
CXVI. De morosi & debilitate memoriæ	429
CXVII. De febribus in genere	430
CXVIII. De febribus continentibus in genere	449
CXIX. De febre continente per eminentiam tali	452
CXX. De febre ephemera simplice, seu diaria	454
CXXI. De febre ephemera plurium dierum	455
CXXII. De febribus continuis in genere	457
CXXIII. De febribus inflammatoriis generatim	459

Cap.	Pag.
CXXIV. De phrenitide	463
CXXV. De angina vera	466
CXXVI. De peripneumonia	469
CXXVII. De pleuritide vera	472
CXXVIII. De paraphrenitide	474
CXXIX. De hepatitis	477
CXXX. De splenitide	480
CXXXI. De nephritide	482
CXXXII. De febre inflammatoria uterina	484
CXXXIII. De febre inflammatoria ex inflammatione vesicæ & ureterum	488
CXXXIV. De febre inflammatoria intestinali	490
CXXXV. De causo	493
CXXXVI. De febribus inflammatoriis ex ophthalmia, otalgia & odontalgia ortis	496
CXXXVII. De febribus inflammatoriis cum erysipellate & phlegmone connexis	499
CXXXVIII. De febre vulneraria	501
CXXXIX. De febre cholERICA, seu biliosa	503
CXL. De febre catarrhali benigna	506
CXLI. De febribus malignis in genere	508
CXLII. De febre catarrhali maligna & petechiante	518
CXLIII. De dysenteria, sive febre dysenterica	521
CXLIV. De febre castrensi, sive hungarica	524
CXLV. De febre scarlatina	526
CXLVI. De febre purpurea urticata	528
CXLVII. De febre purpurata rubra & alba	530
CXVIII. De febre morbillosa	532
CXLIX. de febre variolosa	534
CL. De febre petechiali	537
CLI. De febre pestilentiali, seu de pestilentia	539
CLII. De febre lenta & hectica	541
CLIII. De febribus intermittentibus in genere	545

C A P.	Pag.
CLIV. De febre quotidiana	552
CLV. De febre tertiana	554
CLVI. De febre quartana	556
CLVII. De febrium intermittantium speciebus rarioribus	558
CLVIII. De commotionibus sive motibus febrilibus	559

LIBER TERTIUS.

DE MORBIS COMPLICATIS.

I. De morbis complicatis in genere	561
II. De febribus complicatis in genere	565
III. De synocho putrida	573
IV. De febribus compositis ex acuta periodo.	577
V. De febre tertiana continua	579
VI. De febre quartana continua	583
VII. De febre quotidiana continua	584

LIBER QUARTUS.

DE MORTE.

I. De principiorum conditione ad mortem præsa- giendam in morbis	585
II. De mortis prognosi in morbis generatim.	586

PROLE-



PROLEGOMENA PATHOLOGICÆ.

CAPUT I. DE PATHOLOGIA IN GENERE.

§. I.

Pathologia est pars medicinæ theoreticæ , quæ agit de morbis.

Vera atque antiqua hæc jam est regula Logicorum , qua præcipitur , ut omnis definitio constare debeat ex genere proximo & specifica differentia. Quod quando fit , major tunc definitionibus perfectio attribui solet. Quare etiam eidem regulæ conformem fieri voluimus definitionem in §. propositam. Tantum vero abest , ut ideo prorsus rejiciendæ sint definitiones , quod in iisdem loco generis proximi summum ponitur , ut potius ibi laudem mereantur quam maxime , ubi earum usus extra systematis limites requiritur , modo non deficiant aliæ definitionum veri nominis conditiones.

Hinc etiam licebit *Pathologiam* definire per *scientiam morborum*. Fusius hæc omnia explicabuntur in prælectionibus. Sed & de specifica differentia definitionis constat. Peculiaris nimirum ille status internus corporis humani vivi est, diversusque a sanitate, qui præsentem morbo obtinet, quem sibi accurate considerandum sumit *Pathologia*. Ut itaque id, circa quod doctrina ista versatur, rite intelligi possit, distincta jam opus erit morbi notione.

§. II.

Morbus est dissensus functionum corporis humani respectu suæ conservationis.

Præter id, quod hæc morbi definitio cum usu loquendi conveniat, ea simul ad notiones fecundas referri posse videtur. Quod congruis argumentis evictum dabitur in prælectionibus.

§. III.

Circa quæ versatur *Pathologia*, ea possibilia sunt per essentiam & naturam corporis humani (§§. I & II.)

§. IV.

In *Pathologia* ea tantum tradere competit, quorum complexus dissensum functionum corporis humani ratione conservationis suæ constituit; multis aliis postpositis, quæ æque fieri possunt per corpus humanum. Et sic *Pathologia* notionibus perfectionis, imperfectionis & finis primarii, tamquam notionibus directricibus, utitur (§§. I & II.)

§. V.

Pathologiæ asserta rite sunt demonstranda (§. I.)

Quo in negotio , præter alia demonstrandi principia , hic multum juvare poterit philosophia mechanica ; utpote quæ corporum naturalium mutationes ex illorum structura , textura & mixtione deducere conatur.

§. VI.

In Pathologia ratio sufficiens reddenda est , cur morbi actum consequantur. Causæ adeoque morborum efficientes sufficientes eruendæ erunt (§. antec.)

§. VII.

In Pathologia non æque causæ morborum possibiles , sed actuales potius evolvendæ sunt (§. antec.)

§. VIII.

Ergo concausæ actuales morborum , & quidem omnes probe indagandæ erunt (§. ant.)

§. IX.

Quæcumque a morbis dependent , illa quoque tradere oportet in Pathologia. Hinc omnes effectus morborum eruendi erunt , iique minimi , sive præsentis , sive præteriti , sive futuri (§§. VI. VII & VIII.)

§. X.

In Pathologia tradenda sunt ea , unde colligere licet , morbum vel adfuisse , vel adesse , vel futurum esse. Hinc signa morborum evolvenda sunt (§. IX.)

§. XI.

Quæcumque ex omnimoda subjecti determinatione faciunt ad cognitionem status morborum, ea inserviunt Pathologiæ (§§. VI. VII. VIII. IX. X.).

§. XII.

Prout materia doctrinæ pathologicæ ad eandem rationem redit, quam erga se habere solent genus & species: Pathologia tunc erit modo *generalis*, modo *specialis*.

§. XIII.

Datur Pathologia individui, quæ quamvis doceri nequeat, ad eandem tamen eruendam in casu obvio principia sufficient in Pathologia generali & speciali stabilita (§. XI.).

§. XIV.

Historia morbi est complexus illarum determinationum subjecti morbo obnoxii, quæ faciunt ad cognitionem morbi.

§. XV.

Historia morbi subjecti abstracti dici poterit, cujus subjectum genus vel species est. Eam vero historiam morbi, in qua loco subjecti deprehenditur individuum quoddam, haud immerito vocare licebit *historiam morbi subjecti concreti*.

§. XVI.

Pathologia postulat historias morborum; & quidem Pathologia generalis & specialis historiam

morbi subjecti abstracti; Pathologia vero individui historiam morbi subjecti concreti (§. VI - XV.).

§. XVI.

Historia morbi requirit enarrationes determinationum, de quibus constare poterit, easdem esse vel causas, vel effectus, vel signa morbi (§§. VII. X & XIV.).

§. XVIII.

Differt ideo historia morbi ab historia individui morborum, qua talis (§. XIV.).

§. XIX.

Ad fontes Pathologiæ pertinent

I. Physica ad corpus humanum applicata, seu Physiologia sensu generalissimo sumpta.

II. Physiologia prout sensu medicorum accipitur.

III. Chimia.

IV. Mathesis ad corpus humanum applicata.

V. Ea pars Physices, quæ naturam illorum corporum, præter corpora animalia, scrutatur, quæ quomodocumque concurrunt ad cognitionem morborum.

VI. Ontologia, Cosmologia, Psychologia.

VII. Observationes pathologiæ secundum præcepta logica conceptæ.

§. XX.

Studia autem subsidaria Pathologiæ erunt

I. Logica, tam in specie talis, quam etiam probabilium.

II. Physica.

III. Historia naturalis.

IV. Matheſis.

V. Collectiones caſuum pathologicorum accurate conſignatorum.

§. XXI.

Pathologia methodo, quam dicere ſolent ſcientificam, tradenda eſt (§. V.).

§. XXII.

Suppoſita Phyſica ad corpus humanum applicata, ſeu Phyſiologia ſenſu generaliffimo ſumpta, licet definitiones morborum reales condere, atque inde illorum cauſſas & ſigna eruere. Sed & alia via patet, ex ſignis nempe morborum conficere definitiones nominales, atque deinde ad illorum cauſſas & reliquos effectus progredi. Prior modus majus compendium doctrinæ ſuppeditat, quam poſterior, eidemque idcirco magis præferendus.

Quid ibi vero faciendum ſit via brevi ad Pathologiæ cognitionem ſyſtematicam contendenti, ubi nimirum defectus quidam principiorum Phyſiologiæ maxime generalis deprehenduntur, de eo jam explicatius differetur in prælectionibus.

§. XXIII.

In ſyſtemate pathologico Pathologia generalis ſpecialem præcedere debet (§§. XII & XXI.).

§. XXIV.

Perinde adeoque erit, utrum ſingula Pathologiæ generalis dogmata, quæ doctrinam patholo-

gicam specialem antecedere debent, peculiarem tractationis partem constituent, five in peculiari libello comprehendantur; vel dogmatibus Pathologiæ specialis, in certa capita distributis, generalia ibi præmittantur, ubi illorum usus quam maxime necessarius esse videtur (§. ant.).

§. XXV.

In quocumque capite Pathologiæ agendum erit de essentialibus, causis, effectibus & signis morbi (§§. VI-X.).

§. XXVI.

Faciendum est tractationis initium a morbis simplicibus, & deinde progrediendum ad compositos (§. XXI.).

§. XXVII.

Discens Pathologiam sibi de fontibus & subsidiis Pathologiæ prospiciat; definitiones & historias morborum memoriæ probe mandet, ut non nisi rationali Pathologia imbutus, ægros accedat observator strenuus, ab omni præconcepta opinione liber. Et sic in exemplari vivo historias morborum repetat, singula ad lapidem Lydium revocet, definitiones morborum abstrahere discat, atque hoc modo sibi habitum ad dignoscendos morbos acquirat.

C A P U T II.

D E

MORBO IN GENERE.

§. XXVIII.

DE morbo nihil antea judicare licet, nisi prius constiterit, in quo conservatio corporis humani consistat. Et sic in notione morbi detegenda, notio sanitatis vicem directricis sustinet (§. II.).

§. XXIX.

Corpus humanum constat ex partibus solidis & fluidis, quarum singulæ morbis subjiciuntur. Pro ratione igitur morbi, inhærentis partibus vel fluidis, vel solidis, ille referri poterit ad *morbos partium* modo *fluidarum*, modo *solidarum*. Unde jam cognoscitur, quid in genere per *morbum* tam *solidorum*, quam *fluidorum*, intellectum esse velint Pathologi.

§. XXX.

Considerari potest in corpore ægro vel unam modo functionem in eodem, vel plures simul dissentire. In casu priore *morbus* dici poterit *simplex*, *compositus* vero in casu posteriore.

§. XXXI.

In morbo composito functiones dissentientes vel determinantur inter se, vel minus. Si prius, functiones dissentientes determinatæ se ita habebunt, ratione determinantium functionum dissentientium, ut desinant determinari ab illis, vel non desinant.

§. XXXII.

Morbus idiopathicus est morbus, qui non determinatur per alium. *Morbus symptomaticus*, sive *symptoma* est morbus, qui determinatur per alium.

Congruis argumentis in prælectionibus demonstrabitur, quod genuino fundamento innitatur definitio per universam Pathologiam utilissima.

§. XXXIII.

Morbus symptomaticus determinatur vel a suo morbo idiopathico, vel ab alio symptomatico, vel ab utrisque simul (§. ant.).

§. XXXIV.

Morbus idiopathicus cum suis symptomatibus morbus compositus est (§§. XXX & XXXII.).

§. XXXV.

Morbus symptomaticus, qui definit determinari a suo idiopathico, nec ab alio morbo determinatur, jam in idiopathicum degenerat. Atque hoc valet, sive prior morbus idiopathicus simul existat, sive desinat (§. XXXII.).

§. XXXVI.

Cessante morbo idiopathico, cessant quoque ejusdem symptomata (§. XXXII.).

§. XXXVII.

Morbus complicatus est morbus compositus ex duobus aut pluribus idiopathicis.

§. XXXVIII.

Omnes morbi idiopathici, nec non symptomatice, per se spectati, sunt morbi simplices (§§. XXX & XXXII.).

§. XXXIX.

Morbi compositi ex simplicibus componuntur, nec rite intelliguntur, nondum cognitis simplicibus (§. XXX.).

§. XL.

Optima methodus tractandi Pathologiam requirit, ut morbi simplices præmittantur compositis (§. XXVI.).

§. XLI.

Morbus simplex solus in corpore humano nunquam existere potest (§. XXX.).

§. XLII.

Omnis morbus in subiecto concreto erit morbus compositus (§ antec.).

§. XLIII.

Ex physiologicis constat, unam functionem, quæ sensibus manifesto patet, ex pluribus aliis functionibus magis simplicibus esse compositam. Docetur ibidem, partes corporis humani eo magis similes esse, quo minores sint, e. g. fibræ & fibrillæ. Quod si igitur in Pathologia pragmatica non nisi utiles subtilitates admittendæ sint: necesse tunc omnino esse videtur, ut propositioni (§. XXXIX.) satisfactorius, ortamque hic simul collisionem re-

movere conaturus, de morbis simplicissimis in generalioribus tractet, & deinde a morbis minus compositis ad morbos magis compositos progrèdiatur. Ad morbos vero complicatos quod attinet, ob illorum ingentem multitudinem & varietatem compendii quidem limites non sufficiunt, a Pathologo tamen logico facile pernoscentur, qui aliud morborum compositorum genus probe perspexit. Sed dicetur quoque suo loco de necessariis vel frequentibus circa quosdam morbos complicationibus; præmissis antea principiis congruis, quæ ad hanc doctrinam, distincte intelligendam, generatim requiruntur.

§. XLIV.

Morbus dicitur *solvi*, qui definit inexistere corpori.

§. XLV.

Solutiones morborum contingunt vel sine suppetiis medicinæ practicæ, vel iisdem accedentibus. Atque pro hac diversitate diversæ quoque erunt solutiones morborum. Priores dici poterunt *naturales*; posteriores vero *artificiales*, sive *therapeuticae*.

§. XLVI.

Morbi quidam naturaliter & celeriter decurrunt, & statim stipantur eminente periculo vitæ ægri. *Morbus acutus* est morbus, qui celeriter decurrit, statim stipatus eminente periculo vitæ ægroantis. *Morbus chronicus* opponitur acuto.

§. XLVII.

Observantur interdum morbi chronici extraordinariæ durationis in corpore; atque tum *inveterati* seu *habituales* esse dicuntur.

§. XLVIII.

Morbus recens vocatur, qui ordinarium suum decursum nondum absolvit.

§. XLIX.

Morbus hæreditarius est morbus, cujus causa est dispositio quædam corporis ad morbum a parentibus in prognatos translata. *Dispositio vero corporis ad morbum* est ille status corporis internus, per quem determinatur morbus quidam sub conditione aliarum causarum accedentium.

§. L.

Ad solutionem morbi requiritur cessatio morbi idiopathici, qui morbum solutum constituebat (§§. XXXII & XLIV.).

§. LI.

Solutiones morborum naturales in Pathologia; therapeuticæ autem in Therapia tractandæ sunt (§§. XXV & XLV.).

§. LII.

Morbos finiri vel vita adhuc superstite, vel cum hujus interitu, experientia testatur. In casu adeoque primo æger vel sanus fit, vel in alium morbum incidit. En fundamentum divisionis circa solutiones morborum!

§. LIII.

Mors est solutio morbi (§§. XLIV & LII.), sed omnium pessima.

§. LIV.

In Pathologia de morte quoque agendum erit (§. ant.)

§. LV.

Morbus lethalis est morbus, qui non nisi per mortem solvitur.

§. LVI.

Si morbi solutio naturalis per mortem contingit, morbus tum fit lethalis, vel ob privationem remediorum; vel ob eorundem vires non sufficientes in casu obvio; vel ob causas morbi ita comparatas, ut nullo plane modo superari possint (§. ant.)

§. LVII.

Omnis morbus inveteratus est morbus chronicus (§§. XLVI & XLVII.).

§. LVIII.

Qui morbum quemdam hæreditarium esse probare contendit: illum ostendere oportet, conditionem corporis in subjecto quodam, quamdiu hoc vixerit, talem fuisse, qualem dispositio ad quemdam morbum requirit (§. XLIX.).

§. LIX.

Ab ignorantia aliarum causarum morbi efficientium sufficientium non licet concludere, illum esse hæreditarium. Sed falsum quoque est, a causis quibusdam morbi efficientibus sufficientibus, præter causas hæreditatis, conjicere, morbum non esse hæreditarium.

§. LX.

Morbus salutaris est morbus, cujus solutio remedium est alterius morbi simul existentis in corpore, hac tamen lege, ut status posterior inde enatus, non sit periculosior priore.

§. LXI.

Quomodocumque determinatus esse poterit ille morbus, cujus simul existentia supponitur in casu morbi salutaris (§. ant.).

§. LXII.

Morbus major est morbus, in quo major dissensus functionum corporis respectu hujus conservationis adest. *Morbus contra minor* appellatur, in quo minor dissensus functionum corporis respectu hujus conservationis adest. Æstimatur porro *initium morbi* ex ejus ortu, seu ex symptomatibus conspicuis, quibus morbus idiopathicus quidam stipatur. *Incrementum morbi* fieri dicitur, quando morbus major fit. *Morbus* porro *in statu* esse vocatur, quando post sui incrementum in uno gradu perseverat. *Decrementum* denique seu *declinatio morbi* exinde dijudicatur, quando ille minor fit.

§. LXIII.

Morbus salutaris non est major illo morbo cui remedium affert (§§. LX & LXII.).

§. LXIV.

Morbus typicus, seu *regularis* est morbus, in
cujus phænomenis idem semper ordo apparet.
Morbus vero *atypicus*, seu *irregularis* dicitur, quem
typico, five regulari opponere licet.

§. LXV.

Omnis morbus, per se spectatus, typicus est
(§§. II & LXIV.).

§. LXVI.

Omnis morbus complicatus, si tamquam unus
consideratur, typicus quoque sit, oportebit (§. ant.)

§. LXVII.

Morbus irregularis dici nequit, nisi habita-
tione ad nostram cognitionem. Et sic morbus
vel ob ignoratas complicationes; vel alias causas
accedentes; vel priores deficientes; vel effectus
non observabiles, irregularis esse apparet (§. ant.).

§. LXVIII.

Si in morbo complicato singulorum typi in-
ter se collidunt, tum necesse est, ut exceptiones
adsint, atque hæ ad typum morbi complicati re-
ferantur (§§. XXXVII & LXIV.).

§. LXIX.

Qui typum morbi complicati dijudicare ve-
lit, ille singulorum morborum typum, eorum col-

lisiones, & inde pendentes exceptiones probe per-
noscere debet (§. ant.).

§. LXX.

Id, quod irregulare morbo inesse dicitur, se-
quentem notionem directricem præbet: morbum
medico non esse satis cognitum, hinc inquirendum
esse, an adsit complicatio morborum? an adsit
nova causa? an prior deficiat? an quidam effe-
ctus adsint occulti?

§. LXXI.

Morbus periodicus est morbus, qui statò quo-
dam tempore, vel quoad suum initium, vel suos
paroxysmos recurrit. E contrario *morbus erraticus*,
seu *vagus* dicitur, quem periodico opponere licet.

§. LXXII.

Paroxysmus vero consistit in morbi exacerbatio-
ne; atque hæc adesse putatur, quando morbus ma-
jor fit.

§. LXXIII.

Ordo respectu temporis in morbis periodicis
considerandus erit (§. LXXI.).

§. LXXIV.

Qui itaque morbi periodici rationem suffi-
cientem reddere vult: illum ostendere oportet,
cur ille hoc potius, quam alio tempore recurrat,
vel quod idem est, cur causa morbi periodici
efficiens sufficiens hoc potius tempore, quam alio
existat (§. ant.).

§. LXXV.

§. LXXV.

Ex morbo periodico erraticus fieri potest (§§. LXXI & LXXIV.).

Mutationis hujus, quam frequenter fieri, experientia docet, causæ suo loco satis innotescunt.

§. LXXVI.

Fieri potest, ut, quod ex uno corpore exhalat, idem ad aliud corpus humanum trans-eat. Observatur porro, nonnullorum morborum hanc indolem esse, ut illis obnoxiorum corpora materiam excernant, cujus insinuatione, aliorum corporibus facta, in his quoque similis morbus (sed neglecta præservatione) oriatur. Pertinent hic exempla febris petechialis, luis venereæ, scabiei, pluriumque aliorum morborum. E contraria parte observantur etiam complures morbi, ubi exhalantes ex ægris materiæ ita non nocent, aliorum corporibus importatæ, ut in his morbum illi similem producant, quem in ægrotante deprehendere liquit, unde hujus materiæ facta erat egressio.

De varietate modorum, quibus hæc materia alterius corpori insinuari possit, deinceps convenientiore loco constabit. Nam nostra nunc modo refert, fundamentum ponere definitionum, in §. sequente proponendarum.

§. LXXVII.

Indolis ad §. antec. descriptæ materia *miasma*, sive *contagium* dici solet, sive etiam *materia maligna*. Sed *morbi maligni* nomine venit ille, cui vis contagii competit; sive in quo materia adest, cujus trans-

latione ad aliud subjectum, in hoc quoque similis morbus producit. *Morbus benignus* maligno opponitur. Quod vero ad *morbum contagiosum* attinet, per illum in specie intelligitur morbus malignus eminentioris gradus.

Consensus harum notionum cum usu loquendi evincetur in prælectionibus, simulque commonstrabitur modus, easdem rite applicandi.

§. LXXVIII.

Morbus malignus esse poterit modo chronicus, modo acutus (§§. XLVI & LXXVII.).

§. LXXIX.

Materia morbi contagiosi & majoris, & citioris efficaciae sit, oportet (§. LXXVII.).

§. LXXX.

Morbus malignus semper esse debet morbus fluidorum; morbus vero benignus est morbus modo solidorum, modo fluidorum (§§. XXIX & LXXVII).

§. LXXXI.

Qui itaque morborum malignitatem determinare audeat, illum cognoscere oportebit mixtionem fluidorum corporis humani, nec non mutationes, quæ materiae huic malignæ, in atmosphæra operanti, accidere possunt (§. LXXVII & LXXX.).

Quæ hic de morbis malignis prædicantur, illa instar notionum directricium habenda sunt.

Quibus jam si accessuræ sint de eodem morborum genere accuratæ observationes; nullum du-

bium erit, quin malignorum natura hoc modo penitus introspeciat, illorumque doctrina certissimis principiis innitatur. Quo facto, licebit tunc etiam morborum malignorum definitiones reales veri nominis conficere. Cujus rei documenta suo loco prostabunt.

§. LXXXII.

Si multitudinem ægrotantium, qui in certo quodam loco ut domi degunt, respicis, atque hi morbo ejusdem speciei decumbere a te observantur; tunc tibi ad id attendendum erit, an morbus, hominibus ex hac societate abortus, frequenter, vel raro iisdem accidere soleat, ideoque vel pro ordinario, vel extraordinario quodam malo, quod ipsis contingit, haberi debeat. Casu jam priore oborto, *morb*us adesse dicitur *endemicus*, sive *endemi*us; si autem casus posterior evenerit, *morb*us tunc vocari debet *epidemicus* vel *epidemi*us.

§. LXXXIII.

Morbi endemici & epidemici benigni, maligni acuti, chronici esse possunt (§§. XLVII. LXXVII & LXXXII.).

§. LXXXIV.

Deprehenditur non numquam morbus unius speciei in omnibus, vel saltem plerisque hominibus, qui, amplissimam quasi societatem constituentes, in certo quodam loco vivunt; quæcumque etiam alia ejusdem morbi relatio fuerit. Ejusmodi *morb*us *pandemi*us, sive *pandemicus* dici, eidemque *sporadicus* opponi solet.

§. LXXXV.

Morbus pandemius æque, ac sporadicus mox malignus, mox benignus esse poterit; itidemque vel acutus, vel chronicus (§§. XLVI. LXXVII & LXXXIV.).

§. LXXXVI.

Pro ratione differente, licebit etiam de morbo pandemio prædicare, quod ille simul esse possit vel endemius, vel epidemius (§§. LXXXII & LXXXIV.).

§. LXXXVII.

Nullum est dubium, quin ex morbo sporadico contagioso mox fieri possit morbus pandemius (§§. LXXIX & LXXXIV.).

§. LXXXVIII.

Per essentiam & naturam corporis humani fieri potest, ut in eodem morbi oriantur (§. III.). Pro ratione adeoque diversa, quæ in illius compositione obtinet; obtinebunt tunc quoque morbi diversi, primam quasi rationem sui agnoscentes in hac potius, quam alia corporis humani compositione.

§. LXXXIX.

Dantur morbi ætatum & sexus (§. antec.).

§. XC.

Probe attentis ad decursum vitæ humanæ observare licebit, hominem, nisi status corporis sui extraordinarie mutetur, a nativitate sua quoad

volumen & robur corporis crescere; in hoc statu per aliquod tempus perdurare; tandem decrefcere.

Ætates diverfæ a Pathologis referuntur ad rationes dividendi morbos. Neque carent utilitate fua, quæ inde proficifcuntur divifiones morborum; data imprimis opera, ut certiore alio indicio, quam numero annorum, de vera ætatis conditione conflct. Quapropter operæ pretium fore judicavimus, in §. fequente notiones aliquas exponere, easdemque firmitfimo fundamento, quod modo pofuimus, fupcrflruere.

§. XCI.

Ætas crefcens dicitur pars decurfus vitæ ab hujus initio ufque ad illud tempus, quo corpus quoad fuum volumen & robur augeri definit. *Ætas confiftens* eft pars decurfus vitæ a fine ætatis crefcentis ufque ad illud tempus, quo corpus quoad fuum volumen & robur imminui incipit. *Ætas decrefcens* eft pars decurfus vitæ a fine ætatis confiftentis ufque ad mortem.

Uterius adhuc dividi folent iftæ ætates, ita, ut inde jam proveniant nomina ætatis infantilis, puerilis, juvenilis, virilis, fenilis denique. Quid his vocabulis indicetur, mox innotefcet. *Ætas* nimirum *infantis* eft pars vitæ crefcentis a nativitate hominis ufque ad illud tempus, quo fonticulus coit. Quod ordinario fit circa annum feptimum. *Ætas puerilis* dicitur pars ætatis crefcentis a fine ætatis infantilis ufque ad illud tempus, quo in utroque fexu circa genitalia capilli emittuntur, vox gravior fit, & fexus amabilis fluxum menftruum experitur. Solet id fieri

circa annum decimum quartum, vel paulo post. Ad *etatem juvenilem* refertur pars ætatis crescentis a fine ætatis puerilis usque ad consistentem. Plerumque id fieri observatur in sexu potiore ab anno decimo quarto usque ad annum trigessimum; in sexu vero sequiore ab anno decimo quarto usque ad annum vigesimum primum. *Ætas* vero *virilis* erit ætas consistens sexus potioris, eo usque durans, donec externus habitus corporis obrigescere & membra immobilia fieri incipiant. Ordinatio id contingere solet intra annum trigessimum & sexagesimum. *Ætas* tandem *senilis* æstimatur ex inchoante ætate decrecente, ubi corpus magis magisque rigidum fit, illiusque continuatione usque ad obitum hominis. Ex singulis hisce notionibus haud obscure apparet, contineri in iisdem certiores notas, ad ætatem corporis dijudicandam, quam quæ ab annorum numero depromuntur. Quis enim ignorat, quod aliquis ob vitæ genus, vel alias causas admissas, citius senescat, qui ob exiguum annorum numerum ad ætatem vix incipientem virilem referendus foret. A quibus fallaciis te vero immunem reddent propositæ rationes in æstimandis ætatibus corporis humani. Videtur etiam natura hoc ipsum principium Pathologo digitis quasi commonstrare.

§. XCII.

Dantur itaque morbi infantum, puerorum, virginum, juvenum, virorum, maritorum & maritarum, tandemque senum (§§. LXXXIX & XCI.)

§. XCIII.

Neque minus ex §. LXXXVIII. colligere licebit, quod etiam dentur morbi hominum, certo vitæ

generi addictorum. Quorsum pertinent exempla opificum, militum, pluriuniusque aliorum.

§. XCIV.

Simili porro ratione ex §. LXXXVIII. conficitur, dari morbos temperamentorum; nec non subjectorum, quibus structura corporis vel a nativitate, vel deinde a causis aliis vitata est. Exemplo hominis, uno tantum brachio instructi, & sic in lucem editi, vel qui alio modo unius vel alterius membri jacturam fecit.

§. XCV.

Morbus recidivans, sive *recidivus* est morbus, qui post sui quidem solutionem factam, sanitate tamen nondum in integrum restituta, iterum redit.

§. XCVI.

Morbi recidivi notio requirit, ut in ægro pristinae speciei morbus prius plane intereat, antequam denuo revertatur; relictis interea prioris existentia suæ effectibus in corpore (§§. XLIV & anteced.).

§. XCVII.

Tametsi plures adhuc aliæ; præter expostas, morborum divisiones in scholis Pathologorum proferri solent; ab illis tamen consulto abstinemus, quia partim facile intelliguntur, auditis modo verbis; partim non tanti habendæ sunt, ut inde vera quædam utilitas ad ipsam doctrinam pathologicam redeat. Hinc contenti hætenus explica-

catis morborum notionibus, indeque deductis principiis quibusdam generalioribus, eodem animo in id solum intento, quod verum usum pollicetur, ad novum argumentum jam progredimur.

C A P U T III.

D E

CAUSSIS MORBORUM IN GENERE.

§. XCVIII.

Causa morbi est id, quod rationem morbi in se continet. *Causa morbi efficiens* dicitur id, cujus actio est ratio existentiae morbi. Si hæc ratio fuerit sufficiens, tunc etiam *causa morbi efficiens* erit *sufficiens*,

§. XCIX.

Ex §. antecedente jam sequitur, necesse esse, ut inquirentem in causas morbi efficientes sufficientes demonstrare oporteat, in illo contineri rationem sufficientem, quod pro causa morbi habetur, cur morbus existentiam sui consequatur.

§. C.

Similiter ex eodem §. XCVIII. liquet, causam efficientem sufficientem morbi semper esse ens quoddam in concreto; rationem vero sufficientem morbi ens aliquod in abstracto.

§. CI.

Constabit suo loco, multoties fieri, ut ad unius morbi in casu obvio productionem plures causæ concurrant. Quod quando fit, *morbi* tum *con-*
causas adesse dicimus, easque *efficientes*.

§. CII.

Quod si tibi in serie causarum morbi efficientium contingere videatur, ut morbus inde productus & effectus sit, & simul vim habeat causæ efficientis ratione morbi alterius; atque hic iterum in causam efficientem degeneret novi morbi; tunc facile animum tuum subibit notio differentiae illius, quæ intercedit inter *causas morborum efficientes* tam *proximas*, quam *remotas*.

§. CIII.

Causæ morborum latere putantur vel in corporibus, quibus materia certarum qualitatum assignatur, vel in rebus aliis, ad corporum indolem non pertinentibus, sive immaterialibus. Ratione hujus momenti *causæ morborum* dividantur in *materiales* & *imateriales*.

§. CIV.

Causæ morborum sunt vel partes essentielles corporis humani, vel minus. Si prius, tunc erunt vel solidæ, organisatæ cum reliquis partibus, ad organisationem totius corporis pertinentibus, connexæ, vel fluidæ intra systema arteriosum & venosum contentæ, atque in motu progressivo constitutæ. Si posterius, erunt vel producta

ab actione corporis humani, vel non. Si fuerint producta ab actione corporis humani; erunt vel contenta adhuc in eodem, vel magis non continebuntur ibidem. *Causa morbi interna* est vel pars corporis humani essentialis, vel productum ab actione corporis, sed in eodem adhuc contentum. *Causa* vero morbi *externa* erit, quæ neque ad partes essentielles corporis humani, neque ad ejus productum, in eodem contentum, referri poterit,

Harum notionum consensus cum usu loquendi in prælectionibus probabitur. Sed ibidem quoque indicabuntur simul rationes, cæter hic omittantur multa alia vocabula; quibus plerique Pathologi in distinguendis morborum causis uti solent. Talia exempli loco sunt, causæ procatacricæ, prægumenæ, continentes, prædisponentes, occasionales, & id genus plura.

§. CV.

Si pars quædam essentialis corporis humani causam morbi internam constituit; sequitur, ut huic ipsi parti inhæreat morbus, qui rationem sufficientem habebit morbi, ab hac causa dependentis (§. II.).

§. CVI.

Causa morbi symptomati erit pars quædam essentialis corporis humani (§§. XXXII. & ant.)

§. CVII.

Causa morbi idiopathici non erit pars quædam essentialis corporis humani (§. XXXII & CV.).

§. CVIII.

Causa morbi interna semper quærenda erit in corpore (§. CIV.).

§. CIX.

Quia vero causa morbi externa & in corpore, & extra illud esse potest, illam ergo quærere oportebit modo in corpore, modo extra corpus humanum (§. CIV.).

§. CX.

Si causa quædam morbi externa, corpori inexistens ita mutatur, ut inde novum productum oriatur; hoc productum quatenus est mutatum a corpore, spectari debet ut causa interna, quatenus vero non est mutatum, ut causa externa (§. CIV.).

§. CXI.

Actio in distans appellari solet, quæ sine contactu corporum fieri posse concipitur.

§. CXII.

Causa externa morbi materialis in distans agendo morbum producere nequit (§. CXI.).

§. CXIII.

Qui itaque ostendere contendit, corpus quoddam esse causam morbi externam; illum oportet commonstrare, istud corpus partem corporis humani contigisse, in qua morbus producitur; quocumque etiam modo contactus iste factus sit (§. anteced.).

§. CXIV.

Qui morbum a causa externa immateriali profectum esse ostendere conatur; illius erit, præ-

sentiam ejusmodi entis immaterialis, ut spiritus; hujusque talem determinationem evincere, quæ morbi rationem sufficientem suppeditare possit (§§. XCIX & CIII.).

§. CXV.

Ad propositionem antecedentem demonstrandam requiritur, ut evincatur, quod contradictorium sit, morbum in casu obvio a causa materiali esse profectum; quod spiritui in genere competat potentia motum in corpore producendi. Unde colligere licet, quam difficulter hæc probari possint, quum imprimis rerum materialium effectus sæpius abstrusissimi sint!

§. CXVI.

Si anima causa morbi foret, illa non nisi externa erit (§. CIV.), & quidem corpori inexistent. Quamvis igitur præsentia animæ in dubium vocari nequeat; hic tamen non deficiet illa difficultas, quæ ad §. anteced. exponitur.

§. CXVII.

Si ea jam consideras, quæ in scriptis auctorum de magia & incantationibus, tamquam causis morborum possibilibus, traduntur, hæc omnia eo redeunt, ut causæ horum morborum concipiantur esse vel materiales externæ, in distans agentes; vel immateriales, quæ neque Deus, neque anima ægrotantis sunt, sed aliud spirituum genus. Ad primum quod attinet; illud repugnat propo-

tioni §. CXII. Sed neque alterum destituitur difficultate demonstrandi (§. CXV.).

§. CXVIII.

Quamvis etiam causæ morborum immateriales existerent; ex illarum tamen indagatione Pathologus medicus non adeo insignem usum perciperet. Sed secus se habet cum indagatione causarum morbi materialium.

§. CXIX.

Hinc anima, ceu causa morbi, non adeo sollicitè consideranda erit (§. anteced.). Unde simul patet, quam parum commodi sperandum sit Pathologo ex systematibus explicandi commercium animæ & corporis.

§. CXX.

Omnis causa morbi in corpus agens, est causa efficiens sufficiens morbi, per eandem possibilis. Posita ergo ejusmodi causa, poni quoque debet morbus (§. XCVIII.).

§. CXXI.

Omnis igitur causa morbi proxima efficiens erit causa efficiens sufficiens morbi (§. CII.).

§. CXXII.

Quare etiam omnis concausa morbi efficiens proxima erit causa efficiens sufficiens morbi, per eandem possibilis (§§. CI. & ant.).

§. CXXIII.

Omnis causa proxima morbi, quæ est pars essentialis corporis humani, non nisi morbum symptomaticum producit. Sed omnis causa proxima morbi, quæ non est pars essentialis corporis humani, non nisi morbum idiopathicum parit (§§. CVI. & CVII.).

§. CXXIV.

Causa morbi, quæ non est pars essentialis corporis humani, causa morbi symptomatici proxima esse nequit, quamvis remota (§§. CII & ant.).

§. CXXV.

Duæ vel plures concausæ proximæ morbi, quæ non sunt partes essentielles corporis humani, eundem morbum idiopathicum producere possunt. Atque hoc quando contingit, tum quælibet concausa erit causa efficiens sufficiens morbi; vel quod idem est, quælibet concausa per se sufficeret, ad morbum huncce producendum (§§. CXXII & CXXIII.).

§. CXXVI.

Si duæ vel plures concausæ morbi proximæ, quæ non sunt partes corporis humani essentielles, eundem morbum idiopathicum producant; iste morbus major erit morbo idiopathico, qui tantummodo ab una causa dependeret (§. CXXII.).

§. CXXVII.

Duæ vel plures concausæ morbi, siue illæ fuerint internæ, siue externæ, siue ex utrisque

compositæ, adeoque mixtæ, causæ remotæ unius morbi symptomatici esse possunt. Atque idem valet, si hæ concausæ remotæ unum modo morbum idiopathicum producant, si plures (§. CII.).

§. CXXVIII.

Duæ vel plures concausæ, quæ partes corporis humani essentielles sunt, causæ proximæ ejusdem morbi symptomatici esse possunt. Et si hoc contingit, tunc quælibet earum erit causa sufficiens, ad symptoma hocce producendum (§. CXXII.).

§. CXXIX.

Duæ vel plures concausæ, quæ partes corporis humani essentielles sunt, causæ remotæ ejusdem morbi symptomatici esse possunt (§. CII.).

§. CXXX.

Si morbus quidam concausas duas habuerit, unam scilicet, quæ pars est corporis humani essentialis; alteram vero, quæ talis non est, ejusmodi morbus erit, respectu prioris causæ, morbus symptomaticus; respectu autem posterioris, morbus idiopathicus (§§. CXXIII & CXXIV.).

§. CXXXI.

Quando ex morbo symptomatico idiopathicus fit, tum necesse est, ut priore causa proxima, quæ pars erat corporis humani essentialis, jam extincta, ille incipiat habere causam proximam,

quæ non est pars essentialis corporis humani, adeoque vel causa quædam externa, vel productum corporis humani (§§. CXXIII & CXXIV.).

§. CXXXII.

Morbus complicatus duas vel plures concausas proximas, quæ non sunt partes corporis humani essentielles, habeat necesse est, & quarum quælibet diversum morbum idiopathicum producit. Quo simul pluralitas concausarum circa quemlibet morbum idiopathicum diversum in complicatione non excluditur (§§. XXXVII & CXXIII.).

§. CXXXIII.

Omnis morbus causam aliquam sibi præsentem requirit; quamvis causarum vicissitudines fieri possint (§. XCVIII.).

§. CXXXIV.

Morbo sublato, ejus causa nunquam superstes esse potest; & morbi causa sublata, morbus etiam tollitur, qui per eandem erat possibilis (§. anteced.).

§. CXXXV.

Omnis dispositio ad morbum morbus erit qui cum aliis causis simul accedentibus rationem sufficientem in se continebit, cur alius morbus ad actum deveniat (§. XLIX.).

§. CXXXVI.

Morbi maligni & benigni oriuntur a causa modo interna, modo externa (§§. LXXVII & CIV.).

§. CXXXVII.

§. CXXXVII.

Morbi maligni supponunt corruptam mixtionem fluidorum (§. LXXXI.)

§. CXXXVIII.

Si morbus malignus a causa externa oritur: particulæ, quæ corpus ingrediuntur, mixtionem depravare debent (§. anteced.)

§. CXXXIX.

Morbi benigni fluidorum in malignos degenerare possunt (§§. LXXX & CXXXVII.)

§. CXL.

Morbi endemici & epidemici a causa tam interna, quam externa oriuntur. Atque idem quoque de morbo pandemio & sporadico prædicare licebit (§§. LXXXII. LXXXIV & CIV.)

§. CXLI.

Circulus caussarum internarum morbi est ille status internus corporis humani, cujus causæ non nisi internæ sunt, a se invicem dependentes; vel est ille status internus corporis humani, ubi in morbo composito non datur simplex, qui non determinetur ab alio.

§. CXLII.

Circulus caussarum internarum morbi nullam contradictionem involvit (§. anteced.)

§. CXLIII.

Si de morbo periodico probari potest, eundem non existere ob causam quamdam externam: tunc necesse erit, ut ille existat ob circulum causarum internarum morbi (§§. LXXIV & CXLI.)

§. CXLIV.

Causæ morbi externæ & internæ, quæ productum quoddam corporis humani sunt, circulum causarum internarum morbi mutare possunt (§. CXLI.)

§. CXLV.

Hinc necesse erit, ut ex morbo periodico erraticus fiat (§. anteced.)

§. CXLVI.

Morbi ætatum, nec non illorum hominum, qui singulari vitæ genere gaudent, aut quibus jam a nativitate, vel deinceps ex aliis causis externis structura corporis vitiata est, erunt vel dispositiones ad morbos, vel morbi quidam peculiare, ad quos producendos concurrebant dispositiones morborum.

§. CXLVII.

Non datur corpus humanum vivum, quod per eminentiam sanum esse dici posset (§. anteced.)

§. CXLVIII.

Sæpius experientia docuit, rerum sex non naturalium incongruo usu admissis, varios in corpore

humano morbos suboriri. Hinc non immerito res istæ ad causas morborum a Medicis referuntur. Quod jam longo abhinc tempore factum est, & quidem ita, ut putaretur, in hoc numero sexenario omnes morborum causas possibiles contineri. Pertinent vero ad res sex non naturales aer, cibus & potus, motus & quies, somnus & vigiliæ, excreta & retenta, tandemque pathemata animi.

§. CXLIX.

Exponendum jam erit, ad quod causarum genus commode reduci possint res sex non naturales, quibus morbos efficiendi potentia quædam attribuitur. Ne hic vero vocabula quædam ambiguitati ansam præbere videantur, conveniet eadem definitione prius explicare. Ad *cibum* nempe & *potum* referuntur quæcumque solida & fluida assumpta, quæ conficiendo chylo & nutritioni corporis inserviunt. *Motus* vero hic non alius intelligitur, quam voluntarius. Atque huic jam opponitur *quies*, quæ ideo motus voluntarii absentia erit. *Excreta* hoc loco dicuntur contenta intra corpus humanum, quatenus vero extra illud ejiciuntur. *Retenta* vero erunt, quæ extra corpus humanum non ejiciuntur.

§. CL.

Aer, quatenus superficiem corporis ambit, si est causa morbi, erit externa; quatenus in mixture fluidorum continetur, interna erit, & quidem pars essentialis corporis humani; quatenus vero faucibus, oesophago, ventriculo, intestinis, pul-

monibus inest, ibique mutatur, vel si ex mixtione fluidorum secedit (ubi aer factitius dicitur), pro corporis humani producto, adeoque etiam causa interna morbi haberi poterit (§. CIV.)

§. CLI.

Si cibus & potus causæ morborum fiunt: quatenus corpori ingeruntur, erunt morborum causæ externæ; ad internas vero referri poterunt, quando jam mutantur actione corporis (§. CIV.)

§. CLII.

Reliqua, quæ in corpus feruntur per tubum cibarium, si non mutantur, esse poterunt causæ morborum externæ; internæ vero, si mutantur (§. CIV.)

§. CLIII.

Motus & quies rationem sufficientem morbi constituere possunt; causa vero efficiens sufficiens erit pars corporis humani, & anima causa apparens remota (§§. C. & CII.)

§. CLIV.

Si somnus & vigiliæ ab arbitrio animæ pendent, atque ad morborum causas referri possunt; tunc de illis idem quoque valebit, quod jam in §. anteced. de motu & quiete præceptum erat.

§. CLV.

Si ad morborum causas excreta pertinent; illa non nisi causæ externæ dici poterunt. Quod

Si vero de retentis prædicare liceat, quod illa sint vel partes essentielles corporis humani, vel hujus producta, simulque habeant vim morbos producendi; illa tunc morborum causis internis accendenda erunt. Quandoquidem vero contingit, ut retenta neque ad partes essentielles corporis humani, neque ad ejus producta reduci possint. Quæ ideo ad morborum causas externas spectabunt (§. CIV.).

§. CLVI.

Si pathemata animi rationem sufficientem morbi in se continerent, anima tunc foret morbi producti causa, eaque externa (§. CXVI.).

§. CLVII.

Ex eo, quod pathema aliquod animi admissum est, Pathologo ad illam mutationem tuto colligere licebit, quæ ordinario in corpore tunc subsequi solet; nisi aliæ causæ adfuerint, hanc mutationem impredientes (§. CXX.).

§. CLVIII.

Tantum vero abest, ut sub numero rerum sex non-naturalium omnes, quæ existere possunt, morborum causæ comprehendantur, ut potius aliæ adhuc dentur, quas ibidem referre non licebit. Loco exempli inter alia hic pertinebunt illa corpora naturalia, quæ, quamvis a numero illo senario rerum non-naturalium aliena sint; morbos tamen in corpore humano producere possunt; id locente experientia, fidissima illa veritatis magistra. De ista causarum multitudine & varietate in con-

citandis morbis infra ex observationibus constabit quam luculentissime.

§. CLIX.

Dantur causæ morborum, quæ in sensus nec Medici, nec ægri, nec adstantium cadunt. Cujus rei exemplum præbent complures casus inopinati, quos inter homines accidisse experientia docuit. Quando quis scilicet bona valetudine gaudens e domo egreditur, mox vero apoplecticus in platea fit; deficientibus causis manifestis, quas æger sive domi, sive foras admisisset. Vel si quis bene valere atque animo hilari esse videtur, mox epulis accumbens inter jocos amicorum tantopere convellitur, ut de sella subito in terram procidat, tristissimo præsentium spectaculo! Hujus loci quoque forent exempla hystericarum, quibus non numquam casus præter omnem expectationem oboriri solent, admiratione dignissimi.

§. CLX.

Quoniam a Pathologo in genere requiritur ut rationem reddat sufficientem, cur morbi ad existentiam veniant; illumque ideo oporteat causas morborum efficientes sufficientes, pro conditione casus oborti, invenire (§. VI.): nemo non videt, omnem ipsi operam dandam esse, ut sibi etiam prospiciat de illis subsidiis, quæ multum facere possunt ad citiorem inventionem ejusmodi causarum absconditarum morbi. Quibus subsidiis annumerari imprimis merentur.

I. Physica ad corpus humanum applicata, decensque earum rerum naturalium cognitio, quæ in nexum aliquem cum corpore humano veniunt.

II. Multiplices observationes circa ordinarium in corpore humano.

III. Accurata collectio signorum morbi & causæ morbi.

§. CLXI.

Unde jam patet, necesse esse, ut hic omnibus numeris absoluta sit cognitio historica subiecti morborum, ad historiam morbi contexendam (§. XVI.).

§. CLXII.

Prolatis hucusque præcipuis momentis, quæ ad morborum causas, harumque divisiones & mutuas ad se relationes spectabant, id adhuc restare videtur, ut hic quoque de harum causarum modo agendi, sive virium conditionibus simul agatur. Verum enim vero quum id sine multiplicium observationum ope perfici nequeat; consultum fore judicavimus, hanc doctrinam ad ea capita reservare, in quibus de morborum generibus & speciebus sermo erit.



CAPUT IV.

DE

MORBORUM HORUMQUE CAUS- SARUM SIGNIS IN GENERE.

§. CLXIII.

Omne id, quod in corpore humano deprehenditur, ex quo tibi colligere licebit, morbum vel adesse, vel adfuisse, vel futurum esse, *signum morbi* appellatur. Unde vero conficitur ad causam morbi sive præsentem, sive præteritam, sive futuram, id necessario *signum causæ morbi* erit. Quod tandem per signum in genere indicatur, *signatum* dici solet. Quare jam patet, signorum morbi hujusque causæ non aliud signatum fore, quam morbum ipsum & hujus causam.

§. CLXIV.

Signum in genere dicitur *naturale* esse, cujus significatus ratio sita est in ipsa rei essentia & natura. Cui jam opponitur *signum artificiale*, utpote cujus significatus nullam aliam rationem agnoscit, præter arbitrium entis cujusdam intelligentis.

§. CLXV.

Signa morborum horumque causarum, quæ in Pathologia indicare convenit, non nisi signa naturalia erunt (§§. III. X & anteced.).

§. CLXVI.

Signa morbi probe distinguenda sunt a signis causæ morbi (§. XXV.).

§. CLXVII.

Signum morbi, cujus signatum præsens est, dicitur esse *demonstrativum*, five *diagnosticum*, five simpliciter *signum pathognomicum*. Signum vero *prognosticum morbi* vocatur, cujus signatum futurum est. Tandem *signum morbi recordativum*, five *memoriale*, five *rememorativum*, five *anamnesticum* illud vocatur, cujus signatum præteritum est.

§. CLXVIII.

Signum commune morbi, vel *causæ morbi* illud erit, quod pluribus morbis, vel pluribus causis morborum competit. Signum vero *proprium morbi*, vel *causæ morbi* illud dicendum erit, quod certo solum morbo, vel certæ causæ morbi competit. Signum proprium morbi appellari etiam solet simpliciter *signum pathognomonicum*.

§. CLXIX.

Signum sufficiens morbi, vel *causæ morbi* est signum, cujus ope certum morbum, vel certam morbi causam ab aliis distinguere licet. E contraria parte *signum insufficiens morbi*, vel *causæ morbi* dicitur, cujus beneficio mihi non licebit certum morbum, aut ejus causam certam ab aliis discernere.

§. CLXX.

Si quædam per rerum naturam vel coexistunt, vel se invicem sequuntur, eorum unum alterius signum est.

§. CLXXI.

Propositio ontologica ad §. anteced. enuntiata applicari quoque poterit ad signa caussarum morbi & signa morborum; exemplo pathematis animi, quod signum esse poterit morbi, qui cum eo coexistere, vel illud sequi observatur.

§. CLXXII.

Si etiam quædam a communibus caussis dependent, eorum unum alterius signum esse poterit.

§. CLXXIII.

Ne hoc quidem principium ontologicum, quod in §. anteced. continetur, usu caret in evolvendis morborum horumque caussarum signis.

§. CLXXIV.

Causæ efficientes sufficientes morbi & effectus perceptibiles sunt signa morbi (§. CLXIII.). Si causa; illa erit vel externa, vel interna. Si effectus; ille erit vel morbus symptomaticus, vel productum corporis humani, ibidem ob morbum ortum. Atque hoc si factum fuerit; tunc ejusmodi productum erit vel retentum, vel excretum.

§. CLXXV.

Signum causæ efficientis sufficientis morbi esse poterit morbus ipse cum causâ remotiore (§. CLXIII.).

§ CLXXVI.

Signum commune cujusdam morbi, vel causæ morbi est signum insufficiens (§§. CLXVIII & CLXIX.).

§. CLXXVII.

Si quis morbus signa habeat communia, quorum aliud cum hoc, aliud cum alio morbo commune est; atque hæc signa communia in hoc tantum, nec in quocumque alio morbo simul existant: necesse tunc erit, ut signa hæc communia simul sumpta fiant signa sufficientia, ad hunc potius, quam alium morbum dignoscendum. Id quod etiam de causis morbi valebit (§§. CLXVIII & CLXIX.).

§. CLXXVIII.

Omne signum proprium morbi, vel causæ morbi erit signum sufficiens (§§. CLXVIII. & CLXIX.).

§. CLXXIX.

In Pathologia pragmatica non nisi signa morbi, vel ejus causæ sufficientia eruenda sunt (§. CLXIX.).

§. CLXXX.

Quando igitur signa communia morbi, vel causæ morbi sufficientibus æquivalent (§. CLXXVII):

inutile tunc foret, in signa propria inquirere (§. anteced.).

§. CLXXXI.

Morbus symptomaticus, qui deprehenditur, signum morbi alterius est, qui prioris rationem sufficientem in se continet (§§. XXXIII & CLXXIV.).

§. CLXXXII.

Causa morbi externa & productum corporis humani, in eodem adhuc contentum, signa morbi idiopathici suppeditare poterunt (§§. CLXIII & CLXXIV.).

§. CLXXXIII.

In Pathologia tradenda veniunt signa pathognomica, prognostica, anamnestica (§§. X & CLXVII.).

Curabimus id æque, atque omne aliud efficere, quod modo Pathologia pragmatica, ad compendium collata, postulare videtur; ubi partim ad usum, qui inde ad medicinam practicam redit, partim vero ad brevitatem respicitur.

Prolegomenorum Pathologiæ

F I N I S.

LIBER PRIMUS

DE

MORBIS SIMPLICIBUS.

SECTIO PRIMA

DE

MORBIS SOLIDORUM SIMPLICIBUS.

CAPUT I.

DE

MORBIS SOLIDORUM
SIMPLICIBUS IN GENERE.

§. I.

Elementum partis solidæ corporis humani
dicitur particula minima mixti, ex quo
partes organicæ componuntur.

§. II.

Elementa solidorum corporis humani inter se
cohærent ob motum intestinum partium miscibi-
lium, ex quibus constant.

§. III.

Caussæ cohæſionis elementorum erunt elementa ad se invicem relata ; rationem autem sufficientem constituet motus intestinus cujuslibet elementi, quatenus idem causa est (§. ant.).

§. IV.

Posita certa mixtione solidorum corporis humani, ponuntur quoque certi cohæſionis gradus, per eandem mixtionem possibiles (§. II.).

§. V.

Cornu cervi ficcissimum, aut aliud os ejusdem conditionis, ante sui calcinationem plenariam multum aquæ demittit.

§. VI.

In elementis solidorum aqua immixta est (§. anteced.).

§. VII.

Ossa in machina Papiniana, affusa iisdem aqua, in gelatinam abeunt, quæ refrigerata ficcitatem aliquam præ se fert, flexilis apparet, magisque exficcata, dura & friabilis fit. Gypsum calcinatum friabile cum certa aquæ quantitate in lapideum concrementum transit. Si vero aquæ proportio modum exceſſerit, gypsum fit fluidum.

§. VIII.

Certa aquæ proportio respectu reliquorum miscibilium in elementorum partium solidarum mixtione necessaria erit, ne sint friabiles & fluidæ.

Adeoque inter hos limites diversæ aquæ quantitates possibiles erunt (§. anteced.).

§. IX.

Quare quantitates cohæſionum in elementis, ab eorum mixtione pendentes, se habebunt in ratione inversa quantitatum aquæ (§. anteced.).

§. X.

Possibilis est major, vel minor quantitas aquæ immixtæ elementis solidorum, quam quæ ad sanitatem eorundem cohæſionem requiritur [§. VIII.].

§. XI.

Siccitas elementorum in solidis corporis humani est minor aquæ quantitas, quæ in illorum mixtione, tamen sine friabilitate, continetur, quam quæ necessaria est ad sanitatem.

§. XII.

Humiditas elementorum in solidis corporis humani est major quantitas aquæ, quæ in illorum mixtione, sed sine fluiditate, continetur, quam quæ ad sanitatem requiritur.

§. XIII.

Siccitas & humiditas elementorum partium solidarum morbi sunt [§§. XI & XII.].

§. XIV.

Morbi elementares partium solidarum corporis humani possibiles sunt [§. anteced.].

§. XV.

Causa siccitatis & humiditatis elementorum proxima est fluidum corporis humani nutriens, quod tale; & mixtio hujus fluidi erit ratio sufficienter dictorum morborum [§. X.].

§. XVI.

Possibilis erit elementorum in solidis corporis humani cohesio vel major, vel minor illa, quae ad statum sanitatis requiritur.

§. XVII.

Rigiditas majoris gradus cohesione elementorum in parte solida absolvitur, quam cum sanitate convenit.

§. XVIII.

Rigiditas solidorum erit morbus [§. anteced.].

§. XIX.

Rigiditatis solidorum causa proxima ad ipsa elementa in solidis redit, quatenus mixta in hoc casu [§. IX.].

§. XX.

Debilitas solidorum est cohesio elementorum partium solidarum corporis humani sana minor.

§. XXI.

Debilitas solidorum est morbus [§. anteced.].

§. XXI.

§. XXII.

Causa debilitatis proxima erunt elementa, quatenus mixta in hocce casu. Hinc duplici modo ista causa concipi poterit. Vel aquæ major defectus in elementis hic aderit, quam qui in rigiditate obtinet; vel aqua ibidem multo magis abundabit, quam opus est ad sanitatem. Nam in utroque casu elementa partium solidarum corporis humani minorem inter se habebunt cohæsionem (§. X.).

§. XXIII.

Simili etiam ratione fieri potest, ut cohæsiō inter elementa partis solidæ corporis humani plenarie tollatur.

§. XXIV.

Solutio continui est cohæsiōis elementorum partis solidæ corporis humani plenaria sublatio.

§. XXV.

Solutio continui est morbus, cujus causa esse poterit tam interna, quam externa; prout sequentia docebunt.

§. XXVI.

Putrefactio partium solidarum est solutio continui, quæ fit per putrefactionem elementorum; sive quæ tali motu intestino in elementis perficitur, qualis in massis putrescentibus adest.

§. XXVII.

Causa putrefactionis proxima esse potest materia putrescens parti solidæ contigua, ut motum suum putrefactorium ibidem concitare possit. Atque hæc materia erit vel productum corporis

humani , vel corpus aliquod , quod agit ut causa externa.

§. XXVIII.

Ambustio partium solidarum est solutio continui , per motum igneum in elementis facta.

§. XXIX.

Causa ambustionis est omne corpus , in motu igneo constitutum , quod partes solidas contingit.

§. XXX.

Arrosio partium solidarum est solutio continui , quæ ibidem a salibus , ad elementorum mixtionem non pertinentibus , perficitur.

§. XXXI.

Causa proxima arrosionis latebit in salibus , ratione elementorum vim menstruam habentibus , illisque contiguis ; sive illi agant ut causa externa , sive interna.

§. XXXII.

Datur adhuc alia species solutionis continui partium solidarum , quæ non conjuncta est cum elementorum mutata mixtione. Cujus causa esse potest tam externa , quam interna , pro ratione partium.

§. XXXIII.

Fieri potest , ut partes solidæ situm suum ita mutant , ut inde oriatur dissensus functionum corporis humani ratione conservationis suæ.

§. XXXIV.

Dislocatio est talis partium solidarum situs, qui connectitur cum dissensu functionum corporis humani respectu conservationis suæ.

§. XXXV.

Dislocatio itaque morbus erit [§. anteced.].

§. XXXVI.

Causa dislocationis esse potest modo externa, modo interna.

§. XXXVII.

Contingere potest, ut partes solidæ organicæ in corpore humano oriantur, quæ prorsus abesse deberent a statu sanitatis. Quibus jam ortis, oritur morbus partium solidarum, cum quibus organisatione sua connectuntur ejusmodi partes abundantes. Ad causam vero morbi hujus proximam quod attinet; illa sita erit in parte solida organica, ex quibus modo dictæ partes ortæ sunt.

§. XXXVIII.

Sed fieri etiam potest, ut quædam partes solidæ in corpore humano deficient, quarum præsentiam requirebat sanitas. Talis partium defectus morbus erit, cujus causa tam interna, quam externa esse poterit.

§. XXXIX.

Quandoquidem accidit, ut pars quædam solida citius & plus increascit, quam opus est ad

sanitatem. Aderit tunc morbus, qui pro sua causa proxima fluidum nutriens agnoscit, quod nimium affluit ad partes istas augendas. Ob rem similitudinem hic quoque ille casus pertinebit, quando nimirum partes solidæ a varietate & copia materiarum, ibidem contentarum, ad iustum majus volumen perducuntur. Oriuntur inde tumorum nomina varia.

§. XL.

E contrario etiam fieri poterit, ut uni vel alteri parti solidæ corporis humani illud augmentum deficiat, quod in statu sanitatis adesse deberet. Ejusmodi quid pro morbo habendum erit, cujus causa proxima ad omne id redibit, quod vasorum in istis partibus solidis permeabilitatem lædit.

§. XLI.

Morborum, qui ad partes solidas referri solent, generibus hucusque explicatis, ad species jam progredimur; id negotium sequenti ordine expedituri.

CAPUT II.

DE

MORBIS OSSIUM SIMPLICIBUS.

§. XLII.

DE rigiditate & debilitate ossium idem valet, quod in §§. XVII. XIX. XX & XXII. in genere dictum est.

§. XLIII.

Fragilitas ossis est illius debilitas, ob defectum quæ in elementis orta.

§. XLIV.

Mollities ossis dicitur illa debilitas ossis, quæ ab abundantia aquæ in ejusdem elementis dependet.

§. XLV.

De putrefactione, ambustione & arrosione ossis dem quoque valebit, quod jam in §§. XXVI-XXXI. generatim propositum erat.

§. XLVI.

Caries ossis dicitur putrefactio ossis, ab illius superficie externa incipiens.

§. XLVII.

Causa cariei esse potest materia quæcumque putrescens, contigua cum ossis superficie externa; sive illa spectetur ut causa externa, sive interna, exemplo fluidi extravasati putrescentis, vel partis solidæ cum fluido contento in putredinem fluentis.

§. XLVIII.

Spina ventosa appellatur putrefactio ossis, incipiens ab ejusdem superficie interna.

§. XLIX.

Spinæ ventosæ causa sita erit in materia quam putrida, quæ ad superficiem ossis internam continetur.

§. L.

Spina ventosæ tres gradus numerari solent. Primus nimirum gradus tunc adesse dicitur, quando superficies externa ossis adhuc integra est. Secundus vero gradus æstimatur ex tumore ossis. Tertius denique gradus ex putrefactione ossis, quæ jam ad illius superficiem externam pervenit, dijudicatur.

§. LI.

Ex §§. XLIX. & L. haud difficulter colligere licebit, quo nimirum modo causæ concipiendæ sint, a quibus hæc graduum diversitas in spina ventosa proveniat.

§. LII.

Fractura ossis est illius solutio continui, quæ sine elementorum ossis mutata mixtione contingit.

§. LIII.

Fissura est talis solutio continui in osse, quæ sine illius elementorum mixtione mutata ita fit, ut particulis ossis soluti adhuc attribui possit co-hæsiio quædam.

§. LIV.

Causa fracturæ & fissuræ externa erit, instar vis cujusdam intensioris concipienda.

§. LV.

Pro ratione solutionis continui, quæ simul in partibus mollibus, flexilibus, ossibusque fractis

vel fissis superstratis, modo oboritur, modo non: *fracturae & fissurae* erunt modo *complicatae*, modo *simplices*.

§. LVI.

Luxatio est dislocatio ossis respectu suæ articulationis.

§. LVII.

Causa luxationis esse potest externa, quæ vi quadam os cogit in situm incongruum. Neque vero causæ internæ hic deficiunt. Ligamentis enim, quæ os in articulo continent, vel debilitatis, vel solutis; vel illorum uno debilitato, altero ad rigiditatem perducto; vel musculorum motorum partium luxatarum actione supra modum intensa; luxatio necessario eveniat, oportebit. Pertinent hic etiam capitis ossis tumor, excrescentiæ in articulorum locis, atque aliæ materiæ ibidem præsentis.

§. LVIII.

Luxationes dividi solent in *completas*, sive *totales*, sive *perfectas*, & *incompletas*, sive *partiales*, sive *imperfectas*. *Completæ* nimirum dicuntur *luxationes* esse, quando caput ossis luxati ex acetabulo suo prorsus prolabitur. Quum e contrario in *luxationibus incompletis*, quas etiam *subluxationes*, sive *distorsiones* vocare solent, pars aliqua capitis ossis inter acetabulum suum adhuc hæreat.

§. LIX.

Gibbus dorsi est luxatio vertebrarum dorsi.

§. LX.

Quod si etiam os aliquod ita incurvatur, ut hæc incurvatio perfectioni corporis admodum contraria fiat; tunc morbus iste species erit dislocationis.

§. LXI.

Gibbus pectoris est dislocatio ossis sterni, quæ consistit in ejus incurvatione.

§. LXII.

Ossis incurvati causæ esse poterunt modo externæ, modo internæ, vi paulo majore agentes; concurrente imprimis ossis incurvandi mollitie.

§. LXIII.

Superossatio est illa affectio ossis, ubi pars sibi similis excrescit, quæ abesse deberet in statu sanitatis.

§. LXIV.

Causa superossationis consistit in copiosiori fluidi nutrientis affluxu, facto ad ea præsertim loca ossis, ubi solutio continui exstiterat.

§. XLV.

Fieri potest, ut ossa vel majus, vel minus incrementum capiant, quam ad hominis statum sanitatis requiritur. Talis ossium conditio morbus erit, de cujus causa idem notari poterit, quod in §§. XXXIX & XL. docetur.

§. LXVI.

Rhachitis est morbus, cujus præsentia exinde cognoscitur, quando in homine ossa quædam magis, alia vero minus increvissè, subluxata tandem & incurvata esse deprehenduntur.

§. LXVII.

Causa rhachitidis proxima ad ea reducitur, quæ in §§. LVI. LVII. LVIII. LXII & LXV. proponuntur.

CAPUT III.

DE

MORBIS SIMPLICIBUS CARTILAGINUM.

§. LXVIII.

DE rigiditate & debilitate cartilaginum idem valet, quod dictum est in §§. XVII. XIX. XX & XXII,

§. LXIX.

Ossificatio cartilaginis est illius tanta rigiditas, ut inflexilitati ossium æquipolleat.

§. LXX.

Quæ de ossium mollitie in §. XLIV. prædicantur, ea quoque de cartilaginum mollitie valebunt.

§. LXXI.

De solutione cartilaginum tam in genere, quam in specie de illarum ambustione, arrosione, putrefactione, sive hæc a parte interna, sive a superficie externa incipiat, nec non de earundem solutione, quæ non a mixtionis vitio dependet, omnia quoque affirmare conveniet, quæ de eodem argumento supra jam exposita erant (§§. XXIV. - XXXII.).

§. LXXII.

De cartilaginum dislocatione in genere idem quoque tenendum erit, quod in §. XXXIII. præcipitur. Ad illius vero causam quod attinet; hæc esse poterit vel externa violenta, vel interna, ut os dislocatum. Cui adhuc accedit, quod cartilago, quæ mobilis suspensa tenetur a ligamentis, situm suum mutare possit; ligamentis istis debilitate aut rigiditate affectis.

§. LXXIII.

De majori vel minori incremento cartilaginum hominis sanitati contrario, constare quoque poterit ex §§. XXXIX & XL.

§. LXXIV.

Cartilaginum tumores sui causam admittunt modo vasorum suorum nimias repletiones, sive alias materias, ibidem abundantes.

§. LXXV.

Excrementia cartilaginis est pars ejus abundans, quæ deficere deberet in statu sanitatis. Cujus morbi causa liquida esse poterit ex §. XXXVII.

CAPUT IV.

DE

MORBIS SIMPLICIBUS FIBRARUM
PARTIUM FLEXILIUM NON CARTI-
LAGINEARUM ET VASORUM IN GENERE.

§. LXXVI.

OMnes partes flexiles non cartilagineæ considerari possunt tamquam multitudo vel fibrarum, vel vasorum. Sed vasa ex fibris texta sunt. Necesse igitur erit, ut prius de morbis fibrarum, quam vasorum, agatur.

§. LXXVII.

De siccitate, humiditate, rigiditate & debilitate fibrarum idem quoque prædicare licebit, quod jam supra propositum erat (§§. XI. XXII.).

§ LXXVIII.

Neque minus de fibrarum solutione continui ejusque singulis speciebus idem etiam valebit, quod jam supra de eodem argumento dictum erat (§§. XXIV. XXXII.).

§. LXXIX.

Ruptio fibræ est solutio continui in fibra, quæ sine hujus mixtione mutata contingit.

§. LXXX.

Causa ruptionis esse potest tam externa, quam interna, utraque vero tantæ efficaciam, ut fibræ extendantur usque ad solutionem continui sui.

§. LXXXI.

Facultas fibræ sese magis extendendi & minus contrahendi, quam opus est ad sanitatem, morbus erit, cujus causam fibra ipsa constituet, quatenus debilis est ob humiditatem (§§. XII & XXII.).

§. LXXXII.

Facultas fibræ sese magis contrahendi & minus extendendi, quam par foret ad sanitatem, morbus erit, cujus causam fibra ipsa efficiet, quatenus rigida est (§§. XVII & XIX.).

§. LXXXIII.

Spasmus est contractio fibræ involuntaria vel major, vel plus perdurans, quam necessarium est ad sanitatem.

§. LXXXIV.

Causam spasmī fibræ generationem ita tibi concipere poteris. Omnis fibra ex fibrillis constat, inter se cohærentibus. Ex pluribus fibris, quæ singulæ inter se quoque cohærent, efformantur

partes integræ, ut muscoli, membranæ. Quod si itaque ad latitudinem fibrarum in punctis cohæ-
sionis suæ producat^{ur} extensio perdurans: tum ne-
cessario subsequetur spasmus. Quod etiam eveniet,
una fibra facta rigidior^e altera.

§. LXXXV.

Extensio fibræ est elongatio fibræ involuntaria
vel major, vel plus perdurans, quam opus est
ad sanitatem.

§. LXXXVI.

Causa extensionis fibræ est vel interna, vel ex-
terna; quatenus elongatio fibræ contingit, vel ob
pressionem ejus ad latera, vel tractionem secun-
dum ejus longitudinem.

§. LXXXVII.

Concretio fibrarum, quæ in statu sanitatis ho-
minis cujusdam non concretæ esse deberent, mor-
bus est, ejusque causæ redibunt ad fibras ipsas,
quatenus ad contactum valide coguntur.

§. LXXXVIII.

Quando etiam fibra tantam rigiditatem obti-
net, ut cartilagini plane similis fiat; quod vero
in certo subiecto ratione sanitatis deficere deberet:
status iste morbus erit, de cujus causa idem quo-
que sciendum est, quod supra de rigiditate dictum
fuit, (§§. XVII. & XIX.).

§. LXXXIX.

De incremento fibrarum idem valet, quod §. XXXIX. in genere docet.

§. XC.

In textura vasorum observantur fibræ longitudinales & orbiculares, sive quæ in se redeunt. Jam de utroque genere fibrarum ea quoque valebunt, quæ nunc modo generaliter de fibris edita sunt.

§. XCI.

De vasorum rigiditate, debilitate, facultatibus sese plus contrahendi & minus dilatandi, itemque se minus contrahendi & magis dilatandi, quam requiritur ad statum sanitatis, idem tenendum est, quod modo de fibris disputatum fuit (§§. LXXVII. LXXXII.).

§. XCII.

Constrictio vasorum est spasmus fibrarum orbicularium in vasis.

§. XCIII.

Causæ constrictionis vasorum sunt vel fibræ longitudinales, quatenus extensæ, vel ipsæ fibræ orbiculares, quatenus rigidiores aliis (§. LXXXIV.).

§. XCIV.

Distensio vasorum est extensio fibrarum orbicularium in vasis.

§. XCV.

Causa distensionis vasorum est contentum in vasis, quatenus illorum parietes inde ab axe repelluntur, & quidem vi longe superante resisten-
tiam vasorum.

§. XCVI.

Collabescentia sive *collapsio vasorum* est defectus dilatationis vasorum respectu sanitatis, conjuncta tamen cum facultate sese dilatandi.

§. XCVII.

Causa collabescentiæ vasorum est fluidum, ibidem contentum, quatenus non sufficit ad illorum dilatationem, sanitati congruam.

§. XCVIII.

De vasorum solutione continui ejusque omni-
bus speciebus, quorsum etiam ruptio pertinet (§. LXXIX), idem valet, quod in anteceden-
tibus modo dictum fuit (§. LXXVIII.). Ad causam vero putrefactionis quod præcipue hoc loco
pertinet; illa vel in vase continebitur, vel extra
illud existet, superficiem ejus externam contin-
gens. In casu priore aderit vel fluidum, vel pro-
ductum corporis humani; in casu autem poste-
riore vel causa externa, vel etiam productum
corporis humani.

§. XCIX.

Obstructio vasis est abolitio cavitatis illius, a corpore non fluido ibidem hærente orta.

§. C.

Obstructio vasis morbus est, cujus causa esse poterit productum corporis humani. Quod si etiam materia quædam vas ita intrare queat, ut illa a vi corporis humani non mutetur; tunc ejusmodi materia erit causa externa obstructionis.

§. CI.

Compressio vasorum est imminutio cavitatis ejusdem, quæ fit a vi externa, parietes vasis ad axim pellente.

§. CII.

Compressio vasis morbus erit, qui a causa efficitur modo externa, modo interna, exemplo producti aut partis cujusdam essentialis corporis humani; ut clarius constabit ex §§. sequentibus.

§. CIII.

Vas distensum in vase alio sibi contiguo, quod dislocari nequit, compressionem producere poterit.

§. CIV.

Fluidum vasis, quod tunica vasculosa gaudet, quatenus distendit, erit causa compressionis in vasis tunicæ. Sed etiam vasa sub tunica communis vasis majoris repentina si distenduntur, efficiunt causam compressionis in vase majori.

§. CV

§. CV.

Vasa, quæ respectu superficiei externæ corporis ab ossibus non teguntur, causam compressionis admittunt partes superjacentes, quatenus eas distenduntur.

§. CVI.

Vas, quod visceri cuidam distenso contiguum sit, nec ejus pressionem subterfugit, hoc viscus agnoscit ut causam compressionis suæ.

§. CVII.

Concrescentia vasis est abolitio cavitatis ejusdem, quæ tali cohæsione vel parietum inter se, vel cum materia obstruente similari absolvitur, quali elementa solidorum gaudent.

§. CVIII.

Concrescentia vasorum morbus est, cujus causa cum illa, a qua valida & perdurans vasis contractio & compressio efficitur, in eo casu congruit, ubi vasa ob contactum parietum concreverint. Quod si vero concrescentia vasorum materiam apponat obstruentem, tum illius causa erit hæc ipsa materia obstruens, quatenus mixtum est simile cum mixtione fibrarum (§§. XCIII. C & CII.).

§. CIX.

Si quæ vasa tantam rigiditatem impetraverint, ut cartilaginea fierent contra sanitatem hominis;

status iste morbus erit, cujus causam tibi intelligere licebit ex §. XIX.

§. CX.

De dislocatione vasorum idem tenendum erit quod in §§. XXXIV-XXXVI. generatim indicatum erat.

CAPUT V.

DE

MORBIS SIMPLICIBUS VASORUM IN SPECIE.

§. CXI.

Omnia vasa corporis humani sunt vel sanguinea, vel quæ fluidum secretum in se continent.

§. CXII.

Vasis sanguineis, quatenus sunt vasa, competunt morbi omnes, qui de vasis in genere in capite præcedente evicti sunt. Quare nunc tantummodo agendum erit de morbis vasorum sanguineorum, quatenus talia sunt; subjunctis deinceps illis, quæ ad morbos vasorum, fluidum secretum in se continentium, pertinebunt.

§. CXIII.

Quatenus vasa sanguinea tunicam vasculosam habent; eatenus causa constrictionis in illis absolvi poterit, vasis quibusdam ad fibras orbiculares con-

itis, vel iis expansis, vel in cartilaginem mutatis (§. XCIII.).

§. CXIV.

Distensio vasorum sanguineorum vel sanguinem, cuius actio in illorum parietes admodum insignis, vel aliam materiam obstruentem pro sui causa noscit (§. XCIV.).

§. CXV.

Vibratio vasorum est eorumdem contractio & dilatatio successiva.

§. CXVI.

*Inflammati*o est perquam vehemens vasorum sanguineorum vibratio cum eorumdem distensione. *Gangræna* est ille gradus inflammationis, qui proxime preceedit plenariam vibrandi impotentiam vasorum.

§. CXVII.

Inflammati'o & gangræna ad morbos pertinent, cuius causa sanguis est, quatenus ille in sanguine plus abundat, in eadem validiore & magis purificante vi agit, quam requirit sanitas.

§. CXVIII.

Sphacelus est putrefactio vasis sanguinei, a sanguine ibidem putrescente producta.

§. CXIX.

A materia lymphatico-serosa, si in eadem saluberrimus liber sit, aut alius æque noxiæ indolis ibi

dem ita generatur, ut inde superficies externa vasis sanguinei contingatur, causa arrosionis in vasi sanguineo dependebit (§. XXX.).

§. CXX.

Causa obstructionis vasorum sanguineorum esse poterit vel polypus, sive concrementum fibrosum, vel materia resorpta, quæ non facta est miscibilis sanguini, vel novum mixtum iners, et sanguinis diacrifi ortum (§. XCIX.).

§. CXXI.

Si vas sanguineum contiguum est vel alteri vasi sanguineo, vel non sanguineo, utrisque tamen distensis, sed sine dislocatione possibili, hæc vasa ad causam compressionis suæ pertinebunt. Atque id ipsum quoque valet de utroque vasorum genere in tunicis vasorum sanguineorum (§. CI.).

§. CXXII.

Concrefcentia vasorum sanguineorum minorum ob parietum contactum æque, ac materiam obstruentem similem contingere potest; cujus causa redibit ad causam constrictionis, compressionis & obstructionis (§§. CVII & CVIII.).

§. CXXIII.

Vasa sanguinea maxima cartilaginea, immo ossea fieri possunt, ob maximam vim sanguinis quam patiuntur.

§. CXXIV.

Applicato digito tangente ad arteriam, hanc di-
ari deprehendere licet. Refertur jam iste motus
pulsus notionem. Erit itaque *pulsus* motus
astolicus arteriæ.

§. CXXV.

Pulsus celer est pulsus, in quo arteria post sui
contractionem, sive systolen, quasi in instanti, di-
tatur. E contrario *pulsus tardus* dicitur, quando
post arteriæ systolen illius dilatatio valde successiva
observatur.

§. CXXVI.

Pulsus frequens appellatur pulsus, qui intra da-
m aliquod tempus sæpius redit. E contraria
arte *pulsus rarus* vocatur ille, qui non ita sæpe
ter aliquod tempus datum redit.

§. CXXVII.

Pulsus magnus est pulsus, qui sub digito tan-
gente solito majus spatium secundum latitudinem
implere videtur; sive, qui ex lato & longo com-
ponitur. Dicitur vero *pulsus latus*, quando arteria
secundum sui latitudinem, & *longus*, si eadem se-
cundum sui altitudinem sub digito tangente mag-
nam lineam describere videtur. Pulsui magno *par-*
vus opponi solet.

§. CXXVIII.

Pulsus fortis est pulsus, cujus impetus tibi
signis esse videtur. Huic jam opponitur *debilis*.

§. CXXIX.

Pulsus durus est pulsus, qui notabili elasticitate in digitum tangentem agit. Pulsui duro opponitur *mollis*.

§. CXXX.

Pulsus inæqualis nuncupatur pulsus, qui post inæqualia temporis intervalla redit. Quod si vero hocce intervallum redeuntis pulsus extraordinarie protractum fuerit, *pulsus* tunc erit *intermittens*.

§. CXXXI.

Pulsus obscurus est pulsus, quem vix percipere licet.

§. CXXXII.

Definiti hucusque pulsus (§§. CXXV.-CXXXI.) ad morbos pertinebunt, quorum cognitio maxima utilitatis erit in doctrina pathologica, illorumque causa proxima tali modo concipienda, prout in §§. sequentibus declarabitur.

§. CXXXIII.

Causa pulsus celeris erit sanguis, ad elasticitatem usque compressus. Causa vero pulsus tardæ referenda erit ad sanguinem, non ita compressum ad elasticitatem (§. CXXV.).

§. CXXXIV.

Pulsus frequens pro sui causa agnoscat sanguinem, frequenti systole compressum. Quod

ro huic compressioni sanguinis opponitur, id
ertinebit ad causam pulsus rari (§. CXXVI.).

§. CXXXV.

Causa pulsus magni ad sanguinem redit, ar-
teriam valdopere dilatantem. Causa vero pulsus
parvi erit sanguis, a quo arteria parum dilatatur
(§. CXXXVII.).

§. CXXXVI.

Pulsus fortis causa referri poterit vel ad san-
guinem, qui arteriæ validam vibrationem effice-
re potest, vel ad arteriam ipsam, non debilita-
tam. Ad pulsum vero debilem quod attinet, ille
vel cum debilitate vasis connexus erit, vel minus.
In casu priore pulsus debilis dependebit a sangui-
ne admodum exigue dilatante arteriam, hujusque
vibratione longe minore, quam opus foret ad sa-
nitatem. In casu autem posteriore pulsus debilis
causa erit sanguis, cujus vis longe minor est in
dilatanda arteria, quam oporteret in statu sanita-
tis (§. CXXXVIII.).

§. CXXXVII.

Pulsus duri causa a sanguine, in vas valide
resistente, & arteria nimis resistente derivanda erit.
Nimia autem mollities pulsus causam agnoscit
a sanguine, arteriam parum dilatantem, hancque
a sanguine parum resistentem (§. CXXXIX.).

§. CXXXVIII.

Causa inæqualitatis pulsus est sanguis, qua-
tenus in eodem puncto arteriæ in diversis tem-

pusculis diastoles differt ratione densitatis, vel raritatis, vel abundantiae, vel defectus (§. CXXX.)

§. CXXXIX.

Pulsus obscuri causa esse potest sanguis, qui minimam vim in vas exferit (§. CXXXI.).

§. CXL.

Aneurysma verum est tumor arteriae sanguinae in quodam loco.

§. CXLI.

Aneurysmatis veri causa triplici modo concipi poterit. Sive enim vas in loco affecto maxime debilitatum erit, ut sanguis ad vasis loca debilia illud valdopere distendat. Sive vasa sanguinea in loco quodam tunicae arteriae aneurysmaticae debilitantur, atque a sanguine haud parum distenduntur. Sive tandem sanguis, qui e vasis tunicarum arteriae aneurysmaticae egreditur, ibidemque interceptus illas distendit.

§. CXLII.

Aneurysma spurium est tumor in partibus cum arteria connexis, ob sanguinis ex illa exitum ortus. Unde jam satis liquida esse poterit morbi hujus causa.

§. CXLIII.

Varices dicuntur tumores venarum sanguinearum.

§. CXLIV.

Varices causam sui agnoscunt vas debilitatum & sanguinem, illud distendentem.

§. CXLV.

Palpitatio cordis est pulsus cordis fortis.

§. CXLVI.

Anxietas præcordiorum, sive *angor cordis* est distensio cordis cum debilitate.

§. CXLVII.

Tremor cordis est pulsus cordis celer, debilis & frequens.

§. CXLVIII.

Palpitatio & tremor cordis, nec non anxietates præcordiorum numerum morborum subeunt, quorum causa ad ea momenta redibit, quæ in §§. proxime sequentibus exstabunt.

§. CXLIX.

Causa palpitationis cordis a sanguine, ventriculos cordis cum impetu intrante, dependebit (§. CXLV.).

§. CL.

Corde debilitato, eoque distenso a sanguinis incrementis copia, oritur anxietatum præcordiorum causa (§. CXLVI.).

§. CLI.

Tremor cordis pro causa habebit sanguinem pluribus quidem vicibus, tamen celeriter & sine magna vi in cor effusum (§. CXLVII.).

§. CLII.

Fieri poterit, ut etiam cordis auriculæ debilitentur, nimium distendantur, illarumque actio supra gradum intendatur. Omnes istæ affectiones ad morbos auricularum pertinebunt.

§. CLIII.

Tremor auricularum cordis est earumdem actio debilis, celer & frequens.

§. CLIV.

Causa debilitatis auricularum cordis cum fibræ debilitate in genere congruit (§. LXXVII.). Distensionis vero auricularum cordis causa sita erit in sanguine, ibidem adveniente, crescente, tandemque auriculas distendente. Quod deinde ad auricularum actionem supra gradum attinet; tunc hujus causa partim a fibris robustis auricularum, partim a sanguine, has cum impetu accedente, atque ad magnam vibrationem cogente, dependebit.

§. CLV.

Causa tremoris auricularum cordis posita erit in illarum debilitate, sanguinis copia, ibidem sine impetu crescente, auriculas ad agendum invitante, illisque tandem aliquoties nimium resistente (§. CLIII.).

§. CLVI.

Si vasa, in quibus fluidum secretum vehitur, ejusmodi relativa debilitate, respectu illorum vasorum, quæ fluidum, unde secretio perficienda, in se continent, affecta fuerint, ut loco fluidi secreti fecernendum admittant; talis tunc debilitas pro morbo reputanda erit, cujus causam tibi ita jam concipies, prouti supra de debilitate generatim dictum erat (§. LXXVII.).

§. CLVII.

Similis adeoque conditionis morbus aderit in vasis excretoriis, præsentem in iisdem debilitate, modo descripta (§. anteced.). De cujus causa idem quoque valebit, quod de debilitate in genere (§. LXXVII.).

§. CLVIII.

Vasorum inhalantium talis debilitas, ut vel nimis cruda, vel plane nihil revehant, morbus erit, cujus causa itidem intelligi poterit ex §. LXXVII.

§. CLIX.

Causa obstructionis vasorum lymphatico - serosorum esse poterit materia calcaris indolis, ex præcipitatione orta; vel viscida; vel globulus sanguineus, qui per errorem loci ibidem intrat.

§. CLX.

Ad causam obstructionis vasorum inhalantium & exhalantium non immerito referre licebit materiam inertem, orificia vasorum regentem.

§. CLXI.

Arrosio vasorum, fluidum secretum in se continentium, admittit causam, quæ sita erit in stagnante & fermentante humore, qui vasis istis inest (§.XXX.)

§. CLXII.

Inflammatiō & sphacelus vasorum, in quibus fluidum secretum continetur, loco causæ suæ agnoscent sanguinem erroneum, ibidemque putrescentem (§§. CXVI. CXVIII & CLVI.).



SECTIO SECUNDA.

DE

MORBIS FLUIDORUM SIMPLICIBUS
TAM IN GENERE QUAM IN SPECIE.

§. CLXIII.

Circa morbos fluidorum evolvendos attendendum erit ad horum quantitatem; motum vel progressivum, vel intestinum, & tandem ad mixtionem. Huic enim fundamento innituntur generum & specierum notiones, quibus partium fluidarum morbi indicantur.

§. CLXIV.

Plethora est major sanguinis quantitas, quam cum sanitate congruit.

§. CLXV.

Plethora morbus erit, cujus causa ad victum plenum, valde nutrientem, & excretionem naturales nimium languescens, redibit.

§. CLXVI.

Plethora dividi solet in simplicem & compositam, sive complicatam; nec non ad vasa & vires. Efficiendum jam erit, ut de horum vocabulorum significato constet. *Plethora* nimirum *simplex* vocatur, ubi sanguis tantummodo quantitate excedit,

integrīs illius reliquis qualitatibus; *composita* vero appellatur, quando sanguini abundanti aliæ simul qualitates vitiosæ adhærent. In *plethora* denique *ad vasa*, hæc solum a sanguine turgida fieri, supponuntur, absentibus variis aliis molestiis; utpote quibus simul stipata esse putatur *plethora ad vires*.

§. CLXVII.

Præter sanguinem alia quoque fluida, quæ ab illo secernuntur in corpore humano, ita abundare poterunt, ut illorum quantitas sanitati fiat adversa. Hæc fluidorum conditio morbus erit, cujus causa in sanguine, partibus oleosis & gelatinæ tenuis similibus abundante, atque ad vasa secretoria decenter delato, nec non in excretionibus languescantibus consistet..

§. CLXVIII.

Depletio vasorum est nimius fluidi defectus, per vasa vehendi.

§. CLXIX.

Depletio vasorum morbus erit, cujus causa latet in nimis fluidi excretionibus.

§. CLXX.

Orgasmus humorum est celerior fluidorum per vasa motus, quam opus est ad sanitatem.

§. CLXXI.

Orgasmus humorum morbus erit, qui a vasorum nimium forti frequentique actione in fluida,

horumque minima resistentia in vasa, tamquam a causa sua proxima, proficiscitur.

§. CLXXII.

Sed fieri quoque potest, ut fluida tardius, quam requirit sanitas, per vasa vehantur. Talis fluidorum status morbus est, qui sui causam agnoscit vasa, quatenus sunt debilia, quæ ideo actionem debilem in fluida exserunt; & fluida ipsa, quatenus vasis nimium resistunt.

§. CXLXIII.

Stasis est quies fluidi, per vas vehendi.

§. CLXXIV.

Stasis morbus est, cujus causam quærere oportebit modo in vasis vel debilibus, vel rigidis, vel constrictis, vel compressis; modo etiam in fluido inertis ad transeundum per vasa sua.

§. CLXXV.

Congestio humorum est illorum in vasis quibusdam major, quam sanitati respondet, coactio.

§. CLXXVI.

Congestio humorum morbus erit, cujus causa latebit modo in vasorum, congestionibus obnoxiorum, vel debilitate, vel obstructione; modo ad alia vasa restricta vel compressa redibit.

§. CLXXVII.

Putredo humorum est illorum mixtionis depravatio, facta a motu intestino.

§. CLXXVIII.

Putredo humorum morbus erit, qui præter materialium putridæ indolis delationes, ad corpus ægrotantis aliunde factas, loco causæ suæ admittit fluidorum stases. Tunc etiam humorum putrefactio intensioris gradus erit, quando illorum nimiam rarefactionem simul deprehendere licebit.

§. CLXXIX.

Extravasatio est egressio fluidi ex vase, quod in eodem vel contineri debuisset, vel quod majori in copia excernitur, quam opus est ad sanitatem.

§. CLXXX.

Extravasatio morbus erit, cujus causa profiscitur vel a fluido ipso modo arrodente vasa, modo tantopere congesto, ut illa ad sui ruptionem perveniant, sive etiam illorum orificia nimium distendantur; vel denique a vi externa, solutionem continui in vasis producente.

§. CLXXXI.

Hæmorrhagia est extravasatio sanguinis.

§. CLXXXII.

De hæmorrhagiæ causa proxima satis constare poterit ex §. CLXXX.

§. CLXXXIII.

§. CLXXXIII.

Sed fieri etiam poterit, ut fluidorum secretorum extravasationes oboriantur, quas non immerito ad morbos referre licebit, ab iisdem causis in genere dependentes, quæ jam exstant in §. CLXXX.

§. CLXXXIV.

Humorum spissitudo, five *nimia densitas*, est humorum consistentia, ab aquæ defectu ibidem oborta; five est imminutus fluiditatis in massa humorum gradus.

§. CLXXXV.

Spissitudo humorum morbus erit, qui loco causæ suæ habere potest partim nimis auctas fluidorum secretorum excretiones; partim vasa admodum debilia; partim etiam victum magis siccum, nimis crassum & acidum.

§. CLXXXVI.

Visciditas humorum est illorum mixtio, quæ ad gelatinam consistentem proxime accedit.

§. CLXXXVII.

Morbi visciditatis causa proxima latebit in acido, quod a terra saturatur, & oleo, quod instar superdecompositionis accedit.

§. CLXXXVIII.

Tenuitas humorum est ea humorum consistentia, quæ a nimia quantitate aquæ, iisdem admixtæ, dependet; five intensior fluiditatis gradus in humoribus.

§. CLXXXIX.

Tenuitatis humorum morbus pro sui causâ agnoscere poterit vel nimiam quantitatem aquosorum, ad corpus admissorum, atque a vasis absorptorum; vel excretionum naturalium languorem; vel terræ, in fluidis contentæ, præcipitationem; vel denique eam vasorum conditionem, ut illorum quædam modo constringantur, modo comprimantur.

§. CXC.

Acrimonia humorum est illorum talis mixtio, qualis obtinet in massa quadam salina, cui vis menstrua competit.

§. CXCI.

Pro differente specie salis expliciti atque in hærentis massæ humorum, horum *acrimonia* dividi solet modo in *acidam*, modo *salsam*.

§. CXCII.

Acrimonia morbus erit, cujus causam proximam ita tibi concipere poteris. Acido nimirum superfluo, ejus copioso usu ad massam humorum delato; vel factis modo partium terrearum, modo oleosarum secessionibus a reliquis fluidorum miscibilibus; oriatur *acrimonia acidâ*. Quod vero *acrimoniam salsam* concernit, illa partim a præcipitationibus partium terrearum ex massa humorum, cum quibus vero acidum explicitum satis arcte unitur, pendebit; partim etiam a putredine produci poterit, unde sales urinosi generari possunt.

§. CXCIIL.

Cacochymia, five *dyscrasia humorum*, est mixtio fluidorum, relata ad eorundem vel spissitudinem, vel visciditatem, vel tenuitatem, vel acrimoniam. Notionem igitur *cacochymiae* ad casus obvios rite applicaturus, illam pro horum conditione specialius determinare debebit. Solet denique *cacochymiae* opponi *euchymia*.

§. CXCIIV.

Cacochymiae igitur causae proximae constare poterunt ex §§. CLXXXV. CLXXXVII. CLXXXIX & CXCH.



SECTIO TERTIA

DE

PARTIUM FLEXILIUM INTEGRUM QUID
EFFICIENTIUM MORBIS INSTAR SIMPLI-
CIUM CONSIDERANDIS.

CAPUT I.

DE

PARTIUM FLEXILIUM INTEGRUM QUID
CONSTITUENTIUM MORBIS SIMPLICIBUS
IN GENERE.

§. CXCIV.

D*Olor* est morbus, quem ad attentatam solu-
tionem continui nervosi, sed adhuc commu-
nicantis cum organo communi sensorio, referre
licebit.

§. CXCVI.

Quidquid igitur in continuo nervoso, quod ad-
huc cum organo sensorio communicat, solutio-
nem producere poterit; id omne pertinebit ad caus-
sam doloris proximam. Exempli loco hic vale-
bunt extensiones, ambustiones, arrosiones, vires
aliæ externæ, ad solvendum continuum sufficientes.

§. CXCVII.

Vulnus est solutio continui recens, cruenta.

§. CXCVIII.

Vulneri opponi solet *ulcus* ; utpote quod solutio-
e continui absolvitur, in cujus cavo non ita san-
guis, quam potius aliud materiæ genus contine-
r. Sed humor, qui cavo ulceris inest, vel acri-
monia quadam gaudebit, vel minus. In casu priore
erit *ulcus compositum*, five *qualificatum* ; in casu
item posteriore *simplex*.

§. CXCIX.

Ulcus callosum dicitur, cujus labia, seu margi-
s, duritiem quamdam præ se ferunt.

§. CC.

Ulcus sinuosum appellatur, ad cujus latera ca-
vities, seu speluncæ, introrsum devergunt.

§. CCI.

Ulcus fistulosum, seu *fistula*, est *ulcus sinuosum*,
callosum.

§. CCII.

Ulcerum in genere causa proxima involvit om-
ne id, quod modo ruptionem partium non sangui-
narum, five earundem solutionem quacumque
a ratione producere valet ; modo efficit, ut par-
vus quidem sanguineis solutis, aliud humoris ge-
neris loco sanguinis ad cavum continui soluti con-
stat, aut ibidem generetur (§. CXCVIII.).

§. CCIII.

Ulcerum calloforum caussa ideo oritur, quia fluidum in vasis circa labia inspissatur; modo etiam fibræ ibidem rigidæ fiunt (§. CXCIX.).

§. CCIV.

Ulceris sinuosi caussa partim ad suppurationem quæ in illius cavo ad latera introrsum magis oboritur; partim etiam ad materiam acrem redit, quæ ibidem arrosionem efficere valet (§. CC.).

§. CCV.

Fistularum vero causam intelligere jam licebit ex §§. CCI. CCIII. & CCIV.

§. CCVI.

Tumores diversis respectibus a Medicis considerari solent, pro diversitate nimirum vel materiæ, a qua partes distenduntur; vel pro varietate modi, quo partes ipsæ distenduntur; vel tandem pro diversa ratione modi, quo materia distendens partes intra easdem continetur.

§. CCVII.

Abscessus, seu *apostema*, dicitur vel tumor, cujus materia distendens pus est, vel ulcus, in cujus cavo pus continetur. *Pus* vero appellatur materia flavescentis coloris & spissioris consistentiæ.

§. CCVIII.

Caussa abscessus erit sanguis, quatenus ejus partes tenuiores a venis revehuntur, crassioribus vero ad fermentandum relictis.

§. CCIX.

Tumor sanguineus dicitur tumor, cujus materia, distendens partes, sanguis est. *Tumor lymphatico-serosus* ille erit, qui pro sui materia, pars distendente, humorem lymphatico-serosum agnoscit. Isti tumores lymphatico-serosi, si improprie majoris ambitus fuerint, dici etiam solent *hydropici*, sive *hydropes* in genere.

§. CCX.

Scirrhus est tumor durus, qui oritur a fluido inspissato; eritque vel *sanguineus*, vel *lymphatico-serosus*, secundum differentem speciem humoris inspissati.

§. CCXI.

Causas scirrhorum cognoscere licebit ex §§. CLXXXV. & CLXXXVII.

§. CCXII.

Cancer occultus, seu *noli me tangere*, est scirrhus lymphatico-seroso-sanguineus, cujus materia distendens acredinem paulo majoris gradus concepit. *Cancer apertus*, sive *carcinoma*, vocatur ulcus, ex cancro occulto natum.

§. CCXIII.

Causæ canceri occulti patent ex §§. CLXXXVIII. & CCXI. Causa vero canceri aperti sita erit in acrimoniæ, qua materia cancrosa prædita est, tanto incremento, ut inde partis affectæ continuuum solvatur (§. ant.).

§. CCXIV.

Tuberculum, seu *phyma*, est tumor, cujus basis secundum sui diametrum longitudinem dimidii pollicis transversæ, habita nimirum ratione ægro-
tantis in casu, haud excedit.

§. CCXV.

Pustula, five *papula*, est tuberculum molle, atque apicem versus elongatum. *Vesicula* est tuberculum perlucidum. *Furunculus* dicitur tuberculum gangrænoideum.

§. CCXVI.

Tuberculorum, pustularum, vesicularum, nec non furunculorum causæ proximæ conditio facili ratione ex superioribus constare poterit (§§. CCIX. CCXIV & CCXV.).

§. CCXVII.

Tumores tunicati, five *saccati*, dicuntur, quorum materia distendens partes peculiari folliculo inclusa tenetur. Hi tumores sunt vel *molles*, vel *duri*.

§. CCXVIII.

Causa tumorum tunicatorum ad materiæ distendentis partes mixtionem similem cum membranis, in quibus hæret, redibit.

§. CCXIX.

Atonia, vel etiam *laxitas*, five *relaxatio*, dici communiter solet debilitas, relata ad partes flexiles, quæ totum quid constituunt.

§. CCXX.

Atoniæ igitur causa proxima generatim intelligi poterit ex §. XXII.

CAPUT II.

DE

MORBIS CUTIS SIMPLICIBUS.

§. CCXXI.

E*Rrysipelas* est inflammatio cutis ad sui superficiem externam potissimum oborta. *Phlegmone* est tumor inflammatorius, seu inflammatio in cutis profundo magis residens. Utriusque morbi causa proxima intelligi poterit ex §§. CXVI & CXVII.

§. CCXXII.

Phimosis, seu *paraphimosis*, est tumor inflammatorius præputii. De causa hujus quoque morbi constare poterit ex §§. CXVI & CXVII.

§. CCXXIII.

Bubo in genere dicitur tumor inflammatorius, vel scirrhus glandularum majorum ad cutim sitarum. *In specie* hoc nomine veniunt tumores inflammatorii, vel scirrhi glandularum inguinalium & subaxillarium. Bubonis causa proxima apparebit ex §§. CXVI. CXVII. CCX & CCXI.

§. CCXXIV.

Prout bubones præ se ferunt indolem morbi modo maligni, modo benigni (§. LXXVII. Proleg.): dividi solent in *malignos*, ut sunt bubones pestilenciales & venerei, & in *benignos*.

§. CCXXV.

Scabies est congeries modo pustularum, modo vesicularum prurientium in cute, sed morbi chronici speciem præ se ferentium.

§. CCXXVI.

Scabiem dividere solent in *siccam* & *humidam*; pro ratione nimirum vel minoris, vel majoris quantitatis materiæ, quæ intra illius pustules, vel vesiculas continetur. Utraque porro dividitur in *benignam* & *malignam*, sive *feram*. Prior ex gradu malignitatis admodum exiguo æstimari debet; posterior vero malignitatis gradum eminentiorem sibi vindicabit.

§. CCXXVII.

De causa scabiei proxima sequentia notare conveniet. Fluidum lymphatico-serosum corruptum, acre, stagnans in glandulis subcutaneis id efficere poterit, quod notio scabiei postulat (§. CCXXV.). Unde simul etiam colligere licebit causam scabiei siccæ, humidæ, benignæ & malignæ (§. anteced.).

§. CCXXVIII.

Psoriasis est scabies sicca, maligna vel scroti, vel perinæi, cujus causa patebit ex §. anteced.

§. CCXXIX.

Impetigo est phlegmone connexa cum scabie. *Lepra*, sive *elephantiasis*, est impetigo universalis, eaque admodum eminentis malignitatis. Ad utrius-

que mali causam proximam intelligendam facient
§§. CCXXI & CCXXVII.

§. CCXXX.

Herpes, five *serpigo*, est erysipelas, connexum cum scabie sicca, vel ulcusculis inde prognatis. *Zona* vero dicitur herpes circa regionem hypogastricam & vertebrae lumbares. Uterque morbus ratione causae suae proximae cognosci poterit ex §§. CCXXI & CCXXVII.

§. CCXXXI.

Crusta lactea, five *achor*, five *tinea*, est vel scabies in cute capitis, vel sunt ulcera inde ibidem orta. Cujus causa proxima tibi manifesta fieri poterit ex §§. CCII & CCXXVII.

§. CCXXXII.

Vari, five *jonthi*, sunt tubercula subdura in facie. *Gutta rosacea* est erysipelas faciei, connexum cum varis. Utriusque mali causa proxima conspicua esse poterit ex §§. CCXVI & CCXXI.

§. CCXXXIII.

Maculae dicuntur colores cutis tam diversi ab illo colore, qui solitus esse solet homini cuidam sano, quam etiam distincti simul per spatia intermedia.

§. CCXXXIV.

Sanguis sugillatus esse dicitur, quando ille notabilis ambitus ita sub cute concepit. *Vibices*

appellantur maculæ, ex sanguine fugillato obortæ. Cujus morbi causa proxima patebit ex §. CLXXIV.

§. CCXXXV.

Anthrax, sive *carbunculus*, est furunculus perquam malignus. In *specie talis* esse dicitur *pestilentialis*, seu qui cum peste connexus est.

§. CCXXXVI.

Quisque sine dubio facile concedet, fieri posse, ut exterior habitus corporis relaxetur, sive cutis fibræ debilitatem aliquam contrahant. Cujus rei causam generatim intelligere licebit ex §. XXII.

§. CCXXXVII.

Sed e contraria parte fieri etiam poterit, ut in iisdem locis (§ anteced.) suboriatur *spasmus*, quem non inepta ratione *periphericum* dixeris, cui alias nomen *horroris*, sive *horripilationis*, sive *frigoris*, vel *tensionis febrilis*, tribui solet. Hujus quidem spasmī causa generatim ex §. LXXXIV. tibi constare poterit: clarioris tamen intelligentiæ causa hic ea momenta notari merentur, quibus deprehensis, hunc quoque spasmus deprehendere licebit. Quorsum nimirum pertinebunt frigus, externe ad cutim admissum; vasorum cutis obstructions; eademque obortæ in vasis internis; nec non partium internarum distensiones.

§. CCXXXVIII.

Jaſtis fundamentis (§§. CXXV. CXXVI & CCXXXVII.) ad febrem generatim definiendam, non incongruum eſſe videbitur, hoc loco jam proponere febris definitionem; utpote cujus uſum ſequentia multiplici nomine ſibi vindicabunt. Eſt vero *febris* in genere ſpasmus periphericus cum pulſu, qui illum ſequitur, celeri & frequente. Pro differentibus morbi qualitatibus, quas in febre deprehendere licet, hæc jam in varias abibit diviſiones; exemplo *febris chronica, acuta, benigna, magna*. Sed ex febris momentanea duratione, vel ex uno tantum vel altero requiſito ad notionem febris, *motuum*, ſive *commotionum febrilium*, præſentia æſtimari ſolet.

§. CCXXXIX.

Variolæ dicuntur puſtulæ malignæ ſuppuræſcentes; & dividi ſolent in *benignas* & *malignas*. Prioræ admodum exiguæ malignitatis ſunt, nullam febrem acutam ſibi comitem habent, hinc etiam *chronica* dici poſſent; poſteriores vero malignitatis gradum valde conſpicuum admittunt, cum febre acuta connectuntur, ut ideo etiam nomine *febris variolofæ* inſigniri ſoleant.

§. CCXL.

Morbilli ſunt maculæ rubræ, paulo minores, benignæ. Eadem hic quoque diviſionis ratio obſervare poterit, quæ in §. anteced. expoſita erat.

§. CCXLI.

Maculæ scarlatinae sunt maculæ paulo majores atque intensæ rubedinis. Quo etiam loco eadem divisio (§. CCXXXIX.) valebit.

§. CCXLII.

Purpuræ rubræ, seu *miliaris*, nomine veniunt pustulæ intense rubræ, milii magnitudinem haud excedentes. *Purpuræ urticatæ* vocabulo indicantur vesiculæ pallide rubentes, serpiginosæ. Præter eandem dividendi rationem, quæ jam ex §. CCXXXIX. constat, hic adhuc annotandum erit, quod purpura rubra chronica dici etiam soleat *scorbutica*.

§. CCXLIII.

Purpura alba est congeries vesicularum albarum malignarum, insidentium maculis rubris, connexa cum febre acuta.

§. CCLXIV.

Petechiæ sunt maculæ malignæ, minimæ, varios colores, excepto intense rubente, referentes, sed connexæ cum febre acuta.

§. CCXLV.

Exanthemata vocantur Medicis vel tubercula vel pustulæ, vel vesiculæ, vel maculæ, quæ in cutis superficie externa proveniunt.

§. CCXLVI.

Exanthematum causa generatim ad monientia sequentia redibit. Aderit nempe fluidum, idque

diversæ speciei & mixtionis huc & illuc intra cellulofam cutis vel extravasatum; vel in vasculis cutaneis nimis coacervatum, atque ad stasim perductum. A varia fluidi hujus conditione, præter xanthematum divisionem in *maligna* & *benigna*, illorum quoque singularia phænomena, de quibus quo loco ex observationibus constabit, dependent.

○ §. CCXLVII.

Leucophlegmatia est levior quidam hydrops universæ cutis; five hydrops universalis minoris gradus. *Anasarca* vero dicitur hydrops universalis gravior; five hydrops majoris gradus, ad universam partem abortus.

§. CCXLVIII.

De hydropis universalis causa generatim frequentem in modum constare poterit. Obtinebunt hic scilicet modo vasorum lymphatico-ferosorum partis debilitas, disrptiones, obstructions in aliis, aliis constrictiones; modo graves obstructions, constrictiones, compressiones in vasis viscerum lymphaticis abortæ; modo vasorum sanguineorum validæ constrictiones, compressiones, deplectiones; modo denique ipsius fluidi lymphatico-rosi spissitudo aut visciditas. Jam pro differente causarum vi, oritur hydrops universalis, quidem levior in uno casu, gravior in alio; nec modo leucophlegmatia, modo anasarca.

§. CCXLIX.

Secundum differentiam locorum corporis, ubi imprimis hydrops maxime fit conspicuus, & morbi gradum diversum, peculiares species hydropis constituere solent. *Ascites* nimirum vocatur hydrops abdominis. *Tympanites* vero audit hydrops abdominis maximi gradus. *Hydrocephalus externus* est hydrops cutis, caput obvolventis. *Oedema* dicitur hydrops membrorum. *Hydrocele* audit hydrops scroti.

§. CCL.

Quod de causa hydropis universalis generatim in §. CCXLVIII. dictum est, id etiam ad hydropis species transferri poterit; habita nimirum ratione locorum peculiarium corporis humani, quæ huic vel illi causæ præ reliquis patent.

§. CCLI.

Hernia, five *ramex*, dicitur tumor, qui ad illa potissimum loca suboritur, ubi possibilis est peritonæi extra abdomen egressio. Iste tumor produci poterit vel a peritonæo, vel ab intestinis, vel ab omento. Quo in casu *hernia vera*, seu *propria*, adesse existimatur. Quod si vero ad eadem loca tumor subortus magis dependeat a materia longe alia, quam quæ in herniis veris obtinet; tunc *hernia impropria*, five *spuria*, adesse dicitur.

§. CCLII.

Proveniunt hic iterum, ob diversitatem locorum affectorum, herniarum verarum differentes species

Exom

Exomphalus nempe, seu *omphalocele*, seu *hernia umbilicalis* (κατ'ἐξοχὴν talis), dicitur hernia vera, ad regionem umbilicalem oborta. *Bubonocèle*, sive *hernia inguinalis* (κατ'ἐξοχὴν talis), illa species herniæ propriæ erit, quæ in regione inguinali producitur. *Oscheocèle*, seu *hernia scrotalis* (κατ'ἐξοχὴν talis), est hernia vera, ad scrotum elata. *Hypogastrocele*, sive *hernia abdominalis* (κατ'ἐξοχὴν talis), illam speciem herniæ veræ constituit, quæ inter regionem umbilicalem & inguinalem residet.

His modo definitis speciebus herniæ propriæ plures aliæ adhuc subjungi solent, quæ a diversitate partium prolapsarum, utpote ad herniam veram in casu obvio efficiendam concurrentium, originem suam ducunt. Unde jam voces sequentes prostant: *enterocèle*, *enteromphalus*, *epiplomphalus*, *epiplocele*, *entero-epiplomphalus*, *entero-epiplocele*. Efficietur in prælectionibus, ut non solum de horum vocabulorum significato, verum etiam de eo simul constet, quod partim perexiguæ utilitatis sit hæc divisio, partim hic admitti videantur notiones inanes.

§. CCLIII.

Herniæ veræ dicuntur esse *incaarceratæ*, seu *captivæ*, quando impedimenta oboriuntur, quo minus partes prolapsæ pristino situi suo restitui possint. Quorsum exempli loco pertinet partium prolapsarum cum locis proidentiae concretio, vel illarum inflammatio. Hujusmodi herniis opponi jam solent *herniæ liberæ*.

§. CCLIV.

Sed usu suo non carebit illa herniarum impropriadum in species divisio, quæ sui ortum debet materiarum, tumores hic producentium, varietati. Notandæ hic igitur erunt species sequentes. *Hydromphalus* est illa herniæ spuriae umbilicalis species, quæ a fluido lymphatico-seroso dependet; sive, quæ instar hydropis, ad umbilicum nati, considerari potest. *Pneumatomphalus* dicitur illa herniæ improprie umbilicalis species, quæ ab aëre distendente formatur. *Sarcomphalus* audit illa herniæ spuriae umbilicalis species, quæ pro sui origine excrescentiam carneam agnoscit. *Hydrocele* appellatur illa herniæ improprie scrotalis species, quæ ab humore lymphatico-seroso efficitur; vel quam tibi ad hydropem scroti referre licebit. *Pneumatocèle* vocatur ea herniæ improprie scrotalis species, cujus causa ad aërem distendentem redire videtur. *Sarcocèle* nuncupatur illa herniæ improprie scrotalis species, quæ ab excrescentia quadam carnea producitur. *Cirsocele*, sive *varicocele*, sive *ramex varicosus*, illam speciem herniæ spuriae modo inguinalis, modo scrotalis, constituet, quæ a venis spermaticis valdopere tumefactis proficiscitur.

§. CCLV.

Herniarum propriarum causa proxima sibi vindicat modo peritonæi relaxationem, sive debilitatem; modo illius continui solutionem; modo etiam musculorum abdominalium debilitatem. Quod vero ad hernias spurias, illarumque species

§. anteced.) spectat: ex definitionibus (§. m. citat.) illarum causæ conditio tibi satis clare perspicua fiet; si imprimis hic ea loca simul evolvantur, quæ supra jam prostant, ob similitudinem argumenti facile invenienda.

§. CCLVI.

Cachexia est complexus illarum affectionum cutis, quæ modo ad illius colores morbosos, modo ad ejusdem relaxationem, sive debilitatem referri solent. Opponitur jam *cachexiæ evexia*.

§. CCLVII.

Non poterit non ex §. anteced. intelligi, quid de causâ *cachexiæ* proxima sentiendum, & e quibus locis superioribus illius clarior cognitio petenda sit.

CAPUT III.

DE

MORBIS PARTIUM MUSCULARIUM
SIMPLICIBUS.

§. CCLVIII.

OMnes partes musculares, integrum quid in corpore humano constituentes, ut exempli gratia muscoli sunt, vel membranæ, spasma corripipi possunt (§. LXXXIII.); cujus species nunc jam definiendæ erunt. Singulæ vero notiones istæ non aliud fundamentum divisionis suæ agnoscunt,

quam locorum affectorum differentias; immo etiam varietatem situs, in quem partes a spasmō affectæ veniunt, vel in eodem perdurant, spasmō sæviente, quem ante ejus aggressum habebant. Quotquot denique spasmorum species numeraveris, de singulis ratione causæ suæ proximæ idem quoque judicandum erit, quod jam prostat in §. LXXXIV.

§. CCLIX.

Arthritis est spasmus, qui in partibus muscularibus circa articulos oboritur; estque vel *fixa*, si in uno loco constanter perdurat, vel *vaga*, si ex uno loco in alium migrat.

§. CCLX.

Rheumatismus vero dicitur spasmus, qui in partium muscularium aliis potius locis, quam circa articulos, producit. Simili ratione *rheumatismus* dividi poterit in *vagum* & *fixum*, ut *arthritis*.

§. CCLXI.

Chiragra est *arthritis* manuum. *Gonagra* est *arthritis* genuum. *Podagra* est *arthritis* pedum. *Malum ischiadicum* est *arthritis* ad coxas.

§. CCLXII.

Hemicrania est *rheumatismus* circa tempora. *Pleuritis spuria* est *rheumatismus* circa os sterni. *Spasmus paracelsi fixus* est *rheumatismus* circa regionem lumbarem. *Lumbago* est *rheumatismus* circa femora.

§. CCLXIII.

Tetanus est spasmus, quo totum corpus ita corripitur, ut in situ erecto immotum persistat. *Catalepsis* est spasmus, quo corpus affectum in tali situ persistit, quem ante illius adventum habebat.

§. CCLXIV.

Emprosthotonus est spasmus, quo corpus corripitum antrorsum incurvatur. *Opisthotonus* est spasmus, a quo corpus prehensum retrorsum incurvatur. *Spasmus cynicus* est spasmus oris, quo angulus labiorum unius lateris versus maxillam inferiorem abducitur. *Risus sardonius* est spasmus oris, quo anguli labiorum a se invicem vel magis removentur, vel ad se propius adducuntur.

§. CCLXV.

Asthma convulsivum, sive *spasticum*, est spasmus musculorum pectoris & laryngis. *Incubus* vero appellatur asthma convulsivum, durante somno natum.

§. CCLXVI.

Contractura est spasmus tendinum, præsertim ad loca articulorum.

§. CCLXVII.

Convulsio dicitur spasmi in parte quadam musculari continua reciprocatio. *Epilepsia*, seu *morbus comitialis*, est convulsio quædam universalis.

§. CCLXVIII.

Convulsionum causa proxima cum illa conveniat, oportebit, quæ de spasmo in genere valet (§. LXXXIV.); hic simul concurrente varietate actionis nervorum in partibus convulsis.

§. CCLXIX.

Fieri poterit, ut in partibus muscularibus, quæcumque etiam maximi ambitus esse videantur, debilitas oboriatur; eaque diversi gradus. Pro diversitate hujus gradus æque, ac locorum affectorum, debilitatis species variæ effingi solent.

§. CCLXX.

Paralysis, five *resolutio nervorum*, est talis debilitas in partibus muscularibus, ut illæ vel sensu, vel potentia motum exercendi, vel utrisque simul careant. Dividi solet *paralysis* in *spuriam*, seu *scorbuticam*, & in *veram*. Prior tunc adesse judicatur, quando vel sensus solum, vel tantum potentia motum exercendi in partibus muscularibus deficere observatur; posterior vero ex utriusque defectu, ibidem deprehenso, colligitur.

§. CCLXXI.

Causam paralysis proximam reducere licebit ad ea loca, ubi generatim de debilitate sermo erat (§§. XII. XX. XXII. LXXXI.); hic simul habitatione actionis nervorum, in partibus paralyticis admodum impeditæ.

§. CCLXXII.

Hemiplexia, five *hemiplegia*, dicitur paralyſis in uno corporis latere. *Paraplexia*, five *paraplegia*, eſt paralyſis in utroque corporis latere.

§. CCLXXIII.

Aſthma defectivum eſt paralyſis mufculorum pectoris & laryngis. Communiter etiam dici ſolet *aſthma humidum*, ob ſtertores inter reſpirandum ſæpius obſervatos, vel tuſſim frequentem, cujus ope mucus ejicitur; ad differentiam *aſthmatis ſicci*, ubi ejusmodi quid deficere videtur, & de aſthmate ſpaſtico vulgo prædicari ſolet.

§. CCLXXIV.

Apoplexia eſt paralyſis vera, univerſalis. Atque in *sanguineam* & *ſeroſam* dividi ſolet: prior nimirum ſanguinis, poſterior vero ſeri coacervationes, aut extravafationes, encephalon verſus ſimul obortas, ſupponit.

§. CCLXXV.

Singularum harum paralyſis ſpecierum, quæ in §§. CCLXXII. CCLXXIII & CCLXXIV. definiuntur, cauſſæ proximæ conditio cum illa congruit, quæ jam de paralyſi in genere evicta eſt (§. CCLXXI.).

§. CCLXXVI.

Conſiderato illo fundamento, cui notiones ſpecierum ſpaſmi & paralyſis ſuperſtruuntur (§§. CCLVIII & CCLXIX.); facili tunc ratione con-

stabit, quod adhuc longe plures utriusque morbi species, præter hætenus definitas, hic exstare possent; adhibitis vocabulis quibusdam peculiaribus, ad notiones istas exprimendas. Quoniam vero vocum augmenta, quæ in disciplinis præter necessitatem fiunt, plus damni, quam utilitatis, afferre solent, hinc etiam consultum fore judicavimus, a pluribus paralyfis & spasmi speciebus definiendis abstinere; ad quas in casu obvio designandas nomen genericum utriusque morbi, relatum ad partem affectam, commode sufficere poterit. Quare etiam definitæ modo species spasmi & paralyfis omitti potuissent; nisi jam horum vocabulorum usus in scholis Medicorum adeo invaluisset, ut illis hoc loco prætervisis, res maximi momenti desiderari videretur.

§. CCLXXVII.

Atrophia in genere dicitur defectus nutritionis; in partibus muscularibus præsertim conspicuus. *Ariduræ* autem nomine venit atrophia, relata ad partes musculares membrorum, circa illorum præcipue articulos.

§. CCLXXVIII.

Atrophix generatim morbus loco causæ suæ proximæ habebit vel obstructiones glandularum mesenterii; vel defectum fluidi, ad nutriendum apti; vel denique obstructiones, constrictiones, compressiones, immo etiam concretiones vasorum, fluidum nutriens ad partem atrophicam ferendum destinatum. Hoc ultimum momentum præ reliquis in aridura locum habere solet.

§. CCLXXIX.

Explicatis itaque illis notionibus, quæ ad morbos in specie, designandos partium muscularium, quatenus hæ totum aliquod faciunt, pertinebant; multis aliis hic studio omissis, quæ ut communia se habent, atque ad capita antecedentia referunt, ad novi jam argumenti tractationem progredimur.

CAPUT IV.

DE

CAVITATUM ET PARTIUM INTRA ILLAS
CONTENTARUM MORBIS SIMPLICIBUS.

§. CCLXXX.

Fieri potest, ut cavitates corporis humani, omnesque in illis contentæ partes, morbis subjaceant hætenus pertractatis. Hoc igitur loco ea tantum proponenda erunt, quæ ad morbos harum partium in specie pertinere videbuntur.

§. CCLXXXI.

Coryza est impedita, sive difficilis excretio muci e naribus. *Gravedo* est incommoda repletio sinuum frontaliū, a muco facta. *Phlegmatorrhagia* est stillicidium muci e naribus.

§. CCLXXXII.

Causa coryzæ proxima consistet vel in mucinarium nimia visciditate, vel in glandularum membranz pituitariæ compressione, constrictione, obstructione. Causa vero gravedinis latebit in mucinimia intra sinus frontales secretionem, ejusque inspissationem. Causa denique phlegmatorrhagiæ ad mucinarium nimiam tenuitatem redibit.

§. CCLXXXIII.

Ozæna vocatur ulcus intra cavitates narium prognatum. De cujus causa proxima tibi constare poterit ex §. CCII.

§. CCLXXXIV.

Angina spuria, sive *notha*, est inflammatio partium, intra fauces quidem contentarum, sed concurrentium ad deglutitionem & respirationem. Hujus quoque morbi causam proximam tibi intelligere licebit ex §. CXVII.

§. CCLXXXV.

Branchus dicitur major excretio muci intra fauces & asperam arteriam, quam opus est in statu sanitatis.

§. CCLXXXVI.

Branchi causa proxima ad partium, in hoc morbo affectarum, debilitatem redibit; vel in nimia sanguinis arteriosi, ad easdem partes affectas, congestionem latebit, ita, ut ibidem auctiore muci secretionem facta, ejus quoque copiosior excretio necessario proveniat.

§. CCLXXXVII.

Raucitas, five *raucedo*, est spasmus tunicæ glandulosæ laryngis. Cujus causam in genere cognoscere poteris ex §. LXXXIV.

§. CCXXXVIII.

Sputum cruentum vocatur hæmorrhagia, relata vel ad infundibulum narium, vel partes alias, intra os contentas, sed cum ejectione sanguinis per os simul connexa. De causa hujus morbi proxima in genere te jam edocebit §. CLXXXII.

§. CCLXXXIX.

Catarrhus suffocativus est pulmonum paralytica debilitas. Cujus causam proximam tibi indicabit §. CCLXXI.

§. CCXC.

Tophi pulmonum sunt scirrhi, in locis quibusdam pulmonum nati. Cujus causam proximam generatim introspicere licebit ex §. CCXI.

§. CCXCI.

Phthisis pulmonalis est ulcus in pulmonibus. *Vomica pulmonum* vero appellatur abscessus pulmonum. Utriusque morbi causa proxima patebit ex §§. CCII & CCVIII.

§. CCXCII.

Empyema in genere dicitur effusio materiæ purulentæ in cavitatem quamcumque corporis humani. In specie hoc nomen hodie plerumque tri-

bui solet puris evacuationi, in cavo thoracis factæ. Cujus causa proxima supponit apertionem factam esse vel vomicæ pulmonum, vel abscessus in alia parte suborti, referenda ad thoracis cavitatem.

§. CCXCIII.

Hydatides pulmonum sunt hydropes in locis quibusdam pulmonum. *Hydrops pectoris* est hydrops, ad pleuram relatus. Horum morborum causa proxima generatim apparebit ex §. CCXLVIII.

§. CCXCIV.

Dyspnœa vocabulum denotat in genere difficilem respirationem. Ad cujus causam vero quod attinet, illa jam ad sequentia momenta redibit. Adeste hic poterunt vel asthmatis utrumque genus, immo etiam dolores modo in pleura, modo in muscalis suborti, quibus natura utitur ad thoracis dilatationem & coarctationem; vel pulmonum inflammatio, vomica, ulcus, hydatides, topi, debilitas; vel empyema, hydrops pectoris; vel tandem distensiones partium, diaphragmati vicinarum, nec non impeditæ actiones musculorum abdominalium.

§. CCXCV.

Tussis nomen accepit exspiratio vehemens sonora, involuntaria, estque vel *humida*, quando cum ejectione materiæ cujusdam stipata est; vel *ficca*, si ista ejectio deficere videtur.

§. CCXCVI.

Causa tussis proxima in genere supponit omne, quod actionem in partibus, proxime inservientibus expirationi, supra modum intendere valet.

§. CCXCVII.

Hæmoptysis est hæmorrhagia pulmonum, ubi pro sanguis per os ejicitur. De cujus causa proxima satis constabit ex §. CLXXXII.

§. CCXCVIII.

Singultus est convulsio diaphragmatis. Cujus causa proxima liquida esse poterit ex §. CCLXVIII.

§. CCXCIX.

Cardialgia, five *cardiognus*, est spasmus cardiacæ, seu orificii superioris ventriculi. Ne hujusmodi morbi causa proxima obscura esse poterit ex §. LXXXIII.

§. CCC.

Soda est arrosio circa orificium ventriculi superioris, five cardiacæ, oborta. Cujus causa proxima §. XXXI. redibit.

§. CCCI.

Ructus est explosio aëris, in ventriculo contenti, per cardiacam. Pro diversitate saporis, quem ab ructibus organon gustus percipit, illi dividuntur vel in *nidosos*, vel *acidos*, vel *amaros*, sic porro.

§. CCCII.

Ructuum ortus vel spasmum, vel compressionem pylori, durante concoctione in ventriculo, aut præsentibus ibidem massis aliis fermentantibus, supponit.

§. CCCIII.

Anorexia est defectus famis. Cui simul si accesserit vehemens quædam esculentorum averfatio, *nausea* tunc adesse dicitur.

§. CCCIV.

Anorexiæ morbus non aliam sui causam proximam agnoscere poterit, quam motum peristalticum ventriculi admodum imminutum, vel etiam succi gastrici inertiam.

§. CCCV.

Addephagia vocatur longe major fames, quam quæ flatui sanitatis respondet. *Orexis* vero *canina* erit addephagiæ summus gradus.

§. CCCVI.

Addephagiæ causa proxima latebit modo in ventriculi motu peristaltico admodum aucto; modo in succi gastrici acrimonia.

§. CCCVII.

Vomitus est tale superpondium motus peristaltici ascendentis præ descendente in ventriculo, ut ejus contenta per os excernantur. Pro excretorum diversitate, vomitus erit vel *biliosus*, si bilis

ficiatur; vel *acidus*, si materia quædam acida ex-
ternatur; vel *cruentus*, si rejectiones sanguinis fiant,
et sic porro. Quod amplius ad *vomitum cruentum*
spectabit, haud incongrua ratione illum quoque
definire poteris per hæmorrhagiam ventriculi, ubi
sanguis extravasatus per os rejicitur; sive per hæ-
morrhagiam, relatum ad ventriculum, sed simul
connexam cum vomitu.

§. CCCVIII.

Quando fibræ ventriculi vel ad sui extremitatem
extremam, vel ad superficiem mox superiorem, mox
inferiorem, vel denique ad unum marginem aut
basim afficiuntur, aut comprimuntur; vomitus
tunc erit necessarius. Qui etiam suborietur; fibris
ventriculi vel absolute, vel respectu debilibus factis.
Unde jam satis constabit de conditione causæ pro-
ximæ vomitus. Quod vero in specie ad vomitum
cruentum attinet; ad illius causam intelligendam
insuper accedere debent dicta in §. CLXXXII.

§. CCCIX.

Flatulentia est nimia intestinorum distensio, ab
aëre facta. Cujus causa proxima consistet vel in
debilitate intestinorum; vel in nimia copia aëris,
quocumque modo delati ad tubum cibarium.

§. CCCX.

Diarrhæa est frequens scybalorum tenuium per
num excretio. Cujus causa proxima ad motus
peristaltici intestinorum descendens nimium au-
gmentum redibit, sub ratione vis inertiae.

§. CCCXI.

Diarrhœæ species variæ a Medicis numerantur, fundamento sequenti superstructæ. Solita scilicet miscibilia scybalorum in iisdem vel abundabunt, vel deficient, vel cruda iisdem inerunt; vel etiam scybalis insolita quædam admixta esse poterunt. Unde diarrhœæ species illæ notissimæ proveniunt, quarum definitiones §. sequens in se jam continebit.

§. CCCXII.

Diarrhœa serosa, five *seroso-mucida*, five *mucida*, illa vocatur, si in scybalis mucus intestinalis abundaverit. *Diarrhœa biliosa*, five *cholericæ*, erit illa diarrhœæ species, quæ abundantia bilis admixtæ excrementis alvinis se præ reliquis distinguit. Dum e contraria parte bilis defectum in scybalis supponit *diarrhœa icterica*. *Diarrhœa cœliaca* illam diarrhœæ speciem efficit, quando scybala cibos semicoctos in se continent. *Lienteria*, five *diarrhœa lienterica* appellatur, si scybalis cibi nihil plane soluti inesse observantur. *Diarrhœa colliquativa* nuncupatur illa diarrhœæ species, ubi scybala lympham copiosam sibi admixtam in se continere deprehenduntur. *Fluxus vero hepaticus* illa diarrhœæ species erit, ubi scybala sero subrubro abundare videntur.

§. CCCXIII.

Obstructio alvi est deficiens excretio per alvum. Cujus morbi causa proxima latebit in motu peristaltico intestinorum descendente valdopere imminuto, respectu vis inertię.

§. CCCXIV.

§. CCCXIV.

Colica vocatur in genere dolor intestinorum. Cujus causam proximam ex §. CXCVI. intelligere poteris.

§. CCCXV.

Passio iliaca, sive *miserere mei*, est ea colicæ species, ubi scybala versus intestina tenuia & ventriculum regrediuntur.

§. CCCXVI.

Præter causam doloris (§. CXCVI.), passio illa sibi quoque vindicabit motum peristalticum intestinorum ascendentem longe majorem descendente (§. anteced.), una cum valvulæ coli deflectione.

§. CCCXVII.

Tenesmus est convulsio musculorum ani. Cujus causa proxima generatim constare poterit ex §. CCLXVIII.

§. CCCXVIII.

Procidentia ani dicitur intestini recti talis distensio, ut illud promineat. Morbi hujus causa proxima latebit in ligamentorum intestini recti debilitate, vel plenaria solutione.

§. CCCXIX.

Paralysis ani est musculorum intestini recti paralysis. Cujus causam proximam generatim cognoscere licebit ex §. CCLXXI.

§. CCCXX.

Infarctus, five *inflatio hepatis*, vel *lienis*, ex tumore molli, in istis visceribus deprehenso, æstimatur; five ex congestione humorum ibidem facta colligitur. Oboriri etiam poterunt in istis visceribus hydatides.

§. CCCXXI.

Hepatis vel lienis infarctus pro sui causa proxima agnoscet modo distensionem coli & ventriculi; modo vasorum in istis visceribus obstructionem; modo illorum in locis quibusdam constrictionem; modo denique ipsorum viscerum affectionum atoniam. Quod vero ad hepatis vel lienis hydatides attinet, harum quoque causa proxima ex eodem principio derivanda erit, ex quo hydatidum ortus in pulmonibus supra explicatus erat (§. CCXCIII.)

§. CCCXXII.

Nephritis calculosa in genere dicitur complexus morborum, ob calculi præsentiam in renibus obortorum. De cujus causa & effectibus deinceps clarius constabit.

§. CCCXXIII.

Stranguria est dolorifica urinæ excretio, eaque guttatim contingens. *Dysuria* vero audit dolorifica urinæ excretio, cum ingenti nisu & pressione connexa. *Ischuria* est suppressio urinæ, sine ullo ad eandem excernendam conatu.

§. CCCXXIV.

Stranguriæ caussa proxima ad sphincteris vesicæ
 nariæ spasmus, compressionem, exulceratio-
 nem redibit, nec non urinæ acri sæpius tribuen-
 erit, unde collum vesicæ, vel urethra; tam-
 en loca admodum sensilia, valdopere affici pos-
 unt. Dysuria sui causam proximam admittit spas-
 mum & compressionem circa fundum vesicæ.
 Hematuria tandem caussa proxima latebit in urete-
 ris obstructione, compressione, spasmis; nec non
 paralyfi fibrarum orbicularium vesicæ, ejusque
 sphincteris spasmis.

§. CCCXXV.

Quandoquidem fieri solet, ut urina ad tantam
 quantitatem excernatur, ut liquidorum in corpus
 humani delatorum copia longe magis superari vi-
 deatur; atque urina ipsa, quæ excernitur, vel
 crassa, sive parum mutata, vel etiam lymphæ re-
 similes esse appareat; ejusque tandem excretio fre-
 quens esse simul observetur. Huic fundamento in-
 fertur notio morbi illius singularis, quem dicere
 solent diabetem. Erit itaque *diabetes* copiosa & fre-
 quens urinæ vel crudæ, vel lymphaticæ excretio.
 appellatur etiam *hydrops ad matulam*. Hujus mor-
 bi caussa proxima latebit vel in nimia debilitate
 renum, urinam secernentium in renibus; vel in
 corruptione & obstructione vasorum lymphaticorum,
 præsertim in visceribus abdominalibus.

§. CCCXXVI.

Incontinentia urinæ est involuntaria urinæ excretio. Cujus causa proxima esse poterit vel solutio vel paralytica debilitas sphincteris vesicæ.

§. CCCXXVII.

Fluor albus est major muci ex utero ejusque vagina, nec non labiis vulvæ excretio, quam requirit status sanitatis. Pro qualitate muci excreti *fluor albus* erit vel *benignus*, vel *malignus*.

§. CCCXXVIII.

Fluoris albi causa proxima redibit ad vasorum in partibus, ab hoc morbo affectis, nimiam debilitatem, constrictionem, compressionem, immobilitatem, solutionem quamcumque. Ad causam vero fluoris albi maligni in specie intelligendam mutum valebunt proposita in §. CLXXVIII.

§. CCCXXIX.

Gonorrhœa vocatur involuntaria atque incommoda feminis & liquidi prostatarum glandularumque urethræ in maribus excretio. Pro conditione liquidi hujus, quod e genitalibus marium excernitur, *gonorrhœa* dividi solet in *benignam* & *malignam*.

§. CCCXXX.

Gonorrhœa pro sui causa agnoscet partium ab hoc morbo afflictarum, præcipue vasorum spermaticorum debilitatem, spasmus, solutionem. Id causa vero gonorrhœæ maligne specialius consistere poterit ex §. CLXXVIII.

§. CCCXXXI.

Impeditum justoque tardiozem humorum motum progressivum per vasa ad morbos in genere continere ex superioribus jam constat (CLXXII). Ad hoc mali genus non solum in omnibus partibus, quas vasa adeunt, obtingere poterit, sed etiam morbi chronici speciem præ se ferre. Nullum igitur dubium erit, quin etiam morbus chronicus oboriri queat, qui in difficili progressu sanguinis per viscera abdominalia consistit. Hujus jam conditionis morbus in sexu potiore *malum hypochondriacum*, sed *hystericum* insequiore appellatur.

§. CCCXXXII.

Mali hypochondriaci & hystERICI causa proxima proficiscitur a vasorum sanguineorum, per viscera abdominis decurrentium, debilitate, depletionem, constrictione, compressione, obstructione, tandemque etiam a spissitudine sanguinis.

§. CCCXXXIII.

Hæmorrhoides in genere vocari poterunt morbi, quos partim ad vasa hæmorrhoidalia, partim ad quicquid, in iisdem contentum, referre licebit. Prout vasa hæmorrhoidalia vel interna, vel externa fuerint, quæ hic magis afficiuntur, *hæmorrhoides quoque* dividi solent in *internas & externas*. Sed hic simul liquet, quod hæmorrhoidum species diversæ possibiles sint; quarum præcipuas explicabunt definitiones sequentes.

§. CCCXXXIV.

Hæmorrhoides fluentes generatim dici merentur extravasationes fluidi in vasis hæmorrhoidalibus contenti. *In specie* tamen *hæmorrhoidum fluentium* nomen tribui solet extravasationibus sanguinis ex vasis hæmorrhoidalibus; sive hæmorrhagiæ, ad vasa hæmorrhoidalia relata. Atque hujus indolis *hæmorrhoides internæ* vulgo putantur.

§. CCCXXXV.

Hæmorrhoides mucidæ, sive *serosæ*, seu *albæ*, sunt extravasationes feri e vasis hæmorrhoidalibus. Hujus conditionis esse communiter habentur *hæmorrhoides externæ*. *Hæmorrhoides serpiginosæ*, sive *serpigo*, vel *sudor hæmorrhoidalis*, erunt species hæmorrhoidum albarum, sed prurientium.

§. CCCXXXVI.

Hæmorrhoides cæcæ nullam extravasationem fluidi, in vasis hæmorrhoidalibus contenti, sed potius alium morbum ibidem supponunt. Tales vulgo esse judicantur *hæmorrhoides externæ*. *Hæmorrhoides turgentes* sunt species hæmorrhoidum cæcarum, quatenus cum tumore ad fines vasorum hæmorrhoidalium connexarum. *Hæmorrhoides tumentes*, *dolentes*, *furentes*, sunt species hæmorrhoidum turgentium, quatenus earum tumor furunculus est.

§. CCCXXXVII.

De hæmorrhoidum in genere causa proxima ex superioribus satis constare poterit, ubi nimi-

um sermo erat de morbis vasorum & fluidorum. Quod vero ad hæmorrhoidum species definitas atinet, ne harum quidem causa proxima ignorari poterit, rite perpensis definitionibus singulis. Et hic hæmorrhoides fluentes congestionem fluidi ad vasa hæmorrhoidalia supponunt, ut illa inde vel disrumpantur, vel ad sui orificia nimis dilatentur. Hæmorrhoides vero cæcæ turgentes & tumentes requirunt fluidi congestionem, ad vasa hæmorrhoidalia ita factam, ut inde stasis ibidem oriatur. Serpiginis tandem hæmorrhoidalis conditio inter reliqua feri acredinem sibi simul vindicat.

§. CCCXXXVIII.

Fluxus menstrui sive *mensium*, vel etiam *catameniorum* nomen tribuitur hæmorrhagiæ uteri, quatenus periodicæ intra menstruum tempus. *Menses decolores* ex eo æstimari solent, quando sanguis, sub fluxu menstruo excretus, valde ferofus esse videtur.

§. CCCXXXIX.

Hæmorrhagia uteri in specie talis vocari solet hæmorrhagia uteri admodum larga, neque periodica intra menstruum tempus.

§. CCCXL.

Fluxus lochialis, sive *lochiorum* nomen competit hæmorrhagiæ uteri, quæ post partum editum contingit.

§. ° CCCXLI.

Fluxus menstrui & hæmorrhagiæ uteri in specie talis causa proxima latebit in sanguine, ad uterum ita congesto, ut illius vasa modo solutionem patiantur, modo in suis orificiis valde dilatentur. Mensium vero decolorum causa proxima vel ad sanguinem ferofum, qui corpori inest, vel ad insufficientem dilatationem vasorum uteri redibit. Fluxus denique lochialis vasorum uterinorum solutionem, ob placentam ab utero separatam, pro sui causa proxima agnoscit.

§. CCCXLII.

Mictus cruentus, quem etiam *hæmorrhoides vesicæ* (sed perperam) dicere solent, est hæmorrhagia ad partes, se-et excretioni urinæ dicatas, relata, atque sub ipsa mictione conspicua. Cujus causa proxima sita erit vel in sanguinis ad eas partes, quæ huic morbo obtemperant, tanta congestione, ut vasorum ibidem ruptio aut nimia dilatatio circa sua orificia subsequatur; vel in arrosione a materia acri, aut læsione, a calculo iidem partibus inducta.

§. CCCXLIII.

Scorbutus est massæ sanguineæ putredo, quæ quidem lente procedit, nihilo tamen minus diversos sui gradus respectu diversorum plexuum vasorum sanguineorum admittit. De morbi hujus causa proxima te generatim edocebunt dicta in §. CLXXVIII.

§. CCCXLIV.

Lues venerea, five *malum neapolitanum*, est putredo lenta, ad universam magis massam lymphatico-serosam relata, simulque connexa cum fluore albo maligno, vel gonorrhœa maligna, nec non cum bubonibus, aut aliis ejusdem farinæ incommodis, ad genitalia productis. De conditionibus causæ proximæ luis venereæ ex superioribus quoque generatim constare poterit (§§. CLXXVIII. CCXXIII. CCCXXVII. CCCXXVIII. CCCXXIX. & CCCXXX.

§. CCCXLV.

Icterus absolvitur diffusionem bilis per totam massam humorum; estque vel *flavus*, vel *niger*; pro diversitate coloris, quem bilis diffusa partibus inducit.

§. CCCXLVI.

Icteri causa proxima posita erit in ductus choledochi, pororum biliariorum & hepatis compressionibus, constrictionibus; obstructionibus.

§. CCCXLVII.

Catarrhi vocabulum generatim transferri solet ad morbos designandos, qui sui ortum vitiis feri quibuscumque debent; *speciatim* vero hoc nomine venire solent gravedo, coryza, phlegmotorrhagia, branchus, raucitas, tussis serosa. Unde jam ex superioribus cognoscitur, quid de catarrhi causa proxima sentiendum sit.

CAPUT V.

DE

MORBIS SENSUUM EXTERNORUM
SIMPLICIBUS.

§. CCCXLVIII.

Sensus externi plurium morborum compotes sunt cum aliis partibus, totum quid efficientibus, communium, atque hactenus pertractatorum.

§. CCCXLIX.

Lipothymia, five *lipopsychia*, five *animi deliquium* vel *defectio* ex manifesto defectu, qui præsertim circa functiones vitales & animales deprehenditur, colligi solet. Ad *syncopen* vero refertur *lipothymia* eminentioris gradus.

§. CCCL.

Impedita nervorum actione in partibus, quarum ope actiones vitales & animales administrantur; *lipothymia* erit necessaria. Hinc etiam *syncope* in casu obvio producetur; impedimentis iisdem supermodum auctis. Ex quo jam de ratione causæ proximæ horum affectuum satis constare poterit.

§. CCCLI.

Affectus soporosi in genere dicuntur vel continuus ad dormiendum conatus, vel somnus magnitudine

modum excedens. Quorum causa proxima labitur in continua quadam partium externarum relaxatione & distentione vasorum, ad encephalon recurrentium.

§. CCCLII.

Pro diversitate gradus, qui causæ isti affectuum sopororum adhæret, hi quoque gradu inter se differunt, adeo, ut modo conatus solum ad dormiendum, modo somnus, uterque etiam mox gravior & perseverantior, mox levior & succisior succedat. Quibus si adhuc accesserit illa affectuum sopororum relatio, quam ad febres habent, in quibus non nunquam observantur; satis tunc constabit de fundamento, cui superstruere solent medici notiones, ad affectuum sopororum species designandas; quarum præcipuæ in §. sequente exhibebuntur.

§. CCCLIII.

Coma vigil est affectus soporosus, consistens in continuo conatu ad dormiendum, sed quatenus est symptoma febris. *Coma somnolentum* dicitur affectus soporosus, consistens in somno magnitudine excedente, quatenus etiam est symptoma febris. *Carus* vocatur affectus soporosus, consistens in continuo, eoque valde notabili conatu ad dormiendum, sed quatenus non est symptoma febris. *Lethargus* appellatur affectus soporosus, consistens in somno magnitudine excedente, quatenus etiam non est symptoma febris.

§. CCCLIV.

Ophthalmia est inflammatio oculi. De cujus causa proxima generatim constare poterit ex §. CXVII.

§. CCCLV.

Vertigo, sive *scotomia*, sive *scotoma*, est talis visus affectio, ut objecta in gyrum quasi moveri videantur, quamvis quiescant. Morbi hujus causa proxima latebit in nervi optici ejusque ramulorum motu tremulo.

§. CCCLVI.

Lippitudo est involuntarius fluxus liquidi serosi ad canthos oculorum. Cujus causa proxima ad vasculorum in oculis constrictionem, debilitatem, & solutionem redibit.

§. CCCLVII.

Cæcitas est abolitio visus. De cujus causa proxima ut satis constet, sequentia momenta notari merentur. Oculo destructo, aut illius pupilla pellicula prorsus obducta, visus peribit. Idem etiam eveniet, opacitate humori crystallino inducta, aut membrana quadam ad humorem aqueum suborta; utpote quod in *suffusione*, sive *cataracta*, obtinet. Neque minus cæcitas ingruet, quando nimirum humor vitreus admodum turbidus fit; quippe quod ad *glaucoma* referri solet. Tandem hic quoque attendenda sunt vitia quædam nervi optici, ut sunt compressio, concretio, rigiditas, paralytica debilitas, quæ in *amaurosi*, sive *gutta serena*, locum habent.

§. CCCLVIII.

Dolor, ad aurem relatus, dicitur uno vocabulo *algia*; ad dentes, *odontalgia*; ad caput, *cephalgia*, & sic porro. Quæ generatim de causa doloris proxima supra jam dicta sunt (§. CXCVI.), a hic quoque valebunt.

§. CCCLIX.

Susurrus est motus aëris sibilans in meatu auditorio. *Tinnitus* vero dicitur motus aëris in meatu auditorio sonans. Horum affectuum causa proxima aëris, in meatu auditorio contenti, motum formem atque inæqualem redibit.

§. CCCLX.

Surditas est abolitio auditus. Cujus causa proxima latebit vel in ceruminis aurium induratione; vel in tympani relaxatione, aut ejus plenaria solutione; vel in obstructione, aut scirrho glandularum in meatu auditorio; vel denique in nervi acustici paralytica debilitate.

§. CCCLXI.

Olfactus quoque defectus pro morbo habendus erit; de cujus vero causa proxima sequentia tenenda erunt. Adeste hic nimirum poterit materia quedam, orificia vasorum membranæ pituitariæ obstruens. Quandoquidem etiam fieri poterit, ut papillarum nervearum in cavo nasi adsint varii generis vitia, aut illarum plenariæ abolitiones. Tandemque olfactui valdopere officiet nervi olfactorii paralytica debilitas.

§. CCCLXII.

Similiter etiam gustus defectus loco morbi æstimandus erit; cujus causam proximam ad sequentia momenta reducere licebit. Sæpius hic contingere solet, ut a materia aliqua viscida & tenaci superficies linguæ obducatur, indeque impediatur, quominus actio in papillulis nerveis excitari possit; licet corpora, ad saporem producendum idonea, linguæ admoveantur. Sed necesse etiam erit; ut ob vasculorum linguæ obstructions, vel papillarum nervearum ibidem factas abolitiones, tandemque linguæ ipsius paralyfin gustus deficiat.

§. CCCLXIII.

Aphonia, sive *vocis defectus*, est impotentia loquendi. Cujus causa proxima sita esse poterit in linguæ spasmō, paralyfi, destructione, concretione ad frenulum versus illius apicem nimis protensum tandemque in spasmī cynici & risus sardonii pertinacia.



CAPUT VI.

DE

ORBIS SENSUUM INTERNORUM
SIMPLICIBUS.

§. CCCLXIV.

MOrbi sensuum internorum, five animi, medicis dicuntur morbi, qui partibus corporis communi, exercitio facultatum animæ inferiorum proximæ inservientibus, ita inhærent, ut in harum facultatum animæ usu vel defectus, vel perturbatio quædam manifesto apprehendi liceat.

§. CCCLXV.

Animi morbus, quem potius in casu obvio ad notabilem perturbationem usus facultatum animæ inferiorum referre licet, *in genere* dici solet *delirium*. Quod si vero ille magis reduci possit ad manifestum aliquem defectum in exercitio earundem facultatum animæ inferiorum, *morosis*, five *moria*, *ve stupiditas*, five *fatuitas*, appellari solet.

§. CCCLXVI.

Delirium connexum cum insolito robore membrorum, vel intensa actione aliarum partium muscularium nomen *delirii in specie talis*, five *delirii maniaci*, fortitur. Ad differentiam *delirii melancholici*, ubi ejusmodi insolitæ virium moventium in membris, aut partibus aliis muscularibus exacerbationes non sunt conspicuæ.

§. CCCLXVII.

Delirium in genere (§. CCCLXV.) instar morbi cujusdam vel acuti, vel chronici apparere poterit. Si prius, dicitur tunc esse *delirium acutum*, five etiam *phreniticum*, Si posterius, vocabitur *delirium chronicum*. Utrumque porro delirium, five illud fuerit acutum, five chronicum, pro diversitate nimirum casus, mox ad *delirium in specie tale*, five ad *delirium maniacum*, mox vero ad *delirium chronicum* (§. anteced.) referri poterit. Delirium tandem maniacum simulque chronicum dicitur etiam *mania*, five *furor*. Quum e contrario nomen *melancholiæ* delirio melancholico, quod simul chronicum est, tribui soleat.

§. CCCLXVIII.

Ex inæqualitate vis & nimia celeritate in producendis ideis materialibus, five & nervorum motu per cerebrum admodum accelerato atque inæquali usus facultatum animæ inferiorum perturbatus explicari poterit. Unde jam de conditione causæ proximæ deliriorum in genere (§. CCCLXVI) constabit. Quoniam vero delirium in specie tale, five delirium maniacum eo differt a melancholico, ut ibi augmenta virium insolita in membris, vel partibus aliis muscularibus simul adesse, hic vero abesse deprehendantur (§. CCCLXVI.): sequitur, ut ad deliria maniaca, præter causam modo indicatam, a qua facultatum animæ inferiorum perturbationes in exercitiis suis proficiscuntur, adhuc accedat justo celerior & valentior motus nervorum motoriorum. Hinc etiam delirii maniaci causâ proxima manifesta

ita erit. Ex quibus adeoque colligere licebit, quas rationes reditura sit causa proxima deliriorum tam in genere, quam in specie, consequenter etiam maniae & melancholiae (§§. CCCLXV. CCCLXVI & CCCLXVII.)

§. CCCLXIX.

Ad morosis vero causam proximam quod attinet, illa non nisi in nervorum per cerebrum morbo admodum retardato & languescente quaerenda erit (§. CCCLXV.)

§. CCCLXX.

Medicis jam dudum fuit solemne, melancholiam & maniam in certas species distribuere. Distributionis hujus duplex ratio est. Prima nimirum promittitur a conditione ideae maxime dominantis in homine mente capto, atque ab ipso vel verbis, vel actionibus expressae; exemplo melancholiae, vel maniae, utriusque modo tristis, modo jucundae. Secunda ratio, quae hic locum habet, originem suam ducit ab externis quibusdam mutationibus, corpori inductis, quas vero non numquam mentis alienationes excepisse, experientia docuit; quorum exempli loco pertinet morsus animalis cujusdam rabidi. Clarius haec constabunt ex §§. proxime sequentibus, in quibus jam continebuntur frequentiores melancholiae & maniae species definitae.

§. CCCLXXI.

Erotomania est vel melancholia, vel mania, quatenus connexa cum appetitu ad venerem.

Furor uterinus dici solet erotomania in sexu sequiore.

§. CCCLXXII.

Chorea S. Viti est modo melancholia, modo mania, quatenus connexa cum desiderio saltandi.

§. CCCLXXIII.

Tarantismus est vel melancholia, vel mania, quatenus connexa cum ictu tarantularum.

§. CCCLXXIV.

Hydrophobia est mania, quatenus connexa cum averfatione corporum fluidorum & splendorum. *Rabies canina* est hydrophobia, quæ morsum canis rabidi sequitur. *Lycanthropia* est hydrophobia, quæ lupi rabidi morsum sequitur.

§. CCCLXXV.

Furor poëticus, sive *raptus poëticus*, est mania, quatenus connexa cum insigni promptitudine verba in numeros cogendi.

§. CCCLXXVI.

Noctambulatio, sive *noctisurgium*, sive *somnambulatio*, est melancholia, quatenus connexa cum somno & motu progressivo corporis.

§. CCCLXXVII.

Nostalgia est melancholia, quatenus connexa in desiderio redeundi in patriam.

§. CCCLXXVIII.

Definitæ species morborum animi (§§. CCCLXXI. CCCLXXVII.), ratione causæ suæ proximæ, in genere respondebunt propositis in §. CCCLXXVIII. Specialiora vero, quæ ad hoc argumentum pertinerent, infra loco suo ex observationibus magis elucidabuntur.

§. CCCLXXIX.

Debilitas memoriæ est illa species morosis, quæ cum defectu memoriæ valde notabili connexa esse apprehenditur.

§. CCCLXXX.

Causa proxima debilitatis memoriæ jam in genere ex superioribus patet (§. CCCLXXIX.); de qua vero specialius infra ex observationibus constabit.

§. CCCLXXXI.

Marasmus senilis morosin in genere supponit, tamque cum universali quadam & tali solidorum debilitate connexam, qualis ordinario in sene decrepito oboriri solet, ob majorem nimirum aquæ elementis defectum, quam qui in rigiditate adest.

§. CCCLXXXII.

Hinc marasmi senilis causam proximam generatim intelligere poteris ex §§. XXII & CCCLXIX plura alia specialiora de eodem argumento infra percepturus.

Quod jam in sequentibus fiet, ubi morbi simplices, de quibus libro isto egimus, in varia compositione sua, hinc ita, prout corpori humano insunt, considerabuntur (§§. XXXIX. XLI & XLII. *prolegom.*) Perficere id conabimur eo ordine, quem leges methodi, aptæ ad perspicue intelligendos morbos, præcipiunt (§. XLIII. *prolegom.*)

Libri Primi de Morbis Simplicibus

F I N I S.



LIBER SECUNDUS.

DE

MORBIS COMPOSITIS.

CAPUT I.

DE

RIGIDITATE ET DEBILITATE SOLIDORUM
IN GENERE.

§. CCCLXXXIII.

Osita rigiditate solidorum (§. XVII.), poni
simul debent immobilitas membrorum; ni-
mia resistantia vasorum in fluida; pulsus du-
s (§. CXXXVII.); tandem concrefcentia va-
rum (§. CVII.); decrementum corporis (§.
CLXXVIII.); stases multiplices (§. CLXXIV.)

Dictorum in §. veritatem confirmant exemplo
suo præ aliis senes, aut qui duro vitæ genere,
vel spasmodum atrocitate & pertinacia longe ma-
turius senescere videntur. Explicatius hæc pro-
ponentur in prælectionibus.

§. CCCLXXXIV.

Descripti in §. antec. effectus rigiditatis, hujus si-
a pathognomica sufficientia suppeditare poterunt.

§. CCCLXXXV.

Ad rigiditatis vero signa prognostica quod attinet, illa rite inventurus attendat ad morbi differentem gradum, ejusque notabiles effectus in partibus vel nobilioribus, vel ignobilioribus.

Hinc patet, quod ad hoc negotium in casu obvio multo facilius expediendum, plurium aliorum morborum, de quibus in subsequentibus sermo erit, exacta cognitio requiratur; quorum imprimis pertinebunt viscerum horumque vasorum morbi. Cujus rei exempla excitabuntur in prælectionibus.

§. CCCLXXXVI.

Posita partium solidarum debilitate (§. XX.); poni simul debent illarum facilis extensio; imminuta actio vasorum in fluida; pulsus admodum debilis & mollis (§§. CXXXVI & CXXXVII.); stases (§. CLXXIV.); tandemque solutiones continui perquam faciles (§. XXIV.)

Hæc etiam cum observationibus probe consentire, in prælectionibus ostendetur. Valebunt hic inter alia exempla senum decrepitorum corpora sicca, vel admodum succulenta phlegmaticorum

§. CCCLXXXVII.

Quæ in §. anteced. continentur, ea simul videri habere poterunt signorum pathognomicorum sufficientium debilitatis. Quoniam vero partium solidarum debilitas duplicis generis est; prout nimirum aqua vel magis deficit in elementis inter se coherentibus, quam in rigiditate, vel magis ibidem

abundat, quam cum sanitate congruit (§. XXII.): præter modo indicata signa debilitatis, in ejus casu priore adhuc notari debent ossium fragilitas, atque habitus corporis admodum emaciatus; in casu vero posteriore, habitus corporis magis inflatus, atque ossium mollities. Unde jam satis constabit de signis pathognomicis debilitatis utriusque generis.

§. CCCLXXXVIII.

Debilitatis vero accurata prognosis requirit, ut ratio probe habeatur & gradus diversi, quem morbus in corpore jam obtinuit, & conditionis partium, quæ præ reliquis ab illo affliguntur. Hic igitur quæque valebunt, quæ jam ad §. CCCLXXXV. notata sunt. Sed unum adhuc momentum hic addendum erit, quod ad illam magis debilitatem respiciet, quæ originem suam in abundantia aquæ agnoscit, elementis partium solidarum admixtæ. Ope scilicet excretionum naturalium fluidi aquei copia notabilis corpori subtrahitur. Nonne igitur fieri poterit, ut hoc modo status ægri in melius vergat.

CAPUT II.

DE

PLETHORA GENERATIM.

§. CCCLXXXIX.

Plethoræ (§. CLXIV.) symptomata necessaria esse debent; distensiones vasorum (§. XCV.); pulsus magnus (§. CXXXV.), ob molem sanguinis, ejusque retardatum reditum ex vasis par-

tium externarum, nec non majorem coactionem in vasis debilioribus aliis; artuum gravitas; obdormitio, torpor corporis; frequentes vertigines; itemque sensibilitas, quæ a frigore & æstu mirum in modum exacerbatur.

§. CCCXC.

In corporibus admodum plethoricis se-et excretiones naturales inde impediri poterunt, quia vasorum distensiones (§. anteced.) tantæ jam fient, ut inde jam plura alia vasa partim constringantur, partim comprimantur (§§. XCIII. CIII & CIV.)

§. CCCXCI.

Vasorum debilitas illorum distensiones tandem sequi solet. Hinc fieri poterit, ut succedente tempore sanguis plethoricorum spissescat (§§. CLXXXV & CCCLXXXIX.), & sic ex plethora simplice composita quædam suboriatur (§. CLXVI.)

Exstabant loco suo exempla, quorum quædam in prælectionibus indicabuntur, ex quibus manifesto apparebit singularum propositionum, quæ in §§. anteced. continentur, consensus cum observationibus.

§. CCCXCII.

Plethoræ signa pathognomica sufficientia ex propositis in §. CCCLXXXIX. satis clare intelliguntur.

§. CCCXCIII.

De signis vero prognosticis plethoræ sequentia tenenda erunt. Hæmorrhagiis, aut excretionibus aliis naturalibus auctis quidem, sed non supra modum, plethora salutariter solvitur. Ubi vero ejusmodi quid non contingit; tunc ex specie morbi urgentis, a plethora producti, prognosis formanda erit.

CAPUT III.

DE

SPISSITUDINE HUMORUM IN GENERE.

§. CCCXCIV.

QUando humorum spissitudo in corpore jam invaluit; tunc simul adsint, oportebit, stases, præsertim in vasis minimis (§. CLXXIV.); inæquales distensiones vasorum, pulsus durus & inæqualis (§§. CXXXVII & CXXXVIII.); frequentes cordis palpitationes (§. CXLIX.); se-et excretionum naturalium impedita successio; somnus inquietus; pallor in facie & extremorum frigus fere continuum.

Quod probe congruit cum observatis, id melancholicorum exemplis inter alia probantibus.

§. CCCXCV.

Sanguis spissus, teste observatione, colorem magis in nigrum ruentem continuo referre solet.

§. CCCXCVI.

Spissitudinis humorum signa pathognomica ex §§. anteced. satis manifesta sunt; de prognosticis vero sequentia notanda erunt. Motibus febrilibus determinati gradus humores spissi resolvi possunt. Præter hæc vero attendatur ad notabiles quosdam effectus morbi; habita nimirum ratione unius vel alterius partis, quæ ab illo magis afficitur.

CAPUT IV.

DE

CACOCHYMIA IN GENERE.

§. CCCXCVII.

QUoniam cacochymia differentem statum massæ humorum involvit (§. CXCIIL.); sequitur, necesse etiam esse, ut cacochymię effectus pro diversitate casus inter se differant.

§. CCCXCVIII.

Et sic cacochymię spissæ & viscidæ effectus redibunt generaliter ad illos, de quibus modo actum est in cap. præced. De cacochymia vero illa, quæ humorum tenuitatem supponit, hoc sciendum erit, quod præter retardatum motum humorum progressivum, & facilem corporis intumescentiam, hic quoque stases haud difficulter suboriri possint (§. CLXXIV.) Quod denique ad acrimoniæ casum respicit, qui æque ad cacochy-

miam referri solet; nullum dubium erit, quin tunc arroſiones producantur variæ in ſolidis, pro gradu nimirum acrimoniæ diverſo, quo pollet materia acris, hujusque ad differentem quantitatem in locis diverſis exiſtentia.

§. CCCXCIX.

Cacochymia differentes caſus tibi facile cognoscere licebit ex modo prolatis ad §. præced. Quod vero ad ejusdem morbi ſigna prognostica concernit; ea quoque haud difficulter ex iisdem principiis erueri poteris; rite perſpecta effectuum in corpore cacochymico conditione. Specialius ad prognosin cacochymia, quæ humorum tenuitate & acrimonia abſolvitur, id adhuc pertinebit; fieri nimirum poterit, ut excretionibus ſeroſis paulo auctioribus, maxime poſt motus febriles, hæc cacochymia ſpecies ſalutariter ſolvatur.

CAPUT V.

DE

STASIBUS ET OBSTRUCTIONIBUS GENERALITER.

§. CCCC.

STasibus & obſtructionibus (§§. XCIX & CLXXIII.) in integris vaſorum plexibus jam obortis; neceſſe erit, ut tum in illa parte, ad quam iſta vaſa decurrunt, tumor producat, & quidem plus minusve dolens; pro ratione ſcilicet partis affectæ, magis vel minus nervosæ (§. CXCVI.)

§. CCCCI.

Si stases & obstructiones vasa occupaverint, quæ fluidum, e quo secretio perficienda est, ad vasa secermentia devehunt; vel hæc ipsa stasibus & obstructionibus obnoxia facta fuerint; nulla tum ibi secretio possibilis erit. Quod etiam probant observationes.

§. CCCCII.

Quando in vasis, quæ vel ad partes intra cavitates contentas, vel ad profunditatem cutis feruntur, stases & obstructiones nascuntur; tunc spasmus periphericus necessarius erit (§. CCXXXVII.)

§. CCCCIII.

Quæ de stasibus & obstructionibus in §§. antec. prædicantur, ea quoque pro signis pathognomicis sufficientibus morbi haberi poterunt. Ratione vero signorum prognosticorum notari meretur, quod hic moderati motus febriles sæpius proficiant. Præter hæc necesse erit, ut ad loca, a morbo potissimum affecta, ejusque magnitudinem, animum dirigas tuum; exactiorem inde deducturus prognosin beneficio principiorum infra obviorum.

CAPUT VI.

DE

HUMORUM CONGESTIONIBUS IN GENERE.

§. CCCCIV.

Partes, ad quas humorum congestiones (§. CLXXV.) fiunt, tumefieri, dolore (§. CXCVI.), aut saltem sensu gravativo affectæ esse debent.

§. CCCCIV.

Si partes magis internæ congestionibus subjiciantur; oborietur tunc spasmus periphericus (§. CCXXXVII.), cum aspectu ægri emaciato ad sensum apparente.

§. CCCCVI.

Quando congestiones sanguinis versus illas partes contingunt, quæ vasorum dilatationem, vel ruptionem permittunt; tunc hæmorrhagiæ (§. CLXXX.) consequi debent, per quas congestiones ipsæ solvuntur. Quod si vero nulla consequatur hæmorrhagia, congestionibus tamen cum impetu perseverantibus; inflammatio ibidem extimescenda erit (§. CXVII.)

§. CCCCVII.

De congestionum signis pathognomicis sufficientibus satis jam constare poterit ex §§. CCCCIV & CCCCIV; ratione vero prognosis ejusdem morbi, res ita sese habebit. Æqualiter facta humorum distributione, quæ sub universali transpiratione sensibili contingit, congestiones quæcumque admodum imminuuntur. Quid ratione congestionum sanguinearum hic notandum sit, id jam ex §. præced. patebit. Præter hæc omnia conveniet tandem in casu obvio ad loca magis affecta, & morbi acerbitatem attendere.

CAPUT VII.

DE

INFLAMMATIONE, GANGRÆNA ET SPHA-
CELO GENERATIM.

§. CCCCVIII.

OMnis inflammatio stasin & obstructionem in vasis sanguineis, vel etiam sanguinis extravasationem intra cellulofam fupponit (§§. CXVI & CXVII.)

§. CCCCIX.

Inflammatiō exigui ambitus se mox ad majus spatium extendere potest; & omnis pars inflammata rubere, nec non dolore ardente affecta esse debet (§§. CXVI & CXVII.)

§. CCCCX.

In omni parte inflammata pulsus fortis adfit, oportebit (§§. CXVI. CXVII. & CXXXVI.)

§. CCCCXI.

In inflammationibus quibuscumque, præcipue in internis & phlegmone (§. CCXXI.), semper adesse debent motus febriles (§§. CCXXXVII & CCXXXVIII.)

§. CCCCXII.

Partes, gangræna affectæ, magis dolere debent, quam inflammatae, & colorem ex rubro jam ad nigrum vergentem referre (§. CXVI.)

§. CCCCXIII.

Partes, in quibus jam sphacelus obtinuit, insensiles factæ sunt; colorem lividum, vel nigrum habent; foetorem cadaverosum spirant (§. CXVIII.)

§. CCCCXIV.

Quadruplici modo, teste experientia, inflammationes solvuntur.

I. Per discussionem, sive per sanguinis restagnantis plenariam resolutionem; qua nimirum peracta, inflammatio prorsus evanescit, & pars affecta pristinae integritati suæ restituitur.

II. Per suppurationem, sive inflammationis transitum in apostema.

III. Per scirrhum.

IV. Per gangrænam & sphacelum.

§. CCCCXV.

Inflammationis solutio per discussionem requirit, ut particulæ sanguinis restagnantis mobilitate quadam adhuc gaudeant (§. anteced.)

§. CCCCXVI.

Inflammationis vero transitus in abscessum supponit fluidioris portionis sanguineæ ablationem aliquam, crassiore relicta ad genesis puris per fermentationem (§. CCVII.)

§. CCCCXVII.

Quod porro ad inflammationis solutionem per scirrhum attinet; necesse tunc erit, ut fluidiore

portione sanguinis fere prorsus ablata, ejus partes magis crassæ & terreæ relinquantur, ad suppurascendum inertes, atque scirrhi (§. CCX.) materiam constituentes.

§. CCCCXVIII.

Vasa non admodum debilitata solum, sed jam fere soluta adsint, oportebit; inflammatione ad gangrænam perducta (§. CXVI). Sed a gangræna proximus est lapsus in sphacelum; ubi sanguinis putrefactione vasa, & quid cum illis cohærebat, in locis inflammatis plenarie destruuntur (§. CXVIII.)

§. CCCCXIX.

Extra omne dubium positum est, eam inflammationis solutionem bonitate præ reliquis præstantissimam esse, qua parti affectæ pristina integritas sua mox, & sine novi in eadem morbi productione restituitur. Hinc aliæ inflammationis solutiones præter modo indicatam, bonitate sua inferiore erunt. Circa inflammationis itaque solutiones ad erunt bonitatis gradus, sequentem in modum constituendi. Ea nimirum inflammationis solutio, quæ fit per discussionem, omnium optima dici poterit; quæ vero transitu in apostema absolvitur, bona quidem, priore tamen inferior erit; quæ post scirrhum fit, proxime antecedente adhuc pejor erit; quæ tandem gangræna & sphacelo perficitur pro pessima inter quascumque alias ideo habenda est, quia parti affectæ plenariam destructionem & vitæ interitum minatur.

§. CCCCXX.

§. CCCCXX.

Ad signa pathognomica sufficientia inflammationis pertinebunt, dolor ardens, de quo æger in parte certa corporis conqueritur; cuticula cærulei coloris, quæ ex urina ægrotantis, præsentè imprimis motuum febrilium augmento, ad vitri latera, teste observatione, nascitur; rubor denique insolitus, quem videre licet in parte externa inflammata. Inflammationis vero, ad gangrænam, vel sphacelum perductæ, signa sufficientia tibi suppeditabunt §§. CCCCXII. & CCCCXIII.

§. CCCCXXI.

Signorum tandem prognosticorum inflammationis cognitio innititur in casu obvio tam partis affectæ indoli, quam etiam morbi magnitudini. Quare tibi hic jam facem quasi præferre poterunt proposita in §§. CCCCXII. CCCCXIII. & CCCCXIX.

CAPUT VIII.

DE

VULNERIBUS IN GENERE.

§. CCCCXXII.

Circa vulnus (§. CXCVII), quod parti cuidam, non ita capacibus arteriis præditæ, infligitur, sequentia phænomena occurrere observantur.

K

I. Labia vulneris, ejus quoque caussa externa remota, a se invicem magis resiliunt.

II. Sanguis initio cum impetu fluit, deinde sensim sistitur, & crusta cavo vulneris innascitur.

III. Atque tum liquidum tenue rubellum e vulnere manat.

IV. Labia vulneris inflammantur.

V. Tum dolor increscit, & febris ingruit.

VI. Interim liquidum tenax, flavescentis coloris, pus scilicet nascitur. Et tunc evanidum fit phænomenon ad numerum præcedentem.

VII. Tandem vulnus a fundo sursum, & ab ambitu versus centrum increscit, coit margo, vulnus exsiccat, cicatrice relicta.

§. CCCCXXIII.

Ob solutionem vasorum sanguineorum in parte vulnerata hæmorrhagia vulneris necessaria erit (§. CLXXXII.)

§. CCCCXXIV.

Fibræ vasorum elasticæ sunt, quæ jam solutæ resilire debent, vulnere parti inducto. Hinc efficitur, ut fibrarum finibus ad axin vergentibus, vasorum diameter angustior reddatur. Unde tandem hæmorrhagia, quæ sub initio cum impetu aderat, cessabit, & loco sanguinis serum magis e vulnere effluet. Ex quibus jam constabit de ratione phænomenorum, descriptorum ad §. CCCCXXII. numer. II. & III.

§. CCCCXXV.

Ob causſam inflammationis neceſſariam, quæ a vaſorum ſanguineorum conditione in parte vulnerata proficiſcitur, neceſſaria quoque erit inflammatio ipſa. Hinc effectus inflammationis neceſſarii, ut dolor, febris. Unde jam ratio liquida erit phænomenorum indicatorum in §. CCCCXXII. *numer. V.*

§. CCCCXXVI.

Inflammatio partis vulneratæ eſt cauſſa doloris & motuum febrilium (§. ant.). Hinc effectus iſti ceſſare debent, ſuppuratione ſuborta; quippe qua inflammatio ſolvitur (§. CCCCXIV.). Unde ſatis aperta erit ratio phænomeni annotati in §. CCCCXXII. *numer. VI.*

§. CCCCXXVII.

Ceſſante inflammatione, ceſſant quoque diſtenſiones vaſorum ſanguineorum. Quare tunc fibræ partis vulneratæ propius ad ſe invicem accedent. En rationem conſolidationis neceſſariam (§. CCCCXXII. *num. VII.*)!

§. CCCCXXVIII.

Vulnera partium externarum dignoſci poſſunt ex ſolo adſpectu; ad caſum rite applicata definitione vulneris (§. CXCVII.). Vulnerum vero internorum ſigna pathognomica ſufficientia ex ſymptomatibus & cauſſis, præcipue externis validioribus admiſſis, eruenda erunt.

§. CCCCXXIX.

Prognosis vulnorum maxime dependebit a cognitione qualitatis partium vulneratarum, & magnitudinis tam vulnorum, quam etiam inflammationis, iisdem supervenientis.

Clarius hæc patebunt ex exemplis, quæ in prælectionibus excitabuntur.

CAPUT XIX.

DE

ULCERIBUS IN GENERE.

§. CCCCXXX.

Ulcera (§. CXCVIII.) in partibus magis exsanguibus nascuntur; non exclusis hic quoque aliis partibus, quarum solutiones insequi poterunt mutationes, ut exsanguibus æquipolleant (§. CCII.)

§. CCCCXXXI.

Pus, in abscessu diu detentum, acredinem concipere potest (§. CCVIII.)

§. CCCCXXXII.

Si fibræ laxæ, vel constrictæ ad labia ulceris fuerint, tunc facile generabitur ulcus callosum (§. CCIII.)

§. CCCCXXXIII.

Quod si materiæ ulcerosæ ejusmodi quid admixtum fuerit, de quo constitit, quod illud præ reliquis compos sit fermentationis & putrefactionis, sive vi quadam fermenti polleat; consequens tunc erit; accessione ejusmodi massæ ad materiam ulcerosam; hanc magis corrumpi; & acriorem fieri.

§. CCCCXXXIV.

Ex copiosa igitur affusione liquidi salivalis, vel sanguinis ad materiam ulcerosam, hujus acrimonia magis augeri, & ulcus in pejus ruere poterit (§. anteced.)

§. CCCCXXXV.

Quo magis æger cacochymicus est, eo magis ulcera acria fieri poterunt, quæ in illius corpore generantur (§. CXCI.)

§. CCCCXXXVI.

Ulcera qualificata facillime fieri possunt & sinuosa, & fistulosa (§§. CC. & CCI.)

Singulæ propositiones §§. antec. confirmat experientia. Hac enim præceptrice constat, abscessus sero apertos in ulcera pessimi moris degenerare; applicationem nimis frequentem pinguium, adeoque relaxantium, & remediorum stypticorum, hinc fibras constringentium, sequi callos ulcerum; ulcera, in cavitatem oris hiantia, difficillimæ esse curationis; & quæ in locis suboriuntur, ad quæ sanguinis aditus facilis est, acerrimam concipere materiam, ut exemplo esse potest cancer; venereis, scorbuticis, cachecticis ulcera aboriri

peffimi moris ; tandemque ulcera cacochymicorum sæpius effe finuofa & fiftufofa.

§. CCCCXXXVII.

Ulcera, pro conditione partium affectarum plus minusve dolent, ita tamen, ut ifte doloris gradus mox remittat, mox intendatur ; prout nimirum materiæ ulcerofæ acrimonia fuerit, hinc ejus modo majores, modo minores arroffiones ; nec non pro ratione inflammationis ulceribus tunc fupervenientis, qua non exigue depravationes locis exulceratis inducuntur (§. CCCCXXXIV.)

§. CCCCXXXVIII.

Ulcera externorum figna pathognomica fufficientia fatis clare intelliguntur ex definitionis (§. CXCVIII.) recta applicatione ad cafum. Quod vero ad ulcera internorum diagnofin attinet ; hanc deducere licebit ex caufarum admiſſarum conditione, fymptomatibus, atque omnium maxime ex motuum febrilium peculiari illa indole, quæ febri lentæ propria effe folet ; de quo argumento fpecialiora loco fuo exftabunt.

§. CCCCXXXIX.

Ulcera prognofis eruenda erit ex confideratione locorum affectorum & morbi magnitudine.

CAPUT X.

DE

SCIRRHIS IN GENERE ET IN SPECIE DE
CANCRO TAM OCCULTO QUAM
APERTO.

§. CCCCXL.

POsito scirrho (§. CCX.) in parte quadam ; poni simul debent congestiones ad partem affectam æque , ac alias partes , quæ adhuc a scirrho immunes sunt (§. CLXXVI.)

§. CCCCXLI.

In scirrhis adeoque congestionum symptomata simul adsint , oportet (§. anteced.)

§. CCCCXLII.

Subjecta ad scirrhos præ reliquis proclivia esse debent , quæ congestionibus (§. CLXXV.) , vasorum constrictionibus (§. XCII.) , obstructionibus (XCIX.) , tandemque dyscrasiæ humorum (§. CXCI.) sunt obnoxia.

Quod apprime confirmat experientia. Victu enim crasso utentes scirrhis subjiciuntur ; importata illorum corpori humorum dyscrasia. Familiæ porro sunt scirrhii hypochondriacis & hysterics , quibus hæmorrhagiæ subito supprimuntur ; nam hic necessariæ sunt congestiones sanguinis versus alias partes , obstructiones vasorum. Obstruuntur etiam vasa feminis , quibus lac in mammis coagulatur ; sed hæc etiam scirrhos per-

sæpe patiuntur. Quotiescumque scirrhi oboriuntur hominibus, admisso adstringentium abusu!

§. CCCCXLIII.

Cancer (§. CCXII.) non nisi in locis glandulosis, aut etiam illis generatur, quæ ratione pluralitatis vasorum lymphatico-ferosorum cum prioribus conveniunt.

§. CCCCXLIV.

In cancro inflammatio quædam adesse debet (§§. CXVI et CCXII.).

§. CCCCXLV.

Pars cancro affecta dolore ex inflammatione & ærosione composito torqueatur, oportet (§. ant.)

His quoque esse consona deprehenditur experientia. Ejusmodi enim scirrhi ad tactum sæpe calidissimi sunt; æger de rosionis continuo sensu conqueritur. Exemplo hic sint feminæ, quibus cancer ad mammas oboritur.

§. CCCCXLVI.

Congestionēs, ad cancrum occultum provocatæ, hunc & augment, & efficiunt, ut ille eo citius degeneret in apertum (§§. CCXII. et CCCCXLII.)

§. CCCCXLVII.

Ex §. anteced. intelligere jam licet, quare emollientia, improvide applicata, orgasmi humorum, ex cancro occulto facile apertum faciant? Et

cur jam veteres medici cancrum occultum vocaverint, *noli me tangere*?

§. CCCCXLVIII.

Materia, quæ e cancro aperto promanat, esse solet modo crassioris, modo tenuioris consistentiæ; foetoris abominabilis quidem, ad sensum tamen multum differentis per intervalla. Ad indolem hujus materiæ magis introspiciendam, sine dubio aliquid facient experimenta sequentia. Admoto nimirum acido vitriolico volatili ad materiam ulceris cancrofi, ita, ut hujus materiæ exhalationes se cum acidi exhalationibus in aëre contingere possint, fumus tunc aliquis suboriri deprehenditur. Quod vero alio tempore non fit; licet idem experimentum cum materia cancri, ex eodem ægro desumpta, capiatur. Sed jam substitue acido vitriolico volatili spiritum salis ammoniaci, aut alium urinosum; servato quoad reliqua modo eodem procedendi: videbis tunc iterum fumum illum nasci, ut in experimento priore. Voluerunt etiam alii effervescentiam aliquam notabilem vidisse, subortam ex materiæ cancrofæ facta commixtione cum terris absorbentibus. Alio etiam tempore contingit, ut neque ab acidi vitriolici, neque ab alcali volatilis admotione ad materiam cancri, fumus quidam concitetur. Verum enim vero subjecta eadem materia cum calce viva urinosum extorquetur, quod & nares statim afficit, & visui se distincte prodit fumi productione, per acidi vitriolici volatilis supra indicatam applicationem.

§. CCCCXLIX.

In cancro itaque fluidum lymphatico - serofo-
fanguineum veram putredinem concepit , eamque
chronicæ indolis [§. anteced.]

§. CCCCL.

Constat jam ex §. antec. ratio, cur cancer aper-
tus nonnullis quoque dicatur *sphacelus chronicus*?

§. CCCCLI.

Quoniam experimenta , in §. CCCCXLVIII.
descripta , satis aperte docent , materiam ulceris
cancrofi non omni tempore unam eandemque salis
speciem in se continere , sed in eadem mox acidum ,
mox alcali volatile , mox etiam salem ammoniacum
latere : consequens omnino erit , putrefactionem in
cancro adesse quidem chronicam , diversam tamen
per intervalla ratione gradus & effectuum producto-
rum in mixto.

§. CCCCLII.

Unde patet , statum ulceris cancrofi ratione qua-
litatum materiæ ulcerosæ non eundem semper per-
durare , sed continuo mutari (§. anteced.).

§. CCCCLIII.

Si cancer, sive ille occultus, sive jam apertus fuerit,
in locis , ubi magna vasa sanguinea sita sunt , oria-
tur , tum lethales hæmorrhagiæ haud difficulter
subsequi poterunt.

Quod multoties tristis confirmavit experientia ?

§. CCCCLIV.

Scirrhi, in partibus externis nati, rite applicata definitione, solo tactu dignosci possunt. Quod etiam de scirrhis valebit, in partibus internis obortis, ubi nulla adfuerit resistentia in vim tangentem. Quando vero casus obtinuit, ubi hæc signa locum non habent; tunc animadvertenda erunt ea, quæ exhibentur in §§. CCCCXI - CCCCXII. Specialiora adhuc ad scirrhorum internorum diagnosis infra obvenient.

§. CCCCLV.

Ratione prognosis scirrhorum in genere notare conveniet, quod, quando adhuc recentes fuerint, quandoquidem a febre resolvantur. Sed quando jam materia scirrhi cum parietibus vasorum, aut membranis aliis concrevit; morbus tunc continuo perseverabit; nisi forte per lentam suppurationem e medio tollatur. Solet vero inflammationis accessio ad scirrhos, si præsertim inveterati fuerint, eosdem in ulcus pravæ indolis convertere. Auctis denique congestionibus ad loca affecta, præter mala alia, scirrhi majora incrementa fient.

§. CCCCLVI.

Signa in specie canceri occulti pathognomica sufficientia erunt, præter signa scirrhi in genere [§. CCCCLIV.], locorum affectorum conditiones [§. CCCCXIII.]; sensus doloris rodentis continuus, ejusque ab interveniente inflammatione frequens exacerbatio [§. CCCCXV.]; tandemque striarum rubrarum vel lividarum in scirrhi superficie externa temporariæ productiones [§. CCCCXIV.]

Cancrī vero aperti diagnōsis ex ejus definitione [§. CCXII.] facile constare poterit.

§. CCCCLVII.

Ad prognosin cancrī tam occulti, quam aperti quod spectat; conveniet hic in genere ea quoque transferre, quæ jam prostant in §§. CCCXXXIX & CCCCLIII. Tantum vero abest, ut ob pravitatem materiæ cancrōsæ natura morbum subigat, quiddquid illa etiam moliatur, ut potius tandem succumbere cogatur.

C A P U T X I.

D E

CARIE OSSIUM ET SPINA VENTOSA
GENERATIM.

§. CCCCLVIII.

Ossa, quibus jam caries [§. XLVI.] inest, mollia, inæqualia, friabilia, grysei, immo nigricantis coloris esse, & materiam putridam fundere debent.

§. CCCCLIX.

Caries in ossibus quibuscumque incipiens, & consummata in osse, præsertim cavo, magno dolore stipata sit, oportebit.

§. CCCCLX.

Os cariosum & partes eidem superstratæ tumesceri poterunt [§. CCCCLVIII.]

§. CCCCLXI.

Fieri adeoque poterit, ut ulcera generentur in partibus quoque a puncto ossis cariosi remotis (§. anteced.)

§. CCCCLXII.

Pro ratione & qualitate partium, in carie ossium simul affectarum, necessarii erunt motus febriles (CCXXXVIII.)

§. CCCCLXIII.

Caries ossium in subjectis cacochymicis symptomatibus majoris gradus stipata esse debet [§. CXCIII.]

§. CCCCLXIV.

In spina ventosa [XLVIII.] omnia symptomata ossis putridi in eminentiore gradu compareant, oportet; & quod præcipue ad dolorem attinet, ille multo acerbior esse debet in spina ventosa, vertebrae spinæ præsertim affectis, quam in ulla alia ossis carie.

Singulis istis propositionibus applaudit experientia. Inæqualitas enim, mollities, nec non dolor descriptus ossis cariosi, una cum ejus colore, tandemque materia putrescens, quæ inde emanat (§. CCCCLVIII.), sensibus percipiuntur. Atque ita se res quoque habet cum tumore (§. CCCCLX.). Initio morbi & tandem post longa temporis intervalla de gravioribus doloribus æger conqueritur (§. CCCCLIX.) Dolent porro Chirurghi de difficultate detegendi cariem (§. CCCCLXI.). Quam difficulter tandem caries venerea, vel scorbutica sanetur, satis superque constat (§.

CCCCLXIII.). Ad majorem tandem gradum hæc mala ossis putrefacti adesse in spina ventosa, per vulgus fere notum est.

§. CCCCLXV.

Signa pathognomica sufficientia cariei ossium esse possunt, quæ ad §. CCCCLVIII. proponuntur; si nempe ossa affecta visu, vel tactu explorare liceat. In casu autem contrario, signa pathognomica sufficientia cariei ossis ex symptomatibus & conditionibus causarum putrefactionis delumenda erunt. Quod etiam de signis spinæ ventosæ notetur, oportebit.

§. CCCCLXVI.

Prognosis cariei ossium & spinæ ventosæ ex morbi magnitudine & locorum affectorum indole derivetur, necesse erit. Maxime hic habeatur ratio inflammationis & ulcerum, quæ ad loca cariosa hisque vicina provenire solent.

CAPUT XII.

DE

FRACTURA ET FISSURA OSSIUM IN GENERE.

§. CCCCLXVII.

IN omni fractura & fissura ossium [§§. LII. & LIII] adesse debent dolor, vasorum compressiones, inflammationes, motus febriles.

§. CCCCLXVIII.

Ex ossium fractura & fissura simplice composita, five complicata, facile fieri potest [§§. LV. & ant.]

§. CCCCLXIX.

Si partes ossis fracti vel fissi fuerint acutæ, tum vasa æque, ac reliquæ partes molles ossi superstratæ, solvantur, necesse erit; in quo casu non solum hæmorrhagiæ, sed & symptomata, in §. CCCCLXVII. indicata, acerbiora fieri debent.

§. CCCCLXX.

In fracturis membrorum possibiles erunt eorundem accurtationes.

§. CCCCLXXI.

In magnis magnorum ossium fracturis oboriri poterunt paralyfis [CCLXXI.], atrophia [§. CCLXXVIII.]

§. CCCCLXXII.

Fractis igitur ossibus circa articulos, aridura necessaria erit. [§. anteced.]

§. CCCCLXXIII.

Ossium fracturæ & fissuræ complicatæ visu statim dignosci poterunt; simplicium vero præsentia ex caussarum admissarum vi, atque inæqualitate partis læsæ, ut & symptomatum conditionibus colligenda erit.

§. CCCCLXXIV.

Si etiam os fractum, ex una parte manu comprehensum, firmiter teneatur; ex altera autem moveatur versus partem, quæ firmiter manu tenetur; tum strepitus quidam exaudiri debet, qui loco signi cujusdam pathognomici sufficientis in fractura ossium simplice habendus erit.

§. CCCCLXXV.

Ad prognosin fracturæ & fissuræ ossium formandam, juvabit probe considerare locorum afflictorum naturam, & morbi ejusque symptomatum quantitatem.

CAPUT XIII.

DE

LUXATIONE OSSIUM GENERALITER.

§. CCCCLXXVI.

SI ossa luxata [§.LVI.] antrorsum magis exciderint; tum membra longitudine increvisse apparebunt. In casu autem luxationis ossium, obortæ magis ad latera, membrum brevius factum esse videbitur.

Quod etiam experientia confirmat; utpote qua teste constat, membra luxata modo breviora, modo longiora apparere.

§. CCCCLXXVII.

§. CCCCLXXVII.

In luxationibus ossium, antrorsum factis, ad partes luxatas fovea quædam circum circa apparere debet. Sed ossa, ad latera tantum luxata, non nisi foveam ibi exhibebunt, unde os secessit, & prominentiam, quorsum illud abiit.

Quod itidem experientiæ consonum est.

§. CCCCLXXVIII.

In quacumque luxatione, five illa fuerit completa, five incompleta (§. LVIII.), five antrorsum, five ad latera facta, adesse debent dolor, compressio vasorum, tumores inflammatorii, tandemque motus febriles.

Atque id quoque cum experientia convenit.

§. CCCCLXXIX.

Luxationes spinæ dorsæ convulsiones (§. CCLXVIII.), membrorum paralyfes (§. CCLXXI.), contracturæ (§. CCLXVI.), ariduræ (CCLXXVII.) facillime consequuntur.

Quod frequens probavit experientia.

§. CCCCLXXX.

Signa luxationum pathognomica sufficientia latent in §§. CCCCLXXVI & CCCCLXXVII.

§. CCCCLXXXI.

Luxationum in genere prognosis considerationi naturæ locorum affectorum & symptomatum superstruenda erit.

CAPUT XIV.
DE
SPASMO IN GENERE.

§. CCCCLXXXII.

Constans docet experientia, spasmis (§.LXXXIII) non nisi illa subjecta fieri obnoxia, in quibus sequentes conditiones obtinent.

I. Quæ plethora, spissitudine humorum & cacochymia laborant.

II. Quæ excretionum suppressionem æque, ac exacerbationem patiuntur.

III. Quæ orgasmos & congestiones humorum admittunt.

IV. Quæ compressiones & extensiones partium sibi frequentes esse sinunt.

V. Quibus profundæ partium solutiones, vasorum & viscerum distensiones & obstructiones oboriuntur.

VI. Quæ cum corporibus arsenicalibus frequentes operationes suscipiunt.

VII. Quæ ætatis magis sunt provectæ.

VIII. Sexus tandem sequior frequentius posteriore spasmis obtemperare cogitur.

§. CCCCLXXXIII.

Attendenti porro ad ægrotantes ex spasmis observare licebit, varia ibidem oboriri phænomena,

ægrosque tunc de variis incommodis conqueri. Quorsum imprimis pertinebunt.

I. Dolor, isque modo pulsatis, modo urens, modo lancinans, modo tendens, modo gravitans.

II. Æstus volatilis, vel qui etiam in uno tantum corporis loco percipitur.

III. Nimia sensibilitas contra frigus & calorem, ad corpus externe admissum.

IV. Ea porro esse solet spasmodum ratio, ut a meridie & circa vesperam magis exacerbari, horis vero matutinis a vehementia sua remittere videantur.

V. Excretionibus tandem moderate subsequentibus, præsertim transpiratione oborta, spasmi salutariter solvi observantur.

VI. Quodsi vero excretiones naturales nimis retardentur, aut plane deficient; fieri tunc solet, ut vel contracturæ producantur; vel loca affecta rigiditatem contrahant; vel inflammationes concitentur; vel spasmus in paralyfin, aut morbum aliquem visceris transeat.

§. CCCCLXXXIV.

Singulis illis determinationibus, quæ ad subiecta pertinent, in quibus, teste observatione, spasmi oboriri solent (§. CCCCLXXXII.), rite consideratis; non poterit non satis aperte constare, oriri inde posse causam proximam spasmi (§. LXXXIV). Ad cujus itaque productionem modo

indicatæ conditiones concurrunt, instar causarum efficientium sufficientium morbi.

Quod copiose dabitur evictum in prælectionibus.

§. CCCCLXXXV.

Patet itaque ratio (§§. anteced. & CCCCLXXXII. *numer. II.*), cur suppressiones hæmorrhagarum naturalium, & artificialium intermissiones, nec non sudoris sufflaminationses spasmi sequantur? Cur opifices, in aquis frigidis operantes, spasms afficiantur? Porro, quare nimias hæmorrhagias, diarrhæas, sudationes excedentes spasmi excipiant? Quæ omnia cum observatis conveniunt.

§. CCCCLXXXVI.

Liquidum etiam esse poterit ex §§. CCCCLXXXIV & CCCCLXXXII. *numer. III.*, cur nimirum Veneri & Baccho diligenter inservientes spasms sæpius subjiciantur? Quod frequentissimæ probant observationes.

§. CCCCLXXXVII.

Intelligi quoque poterit, cur hominibus, quibus familiaris quasi esse solet ille situs corporis, ubi scilicet pedibus sibi continuo incumbentibus sedent, tam facile oboriatur spasmus in suris? Cur etiam inde dolorum augmenta in locis affectis percipiant podagrici? Cur porro omnem vim ad opera movenda intendentes in spasmos incidant (§§. CCCCLXXXIV & CCCCLXXXII. *numer. IV.*)?

§. CCCCLXXXVIII.

Neque minus jam patebit, quare sæpius atroces spasmi in conspectum prodire soleant, partibus præcipue sensilibus admodum vulneratis, aut exulceratis? Quare hypochondriaci, hystericae, & quibus jam viscera læsa sunt, spasmiss facile subjiciantur (§§. CCCCLXXXIV & CCCCLXXXII. *numer. V.*)?

§. CCCCLXXXIX.

Cognosci inde etiam potest (§§. CCCCLXXXIV & CCCCLXXXII. *numer. VI.*), quare metallorum operarii, quibus res magis est cum mineris arsenicalibus, cupreis, plumbeis, atrocissimis corripiantur spasmiss?

Spasmus, in casu isto productus, una cum varietate effectuum suorum *morbis saturninus*, Germanis *die Hüttenkatze*, dici solet.

§. CCCCXC.

In omni spasmo dolor adesse debet (§§ LXXXIV & CXCVI.), sed diversus, partim ob causarum, a quibus causa proxima spasmi producitur, varietatem ratione qualitatis æque, ac quantitatis (§. CCCCLXXXII.); partim ob diversitatem partium, quæ a spasmo affliguntur.

§. CCCCXCI.

■ Ex §. anteced. constabit jam de varietate illa sensus dolorifici, de quo æger ex spasmo conqueritur (§. CCCCLXXXIII. *numer. I.*)

§. CCCCXCII.

Spasmo in una parte exacerbato, congestiones ad alias partes fieri debent (§§. LXXXIII & CLXXVI.)

§. CCCCXCIII.

Quare ægrotantium ex spasmis adfectus varius sit, oportebit (§§. CCCCIV & anteced.); pro ratione nimirum gradus congestionum, & locorum differentia, quorsum illæ magis tendunt.

§. CCCCXCIV.

Fieri etiam poterit, ut spasmi in una parte facta exacerbatione, spasmus in alia parte producat (§§. CCCCXCII & CCCCLXXXII. *num.* III.)

Quod bene congruit cum observatis; exemplo arthritidis vagæ.

§. CCCCXCV.

Congestionum effectus varii sunt, qui in varias morborum species transire possunt [§§. CCCCIV & sequ.] Hujus originis morbi præ reliquis esse solent, inflammatio, cephalalgia, vertigo, affectus soporosus, suffocatio, colica, paralyxis, morbi viscerum varii. Quanta mala a spasmi atrocitate!

§. CCCCXCVI.

Unde jam intelligere poteris [§. anteced.] casum illum, quem sæpius inter arthriticos obortum esse, experientia docuit; unde nimirum fiat, ut ad spasmos membrorum adstringentia applicata di-

riffimos effectus in visceribus præstent, atque ægrum in summum vitæ periculum conjiciant?

§. CCCCXCVII.

In omni spasmo præsertim exacerbato, adesse debent motus febriles [§§. CCCCXCII & CCCCXCV.]

§. CCCCXCVIII.

Ex §. anteced. perspicua jam erit ratio æstus volatilis, vel etiam persistentis in uno loco; nec non nimiae sensibilitatis contra frigus & calorem externum [§. CCCCLXXXIII. *numer.* II & III.]; maxime, quum hic etiam inflammationes adesse soleant [§. CCCCXCV.]

§. CCCCXCIX.

Motus febriles determinati gradus id efficere valent in corpore, ut massa humorum imminuatur, resolvatur, quod eidem inerat noxium, ejiciatur, obstructions referentur, fluida æqualiter distribuuntur, congestiones & orgasmi humorum imminuantur, excretiones naturales modo augeantur, modo imminuantur; quæ singula loco suo clarius constabunt, evincenda ex ipsius febris natura. Vides adeoque rationem, unde spasmodorum salutaris solutio, quam sponte oboriri experientia docet, derivanda sit [§§. CCCCXCVII. CCCCLXXXII & CCCCLXXXIII. *numer.* V.]?

§. D.

Sed ex natura quoque spasmi sequitur, fore, ut ille sub conditione, supra jam proposita

§. CCCCLXXXIII. *num.* VI.], in morbos, ibidem enarratos, transeat [§§ XVII. XXII. LXXXIII. LXXXIV. CCLXVI. CCLXXI. CCCCXCII & CCCCXCVI].

§. DI.

Signa pathognomica sufficientia spasmi in genere redibunt ad dolorem supra descriptæ indolis [§§. CCCCLXXXIII. *numer.* I.]; ad congestiones, in aliis partibus simul productas [§. CCCCXCII.]; ad pulsum durum [§. GXXXVII.]; quibus adhuc id accedere poterit, quod in locis, a spasmo affectis, vasa alias ibidem conspicua, evanescere debeant.

§. DII.

Signa tandem prognostica spasmi in genere derivanda erunt ex morbi magnitudine; ex quantitate & qualitate causarum, non neglecta illarum ratione ad ægrum, in quo inde producitur spasmus; ex partis denique natura, a spasmo affectæ. Quapropter sequentes hic jam notandæ erunt propositiones.

I. Quo plures causæ, ad spasmus in casu obvio producendum, conveniunt; eo major erit morbus.

II. Quo magis indoles causæ spasmi respondet illi mutationi, in parte aliqua producendæ, quæ instar causæ proximæ spasmi concipitur [§. LXXXIV.]; eo citius spasmus produçetur, productusque major erit.

III. Quo magis spasmi symptomata urgent; eo major morbus erit.

IV. Quo nobiliores sunt partes, quæ spasmō fiunt obnoxia; eo periculosior erit status ægri.

V. Quo magis debilis æger est, aut jam dispositione ad spasmum gaudet, ob statum corporis præteritum; eo major erit spasmus, sub accessione conditionis, descriptæ ad *numer. I. & II.*

VI. Quo magis a congestionibus, quæ in spasms oboriri solent [§. CCCCXCII.], loca nobiliora corporis affliguntur; & quo magis afflictiones istæ urgent; multo majus quoque periculum erit, in quo æger versatur [§§. CCCCXCV & CCCCXCVI.]

VII. Quo accommodatior erit una vel altera mutatio, a spasmō in corpore producta, ad imminuendam, vel plane tollendam causam, morbi productricem [§. CCCCLXXXII.]; eo certius expectari poterit spasmi solutio salutaris. In casu vero contrario parum boni prælagire licebit. Hoc igitur loco juvabit, animum ad ea dirigere, quæ jam continentur in §§. CCCCLXXXIII. *num. VI.* CCCCLXXXIX & D.

CAPUT XV.

DE

HEMICRANIA.

§. DIIL.

Hemicraniæ [§. CCLXII.] subjecta esse solent
ut experientia testatur.

I. Quæ coryzam, hæmorrhagiam narium
frequentem, vel ejus suppressionem patiuntur.

II. Quæ morbos primarum viarum alunt.

III. Quæ retropulsionem crustæ lactæ ad-
mittunt.

IV. Quæ sudores capitis reprimunt.

V. Quæ glandulas parotides tumefactas ha-
bent, vel exulceratas.

VI. Quæ ophthalmia, vel otalgia laborant.

VII. In quibus illarum conditionum, sub qui-
bus spasmus generatim oboriri potest in corpore,
una vel altera locum habet [§. CCCCLXXXII].

§. DIV.

In hemicrania tibi porro sequentia observare
licebit.

I. Conqueritur æger de dolore acutissimo
ad tempora, qui sub manducando magis exa-
cerbatur.

II. Idem dolor ad lateris affecti collum &
brachium sæpius se extendere solet.

III. Comparent non numquam ophthalmia, lippitudo, otalgia.

IV. Præter alias [§. CCCCLXXXIII.] excretiones, hic oboriri solent hæmorrhagia narium, phlegmatorrhagia, vomitus, diarrhæa, in maximum ægri emolumentum.

V. Notatu porro dignum est, quod morbus iste haud raro esse soleat periodicus.

§. DV.

Descripta in §. DIII. momenta hujus conditionis sunt, ut inde hemicraniæ potius, quam alterius speciei spasmi, causa proxima suboriatur. Et quod ad generales subjectorum spasmi determinationes, hic quoque annotatas [§. cit. num. VII.], attinet; necesse tunc erit, ut hemicraniæ genesin inde deducturus rationem habeat dispositionis, vel ex ætate ægri, vel ex ejus statu corporis præterito subortæ, ad hanc magis, quam aliam spasmi speciem, in casu præsentē facilius concipiendam.

Quod hic de subjectorum spasmi in genere determinationibus, harumque ratione ad hemicraniam magis, quam ullam aliam spasmi speciem, dicitur; idem etiam principium valebit in capitibus sequentibus, ubi aliæ spasmi species considerantur. Quantum vero eum observationibus hoc principium congruat, id largiter dabitur evictum in prælectionibus.

§. DVI.

Ex §. anteced. Melucebit jam ratio, cur ventriculi & intestinorum nimiam repletionem hemi-

cranix majus sequatur augmentum? Nec non, quare post iram conceptam ejusmodi quid quoque consequatur? Utrumque observationibus bene respondet.

§. DVII.

Ex eodem fundamento [§. DV.] intelliges quoque illum casum, qui sæpius accidit, quare nimirum sexus amabilis, conservandæ augendæque pulchritudini admodum intentus, ob largiorem usum cosmeticorum, ex adstringentibus præparatorum, hemicranix tam frequenter subjiciatur [§. DIII. *numer. IV.*]?

§. DVIII.

Sub conditionis accessione ad causas, spasmus generatim determinantes [§. DV.], fieri itaque poterit, ut hæmorrhoidarii, male menstruatae, & quibus vitium quoddam in excretionibus naturalibus suboritur, hemicrania persæpe vexentur? Quod cum experientia apprime convenit.

§. DIX.

Causa doloris in hemicrania acutissimi latebit in pericranio affecto; causa autem doloris exacerbati inter manducandum non nisi in actione muscutorum temporalium, ad manducandum necessariorum, sita esse poterit [§. DIV. *numer. I.*]

§. DX.

Si hemicrania mirum in modum fuerit exacerbata, doloris ad brachium & collum extensio erit necessaria [§. CCCCXCIV.]

§. DXI.

Facilis ideoque pleuritidis spuriae ortus erit in ægrotantibus ex hemicrania [§. anteced.]; id experientia sæpius probante.

§. DXII.

Unde etiam facile oriri poterunt ophthalmia, otalgia & lippitudo [§§. CCCCXCII. & DX.]

§. DXIII.

Hemicraniæ solutionis salutaris [§. DIV. *numer.* IV.] ratio liquida quoque esse poterit ex §. CCCCXCIV.

§. DXIV.

Inter causas hemicraniæ [§. DIII.] continentur quædam, quæ statim quodam tempore invalescere solent in corpore, exemplo moliminum ad hæmorrhagiam narium, ad fluxum menstruum in feminis. Hinc hemicraniæ periodicæ [§. DIV. *numer.* V.] ortus explicatu sæpe facilis erit.

Quæ uberius proferentur in prælectionibus.

§. DXV.

Hemicraniæ signa pathognomica sufficientia ex illius definitione [§. CCLXII.] & prolatis in §. DI. satis manifesta erunt.

§. DXVI.

Ratione prognosis hemicraniæ, præter fundamenta, quæ jam exstant in §. DII, ea quoque attendenda erunt, quæ habentur in §. DIV. *num.* IV.

CAPUT XVI.

DE

PLEURITIDE SPURIA.

§. DXVII.

EXperientia constat, pleuritidi spuriae [§. CCLXII.], præter subjecta, in quibus determinationes, in §. CCCCLXXXII. indicatæ, locum obtinent, illa præsertim fieri obnoxia, quibus congestiones ad pectus oboriri, vel concussionem, aut contusiones pectoris accidere solent.

§. DXVIII.

Ex observatis porro apparet, dolorem in pleuritide spuria non perdurare circa os sterni, ubi initio hunc locum occupavit, sed ad claviculam, collum, scapulam, immo costas spurias alterutrius, non numquam etiam utriusque lateris se extendere. Iste dolor magis exacerbatur inter respirandum, solvique deprehenditur, sudore producto.

§. DXIX.

Ab expositis in §. DXVII. determinationibus subjecti pleuritidis spuriae [§. CCLXII.] causa proxima dependet.

§. DXX.

Hinc pleuritis spuria juvenibus familiaris erit; ad tusses violentas facile accedet; pugilibus atque iis hominibus haud raro oborietur, qui casum ab

alto conceperunt [§. DXVII.] Quibus etiam observationes annuunt.

§. DXXI.

Ob spasmi exacerbationem fieri poterit, ut etiam pleuritis spuria terminos suos extendat [§§. CCCCXCIV & DXVIII.]

§. DXXII.

Actio musculorum pectoralium, intercostalium & dorsalium, quæ ad respirandum concurrît, causa esse debet doloris, sub respiratione exacerbati, in pleuritide spuria [§. DXVIII.]

§. DXXIII.

De ratione modi, quo pleuritis spuria solvitur, constabit quoque ex §§. CCCCXCIX. & D.

§. DXXIV.

Signa pleuritidis spuriae pathognomica sufficientia esse possunt, quæ exhibentur in §. DI. sed illorum ope definitionis [§. CCLXII.] rite facta applicatione ad casum; una cum doloris augmento, inter respirandum percepto ab ægrotante [§. DXVIII.]

§. DXXV.

Pleuritidis tandem spuriae prognosis iisdem fundamentis superstruenda erit, quæ jam prostant in §. DII.

CAPUT XVII.

DE

SPASMO PARACELSI FIXO.

§. DXXVI.

DOcent observationes a spasmō Paracelsi fixo [§. CCLXII.], præter subjecta, ad §. CCCCLXXXII. descripta, illa potissimum comprehendendi.

I. Quæ nimirum intestinorum validas distensiones, aut gravia incommoda ratione hæmorrhoidum & fluxus menstrui patiuntur.

II. Quæ compressiones lumborum externas, diuturnas spinæ dorsi incurvationes refrigerationes lumborum admittunt.

III. Quibus calculus in renibus est.

IV. Quæ tandem utero gerunt.

§. DXXVII.

Phænomena, quæ in morbo isto deprehenduntur, sequentia esse solent.

I. Sensus frigoris in spina dorsi, cum æstu volatili, dein subsequente.

II. Doloris augmentum, quod oboritur, dum ægri inspirare, vel corpus flectere volunt.

III. Spasmus vesicæ, stranguriæ. ■

IV. Urina excernitur initio tenuis, morbo autem mitescente, saturatior.

V. Trans-

V. Transire solet spasmus iste vel in lumbaginem, vel in malum ischiadicum, vel etiam in integrum solvitur; si nempe excretiones vel alvi, vel hæmorrhoidum, vel fluxus menstrui subsequuntur, vel partus editur.

§. DXXVIII.

Per ipsam naturam subjectorum, quæ in §. DXXVI. describuntur, necesse erit, ut ab illorum determinationibus producaturs causa proxima spasmi Paracelsi fixi (§. CCLXII.)

§. DXXIX.

Unde patet ratio, quare in flatulentia spasmus iste sæpius adsit; & quare etiam hypochondriacis & hysteriis familiaris esse soleat (§. anteced.)?

§. DXXX.

Sensus frigoris in spina dorsi & æstus volatilis (§. DXXVII. *numer. I.*) causæ intelliguntur ex §. CCCCXCVIII.

§. DXXXI.

Actio musculorum lumbarium, ad respirandum & corpus flectendum necessaria, causa esse debet doloris tunc aucti (§. DXXVII. *numer. II.*)

§. DXXXII.

Quare etiam spasmi vesicæ, stranguria in spasmo Paracelsi fixo adsint; id quoque cognosci poterit ex §. CCCCXCIV.

§. DXXXIII.

Urina tenuis, initio morbi excreta (§. DXXVII. *numer.* IV.), a constrictione, vel etiam a compressione renum, sub spasmo Paracelsi fixo necessaria, dependet.

§. DXXXIV.

Unde spasmus Paracelsi fixus in malum ischiadicum, lumbaginem transeat; vel etiam sanitati convenientius solvatur, excretionibus scilicet subsequentibus: hujus quoque rei ratio intelligi poterit ex §§. CCCCXCIV & CCCCXCIX.

§. DXXXV.

Signa pathognomica sufficientia spasmi Paracelsi fixi satis manifesta erunt ex illius definitione (§. CCLXII.) & dictis in §. DI.

§. DXXXVI.

Signa prognostica ejusdem spasmi per rectam applicationem prolatorum in §§. DII & DXXVII. *numer.* IV & V. constabunt.

CAPUT XVIII.

DE

LUMBAGINE.

§. DXXXVII.

Lumbagini (§. CCLXII.), inter alia (§. CCGGLXXXII.), hæc præsertim subjecta fieri obnoxia, ex observationibus constat.

I. Quæ scilicet spasms ad hæmorrhoides & fluxum menstruum frequenter infestantur.

II. Quæ equitationibus diuturnis corpus. nimium & frequenter exercent.

III. Feminae, partum difficilem expartæ, & varicibus obnoxia.

§. DXXXVIII.

Observatur morbus iste connexus quidem esse cum malo ischiadico, spasmo Paracelsi fixo, gonagra, sed etiam solvi in morem aliorum spasmodorum.

§. DXXXIX.

Expositæ in §. DXXXVII. determinationes subiecti productioni causæ proximæ lumbaginis (§. CCLXII.) admodum favent.

§. DXL.

Quare lumbago cum gonagra, malo ischiadico, spasmo Paracelsi fixo connectatur; nec non cur ad modum aliorum spasmodorum solvatur, id intelligere licebit ex §§. CCCCXCIV & CCCCXCIX.

§. DXLI.

Signa pathognomica sufficientia lumbaginis tibi illius definitio (§. CCLXII.) & dicta in §. DI. suppeditabunt.

§. DXLII.

Prognosis vero lumbaginis ab iisdem principiis, propositis jam in §. DII, dependebit; illorum applicatione ad casum convenienter facta.

CAPUT XIX.

DE

MALO ISCHIADICO.

§. DXLIII.

Malo ischiadico (§. CCLXI.) obtemperare coguntur subjecta, in quibus, præter determinationes, in §. CCCCLXXXII. recensitas, sequentes adhuc locum habent.

I. Violentæ nimirum pedum concussiones, illorumque sudores suppressi.

II. Morbi hæmorrhoidales, vehementia spasmodum & flatulentia stipati.

III. Feminis denique hysterice, atque in cælibatu viventibus, morbus iste frequenter accidere observatur.

§. DXLIV.

Mali ischiadici symptomata, prout observatio docet, sequentia esse solent.

I. Dolor acutissimus ad coxas, qui magis exacerbatur sub motu.

II. Iste dolor se latius extendit, eidemque accedunt spasmus Paracelsi fixus, lumbago, gonagra, immo etiam podagra.

III. Morbus diu durans ariduram partis post se trahit.

IV. Hæmorrhoidum vel mensium fluxu superveniente, morbus lenitur, immo etiam plane solvitur.

§. DXLV.

Recensitæ in §. DXLIII. subjectorum determinationes causam proximam mali ischiadici (§. CCLXI.) corpori ingenerare possunt.

§. DXLVI.

Causa doloris exacerbati in malo ischiadico sub motu pedis (§. DXLIV. *numer. I.*) latebit in actione musculorum, ad hunc motum præstandum necessaria.

§. DXLVII.

Ratio doloris extensi in morbo ischiadico intelligenda erit ex §. CCCCXCIV.

§. DXLVIII.

In malo ischiadico vasorum lymphaticorum ad regionem lumbarem compressio, immo etiam eorundem concrefcentia possibilis erit.

§. DXLIX.

Ob quam causam aridura hic quoque possibilis erit (§§. CCLXXVII & CCLXXVIII.)

§. DL.

Per malum ischiadicum partium internarum læsiones fieri possunt (§§. CCCCXCII. CCCCXCV. DXLVIII & DXLIV. *numer. I.*)

§. DLI.

Hinc etiam corpori tabes facile induci poterit
(§. anteced.)

§. DLII.

De ratione salutaris solutionis mali ischiadici
(§. DXLIV. *numer. IV.*) satis quoque constare
poterit ex §. CCCCXCIX.

§. DLIII.

Signa pathognomica sufficientia mali ischiadici
ex ejus definitione (§. CCLXI.) & dictis in §. DI
satis clare apparebunt.

§. DLIV.

Ad morbi vero prognosin recte formandam
sufficient principia supra jam evicta (§. DII.); hi
simul in considerationem vocatis, quæ proponun-
tur in §§. DXLIX & DLI.

CAPUT XX.

DE

CHIRAGRA GONAGRA ET PODAGRA.

§. DLV.

HUic morbo (§. CCLXI.) plerumque pater-
subjecta conditionis sequentis.

I. Quæ in provectiore ætate versantur, in qu-
bus vero determinaciones, in §. CCCCLXXXI
enarratæ, locum habent.

II. Sed arthritidi juniores, immo etiam infantes a sudoribus pedum suppressis, scabie retropulsa, apostasi febrili ad artus submittuntur.

§. DLVI.

In podagricis (§. CCLXI.) phænomena sequentia sensibus apparere solent.

I. Deprehenditur scilicet vasorum, per crura excurrentium, inflatio.

II. Huic jungitur gravitas, lassitudo totius corporis.

III. Concurrunt horripilationes, cum æstu volatili illas sequente.

IV. Ingruit ipse dolor circa vesperam, augeatur ad mediam noctem, dein decrescit.

V. Dolor iste non modo pedem stricte dictum occupat, sed & ad tibiam, immo femur excurrit.

VI. Somnus fere nullus adest, vel adest inquietus.

VII. Appetitus plerumque deficit.

VIII. Concurrunt colica, flatulentia, spasmus paracelsi fixus, malum ischiadicum, lumbago; paroxysmo præsertim supra modum crescente.

IX. Durat podagræ afflictio, sub temporaria remissione, per plures hebdomades.

X. Non nullis erumpunt sudores universales, vel pes tantum sudat, & epidermis instar furfurum secedit, vel vesiculæ, vel tubercula, vel

tophi generantur, in quibus materia calcarea continetur. Atque tum morbus a vehementia sua remittere, vel etiam prorsus evanescere observatur.

XI. Podagra morbus plerumque periodicus esse observatur, circa æquinoctia rediens; non numquam etiam malignus.

XII. Gonagra & chiragra (§. CCLXI.) eodem modo, ut podagra, incedere solent.

XIII. Hoc tandem ex observatis notari meretur, ut omnem arthritidem, ita præsertim podagram, gonagram, chiragram cum calculo connecti.

§. DLVII.

Sub conditione descriptarum in §. DLV. determinationum subjecti, chiragræ, gonagræ & podagræ (§. CCLXI.) causa proxima facile oriri poterit.

§. DLVIII.

Gravitatis & lassitudinis corporis, quam podagrici sentiunt (§. DLVI. *numer.* II.), causa redibit ad congestiones pedes versus (§. *cit.* *num.* I.), & spasmos aliarum quoque partium hic concurrentes (§§. CCCCXCIV & DLVI. *numer.* V & VIII.)

§. DLIX.

Motuum febrilium, quos hic magis auctos esse oportebit, ob locorum affectorum sensibilitatem, causa constabit ex §. CCCCXCVII.

§. DLX.

Somni deficientis causa esse debet dolor acerbissimus una cum spasmō, quo aliæ partes hic simul affici solent [§. DLVI. *numer.* VIII.]

§. DLXI.

De flatulentia & colicæ origine in affectibus arthriticis [§. DLVI. *numer.* VIII.] te quoque edocēbunt supra jam proposita [§§. CCCXCIV & CCCXCV.]

§. DLXII.

Nonne etiam inde [§. anteced.] derivari poterit appetitus defectus [§. DLVI. *numer.* VII.] ?

§. DLXIII.

Quare spasmus Paracelsi fixus, malum ischiadicum & lumbago podagræ accedere soleant [§. DLVI. *num.* VIII.] : id jam intelligere licebit ex §. CCCXCIV.

§. DLXIV.

Solutionis podagræ ratio per sudorem universalem, vel etiam particularem [§. DLVI. *numer.* X.] liquida esse poterit ex §. CCCXCIV.

§. DLXV.

Secessio epidermidis in locis a podagra affectis a sudoris acrimonia dependebit, quæ ibidem vel generatur, vel jam corpori inesse poterit, ob ejus statum cacochymicum.

§. DLXVI.

Forſitan inde quoque (§. anteced.) petenda erit ratio podagræ malignæ (DLVI. *numer.* XI.) ?

§. DLXVII.

Generatio tophorum in podagra dependet a terræ ex fluido lymphatico - ſeroſo præcipitatione. Tubercula vero & veſiculas a ſtaſi ejusdem fluidi, ſuborta in locis affectis, aut illorum vicinitate, derivare licebit (§. DLVI. *numer.* X.)

§. DLXVIII.

Quum teſte experientia, circa æquinoctia morbi ex ſtaſibus, obſtructione & congeſtione oriri ſoleant: patet, cur tunc quoque arthritides redeant (DLVI. *numer.* XI.) ?

§. DLXIX.

Quare porro podagra, chiragra & gonagra diſiſimos edant effectus, ſi repellantur; id cognoſci poterit ex §§. CCCCXCII - CCCCXCVI. Anne etiam ab efficacia congeſtionum, quæ hic facile renes verſus fieri poſſunt, ratio nexus illius petenda erit, qui arthritidem & calculum interdum intercedere ſolet (§. DLVI. *numer.* XIII.) ?

§. DLXX.

Signa pathognomica ſufficientia podagræ, chiragræ, gonagræ ex indole doloris, circa articulos partium, hoc morbo affectarum (§. CCLXI.), oborti [§. DI.], æſtimanda erunt; non poſtponendis ſignis aliis ſpaſmi [§. citat.]

§. DLXXI.

Ad prognosin vero in affectibus arthriticis rite formandam conducet principiorum [§. DII.] conveniens applicatio. Præsertim hic ea consideranda erunt, quæ ad §. citat. *numer.* III. VI. & VII. nec non ad §. DLVI. *numer.* X. prostant.

CAPUT XXI.

DE

ASTHMA SPASTICO SEU CONVULSIVO.

§. DLXXII.

PRæter subjecta, ad §. CCCCLXXXII. determinata, præsertim asthma convulsivo [§. CGLXV] obnoxia fiunt, quibus conditiones sequentes insunt.

I. Quæ nimirum congestionibus humorum ad pectus exponuntur.

II. Quæ scarificationes adsuetas ad pectus negligunt.

III. Quibus flatulentia pertinax, constrictiones & distensiones viscerum abdominalium aboriuntur.

§. DLXXIII.

Phænomena morbi hujus, quæ sensibus facile patent, erunt sequentia.

I. Torpor & extrema lassitudo corporis.

II. In thorace & circa scapulas sentitur compressio quædam, ita, ut quo facilius esse videatur exspiratio ægrotantis, eo difficilius inspiratio.

III. Adsunt palpitationes cordis.

IV. Vasa circa tempora turgent.

V. Adspectus faciei inæqualiter rubicundus apparet.

VI. Vertiginis & dyspnœæ incommoda observantur.

VII. Tandem docuit quoque observatio, asthmatis spastici salutarem solutionem subortam fuisse post alvi excretiones, vel fluxum hæmorrhoidum & mensium.

§. DLXXIV.

Indicatæ in §. DLXXII. conditiones subjectorum satis respondent productioni causæ proximæ asthmatis convulsivi [CCLXV.]

§. DLXXV.

Ex §. itaque anteced. facile constabit ratio, quare nimirum hypochondriaci, histericæ, hæmorrhoidarii, male menstruatae præ reliquis asthmati spastico subjici soleant? id experientia confirmante.

§. DLXXVI.

Ob conditionem locorum, quæ spasmus occupavit in asthma convulsivo [CCLXV], necessarius

erit sensus ille compressionis circa scapulas & thoracem (§. DLXXIII. *numer.* II.]

§. DLXXVII.

Hinc etiam necessarius erit ortus dispnoæ & palpitationum cordis (§§. anteced.) CXLIX. CCCCXCIV & DLXXIII. *numer.* III. & VI.)

§. DLXXVIII.

Asthma convulsivum exacerbatum causa esse potest congestionum ad pectus & loca capitis (§. CCCCXCII.)

§. DLXXIX.

Idcirco fieri poterit (§. anteced.), ut ab asthma spastico pulmonibus varii morbi succedente tempore inducantur ; in idem consentientibus observationibus.

§. DLXXX.

Sed inde etiam patebit ratio (§. DLXXVIII.) torporis & lassitudinis, inflationis circa tempora, inæqualis rubedinis in facie, vertiginis ; quippe quæ in corporibus asthmaticorum deprehenduntur (§. DLXXIII. *numer.* I. IV. V. & VI.]

§. DLXXXI.

Ratio salutaris solutionis, quæ in asthma convulsivo oboriri solet (§. DLXXIII. *num.* VII.), cognosci poterit ex CCCCXCIX. Sed & intelligi simul poterit, quando iste eventus salutaris sperari in asthma spastico nequeat ; si ea nempe in casu abvio adesse deprehenduntur, quæ jam supra

evicta sunt (§§. D. DII. *numer.* VI. DLXXVIII-DLXXX.)

§. DLXXXII.

Signa asthmatis spastici pathognomica sufficientia redibunt ad compressionem, quam æger sentit circa scapulas, illique connexam dyspnœam, ubi exspiratio facilius inspiratione deprehenditur esse.

§. DXXXIII.

Prognosis fundamentum, in asthmate convulsivo rite formandæ, continetur in §. DLXXXI.

C A P U T XXII.

D E

C O N V U L S I O N I B U S.

§. DLXXXIV.

AD convulsiones (§. CCLXVII.) ætas infantilis admodum prona esse observatur. De reliquo hic quoque determinationes subsectorum, in §. CCCCLXXXII. prolatae, locum habebunt; ita tamen, ut illis majoris gradus vis adhærere videatur.

§. DLXXXV.

Ad morbi hujus historiam sequentia momenta pertinebunt.

I. Præcedit in quibusdam refrigeratio extremorum, oscitatio, præcordiorum anxietas, frigus per spinam dorſi.

II. Sentiuntur oculorum obnubilationes, ſcintillationes, vertiginosæ capitis afflictiões.

III. Partes corporis vel omnes, vel non nullæ repentinis atque reciprocis agitationibus vehementer varieque concutiuntur. Hinc ſtridor dentium auditur, & oculi ſuperiora verſus torquentur, ut ſolum tunicæ adnatæalbum conſpiciatur; mox ſpasmus cynicus, mox riſus ſardonius, mox emproſthotonus, mox opiſthotonus obſervantur; brachia ad tergum retorquentur, manibus aura, pedibus terra quatitur; non numquam tetanus & catalepiſis in ſcenam prodeunt.

IV. Convulſorum pollices in pugnum coguntur.

V. Spuma, ſi gravior fuerit convulſio, ex ore fluit; ſi brevior, ſaliva tantum tenuis excernitur. Atque tum paroxyſmus remittere ſimul obſervatur.

Ubi convulſiones invaluerunt, partes a ſitu ſuo naturali diſtorquentur, ac diutius ita retortæ perſiſtunt.

VII. Sub iſſis convulſionibus rationis & ſenſuum uſus ceſſat; ita, ut morbi inſultu ſuperato, convulſus nullam ante actorum memoriam habeat.

VIII. Quædam subjecta narium experiuntur hæmorrhagias ; in aliis concitatur vomitus , aut sequitur diarrhæa ; in aliis succedunt excretiones feminis & urinæ ; in feminis excretio muci vaginalis. Fiunt hæc ad finem paroxysmi.

IX. Plerumque ad morbos periodicos inclinat convulsio ; maxime in sexu sequiore. Nam phasibus lunaribus respondere observantur morbi hujus invasiones ; si ille nempe chronicus magis esse videatur.

§. DLXXXVI.

Convulsiones antecedunt congestiones ad caput (§. anteced. *num.* II.)

§. DLXXXVII.

Certi gradus congestiones ad caput id efficere valebunt , ut , irritatis inde nervis cerebri & cerebelli, in reliquis quoque partibus corporis nervi ad actionem supra modum cogantur. Hinc jam convulsio- nis ortus necessarius erit [§. CCLXVIII.)

In prælectionibus commonstrabitur , quantope- re hæc propositio cum observationibus conveniat. Satis evidenter ex sequentibus quoque consensus iste patebit.

§. DLXXXVIII.

Quare spasmodorum causæ (§. CCCCLXXXII.), quibus vis major attribuenda est in relatione ad ægrotantem, convulsioni producendæ potius respon- debunt (§§. CCLXVII. CCCCXCII & DLXXXIV.)

§. DLXXXIX.

§. DLXXXIX.

Unde simul de ratione casuum illorum constare poterit (§. anteced.), in quibus, teste experientia, præ reliquis convulsiones suboriri solent. Huc nimirum pertinebunt ægrotantes ob vermium colluviem in intestinis; febri acutæ, imprimis malignæ, obtemperantes; graviter vulnerati; hæmorrhagici; hysteriæ; hypochondriaci; iracundi; Ventre incensi; a morfu animalium rabidorum læsi; infantes difficulter dentientes; feminæ abortientes, vel difficulter parientes; tandemque quibus venena & philtrea oblata sunt.

§. DXC.

Si a convulsionibus magis afficiuntur loca excretoria, aut partes aliæ illis vicinæ; necesse tunc erit, ut excretio sequi debeat, convulsions paroxysmo remittente.

§. DXCI.

Patet inde ratio (§. anteced.), cur saliva modo spumescens, modo tenuis sub fine convulsions excernatur? Quare tum quoque hæmorrhagia, vel vomitus, vel diarrhœa subsequatur; vel etiam urinæ, feminis, nec non muci vaginalis rejectiones contingere soleant (§. DLXXXV. numer. V & VIII.?)

§. DXCII.

Ob fibras, a convulsionibus intensas, illarum tandem debilitas necessaria erit. Quo frequentius igitur convulsiones ægrum invadunt; quo graviores & magis universales illæ sunt, eo magis debile fiet corpus ægrotantis.

§. DXCIII.

Quoniam in convulsis cerebrum valdopere afficitur (§. DLXXXVI.); non poterit non inde fieri, ut rationis & sensuum usus, sæviante paroxysmo, cesset, & memoriæ debilitas succedente tempore suboriatur (§§. DXCII & DLXXXV. *numer. VII. CCCLXXX.*)

§. DXCIV.

Ex ipsa convulsionum (§. CCLXVII.) natura satis clare apparet, quod morbi hujus sæpe redeuntis atrocitas una vel altera causa proxima corpori inducatur, ad partium situm naturalem mutandum vel maxime idonea (§§. XXXVI. LVII.) Hinc liquida erit ratio phænomeni, annotati in §. DLXXXV. *numer. VI.*

§. DXCV.

Quum convulsiones ad spasmodum genus pertineant (§. CCLXVII.), atque a similibus causis, sed vi majore præditis, proficiantur (§. DLXXXIV.): consequens omnino erit, omnes illos effectus, qui de spasmō generatim in capite XIV. prædicantur, hic quoque transferendos esse, ea tamen cum differentia, ut hoc loco majores esse debeant.

§. DXCVI.

Exinde, quando convulsio universalis esse apprehenditur, epilepsiæ existentia dijudicari solet (§. CCLXVII.) Quid itaque de convulsione antea evictum erat; id etiam de epilepsia valebit, & quidem in eminentiore gradu.

§. DXCVII.

Convulsionum signis pathognomicis sufficientibus cognoscendis, definitio morbi (§. CCLXVII.), rite applicata ad casum (§. DLXXXV, satis respondebit. Idem vero morbus levioris gradus extendinum subsultu, teste observatione, colligi poterit.

§. DXCVIII.

Convulsionum prognostis eadem sibi quoque vindicabit principia, quæ jam proposita existant in §. DII.

CAPUT XXIII.

DE

PARALYSI IN GENERE.

§. DXCIX.

DOcent observationes, quod paralyfis (§. CCLXX.) oboriri soleat subjectis, quæ conditione sequenti gaudent.

I. Quibus nempe spasmodum & convulsionum sævities diu sustinenda erat.

II. Quibus excretionum naturalium subitaneæ suppressiones, vel etiam nimix exacerbationes atque adsuatarum intermissiones, tandemque exanthematum validæ repressiones ad loca interiora corporis accidunt.

§. DC.

In parte, a paralyfi jam affecta, præter ea, quæ jam in morbi definitione (§. CCLXX.) indicantur, observare adhuc licebit flacciditatem, sæpiusque spasmos in parte, parti affectæ opposita.

§. DCI.

Propositæ ad §. DXCIX. subjectorum determinationes productioni causæ proximæ paralyfis factis accommodatæ esse poterunt (§§. CCLXXI & D.)

§. DCII.

Hinc conspicua erit ratio (§. anteced.), quare in casibus sequentibus paralyfis sæpius oborta sit, docente experientia? Quorsum scilicet spectant gravia vulnera; ulcera putrida in partibus sensilibus; sudoris suppressiones; hæmorrhagiarum interceptiones aut exacerbationes; scabiei & purpuræ retropulsiones; pathemata animi ingrata & vehementia, qualia sunt ira, terror.

§. DCIII.

Causa spasmorum, in parte, parti paralyticæ opposita, sæpius productorum (§. DC.), non nisi ad respectivam debilitatem & rigiditatem fibrarum redibit (§. LXXXIV.)

§. DCIV.

Flacciditas partis paralyticæ (§. DC.) ab ejus summa debilitate dependeat, necesse erit.

§. DCV.

Excretiones, quæ arbitrio animæ subjacent, illius imperio prorsus subtrahantur, oportebit; quam primum partes, dictis excretionibus dicatæ, fiant paralyticæ.

§. DCVI.

Quare [§. anteced.] in paralyfi ani & vesicæ excretio fecum alvinarum & urinæ ne ad momentum quidem retineri poterit; idem probante experientia.

§. DCVII.

Si paralyfis linguam affecerit; & aponia, & defectus gustus inde oriatur, necesse erit [§§. CCCLXII & CCCLXIII.] Quod etiam probat observatio.

§. DCVIII.

Ob causæ debilitatis in parte aliqua incrementum fieri poterit, ut exigui ambitus paralyfis se ulterius extendat.

Quod etiam cum observationibus congruit; utpote ex quibus constitit, paralyfin particularem quandoquidem factam esse magis universalem.

§. DCIX.

Quo magis universalis fuerit paralyfis; & quo magis illa occupaverit partes vitales; eo magis metuenda erit morbi solutio per mortem.

§. DCX.

Quare hemiplexia, paraplexia & apoplexia [§§. CCLXXII & CCLXXIV.] plerumque lethalem

eventum nanciscantur, oportebit §. anteced.); in idem quoque consentiente experientia.

§. DCXI.

A febre determinati gradus, superveniente paralyfi, hujus felix eventus expectari poterit.

Quod etiam multoties confirmarunt observationes.

§. DCXII.

Paralyfis vera, in relatione ad spuriam, morbus major erit (§§. CCLXX & LXII. *proleg.*)

§. DCXIII.

Paralyfis partium externarum signa pathognomica sufficientia depromenda erunt ab impotentia has partes movendi, illarum flacciditate & sensu ibidem admodum imminuto. Paralyfis autem partium internarum ex causis, hunc morbum determinantibus (§§. DXCIX. & DCI.), nec non ex prolatis in §. DCV. dignosci poterit.

§. DCXIV.

Signa prognostica paralyfis ex illius magnitudine & qualitate partium affectarum, nec non ex conditione causarum, morbum determinantium, eruantur, necesse est. Qua in re te juvabunt exposita in §§. DCV. DCVII. DCIX. DCXI & DCXII.

CAPUT XXIV.

DE

ASTHMA TE DEFECTIVO.

§. DCXV.

DE asthmate defectivo (§. CCLXXIII.) per experientiam sequentia innotuerunt,

I. Morbus iste asthma spasticum excipere solet.

II. Morbis pulmonum & diaphragmatis sæpius accedit.

III. Hypochondriacis, hystericiis & hydropicis haud raro oboritur.

IV. Præfente tussi, asthma defectivum non adeo periculosus morbus est, faciliusque solvitur in salutem ægri. o

V. A fluxu hæmorrhoidum, vel mensium levantur ægrotantes.

VI. Sed etiam contingere solet, ut asthma defectivum in catarrhum suffocativum transeat, in maximam ægri perniciem.

§. DCXVI.

Ex asthmate spastico defectivum tandem oriri debet (§§. CCLXXIII. DXCIX. DCI & DCXV. numer. I.)

§. DCXVII.

Morbi pulmonum asthma defectivum producere valebunt; sed & vice versa illi ab isto deter-

minari poterunt (§§. CCLXXIII. DLXXII. *num.* I. DXCIX. DCXV. *num.* II & DCXVI.)

§. DCXVIII.

Malum hypochondriacum, hystericum, hydro-
pes ortui asthmatis defectivi respondent (§§.
CCLXXIII. DLXXII. *numer.* I & III. DCXV.
numer. III & DCXVI.)

§. DCXIX.

Patet ideoque (§. anteced.), quare fluxus hæ-
morrhoidum & mensium asthmati defectivo ob-
noxiiis levamentum afferat [§. DCXV. *numer.* V]?

§. DCXX.

Asthmatis defectivi transitus in catarrhum suffo-
cativum [§. DCXV. *numer.* VI.] intelligi poterit
ex §. DCVIII.

§. DCXXI.

In asthmate defectivo inspiratio major adesse
debet expiratione (§. CCLXXIII.) Quo igitur
loco dyspnœæ (§. CCXCIV.) conditio diversa
erit ab illa, quæ in asthmate convulsivo occurrit
(§. DLXXIII. *numer.* II.)

§. DCXXII.

Ægrotantium igitur ex asthmate defectivo os
sterni, vertebræ dorsales & scapulæ inter respi-
randum antrorsum magis protrudentur (§. antec.)

§. DCXXIII.

In §§. DCXXI & DCXXII. signa pathognomica sufficientia asthmatis defectivi continentur.

§. DCXXIV.

Signa vero prognostica asthmatis defectivi in genere derivanda erunt ex adductis in §. DCXXIV. principiis. Quibus adhuc accedunt momenta, hoc loco speciatim considerata, quæ prostant ad §. DCXXV. *numer.* IV. V. & VI.

CAPUT XXV.

DE

APOPLEXIA.

§. DCXXV.

AD apoplexiæ (§. CCLXXIV.) historiam describendam sequentia momenta suppeditant observationes.

I. Solent hunc morbum antecedere nimia somnolentia, gravitas artuum, vertigo, genarum rubor vel pallor.

II. Sequuntur deinde convulsio universalis momentanea, cordis arteriarum pulsationes initio vehementes, mox languescentes, stertores sub respiratione.

III. Oculi tandem apparent vitrei, atque ad sui dimidiam partem aperti; sensus & motus in partibus muscularibus defectus satis fit conspicuus;

spuma ante os cernitur; non numquam feri vel sanguinis profluvium e naribus contingit; sive etiam feri & sanguinis excretiones ex ore aperto videntur.

IV. Plerumque per mortem solvitur apoplexia; interdum vero in paralyfin particularem transit, cum debilitate memoriæ conjunctam.

§. DCXXVI.

Difsectis illorum corporibus, quos apoplexia encavit, multoties constitit, intra meninges inveniri modo sanguinis, modo feri extravasationes.

§. DCXXVII.

In apoplecticis adesse debent congestiones ad caput [§§. anteced. & DCXXV. *numer. I.*]

§. DCXXVIII.

Ex congestionibus, ad certum gradum encephalon versus factis, sub accessione unius vel alterius causæ paralyfis in genere [§. DXCIX.], apoplexiæ ortus explicari poterit, una cum notabili illa differentia ratione vehementiæ morbi, ejusque productionis mox tardæ, mox celeris.

§. DCXXIX.

Unde jam apparebit ratio [§. anteced.] casuum illorum, ubi experientia multoties docuit, apoplexiam subortam fuisse. Hujus nominis præsertim erunt, læsiones capitis, inflammationes meningum, vasorum in cerebro obstructions, febris peracuta maligna, morbi pertinaces viscerum ab-

ominalium atque admodum læsæ respirationis, excretionum naturalium subitanæ suppressiones & artificialium intermissiones, gravia pathemata animi, dispositio ad hunc morbum eminentior in corporibus infantilibus & senilibus.

§. DCXXX.

Quum apoplexia paralyfin veram simulque universalem constituat [§§. CCLXXIV & DCXXV. *numer.* III.]: sequitur, ut, quæ in cap. XXIII. de paralyfi generatim evicta sunt, ea quoque ad apoplexiam transferri debeant, & quidem in eminentiore gradu.

§. DCXXXI.

Apoplexiæ signa pathognomica sufficientia esse poterunt abolitio sensuum & motus voluntarii, nec non splendor oculorum, ad sui dimidiam partem apertorum [§. DCXXV. *numer.* III.] Sed morbi imminētis signa colligenda erunt ex iis, quæ ad §. citat. *numer.* I. describuntur.

§. DCXXXII.

Apoplexiæ tandem prognosin deducere conveniet ex illis principiis, quæ ad paralyfin generatim respiciunt [§. DCXIV.]; non prætervīso illo momento, quod in historia morbi ad *num.* IV. §. DCXXV. annotatum est.

CAPUT XXVI.

DE

HÆMORRHAGIIS IN GENERE.

§. DCXXXIII.

Hæmorrhagiis [§. CLXXXI.] obtemperare coguntur subjecta, quibus sequentes conditiones insunt.

I. Quæ nimirum plethoram, spissitudinem humorum, cacochymiam alunt, orgasmos humorum patiuntur, aut gravibus congestionibus patent.

II. Quæ obstructa aut infarcta habent viscera.

III. Quæ spasmodum atrocitati obnoxia sunt.

IV. Quæ causas externas violentas admittunt, unde solutiones continui producuntur.

V. Aut quibus etiam ejusmodi solutiones continui ex aliis causis, præter externas violentas, oboriuntur.

§. DCXXXIV.

Docet porro experientia, in hæmorrhagiis, non a causis quibusdam externis violentis, sed alio modo productis, adesse phænomena sequentia.

I. Antecedere solent spasmi in uno loco corporis, in alio autem distensiones, artuum gravitas, spasmi peripherici atque alia motuum febrilium incommoda.

II. Proxime ante eruptionem sanguinis non numquam sensus quidam ardoris in loco hæmorrhagico percipitur.

III. Hæmorrhagia tandem succedente, & quidem moderate, descripta symptomata cessant.

IV. Quod si vero exacerbata, aut subito suppressa fuerit hæmorrhagia; insequi tunc solent convulsiones, lipothymia, inflammationes, hydropes, tabes corporis, mors haud raro subitanea.

V. Sed etiam contingere solet, ut naturæ conamina, ad producendam hæmorrhagiam suscepta, licet sæpe fuerint admodum urgentia, incassum tamen eant. Subsequi tunc observantur spasmi, morbi viscerum varii, immo etiam effectus descripti ad *numer. præced.*

VI. Hæmorrhagiæ tandem morbis periodicis sæpius accensendæ sunt.

§. DCXXXV.

Recensitæ in §. DCXXXIII. conditiones sub-
jectorum ortui causæ proximæ hæmorrhagiæ [§.
CLXXXII.] respondent.

§. DCXXXVI.

Inde jam [§. anteced.] patet, cur subjecta valde sensilia, victum plenum admittentia, & vitæ magis sedentariæ dedita, hæmorrhagiis tam frequenter obnoxia fiant? Cur venerei, scorbutici hæmorrhagias præsertim in illis locis experiantur, ubi humoris acredo in relatione ad alia corporis loca major facta est? Id quod congruit cum observatis.

§. DCXXXVII.

Exinde porro conspicuum erit [§. DCXXXV.] cur hydropicis, hypochondriacis hæmorrhoides & hysterice hæmorrhagiæ uteri soleant esse familiares? Quocum etiam consentiunt observationes

§. DCXXXVIII

Neque minus exinde ratio elucet [§. DCXXXV.] cur in feminis, facta circa periodum menstruanæ exacerbatione lumbaginis vel spasmi in utero, hæmorrhagiæ narium consequantur; vel sudores sanguinei sub axillis prorumpant; vel ad alia corporis loca magis adhuc insolita, ut ad pollicem pedis, taleolos, furas, sanguinis profluvia oboriantur? Quibus pariter annuunt observationes.

§. DCXXXIX.

Similiter etiam constabit ratio [§. DCXXXV.] quare vulneribus & ulceribus compositis [§§. CXCVII & CXCVIII.] hæmorrhagia accedat idem probante experientia.

§. DCXL.

In hæmorrhagiis, quarum phænomena in §. DCXXXIV. describuntur, necesse erit, ut sanguis ad ea loca corporis prius coacervetur, quare ex iisdem promanare possit [§. CLXXXII.] Hirudines non poterunt non vasorum distensiones ibidem oboriri [§. XCV.], quæ in causam spasmi, in alio loco corporis inde producti, degenerare valent [§§. CCCCLXXXIV & CCCCLXXXV. *numer. III.*] Sed etiam spasmi ad causas hæmorrhagarum pertinent [§§. DCXXXV & DCXXXII. *numer. III.*] Ecce igitur rationem phænomeni supra annotati [§. DCXXXIV. *numer. I.*]!

§. DCXLI.

Anne etiam ab ista spasmi conditione [§. ant.] artuum gravitatem & spasmi peripherici incommoda [§. DCXXXIV. *numer.* I. derivare licebit?

§. DCXLII.

Ex attritu sanguinis ad vasorum parietes, utpote qui necessarius hic erit [§. DCXL.], hæmorrhagia imminente, sensus ardoris & pruritus in locis hæmorrhagicis [§. DCXXXIV. *numer.* II.] explicari poterit.

§. DCXLIII.

Sanguinis quantitate per hæmorrhagias immutata, necesse erit, ut vasorum quoque distensiones una cum spasmis inde productis evanescant; hæmorrhagia non excedente supra gradum [§. DCXXXIV. *numer.* III.] Ex quo simul apparet, cur ejusdem conditionis hæmorrhagia se in artem remedii salutaris [nisi forte obstiterit conditio locorum hæmorrhagicorum] habeat ad plethoram & congestiones, morbosque varios inde oriundos? Idem comprobante experientia.

§. DCXLIV.

Quoniam vero necesse est, ut ab hæmorrhagiis efferis vasorum depletiones [§. CLXVIII.] subriantur, eisdemque subortis, stases & coacervationes fluidorum in vasis, præsertim tenerioris texture, fiant; atque etiam similes effectus a subitaneis hæmorrhagiarum suppressionibus in corpore producantur; hinc tibi jam de ratione tristis eventus

constare poterit, quem hæmorrhagiæ tam exacerbata, quam subito suppressæ nancisci soleant [§. DCXXXIV. *numer. IV.*]

§. DCXLV.

Quia etiam irrita quidem, sed pertinacia molimina hæmorrhagica illis similes effectus producere possunt, qui alias ab hæmorrhagiis subito suppressis proficisci solent [§. anteced.] ; hinc jam conspicua erit ratio momenti illius, quod annotatum legitur in §. DCXXXIV. *numer. V.*

§. DCXLVI.

Hæmorrhagiæ, ubi sanguis intra cavitatem quandam corporis excernitur, ut ibidem continuo reneri cogatur, semper erunt insalubres [§. LX. *proleg.*]

§. DCXLVII.

Si etiam hæmorrhagiæ usque ad productionem collapsionis vasorum oboriuntur; tunc illæ nequaquam salutares dici poterunt [§. LX. *proleg.*]

§. DCXLVIII.

Quando denique a ruptionibus vel arrosionibus vasorum, imprimis capaciorum, hæmorrhagiæ proveniunt; has quoque insalubres esse oportebit [§. LX. *proleg.*]

§. DCXLIX.

Signa pathognomica sufficientia hæmorrhagiæ jam præsentis ex ejus definitione patent [CCLXXXII.]; instantis vero colligenda erunt

causarum (§. DCXXXIII.) & phænomenorum existentia, quæ nimirum hæmorrhagias antecedere solent (§. DCXXXIV. *numer. I & II.*)

§. DCL.

Prognosin vero hæmorrhagiarum rite formaturus attendere debet ad locorum hæmorrhagicorum conditionem; ad quantitatem sanguinis excreti; ad qualitatem denique causæ proximæ, a qua hæmorrhagia dependet. Qua de re tibi haud exiguo usui esse poterunt propositiones, quas in se comprehendunt §§. DCXLIII - DCXLVIII.

C A P U T XXVII.

D E

H Æ M O R R H A G I A N A R I U M.

§. DCLI.

EXperientia docet, subjecta sequentis præcipue indolis huic hæmorrhagiæ fieri obnoxia.

I. Quæ in ætate adhuc crescente, imprimis puerili, versantur.

II. Quæ spasms partium haud ita remotarum a locis hæmorrhagicis, vel etiam febribus sanguineis vexantur.

III. Quæ causas quascunque alias congestionum ad caput admittunt. Quorsum exempli loco pertinebunt obambulationes sub cælo fervido, commorationes in conclavibus & balneis

admodum calidis, compressiones vaforum colli, a collarium nimis arcta applicatione productæ; atque hujus generis complura alia.

IV. Quæ scorbuto, aut lue venerea alte radicalata laborant.

V. Sexus denique potior huic hæmorrhagiæ magis subjacet, quam sequior.

§. DCLII.

Prout observatio testatur, hæmorrhagia narium sequentia sibi vindicat phænomena.

I. Antecedunt distensiones vaforum ad colalum, frontem & nasi radicem, genarum rubor, faciei inflatio, ophthalmia, cephalalgia, vertiginis afflictiones, tinnitus & susurrus aurium, non numquam insomnia.

II. Non deficient incommoda spasmi ad membra & circa hypochondria.

III. Urina tenuis apparet, quæ parce excernitur.

IV. Pruritus narium percipitur.

V. Quæ omnia sensim sensimque evanescent, quam primum hæmorrhagiâ ipsa subsequitur.

§. DCLIII.

In hæmorrhagia narium sanguinis congestiones versus caput fieri debent (§§. DCXL & anteced. numer. I.)

§. DCLIV.

Ex congestione sanguinis versus caput omnia phænomena, quæ in §. DCLII. enarrantur, expli-

catu facilia erunt, tam ratione ortus sui, quam interitus (§§. CCCCIV - CCCCVI.)

§. DCLV.

A propositis in §. DCLI. subjectorum conditionibus hæmorrhagiæ narium causa proxima (§. CLXXXII.) produci poterit.

§. DCLVI.

Hæmorrhagia narium instans colligi poterit ex vasorum circa collum, frontem & nasi radicem distensionibus, ex faciei inflatione & genarum rubore, tandemque ex pruritu narium (§. DCLII. *numer.* I & IV.) Signa autem pathognomica sufficientia ejusdem hæmorrhagiæ jam præsentis in sensus statim incurrunt.

§. DCLVII.

Prognosis rationem in hæmorrhagia narium cognoscere poteris ex §. DCL. hic rite applicaturus ibidem indicata principia.

C A P U T XXVIII.

D E

H Æ M O P T Y S I.

§. DCLVIII.

HÆmoptysi (§. CCXCVII.) præ reliquis patere solent subjecta, docente experientia, ubi conditiones sequentes inveniuntur.

- I. Quæ in ætate juvenili versantur.
- II. Quæ compressiones hypochondriorum, aut pectoris contusiones admittunt.
- III. Quæ tussibus vehementibus vexantur.
- IV. Quæ cauendo, clamando, ridendo pulmones percellunt, aut acria per inspirationem ad pulmones deferunt.
- V. Quibus pulmones læsi sunt, aut fluxus hæmorrhoidum aut mensium supprimitur.

§. DCLIX.

Ex observatis porro constat, hæmoptysin præcedere spasmus in extremitatibus & sub hypochondriis; sensum gravativum in capite, in thorace; sæpius etiam oppletionem pectoris & tussim siccam sonoram.

§. DCLX.

Quibus abortis (§. anteced.), ipsa hæmorrhagia contingit, cum sensu caloris in trachea, sanguis, qui ejicitur, floridus & spumescens apparet. Annotari hic etiam debet, quod hæmoptysis ad excedentes hæmorrhagias pertineat, sæpe recurrat, & ordinarie in ulcus pulmonum transeat.

§. DCLXI.

Hæmoptysis (§. CCXCVII.) causæ proximæ ortum ab illis conditionibus subjectorum, quæ in §. DCLVIII. describuntur, deducere licebit.

§. DCLXII.

Ex congestionibus ad loca hæmorrhagica, & spasmis, in omni casu hæmorrhagiæ simul necessariis (§. DCXL), notata ad §. DCLIX. symptomata hæmoptylis derivare conveniet.

§. DCLXIII.

Quia sanguis, ab hæmoptylicis excretus, ex pulmonibus venit (§. CCXCVII.): nec mirum adeoque erit, cur ille intensi ruboris sit & spumescat (§. DCLX.)?

§. DCLXIV.

Sensus caloris in trachea, qui ab hæmoptylicis percipitur (§. DCLX.) dependet a sanguine, qui statim ex suo vase egressus tracheam contingere poterit.

§. DCLXV.

Sanguinis guttula ad vasorum, in pulmonibus solutorum, parietes hærere ibidemque in putredinem ire poterit. Hinc ulcus pulmonibus hæmoptylicorum inducitur (§. DCLX.)

§. DCLXVI.

Ex §. anteced. intelligere licebit rationem casus hujus frequentissimi, cur nimirum hæmoptyci, præcipue juniores, mox fiant phthifici (§. CCXCI.)?

§. DCLXVII.

Ob ulceris facilem ortum in pulmonibus, horumque debilitatem, a congestionibus ibidem pro-

ductam, hæmoptysis sæpius recurrere poterit
[§. DCLX.]

§. DCLXVIII.

Ob motum sanguinis, per pulmones magis acceleratum, hæmoptysis facile fieri potest hæmorrhagia excedens [§. DCLX.]

§. DCLXIX.

Signa pathognomica sufficientia hæmoptysis imminuentis ex propositis ad §§. DCLVIII. & DCLIX. colligenda erunt; sed jam præsentis ex eo constabunt, quando sanguis, sub motu tussiculoso reiectus, floridam magis rubedinem præ se fert, & spumidus apparet [§. DCLX.]

§. DCLXX.

Prognosin certam hæmoptysis conficere poteris ex congrua principiorum supra propositorum [§. DCL.] applicatione ad casum præsentem; hic simul ad ea directurus animum tuum, quæ traduntur in §§. DCLXVI. DCLXVII & DCLXVIII.

C A P U T XXIX.

D E

V O M I T U C R U E N T O.

§. DCLXXI.

EXperientia docet, vomitum cruentum [§. CCCVII.] accidere subjectis, quorum conditio ad sequentia momenta redit.

I. Quibus emeses vehementiores concitantur, venena offeruntur, aut quibus aliæ causæ violentæ externæ ad ventriculum & lienem accidunt.

II. Quibus lienis infarctus aut scirrhus oboritur, vel etiam fluxus hæmorrhoidalis vel menstruus supprimitur.

III. Quibus cum febre quartana diu colludandum erat.

IV. Hypochondriacis & feminis hystericis familiaris est morbus.

V. Tandem sexus sequior potiore magis huic morbo subjacet, ibique maxime, ubi mensium obtinuit, vel emanatio, vel suppressio, vel cessatio.

§. DCLXXII.

Indicant porro observationes, quod circa vomitum cruentum phænomena sequentia occurrere soleant.

I. Antecedunt anxietates præcordiorum & spasmus hypochondrii sinistri.

II. Succedit deinde nausea cum conatu vomendi.

III. Tandem consequitur ipse vomitus, quo prius contenti in ventriculō cibi, deinde congrumatus sanguis ejicitur, haud raro ad notabilem quantitatem.

IV. Tempore remissi vomitus sensus caloris in stomacho percipitur, ubi sanguis subinde collectus, novis conatibus vomendi succedentibus, excernitur.

V. Quo citius hic sanguis, in ventriculo collectus, per vomitum rejicitur; eo floridior & fluidior apparet. Quo diutius autem ibidem moratur; eo spissior magisque niger, & quasi in frusta coactus esse videtur, facta illius excretionē ope vomitus.

VI. Morbus iste semel obortus sæpius redire solet.

VII. Tandem per observationes constitit, vomitum cruentum sæpe quidem profuisse tumoribus lienis; sed illum quoque haud raro transisse in hydropem, tabem corporis, vel morbum aliquem acutum.

§. DCLXXIII.

Determinationes subjectorum, in §. DCLXXI. enarratæ, causam proximam vomitus cruenti [§§. CCCVII. & CCCVIII.] producere valent.

§. DCLXXIV.

Quæ de effectibus hæmorrhagiarum, ratione locorum corporis, ubi natura sanguinis excretionem molitur, in genere valent; ea quoque de vomitu cruento [§. CCCVII.] valere debent. Hoc igitur principium rite applicaturus intelligere poteris rationem necessariam spasmi ad hypochondrium sinistrum, nec non angoris cordis [§. CXLVI.]; utpote quæ incommoda vomitui cruento obnoxiiis accidere solent [§. DCLXXII. *numer. I.*]

§. DCLXXV.

Si in cavo ventriculi cibi adfuerint, necesse est, ut illi (nam superius quasi stratum efficiunt) prius excernantur, quam vomitus cruenti phænomena prodeant in conspectum (§. DCLXXII. *num.* III.)

§. DCLXXVI.

Sensus caloris, qui percipitur tempore remissi vomitus cruenti [DCLXXII. *num.* IV.], non nisi a sanguinis fluxu per vasa semel aperta in cavum ventriculi admodum sensilis dependeat, oportebit.

§. DCLXXVII.

Nigredo & coagula sanguinis vomitu excreti [§. DCLXXII. *num.* III. & V.] partim a sui morâ in ventriculo, partim a bilis & succi gastrici admixtione derivari poterunt.

§. DCLXXVIII.

In frequentia causarum possibilium in corpore, vomitum cruentum determinantium [§. DCLXXI.], ratio latebit frequentioris reditus hujus morbi [§. DCLXXII. *numer.* VI.] Atque ex eodem fundamento id quoque explicandum erit, quare nimis sexus sequior præ potiore huic morbo magis subjiciatur (§. DCLXXI. *numer.* V.)?

§. DCLXXIX.

Sanguinis excretio, quæ in vomitu cruento fit, non numquam vasorum brevium apertionem pro sui ratione habere poterit [DCLXXI *num.* II.] Unde etiam necesse erit, ut tunc lienis tumoribus

proficiat hæc hæmorrhagia [§. DCLXXII. *num.* VIII.] ; non deficiente tamen illa conditione, quæ in §. DCXLIII. exponitur.

§. DCLXXX.

Sed quia etiam in vomitu cruento contingere potest, ut illa conditio obtineat, sub qua hæmorrhagiæ in genere pessimos effectus in corpore edunt [§. DCXLIV] : hinc jam patebit ratio vomitus cruenti, non numquam transeuntis in morbos supra annotatos [§. DCLXXII. *numer.* VII.] Quibus adhuc accedit, quod sanguis ob sui longiorem moram in ventriculo facile putrescere possit, tunc magis promoturus ortum morbi cujusdam acuti.

§. DCLXXXI.

Signa vomitus cruenti pathognomica sufficientia esse possunt sanguis congrumatus & niger, quatenus ille evomitur [§. DCLXXII. *numer.* III & V.] ; una cum sensu illo, quem æger habet, dum sanguis intra tempus remissi vomitus in ventriculo iterum colligitur, rejiciendus vi subsequantium conatuum vomendi [§. *cit.* *numer.* IV.]

§. DCLXXXII.

Vomitus cruenti prognosin ad eadem principia reducere licebit, quæ jam continentur in §. DCL ; hic simul ad considerandum sumptis momentis illis ; quæ indicantur ad §. DCLXXII. *num.* VI. & VII.

CAPUT XXX.
DE
SPUTO CRUENTO.

§. DCLXXXIII.

Si sputum cruentum [§. CCLXXXVIII.] ex infundibulo narium procedat, tum necesse erit, ut vel ad radicem nasi, vel palatum versus dolor, aut sensus quidam gravativus antea sentiatur [§§ DCXL & DCXLII]; deinde vero sanguis grumofus in cavum oris delabatur, cum multo mucro remixtus per os ejiciendus.

§. DCLXXXIV.

Hoc adeoque sputum cruentum [§. anteced.] post hæmorrhagiam narium vel subsistentem, vel non consequentem evenire poterit.

Quod etiam congruum est experientiæ, quæ nimirum teste satis constitit, huic hæmorrhagiæ obnoxium fieri id hominum genus, quod proclive deprehenditur esse ad narium hæmorrhagias.

§. DCLXXXV.

Si sputum cruentum [§. CCLXXXVIII.] proveniat vel ex pharynge, vel larynge, vel tonsillis, opus tum erit, ut antea deprehendatur vel impedita quædam deglutitio, vel tussis exacerbata sub inspiratione, vel dolor aut pruritus quidam in dictis partibus [§§ DCXL & DCXLII.]; dein excernatur sanguis, mucro remixtus.

§. DCLXXXVI.

Hic igitur sputi cruenti casus [§. anteced.] in morbis catarrhalibus, inflammationibus colli & tracheæ evenire poterit; idque cum maximo ægri commodo. Quocum consentiunt observata.

§. DCLXXXVII.

Si sputum cruentum (§. CCLXXXVIII.) ex palato, lingua, gingivis originem suam potius ducat: consequens tunc erit, ut doloris aut illi similis incommodi sensus ibidem percipiatur (§§. DCXL & DCXLII.); quem vero imminui oportebit, quam primum sanguis excernatur, hic quoque muco remixtus.

§. DCLXXXVIII.

Quod si tandem sputum cruentum ob putrefactionem illarum partium oriatur, quæ hic loca sic dicta hæmorrhagica constituunt (§. CCLXXXVIII.): tum sanguis, qui per os ejicitur, foetorem spirabit.

§. DCLXXXIX.

Inde liquet ratio (§. anteced.), cur sputa cruenta scorbuticorum, venereorum, aut quorum lingua a cancro exeditur, vel dentes carie afficiuntur, foeteant? Quocum conveniunt observata.

§. DCXC.

Sputi cruenti signa pathognomica sufficientia continentur in §§. DCLXXXIII. DCLXXXV. DCLXXXVII. & DCLXXXVIII.

§. DCXCI.

Quod denique ad signa prognostica ejusdem hæmorrhagiæ spectat, illa facile eruere poteris ex §§. DCLXXXIV. DCLXXXVI. DCLXXXIX; in subsidium hic simul vocatis, quæ jam prolata sunt in §. DCL.

CAPUT XXXI.

DE

MICTU CRUENTO.

§. DCXCII.

Subjecta mixtus cruenti (§. CCCXLII.), docente experientia, sequentis indolis esse solent.

I. Quæ Venere remediis diureticis vel aphrodisiacis abutuntur.

II. Quæ spasmis hæmorrhoidalibus valdopere vexantur.

III. Quæ calculum in renibus habent vel vesica.

IV. Quibus gonorrhœa perquam maligna, aut ejusdem conditionis fluor albus oboritur.

V. Reliquum morbus iste sexui potiori magis quam sequiori, atque imprimis senibus familiaris est.

§. DCXCIII.

Huic morbo connexa esse observantur symptomata sequentia.

I. Adfunt nimirum spasmus Paracelsi fixus, lumbago, malum ischiadicum, stranguria, alvus constricta.

II. Sanguis modo floridus, modo in flocculis excernitur; idque mox cum dolore satis acerbo, mox etiam sine illius sensu aliquo.

III. Hæmorrhoidariis levamentum aliquod afferre videtur ratione spasmorum. Verum etiam contingere solet, ut eadem hæmorrhagiæ species vel in hydropem, vel in morbum acutum transeat.

§. DCXCIV.

Sub conditionibus subjectorum (§. DCXCII.) fieri poterit, ut facile oriatur mictus cruenti causa proxima (§. CCCXLII.)

§. DCXCV.

Spasmi Paracelsi fixi, lumbaginis, mali ischiadici, stranguriæ & alvi strictæ existentia in morbo præfente necessaria (§. DCXCIII. *numer. I.*) intelligi poterit ex §§. DCXL. & CCCCXCIV.

§. DCXCVI.

Color intense rubens sanguinis ejusque flocculorum, five exiguæ molis coagulorum, sub mictu cruento excretorum (§. DCXCIII. *num. II.*), ab urina ipsis admixta dependebit.

§. DCXCVII.

Cur mixtus cruentus non numquam hæmorrhoidariorum incommoda levare, immo etiam in

hydropem vel morbum acutum transire queat : de hujus rei ratione tibi jam constare poterit ex §§. DCXLIV & DCXLV.

§. DCXCVIII.

Signa pathognomica sufficientia mictus cruenti ex ipsa morbi definitione (§. CCCXLII.) cognoscuntur.

§. DCXCIX.

Ratione prognosis, in hocce morbo formandæ ; præter fundamenta hæmorrhagiarum in genere (§. DCL.), considerandum erit momentum ; ad §. DCXCIII. *numer.* III. propositum.

C A P U T XXXII.

DE

FLUXU MENS TR U O.

§. DCC.

QUam primum sexus sequior annos pubertatis attigerit, quod ordinatæ fieri solet circa annum decimum quartum in non nullis tamen citius, in aliis serius : tum illi fluxus menstruus (§. CCCXXXVIII.) oboritur. Durat hæc menstrua excretio usque ad annum ætatis quadragesimum nonum, immo quinquagesimum. Ad hoc ordinarium est, quod observare licet. Verum enim vero experientia quoque docuit, hanc sexui sequiori solemnem excretionem modo citius, modo serius, quam

cum temporis ratione jam indicata congruit, cessavisse: ibi nimirum citius, ubi primum oborta erat mature; tunc vero serius, quando nimis tarde primum obtigerat.

§. DCCI.

Sequentia porro notanda erunt phœnomena, quæ circa fluxum menstruum occurrunt.

I. Deprehenduntur gravitas artuum, cephalalgia, colica, tormina ventris, spasmus Paracelsi fixus, lumbago, malum ischiadicum: quæ omnia cessant; fluxu ipso ad perruptionem perducto.

II. In non nullis ante fluxum abdomen depressum, in aliis turgidum esse observatur.

III. Adspectus apparet modo floridus, modo pallidus.

IV. Durat hic fluxus in otiosis per quinque, sex, immo octo dies; in laboriosis vero intra secundum diem, interdum adhuc citius, absolvitur.

V. Initio tantum fluidum ferofum subrubrum, mox sanguis densior, denuo serum rubore tinctum excernitur; tandemque fluxus ipse subsistit, denuo rediturus post tres hebdomades.

VI. Prima eruptio mensium febre sat vehementer stipata esse plerumque observatur; reliquæ vero excretiones menstruæ leves tantum motus febriles sibi comites habere solent.

VII. Gravidis plerumque iste fluxus deficit, sine notabili tamen incommodo.

VIII. Ac

VIII. Accidit vero interdum, ut in feminis gravidis, maxime plethoricis, si non per omne gestationis tempus, intra primos tamen graviditatis menses, hæc excretio continuetur.

IX. Notatu porro dignum est, quod, quo propius sexus sequior ad tempus consuetæ cessationis accedit, eo potentius menses fluere soleant.

X. Ad phases lunæ plerumque se accommodat excretio menstrua, & quidem in ratione ad ætatem subjectorum. Quæ de re ut explicatius hic dicatur, necesse esse videtur. Virgines nimirum vel mulieres, quarum ætas adhuc continetur intra annum vigesimum primum, & quod excurrit, illæ purgantur ex utero circa novilunium. Quæ vero ætatis annum vigesimum primum superarunt, illis usque ad annum trigesimum, & quod foret supra, excretio menstrua oboriri solet intra tempus novilunii & plenilunii. Circa annum ætatis trigesimum quintum, usque ad annum circiter quadragessimum secundum, hæc excretio in plenilunio, vel statim post, obtingere consuevit. Ab anno tandem quadragesimo secundo, usque ad annum quadragessimum nonum, vel quinquagesimum, tamquam ordinarium tempus, quo hæc hæmorrhagia menstrua cessare solet, ejus productio incidit in tempus, quo luna decrescit.

XI. Quod de periodo menstrua ad *numer. præced.* dicitur, hoc quidem ordinarium est, quod in natura fieri observatur; tantum verò

abest, ut ordo iste perturbari nequeat, ut potius hoc sæpius contingere soleat, admissis causis variis. Quorsum exempli loco pertinebunt errores multiplices circa usum rerum sex non naturalium, atque hujus generis plura alia, quibus vis quædam inest ad hæmorrhagias vel augendas, vel supprimendas, vel accelerandas, vel etiam retardandas. Ut itaque hoc modo consuetæ periodi menstruæ facta perturbatione, fluxus menstruus solito citius, vel tardius oboriri queat.

XII. Hujus excretionis defectum, vel immutationem, vel etiam exacerbationem varii morbi, tam chronicæ, quam acutæ indolis, excipere solent. Quum e contrario sanitati sexus sequioris quam optime respondere deprehendatur fluxus menstruus, convenienter eidem obortus.

XIII. Tandem ne id quidem hoc loco prætermittendum esse videtur, quod pariter innouit per observationes, existisse nimirum inter feminas exempla (sed hæc rara sunt), quibus numquam contigit fluxus menstruus; salva tamen illarum & sanitate, & foecunditate.

§. DCCII.

Ob sanguinis congestionem versus uterum, utpote necessarium ad fluxum mensium producendum, necessarii quoque esse debent effectus (§. anteced. num. i.), gradu & numero diversi; pro ratione nimirum congestionis, quæ fit ad loca uterina (§. 640.)

§. DCCIII.

Quum, fluxu menstruo ad perruptionem perducto, vasa uterina tantopere turgescere nequeant; cessabunt tunc quoque ista incommoda (§§. 643 & 701. *numer.* 1.)

§. DCCIV.

Si sanguinis congestio (§. 175.), loca uterina versus facta, nullum ibidem spasmus producat, unde sanguis cum impetu aliorum repelli possit; tum opus est, ut abdomen magis turgescat (§. 701. *numer.* 2.)

§. DCCV.

Sed in hoc casu (§. anteced.) adspectus magis fit pallidus oportebit [§. 701. *numer.* 3.] Quocum etiam iudicium sensuum congruit.

§. DCCVI.

Quod si vero sanguis, ad loca uterina congestus, spasmus ibidem efficiat, a quo hæc congestio (§. 175.) subito superetur; abdomen tunc potius depressum erit (§. 701. *numer.* 2.)

§. DCCVII.

In quo casu (§. anteced.) facies magis rubebit (§. 701. *numer.* 3.); oriri facile poterunt dyspnœæ, pleuritides, hæmorrhagiæ narium, sudores sanguinei sub axillis, immo hæmorrhagiæ ad mammas, suras & pollices pedum (§§. 638 & 640.) Quæ etiam ab observatis comprobantur.

§. DCCVIII.

Quoniam sub initio excretionis menstruæ vasa uterina non adeo esse possunt dilatata circa orificia sua, quam deinceps fit, sub illius nempe continuatione; atque etiam eadem vasorum uterinorum orificia admodum patula iterum fieri debent angustiora, imminente fine hujus hæmorrhagiæ; hinc jam de ratione constabit, quare nimirum in principio fluxus menstrui fluidum tantum modo tenue, serum puta subrubrum, in progressu vero sanguis, tandem sub fine fluidum denuo serosum, rubedine aliqua tinctum, excernatur (§. 701. *numer.* 5.)?

§. DCCIX.

Ob majorem vasorum uteri sanguineorum resistantiam in sanguinem, prima vice ibidem congestum, majores quoque motus febriles necessarii erunt; si imprimis plethora admodum urgeat.

§. DCCX.

Intelligere inde licet (§. anteced.), cur prima excretio menstrua notabili quadam febre stipata esse soleat (§. 701. *numer.* 6.)?

§. DCCXI.

Quia etiam haud exigua sanguinis quantitas ab embryone in utero crescente consumitur; plethoram igitur admodum urgentem in corporibus gravidarum supponere non licebit; nisi forte exceptionem aliquam hic faciant otium & victus maximopere nutriens. Qua propter conspicua jam erit

ratio (§§. 635 & 633. *numer.* 1.), unde nimirum fieri soleat, ut in gravidis fluxus menstruus ordinarie desideretur, aut si adfuerit, ille tantum intra primos graviditatis menses contigisse observe-
tur (§. 701. *numer.* 8.)?

§. DCCXII.

In corporibus senilibus vasorum sanguineorum orificia jam concreescere solent. Tunc igitur ruptione magis fibrarum in vasis opus erit ad producendum ex illis egressum sanguinis. Qua de causa hæmorrhagiam quoque largiorem esse oportebit. Ex quibus adeoque cognoscere licebit rationem, quare sanguinis menstrui copiosior excretio circa id tempus ætatis fiat, quod illius plenariæ cessationi imminet (§. 701. *numer.* 9.)?

§. DCCXIII.

Quod denique ad fluxus menstrui effectus tam salutare, quam noxios attinet, qui pro illius differente conditione prodire solent (§. 701. *num.* 12.): id tibi jam facile erit ad intelligendum ex §§. 643. 644. & 645.

§. DCCXIV.

Signa fluxus menstrui pathognomica sufficientia ex illius definitione (§. 338.) patent; prognostica vero eruenda erunt ex §§. 650 & 701. *numer.* 12.

CAPUT XXXIII.

DE

HÆMORRHAGIA UTERI IN SPECIE
SIC DICTA.

§. DCCXV.

HUic morbo [§. 339.], teste experientia, sub-
jiciuntur feminæ abortientes; emmenagogis
fortioribus abutentes; annosiores; tandemque læsæ
ex utero.

§. DCCXVI.

Nunc modo propositæ subjectorum conditiones
[§. anteced.] ad producendam hæmorrhagiæ uteri
in specie talis [§. 339.] causam proximam ad-
modum valent.

§. DCCXVII.

Hæmorrhagia uteri in specie sic dicta [§. 339.]
numerum hæmorrhagiarum insalubrium subibit [§§.
646. 647. 648. 715 & 716.]

§. DCCXVIII.

Ex observationibus constitit, hæmorrhagiam uteri
in specie talem plerumque excepisse inflammationes
uteri, ulcera ibidem orta pessimæ indolis, hydro-
pem, tabem corporis, non numquam etiam alios
eristes effectus, qui in genere hæmorrhagias effe-
ras, vel subito suppressas sequi solent [§. 634
numer. 4.]

§. DCCXIX.

Ratio hujus eventus, quem hæmorrhagia uteri in specie dicta nancisci solet [§. anteced.], satis clare apparet ex §. 644.

§. DCCXX.

Signa pathognomica sufficientia hæmorrhagiæ uteri in specie talis ex illius definitione [§. 339.] liquent; prognostica vero intelligere licebit ex §§. 650. 717 & 718.

CAPUT XXIV.

DE

FLUXU LOCHIALI.

§. DCCXXI.

QUod ad hæmorrhagiæ hujus [§. 340.] historiam attinet; notari hic merentur sequentia momenta.

I. Post foetus & secundinarum exclusionem sanguis e genitalibus feminæ profluit; cujus hæmorrhagiæ duratio se ad octo, quatuordecim, non numquam etiam plures dies extendere solet.

II. Initio sanguis solitæ consistentiæ, dein grumosus, postea tenuis instar loturæ carniū, & tandem liquidum quoddam lymphatico-serosum excernitur, ultimo hoc quoque subsistit.

III. Circa tertium, quartum vel quintum diem gravis quidam foetidusque odor prodire observatur.

IV. Secundinis diu retentis, seu illarum portione aliqua in utero relicta, gravior hæmorrhagia suboriri solet. Idem etiam evenire observatur, admissis causis, orgasmum humorum provocantibus.

V. Quod si vero causæ obtineant in corpore, a quibus fluxus iste subito supprimitur, multa tum, eaque gravissima mala oriuntur.

VI. Tum enim ventris intumescencia, febris inflammatoria, maligna, ulcera uteri pressa, ut dicunt, pede sequuntur.

VII. Notatu tandem dignum est, fluxum lochiale in illis feminis largiorem oboriri, quibus larga; parciorem vero, quibus parca esse solebat purgatio menstrua.

§. DCCXXII.

Fluxus lochiorum [§. 340.] supponit vasorum uterinorum solutionem, factam quasi per dilacerationem [§. 721. numer. 1.]

§. DCCXXIII.

In fluxu igitur lochiali sanguis statim sincerus, prout ex vulnere quodam fieri solet, excernatur, oportebit [§. 721. numer. 2.]

§. DCCXXIV.

Quum sanguis extravasatus quiescens tandem coagulari & putrefieri debeat; liquidum ideo erit, cur per fluxum lochiale dein excernatur sanguis grumofus & foetorem spirans [§. 721. num. 3.]?

§. DCCXXV.

Quoniam in fluxu lochiali simili ratione se res habet cum solutione fibrarum, quæ in vasis uterinis oboritur (§. 722.), quam quæ in vulneribus generatim contingit (§. 424.): hinc etiam ad similes effectus concludere licebit (§. citat.). Unde jam patebit ratio, quare in fluxu lochiali loco sanguinis humor tandem tenuis, instar loturæ carniū, magisque serosus excernatur (§. 721. *numer.* II.)?

§. DCCXXVI.

Posita vasorum distensione, ad illorum solutionem adhuc accedente, poni simul debet major hæmorrhagia. Ilinc retentis in utero frustis secundinarum, seu orgasmo sanguinis concitato, hæmorrhagiam graviolem esse oportebit (§. 721. *numer.* 4.)

§. DCCXXVII.

Originem malorum, quæ a fluxus lochiorum subitanea suppressione provenire solent (§. 721. *numer.* 5. & 6.) intelligere licebit ex §§. 644. & 724.

§. DCCXXVIII.

Vasis sanguineis, quibus frequens majorque distensio obtigerat, major quoque debilitas tribuenda erit. Ergo fluxus lochialis illis etiam feminis largior sit, oportebit, quæ largum; parcior vero, quæ parcum expertæ sunt fluxum menstruum (§. 721. *numer.* 7.)

§. DCCXXIX.

Fluxus lochialis signa pathognomica sufficientia ex illius definitione satis manifesta sunt (§. 340.); prognostica vero facile inveniuntur, rite consideratis, quæ jam prostant in §§. 650. 722 & 721. *numer. 4. 7.*

CAPUT XXXV.

DE

HAEMORRHOIDIBUS FLUENTIBUS INTERNIS IN SPECIE TALIBUS.

§. DCCXXX.

HÆmorrhoides internas fluentes in specie tales (§. 334.), ut experientia docet, antecedere solent sequentia incommoda.

I. Tormina ventris, statulentia, colica, cardialgia.

II. Spasticæ afflictiones circa mesenterium & reliqua viscera abdominalia, nec non circa hypochondria; tandemque malum ischiadicum & spasmus Paracelsi fixus.

III. Quibus adhuc accedunt tenesmus & sensus ille incommodus, quem æger intra intestinum rectum percipit, atque illi similis, qui a corpore quodam duro & spinoso ibidem hærente produci possit; idque tum maxime, ubi qui-

dem gravia adsunt impedimenta, quo minus hæc excretio suboriri queat, in illius tamen productionem natura pertinaciter insistere videtur.

IV. Cessant denique hæc omnia incommoda, quam primum fluxus hæmorrhoidalis ad perruptionem congruam venerit.

§. DCCXXXI.

Descripta in §. anteced. phænomena ex sanguinis congestione ad loca hæmorrhoidalia differente explicari possunt (§§. 640. 643. 644. & 645.)

§. DCCXXXII.

Si causæ in corpore obtineant, siue illæ fuerint externæ, siue internæ, a quibus sanguinis congestio magis ad vasa hæmorrhoidalia interna producitur: tum hæmorrhoides internæ fluentes oriri poterunt in omni subiecto cujuscunque ætatis, vel sexus; quamvis hæc excretio facilius in uno casu, quam in alio fieri possit [§§. 633. & sequ.]

§. DCCXXXIII.

Non poteris igitur non ex §. anteced. generatim concludere ad conditionem subiectorum proclivium ad fluxum hæmorrhoidalem internum. Sed & in specie casuum sequentium rationem inde cognoscere tibi licebit; cur nimirum sexus potior præsequiore, cur ætas consistens & senilis, cur gravidæ & histericæ, cur hypochondriaci, cur morbis primarum & secundarum viarum laborantes,

cur Venere , alliaceis , cepaceis & remediis aloëticis abutentes, cur diuturnis & violentis equitationibus corpus defatigantes , cur juvenes & infantes ex mesenterio ægrotantes, hæmorrhoidibus internis fluentibus subjiciantur? Quæ omnia cum observatis bene conveniunt.

§. DCCXXXIV.

Sanguis hæmorrhoidum internarum non nisi cum scybalis, quæ plerumque indurata sunt, vel mox post illorum egressum ex intestino recto excernatur, oportebit.

§. DCCXXXV.

Quod porro ad effectus attinet, qui ab hac excretionis hæmorrhoidalis specie in ægrotantis corpore dependent: superfluum foret, huic argumento diu immorari; siquidem omnia, quæ de eodem hic prolixè disputari possent, ad eadem principia reducenda erunt, quæ supra jam evicta sunt [§§. 643-650.]. Nam eorum beneficio satis accurate de eo judicare licebit, ubi nimirum & quando a fluxu hæmorrhoidum internarum effectus modo salutare, modo infalubres expectari debeant? Id quod etiam de aliis excretionum hæmorrhoidalium speciebus [§§. 334 & 335.] tenendum erit.

§. DCCXXXVI.

Signa pathognomica sufficientia hæmorrhoidum fluentium internarum, in specie talium, tibi jam

suppeditabunt dicta in §. 734. una cum definitione hujus hæmorrhagiæ [§. 334.]

§. DCCXXXVII.

Prognosin in eadem hæmorrhoidum specie formandam quod denique concernit: de hoc negotio rite expediendo te satis quoque edocere poterunt prolata in §. 735.

C A P U T XXXVI.

D E

HÆMORRHOIDIBUS EXTERNIS
FLUENTIBUS.

§. DCCXXXVIII.

HÆmorrhoides externas fluentes [§. 333 & 334.], præter recensita in §. 730. incommoda, hæc quoque antecedere debent, pruritus ani ejusque tumores, non numquam etiam stranguaria.

§. DCCXXXIX.

Sanguis hæmorrhoidum externarum fluentium extra tempus alvinæ excretionis evacuari potest; quamvis copiosius excerni debeat sub conatu ad alvum deponendam [§§. 333 & 334.].

§. DCCXL.

Tenesmus, cum hæmorrhoidibus externis connexus, major esse debet tenesmo hæmorrhoidum internarum (§. 333.)

§. DCCXLI.

Hæmorrhoidibus internis difficulter fluentibus, produci possunt hæmorrhoides externæ fluentes (§§. 333 & 334.)

Non solum huic propositioni, sed & duabus proximæ antecedentibus, observationes consentiunt.

§. DCCXLII.

Sub conditione caussarum in corpore obortarum, a quibus congestiones sanguinis in vasis hæmorrhoidalibus externis potius, quam alibi efficiuntur, contingere poterit, ut tandem fluxus hæmorrhoidum externarum proveniat.

§. DCCXLIII.

Hinc jam de ratione subjectorum in genere constabit, quæ huic excretioni hæmorrhoidali præ aliis obtemperare coguntur (§. anteced.) Atque ideo nunc etiam facilia erunt ad intelligendum exempla sequentia; cur post equitationes magis hæmorrhoides istæ proveniant; vel etiam psoriasis infectis, stranguria & dysuria laborantibus, feminis fluore albo inquinatis, tandemque illis oboriri soleant, qui alias causas externas, orificium ani valdopere irritantes, ibidem admittunt? Quibus respondent observata.

§. DCCXLIV.

Hæmorrhoidum externarum fluentium signa pathognomica sufficientia apparent ex §§. 333. 334 & 739; prognostica vero eruenda sunt illis principiis convenienter, quæ indicantur in §. 735.

CAPUT XXXVII.

DE

HÆMORRHOIDIBUS MUCIDIS.

§. DCCXLV.

ANtequam hæmorrhoides tam internæ, quam externæ fluentes oboriuntur, fieri tunc poterit, ut illæ prius hæmorrhoidum mucidarum speciem præ se ferant (§. 335 & 337.)

§. DCCXLVI.

Quorum corporibus sanguis valde serosus inest, illis quoque hæmorrhoides mucidæ perquam familiares esse debent [335.]; sed non deficiente conditione illa, quæ generatim ad fluxum hæmorrhoidalem requiritur (§§. 732 & 742.)

Utrasque propositiones proxime antecedentes probat experientia; utpote quæ docet, phlegmaticos æque, ac eos, qui tantum moliminibus hæmorrhoidalibus ut dicunt, continuo vexantur, hæmorrhoidibus mucidis fieri obnoxios.

§. DCCXLVII.

Signa pathognomica sufficientia hæmorrhoidum mucidarum facile patebunt ex definitione [§. 335.]; prognostica vero ad eadem fundamenta redibunt, quæ habentur in §. 735.

CAPUT XXXVIII.

DE

HÆMORRHOIDIBUS CÆCIS TURGENTIBUS
ET TUMENTIBUS.

§. DCCXLVIII.

Posita sanguinis ad vasa hæmorrhoidalia congestionem admodum vehemente, diuque perseverante; necesse tunc potius erit, ut hæmorrhoides cæcæ, tumentes & turgentes suboriantur [§. 336 & 337.]

§. DCCXLIX.

Admissis igitur causis constringentibus anum sub fluxu hæmorrhoidali; aut ejusdem impedimentis alii subortis, quæ mox ad vasa, mox ad sanguinem ipsum redibunt [§. anteced.], hæmorrhoides cæcæ turgentes & tumentes oriantur, oportebit [§. 337. Quocum etiam consentiunt observata.

§. DCCL.

Hæmorrhoides cæcæ, tumentes & turgente facile exulcerari, ac in fistulam ani degenerare possunt.

possunt (§§. 337. 202. 203. 204. & 201.)
Id quod frequentissima confirmat experientia.

§. DCCLI.

Signa pathognomica sufficientia hæmorrhoidum
cæcarum, turgentium & tumentium sunt dolor ad
anum & tumor ibidem palpabilis (§. 337.); pro-
gnosticorum vero rationes ab iisdem fundamentis
petendæ erunt, quibus innititur prognosis stasium
& obstructionum (§. 403.), congestionum (§.
407.), inflammationis (§. 421.), ulcerum (§§.
439 & 750.), scirrhorum (§. 455.)

CAPUT XXXIX.

DE

HÆMORRHOIDIBUS SERPIGINOSIS.

§. DCCLII.

Hæmorrhoides mucidæ successu temporis ser-
piginosæ fieri possunt (§§. 335 & 337.)

§. DCCLIII.

Si veneris (§. 344), aut scorbuticis (§. 343.),
aut scabiosis (§§. 225 & 227.), aut quibuscumque
aliis, quorum corporibus humorum acrimonia in-
est [§. 190.], hæmorrhoides mucidæ eveniunt; hæ
non nisi serpiginosæ erunt (§§. 335 & 337.)

Q

§. DCCLIV.

Unde jam de conditione subjectorum constare poterit, quibus serpigo hæmorrhoidalis accidere solet [§§. 752 & 753.]; in idem consentiente experientia.

§. DCCLV.

Quoniam serum acre est, quod excernitur, obortis jam hæmorrhoidibus serpiginosis [§§. 335 & 337.], sequitur, ut inde varii effectus arroisionis in illis partibus producantur, quibus materia illa acris adhæret. Hinc ad anum & loca vicina facile suboriri poterunt exulcerationes & inflammationes, cum varietate effectuum suorum. Quocum etiam observationes congruunt.

§. DCCLVI.

Signa pathognomica sufficientia hæmorrhoidum serpiginosarum ex definitione [§. 335.] satis aperta sunt; prognostica vero hic postulant, ut dictorum in §. anteced. rationem habeas, eadem cum hæmorrhoidum cæcarum, turgentium & tumentium prognosi collaturus [§. 751.]

CAPUT XL.

DE

FLUXU HEPATICO.

§. DCCLVII.

EXperientia docet, fluxum hepaticum [§. 312.] pati subjecta, quæ ad hæmorrhoides prona sunt, sed simul obnoxia fiunt diarrhoeis serosis & biliosis [§. citat.]

§. DCCLVIII.

Per observationes porro constitit, quod ad solita fluxus hepatici symptomata referri debeant sequentia.

I. Deprehenduntur scilicet colica, flatulentia, spasmus Paracelsi fixus, malum ischiadicum & lumbago.

II. Dolor intestinorum in latere dextro magis adesse, atque hepar versus se extendere ab ægro percipitur.

III. Pruritus ani & tenesmi afflictiones ægrotanti sæpius fiunt molestissimæ.

§. DCCLIX.

Diarrhœæ non cruentæ, præsertim serosæ & biliosæ, una cum dispositione ad hæmorrhoides, fluxum hepaticum producere possunt [§. 312.]

§. DCCLX.

In fluxu hepatico intestinum duodenum & colon præ reliquis pati videntur [§. 758. *num.* 2.]

§. DCCLXI.

Quia fluxus hepaticus non nisi species diarrhœæ est [§. 312.]; neque aliter corpori ingeneratur, quam sub conditione dispositionis ad hæmorrhoides [§. 757.]: patebit ideoque ratio phænomenorum, ad §. 758. *num.* I. annotatorum [§§. 730 & 738.]

§. DCCLXII.

Ob feri vel bilis acrimoniam, quæ in fluxu hepatico dispositioni ad hæmorrhoides accedit [§. 757.], majores quoque erunt molestiæ pruritus ani & tenesmi [§§. 122. *proleg.* 730. 738 & 758. *numer.* 3.]

§. DCCLXIII.

Ex quibus igitur satis clare elucet [§§. 761 & 762.], quanta fluxus hepatici convenientia sit cum fluxu hæmorrhoidali.

§. DCCLXIV.

Fluxus hepatici signa pathognomica sufficientia ex illius definitione [§. 312.] cognoscere poteris; prognostica vero ex iisdem principiis derivare tibi licebit, quæ sibi vindicavit hæmorrhoidum fluxus [§§. 737. 744. & *anteced.*]

CAPUT XLI.

DE

PALPITATIONE CORDIS.

§. DCCLXV.

Cordis palpitatio [§. 145.], sicuti experientia commonstrat, illis præcipue subjectis admodum familiaris esse solet, ubi sequentes conditiones deprehenduntur.

I. Quæ scilicet plethoram præsertim, spissam, in corpore alunt.

II. Quæ malo hypochondriaco, hysterico, flatulentiis, morbis pulmonum vexantur.

III. Quibus febris, imprimis sanguinea, imminet.

IV. Quæ gravibus animi pathematibus, præcipue terrori & tristitiæ, patent.

V. Quibus hæmorrhagiarum aut excretionum aliarum naturalium suppressiones oboriuntur; vel ubi etiam adsuætæ evacuationes artificiales, sanguinis potissimum, negliguntur.

VI. Quæ polypum cordis, vel vasorum eidem annexorum habent.

VII. In sexu tandem sequiore frequentius adesse observatur morbus iste, quam in potiore.

§. DCCLXVI.

Quo jam oborto morbo, phænomena sequentia comparent.

I. Observantur nempe anxia respiratio, faciei pallor, lipothymia, languores artuum.

II. Cordis pulsatio tanta non numquam fit, ut sonitus percipiantur.

III. Remisso morbo, ingentes virium prostrationes sentiuntur.

IV. Ab excretionibus naturalibus, præsertim hæmorrhagiis, morbus haud parum imminui, sæpius etiam in commodum sanitatis prorsus solvi observatur.

§. DCCLXVII.

Ortus causæ proximæ palpitationis cordis (§. 149.) ex illis subjectorum determinationibus, quæ in §. 765. describuntur, haud difficulter intelligi poterit.

§. DCCLXVIII.

Quoniam cor palpitat, dum in illius ventriculos sanguis cum impetu irruit (§. 149.); necesse igitur erit, ut cordis diastole ideo vehemens fiat, eamque similis quoque conditionis systole subsequatur; ita tamen, ne hic deficiat notabilis quædam varietas ratione temporis & gradus, quo mutationes istæ oboriuntur.

§. DCCLXIX.

Ex §. anteced. haud difficilis jam erit ad intelligendum ratio symptomatum, descriptorum in §. 766. Anxiæ vero respirationis symptoma ad-

hic magis ibi augebitur, ubi ad producendam cordis palpitationem causæ veniunt (veniunt vero frequenter), quibus jam per se consideratis vis, inest lædendi respirationem (§. 765. *numer.* 2 & 5.)

§. DCCLXX.

Palpitationis cordis signa pathognomica sufficientia ex ejus definitione (§. 145.) facili opera colligere licebit.

§. DCCLXXI.

Prognosis vero ejusdem morbi requirit, ut rationem habeas momenti annotati ad §. 766. *num.* 4. illud rite comparaturus cum causis morbi, quæ enarrantur in §. 765. Hoc enim modo tibi satis perspicua fiet conditio eventus præfagiendi. Bonam nempe morbi solutionem promittent excretiones naturales nunc modo allegatæ, si ita respondere videantur causis, ut harum imminutiones, vel etiam plenariæ sublationes inde produci possint. Dum e contrario parum boni de palpitatione cordis prædicere licebit, excretionibus istis vel plane deficientibus, vel præsentibus quidem, sed parum accommodatis ad morbi causas removendas. Tum enim morbi symptomata (§. 766.) adeo increfcere poterunt, ut, respiratione mirum in modum præclusa, mors insequatur, eaque non numquam inopinata.

CAPUT XLII.

DE

PHTHISI PULMONALI.

§. DCCLXXII.

EXperientia docet, phthisi pulmonali (§. 291.) obnoxia fieri corpora sequentis conditionis.

I. Ubi nimirum congestiones frequentes & pertinaces ad pectus observare licuit.

II. Ætas juvenilis huic malo præ reliquis obtemperare cogitur.

III. Quod etiam de sexu sequiore notandum erit; utpote quem potiore magis ab eodem morbo comprehendi, accurata edocet observatio.

§. DCCLXXIII.

Neque minus de morbi hujus symptomatibus sequentia per experientiam constiterunt.

I. Præter dyspnœam, tussis adest, eaque modo humida, modo sicca.

II. Non numquam tamen exstiterunt exempla ægrotantium ex phthisi pulmonali, ubi nulla tussis aderat.

III. Materia, quæ tussi rejicitur, plus minusve foetet, mox tenuis, mox crassioris consistentiæ est, mox etiam striis sanguineis tincta apparet.

IV. Motus febriles comparent, sique post partum magis exacerbati.

V. Phthisis tandem pulmonalis transire solet in tabem corporis, de tempore in tempus magis incrementem. Sed hic etiam frequenter oboriri solent massæ humorum corruptiones; pulmonum inflammationes; tandemque catarrhi suffocativi insultus.

§. DCCLXXIV.

A conditionibus subjectorum, quæ describuntur in §. 772. phthisin pulmonalem derivare licebit [§. 291.]

§. DCCLXXV.

Hinc etiam de ratione casuum illorum constabit, ubi præ reliquis phthisin pulmonalem ~~sub~~ortam fuisse, frequens docuit observatio. Quem numerum subeunt defluxiones catarrhi ad pulmones; hæmoptysis; tussis pertinax; contusiones pectoris; inspirationes partium acrium, ut acidarum, arsenicalium; exanthematum repulsiones; depositiones materiæ febrilis ad pulmones; abusus bechicorum, siue illorum remediorum, quibus vis inest ad augendam expectorationem; validæ expirationes; potus frigidus, corpori admodum calenti ingestus, inflammationes pulmonum; fluxus menstrui, hæmorrhoidum atque aliarum quoque hæmorrhagiarum suppressiones.

§. DCCLXXVI.

Quoniam phthisis pulmonalis ulcus in pulmonibus supponit [§. 291.], consequens ideo erit, ea

omnia hic quoque applicari posse, quæ supra de ulceribus generatim disputata sunt (§§. 430 & sequ.) Quibus si adhuc accesserint ea, quæ ex consideratione locorum exulceratorum in phthisi pulmonali sequuntur, atque ex iis facile intelliguntur, quæ de pulmonum singulis functionibus in Physiologicis traduntur, nullum tunc dubium erit, quin inde proveniat congruum principium ad theoriam phthisis pulmonalis.

§. DCCLXXVII.

Atque huic jam fundamento innititur propositio-
num sequentium veritas.

I. Ob continuum quidem, qui ad loca exulcerata fieri solet, humorum affluxum, sed ratione gradus diversum, necesse erit, ut etiam ulceris status idem continuo permanere nequeat. Unde jam patebit ratio diversarum illarum qualitatum, quas materia phthifica præ se fert [§. 773. *num.* 3.]

II. Ob pulmonum læsionem, quæ in phthisi pulmonali obtinet (§. 291.), necessaria erit dyspnœa (§§. 294. & 773. *num.* 1.); ad quam vero magis adhuc augendam hic contribuere poterunt asthmatis, inflammationis pulmonum, nec non catarrhi suffocativi accessiones (§§. 294. 572. 615. 773. *numer.* 5.)

III. Fieri poterit, ut materia ulceris pulmonalis ad bronchia horumque ramos modo penetret, modo non; prout nimirum vel situs fuerit ulce-

ris, vel materiæ ulcerosæ conditio. Hinc jam satis constare poterit de ratione tussis [§§. 295. & 296.], quæ mox humida, mox sicca in phthificis adest, interdum etiam plane deficit [§. 773. numer. 1. & 2.)]

IV. Quia motus febriles in phthificis post partum magis exacerbari deprehenduntur [§. 773. numer. 4.): necesse erit, ut illorum causæ tunc temporis magis increcant. Provenient vero hæc causarum incrementa a chyli per pulmones difficili transitu. Læsis enim pulmonibus, chylus non satis subigi poterit sanguini, eidemque similis fieri. Inerit tunc cruda aliqua materia vasis pulmonalibus, in iisdem majores adhuc stases, obstructions & distensiones, tamquam motuum febrilium causas, productura. Ut de ea ventriculi & intestinorum conditione hic nihil dicatur, quæ in causam exacerbandarum congestionum ad pulmones jam læsos transit, atque haud raro phthificis accidere solet.

V. Læsis visceribus, lymphæ in corpore generatur non satis apta ad nutriendum; id quod eo magis valebit de læsionibus, quæ in viscere tam nobili, ut pulmones sunt, oboriuntur. Sed defectus fluidi apti ad nutriendum corpus ad causas atrophiciæ in genere pertinet (§. 278.) Hinc jam liquida erit ratio, quare nimirum corpora ægrotantium ex phthisi pulmonali tandem contabescant [§. 773. numer. 5.]? Quorsum adhuc accedit lymphæ insignis illa jactura, quæ hic

fieri solet per auctas excretiones, easque satis conspicuas febre ad gradum paullo intensiorem perducta; exemplo diarrhoeæ colliquativæ [§. 312.]

VI. Putridum in peculiaribus quibusdam locis corporis hærens, inde tandem per vasa inhalantia ad massam sanguineam, auctis præcipue motibus febrilibus, transire, eamque corrumpere poterit. En rationem depravationis humorum in phthificis observatæ [§. 773. *numer.* 5.]! Siquidem putridi existentiam in phthificis foetor materiæ, quæ tussi rejicitur, satis probat [§. citat. *numer.* 3.]

VII. Sed ex eodem quoque principio, quod exstat sub *numer. præced.* explicare licebit casus alios singulares, circa phthisin pulmonalem non numquam observatos. Quo nomine præsertim notari merentur phthisis pulmonalis per contagium translationes ab uno ad alium, nec non exanthematum, ut purpuræ, productiones in phthificis. Utrumque facile evenire poterit, sub dispositionis ad phthisin pulmonalem atque insignis cujusdam corruptionis humorum in phthificis conditione.

VIII. Inflammationis pulmonum ortus in phthificis [§. 773. *numer.* 5.] rationem sui agnoscit, petendam ab humorum affluxu ad pulmones, tamquam loca exulcerata, multoties supra modum exacerbato. Unde jam peior fiet status ægrotantium ex phthisi pulmonali [§. 437.]

IX. In phthisi pulmonali obveniunt permultæ causæ, quæ ex ipsa morbi natura oriuntur, atque idoneæ sunt, ad debilitatem pulmonibus adeo inducendam, ut ibi tandem paralyfis [§. 270.] sequatur; id satis probantibus, quæ jam prolata sunt de morbo isto pulmonali. Quare etiam de ratione catarrhi suffocativi (§. 289.) supervenientis phthisi pulmonali [§. 773. *numer.* 5.] constabit. Tantum vero abest, ut hic nullum locum habeant causæ externæ, ut potius vel maximam sui considerationem mereantur. Sic orta tempestate humida, phthisicis catarrhum suffocativum supervenisse, eisdemque præter omnem expectationem diem supremum indixisse, fida sæpius docuit observatio.

§. DCCLXXVIII.

Signa pathognomica sufficientia phthisis pulmonalis esse poterunt, præter dyspnœam, materiæ ulcerosæ rejectiones per tussim, vel etiam foetida exspiratio, quæ a materiæ ulcerosæ præsentia in pulmonibus proficiscitur [§. 773. *numer.* 1. 2. & 3. Hinc necesse erit, ut hic prius removeantur causæ aliæ hujus foetoris, quem sub expiratione percipere licet: exemplo putridæ cujusdam materiæ, quæ ventriculo aut cavitati oris inesse potest. Si ad hæc signa adhuc accesserit insigne quoddam motuum febrilium augmentum, una cum virium corporis hujusque voluminis decremento satis conspicuo; tunc ad phthisin pulmonalem majoris gradus exinde colligere licebit.

§. DCCLXXIX.

Quæ hucusque exposita sunt de phthisi pulmonali, ea quoque sufficere poterunt inveniendis signis prognosticis ejusdem morbi. Præcipue hic valebunt prolata in §§. 772. 773 & 777. Unde jam sequentes propositiones hoc loco derivare licebit; quarum veritati etiam observationes apprime respondent.

I. Quod ad differentiam ætatis attinet, phthisis pulmonalis juvenibus morbus major erit, quam senibus.

II. Mensium aut hæmorrhoidum fluxus phthificis ita obortus, ut inde congestiones ad pectus insigniter imminuantur, miseris non exiguo levamento erit.

III. Tussis moderata, atque imprimis illa, cujus ope materia ulcerosa rejicitur, phthificis proficua erit. Sed e contraria parte sese hic habebit cum tussis nimia exacerbatione, aut illius plenario defectu.

IV. Quo major ille foetor est, quem spargit materia ulcerosa, a phthificis per tussim rejecta, aut qui sub expiratione ex eodem morbo ægrotantium prodire observatur, eo peior conditio erit morbi.

V. Phthificis tandem funestum morbi eventum fore, indicabunt difficultates respirandi admodum incrementales; motus febriles supra modum aucti; eximiae virium prostrationes; insignes corporis extenuationes; varia vitia, quæ in

senfibus internis vel externis prodire solent, ut exempli loco alienationes quædam mentis sunt, memoriæ debilitas, surditas, obnubilationes visus, hujusque indolis alia.

Plura præfagiendi fundamenta, quæ hic quoque valebunt, eo loco exstabunt, ubi differendum erit de febre lenta & hæctica.

C A P U T XLIII.

D E

T O P H I S P U L M O N U M.

§. DCCLXXX.

EXperientia docet, tophis pulmonum [§. 290.] idem hominum genus obnoxium fieri, quod primum est ad phthisin pulmonalem [§. 772.] Notari etiam meretur, quod lapicidis quasi familiaris esse deprehendatur idem morbus.

§. DCCLXXXI.

Humoribus ad partem aliquam congestis, scirrhi ibidem oriri poterunt [§. 442.]. Ab humorum itaque congestionibus ad pulmones ortum tophorum pulmonalium [§. 290.] derivare licebit. Unde etiam liquida erit ratio, quare nimirum ea conditio corporis, sub qua alias phthisis pulmonalis eidem ingeneratur [§. 772.], ad tophorum quoque pulmonalium productionem valeat [§. anteced.]? Sed & obstructions vasorum ad causas scirrhorum pertinent [§. 442.] Nonne inde satis perspicuum erit, cur etiam in lapicidis tophorum pulmonalium fre-

quens ortus esse observetur? Arena enim illa tenuissima, quæ sub hac artificibus istis solita lapidum conformatione ad auram prodit, atque per inspirationem illorum pulmonibus inferitur, ut causa externa obstructionis ibidem agere poterit.

§. DCCLXXXII.

De tophis pulmonum ea omnia valeant, oportebit, quæ de scirrhis in genere predicantur [§§. 290. 440 & sequ.]. Quibus si ea adhuc addantur, quæ a conditione locorum hoc morbo affectorum dependent, facili tunc & congrua ratione explicari poterunt tophorum pulmonalium symptomata.

§. DCCLXXXIII.

Hinc vi §. anteced. consequitur; in tophis pulmonum non deficere motus febriles; neque considerari dyspnœam, una cum renisu quodam, qui inter respirandum in pulmonibus sub aëris in eisdem ingressu percipitur; ibidem porro adesse tussim magis siccam & sonoram; tandemque etiam fieri posse, ut, tophis pulmonum exulceratis, morbus in phthisin pulmonalem transeat, eamque ideo perniciosissimam, quia ulcera ex scirrhis nata pravæ indolis esse solent.

§. DCCLXXXIV.

De tophorum pulmonalium signis pathognomicis sufficientibus constare poterit ex §. anteced. Præsertim vero ad dyspnœam descriptæ ibidem conditionis animus dirigendus erit.

§. DCCLXXXV.

§. DCCLXXXV.

Prognosi hoc loco formandæ non alia principia respondebunt, quam quæ continentur in §§. 455 & 779.

CAPUT XLIV.

DE

VOMICA PULMONUM.

§. DCCLXXXVI.

VOmica pulmonum (§. 291.) requirit inflammationem pulmonum sibi præviam (§. 414.)

§. DCCLXXXVII.

Quare inflammationis causæ hic considerandæ erunt, & vomicæ pulmonum symptomata ex apostematis & partis natura, cui illud inest, derivanda (§. anteced.)

§. DCCLXXXVIII.

Hinc necesse erit, ut, præter dyspnœam, in vomica pulmonum adsint motus febriles; dolores pectoris intercurrentes; rejectiones puris per tussim (§. anteced.); sed etiam ejusdem morbi in phthisin pulmonalem degeneraciones possibiles (§. 431.)

§. DCCLXXXIX.

Ex pulmonum inflammatione prægressa, atque ex descriptis in §. anteced. effectibus, qui illam

R

excepisse deprehenduntur, vomicæ pulmonum signa pathognomica sufficientia depromenda erunt.

§. DCCXC.

Ratione vero prognosis in eodem morbo frequentia tenenda erunt.

I. Puris moderatæ per tussim rejectiones salutares sunt; quæ vero cum impetu fiunt, nocent.

II. Vomicam pulmonum facile transiturem esse in phthisin pulmonalem, indicabit pus tussiendo excretum, quod valde foetet. Quare tunc prognosis prosequenda erit secundum §. 779.

III. Quando vero ex vomicæ pulmonum ruptione materia purulenta in cavum potius thoracis effunditur; tum empyema in specie aderit (§. 292.); de cuius prognosi agendum erit in Cap. sequ.

CAPUT XLV.

DE

EMPYEMATE IN SPECIE TALI.

§. DCCXCI.

AD empyema in specie sic dictum (§. 292.) necessariae erunt prægressiones inflammationis subortæ vel in pulmonibus, vel in pleura, vel in mediastino, vel in pericardio, vel in superiore diaphragmatis superficie (§. 414.)

§. DCCXCII.

Hujus adeoque morbi symptomata ad eas rationes redibunt, quas tam a conditione partium hic affectarum, quam etiam a puris ibidem effusi quantitate & qualitate abstrahere licebit (§. anteced.)

§. DCCXCIII.

Ergo empyema in specie talo stipatum erit dyspnœa & sensu ponderis in eo latere, cui incumbitur; non deerunt ibidem motus febriles & anxietas præcordiorum; hic tandem fieri poterit, ut morbus in phthisin pulmonalem facile transeat (§. anteced.)

§. DCCXCIV.

Empyematis in specie sic dicti signa pathognomica sufficientia cognosci poterunt ex partium, quæ intra cavitatem thoracis continentur, inflammatione præcedente (§. 791.), eamque insequentibus effectibus illis, qui in §. anteced. exponuntur; inter quos vero præcipue notari merentur dyspnœa & ponderis cujusdam perceptio intra pectus ad illud latus, cui incumbunt ægrotantes.

§. DCCXCV.

Quod denique ad prognosin in eodem morbo veniendam attinet; tunc huic scopo sufficientia principia, quæ in se comprehendunt §§. 792 & 793. Unde jam propositiones sequentes deducuntur, hoc loco notandæ.

I. A magnitudine dyspnœæ & doloris, quæ in thoracæ inter respirandum percipit æger ad morbi majus periculum valebit consequentia.

II. Quo magis retardatur materiæ empyematicæ excretio; eo majores accessiones periculi ad statum ægrotantis fieri poterunt.

III. Hujus materiæ excretionem e corpore natura ordinario perficere molitur per motus febriles. Nam hoc modo in genere fieri potest, ut id, quod inerat corpori tenax & viscidum, adeo resolvatur, ut per vasa absorbentia ad massam humorum transeat, inde deponatur ad loca excretoria, horumque actione tandem ejiciatur e corpore. Atque hoc imprimis per alvæ & urinæ excretiones factum fuisse, observationes edocuerunt. Non numquam vero, teste experientia, hæc materiæ empyematicæ evacuatio per vias quasi extraordinarias contigit; foramine nimirum intra costarum interstitia subortu ex ruptione abscessus, producti ab inflammatione musculorum intercostalium.

IV. Præter hæc etiam non negligenda huerunt ea momenta, quæ ratione prognosis in phthysi pulmonali ad §. 779. prolata exstant.

CAPUT XLVI.

DE

CATARRHO SUFFOCATIVO.

§. DCCXCVI.

Catarrhus suffocativus (§. 289.) accidere observatur subiectis, quorum conditio corporis ad sequentia momenta redit.

I. Ubi generatim dispositiones quædam ad paralyfin, atque imprimis ad apoplexiam deprehenduntur.

II. Ubi catarrhus atque aliæ feri delationes ad bronchia, ut mucidæ oppletiones pectoris, frequenter fieri observantur.

III. Ubi de phthisi pulmonali aut alio pulmonum morbo, vel etiam affectibus asthmaticis satis jam constitit.

II. Ætas tandem senilis & infantilis, nec non corpora magis obesa huic morbo præ reliquis obtemperare coguntur.

§. DCCXCVII.

Ex observationibus porro constat, in catarrho suffocativo dyspnœam usque ad metum suffocationis augeri; adesse stertores, eosque sub incremento morbi magis conspicuos; faciem ægrotantis apparere turgidam, una cum splendore oculorum quasi vitreo; loco tussis solos modo conatus ad tussendum deprehendi, eosdemque mox fieri evanidos,

morbo ad paulo majorem gradum perducto; musculos, dilatationi & coarctationi thoracis infervientes hic simul a paralyfi sæpius affici; tandemque morbi hujus atrocissimi insultus fieri repentinos & maximos circa noctem, aut quando cæli status humidus est.

§. DCCXCVIII.

Ab indicatis in §. 796. conditionibus subjectorum derivare licebit ortum catarrhi suffocativi (§. 289.)

§. DCCXCIX.

Unde jam de illorum quoque casuum ratione satis constare poterit, ubi nimirum frequens edocuit observatio, subito fuisse subortum catarrhum suffocativum, eumque ut plurimum eventus funesti. Hujus indolis præ reliquis sunt exanthematum regressiones ad loca interiora, maxime in febre maligna, nec non tumorum serosorum repulsiones cum impetu factæ (§§. anteced. & 796. num. 2.)

§. DCCC.

Posita pulmonum debilitate eminentis gradus, sive posito catarrho suffocativo (§. 289.), necesse erit, ut etiam suboriantur extravasationes feri intra bronchia, una cum spasmo ad tracheam (§§. 180 & 603.)

§. DCCCI.

Exinde igitur satis conspicua erit ratio (§. anteced.), quare nimirum stertores in catarrho suf-

suffocativo prodeant, tantæque difficultates respirandi ibidem suboriantur, ut facies turgescere & oculi instar vitri splendere videantur (§. 797.)?

§. DCCCII.

Non desunt causæ externæ, quibus vis inest debilitandi pulmones; exemplo aëris humidi, qui inspiratur. Hujusmodi vero causarum accessiones ad catarrhum suffocativum non poterunt non exacerbare morbum. Quare etiam necesse erit, ut catarrhi suffocativi invasiones circa noctem, vel ingruente tempestate humida, sæveriores sint (§. 797.); siquidem eo tempore aër magis humidus est, qui per inspirationem ad pulmones deferitur.

§. DCCCIII.

Præter causas externas (§. anteced.), internæ quoque aderunt, a quibus catarrhus suffocativus augeri potest; exemplo feri intra bronchia nimis coacervati (§. 800.), illa distendentis, eoque modo debilitantis. Tunc igitur contingere poterit, ut, factis catarrhi suffocativi majoribus incrementis, illi adhuc accedat paralyfis musculorum, quos natura destinavit ad ampliandum coarctandumque thoracem (§§. 608 & 797.)

§. DCCCIV.

Tussis eam conditionem partium, quæ proxime inserviunt expirationi, requirit, ut in illis producatur actio ad expirandum necessaria, & quidem ad gradum majorem, quam in statu sanitatis fit

(§§. 295 & 296.) Sed partibus istis a paralyfi affectis (§. anteced.), neque expirationis actio supra modum fieri poterit. Ex quibus jam intelligitur, quare tussis in catarrho suffocativo admodum exigua sit, vel etiam sub morbi augmento plane deficiat (§. 797.)?

§. DCCCV.

Catarrhi suffocativi signa pathognomica sufficientia cognoscere licebit ex §. 797. Præ reliquis vero attentionem hic merentur stertores, sub respiratione admodum præclusa percepti, una cum habitu illo externo vitreo oculorum, & tussi admodum exigua, vel prorsus nulla, in ægrotante deprehensis.

§. DCCCVI.

Similiter etiam de signis prognosticis in catarrho suffocativo inveniendis satis constare poterit ex iis, quæ hæcenus de eodem morbo prolata sunt. Hic igitur locum habebunt propositiones sequentes.

I. Ob loci præstantiam, cui inest paralyfis, catarrhus suffocativus sine dubio ad morbos pertinebit periculo plenissimos (§. 289 & 609.)

II. Quo major defectus tussis est in catarrho suffocativo; & quo magis ibidem invalescere observantur stertores; eo major metus est, fore, ut æger suffocatione pereat. E contraria vero parte tussis, qua imprimis mucus e bronchiis

& trachea rejicitur, miseris spem salutis offert (§§. 801 & 804.)

III. Sed hic etiam proficere poterunt excretiones aliæ, quæ nimirum subtractioni caussarum, ad catarrhi suffocativi productionem in casu obvio concurrentium (§. 796.), respondent Quorum exempli gratia pertinebunt excretiones sudoris, alvi, hæmorrhoidum fluxus, purgatio menstrua, vomitus.

IV. Quoniam febris, quæ ad determinatum gradum affectibus paralyticis supervenit, eisdem salutariter solvere solet (§. 611.) ne hoc quidem momentum circa prognosin in catarrho suffocativo negligendum erit (§. 289.)

V. Præter hæc omnia necesse erit, ut in præfagiis catarrhi suffocativi partim ad vires ægrotantium, partim etiam ad causæ morbi qualitatem respicias. Nam hoc modo intelligi poterit, an in casu obvio natura sufficiat ad eluctandum, nec ne? an morbus aliquoties superatus quidem, mox vero rediturus sit, ita, ut tandem natura succumbere cogatur?

CAPUT XLVII.

DE

T U S S I.

§. DCCCVII.

TUssis (§. 295.) oboriri deprehenditur sub varia conditione caussarum, quæ tamen in eo con-

veniunt , ut inde intensior actio produci possit in bronchiis vel trachea , tamquam in partibus , quæ expirationi proxime inserviunt. Sed ad hoc momentum redit causa proxima tussis (§. 296.). Clariora hæc fient ex sequentibus.

§. DCCCVIII.

Morbi viscerum abdominalium , congestionibus pulmones versus stipati , tussim producere possunt [§. 296.]

§. DCCCIX.

Quare in malo tam hypochondriaco , quam hysterico , in morbis intestinorum , ventriculi & mesenterii , nec non in passionibus hæmorrhoidum & catameniorum , tussis proveniat , oportebit. Quocum consentiunt observata.

§. DCCCX.

Si qui alii morbi , partes externas affligentes , congestiones determinant ad pulmones , tum quoque possibilis erit tussis (§. 296.)

§. DCCCXI.

Hinc rheumatismis & arthritidibus tussis persæpe accedat , necesse erit. Quocum etiam conveniunt observationes.

§. DCCCXII.

Si a morbis partium , intra fauces contentarum , vel ad tracheam sitarum , congestiones redeunt ad pulmones : quin tunc quoque suboriatur tussis , nullum dubium erit (§. 296.)

§. DCCCXIII.

Quare in tumoribus faucium & colli haud infrequentes erunt tusses; in idem consentiente experientia.

§. DCCCXIV.

Si morbi in pulmonibus ita existunt, ut hic simul non deficiat congestio ad idem viscus: tussis tunc etiam necessarius erit (§. 296.)

§. DCCCXV.

Conspicuum inde est, cur in phthisi pulmonali, tuberculis & vomica pulmonum, horumque inflammatione tussis deprehendatur?

§. DCCCXVI.

Si quæ aliæ causæ externæ ad laryngem admittuntur, hanc partem adeo afficientes, ut hinc in eadem producatum actio intensioris gradus, tum quoque tussis oboriatur, necesse erit.

§. DCCCXVII.

Patet inde, cur, teste experientia, ab irritationibus faucium, quæ vel ope digitorum, vel per desinsum boli intra tracheam, vel per inspirationem calidi aut vaporis cujusdam acris fiunt, tussis actutum provocetur?

§. DCCCXVIII.

Si fluida, quæ ad pulmones deferuntur, fuerint acris, tussis inde subnata reliquis semper erit vehementior (§. 296.)

§. DCCCXIX.

Exinde jam cognosci licebit (§ anteced.), quare nimirum tussis ferina, sive quæ gradu vehementiæ eminet, cum exanthematibus connecti vel iis demum retropulsis, aut etiam sudoribus suppressis, concitari haud raro deprehendatur?

§. DCCCXX.

A quacumque tussi congestiones ad caput & pulmones prodeunt. Hinc fieri poterit, ut ob tussis acerbitatem oriantur obnubilationes visus, vertigo aurium susurrus & tinnitus, atque in pulmonibus adhuc integris efficiantur læsiones, morbiq; ali ejusdem visceris; in idem consentiente experientia

§. DCCCXXI.

Sub tussi musculorum abdominalium actio intensioris gradus consequitur; ideoque efficitur, ut partes, intra abdominis cavitatem contentæ, valide comprimantur. Ex tussi igitur vehementi & diuturna perquam facile oriri poterunt herniæ, & in gravidis abortus. Id quod etiam cum observationibus congruit.

§. DCCCXXII.

Sed fieri etiam poterit, ut motus sanguinis progressivus per viscera abdominalia, ob illorum succussionem, quæ inter tussendum fit, magis acceleretur. In morbis itaque viscerum abdominalium qui retardato ibidem motui progressivo sanguinis originem suam debent, tussis proficere poterit.

ut exempli gratia in affectibus hypochondriacis atque hysteriis (§. 331.)

§. DCCCXXIII.

Tussis signa pathognomica sufficientia ex morbi definitione [296] patent.

§. DCCCXXIV.

Signa vero prognostica ejusdem morbi invenire poteris, rite æstimaturus morbi gradum & causarum, a quibus ille in casu obvio productus esse deprehenditur, conditiones. Quare hic quoque utilitatem suam habebunt propositiones, quæ in §§. præcedentibus hujus Cap. continentur.

C A P U T XLVIII.

D E

M A L O H Y P O C H O N D R I A C O.

§. DCCCXXV.

IN malum hypochondriacum [§. 331.] incidere observantur subjecta indolis sequentis.

I. Quæ potius in ætate juvenili aut virili versantur.

II. Quæ vitam degunt otiosam; venere abutuntur; corpore incurvato negotia sua administrare, aut alias compressionis hypochondriorum causas externas admittere solent.

III. Quæ appetitui nimis indulgent; victu magis sicco utuntur; aut in nimia quantitate

ingerunt esculenta vel potulenta, unde ventriculus & intestina admodum relaxari & distendi possunt, qualia exempli causa sunt pingua, potus aqueus calidus, cerevisia non satis defecata, vina juniora, legumina, atque hujus indolis alia.

IV. Quæ plethoram alunt spissam; excretionnes sanguineas vel plane suppressas, vel nimias patiuntur.

§. DCCCXXVI.

Recensitæ ad §.anteced. determinationes subjectorum causam proximam mali hypochondriaci [§. 332] producere possunt.

§. DCCCXXVII.

Docent porro observationes, malum hypochondriacum sequentibus symptomatibus stipatum incedere.

I. Adsunt dolores tendentes, prementes, angustantes sub costis spuriiis, maxime in hypochondrio sinistro.

II. Isti doloris sub costis spuriiis continui quidem sunt, sed diversi quoad gradum; dum mox exacerbari, mox remittere deprehenduntur.

III. Plerumque hypochondrium sinistrum, non numquam etiam dextrum, inflatum esse apparet. Deprehendi tunc simul solent colica, cardialgia, immo & sorda, tamquam incommoda ad majorem gradum in ægro incrementa, ad cujus hypochondrium dextrum inflatio præcipue fit conspicua.

IV. Appetitus hypochondriacorum varius est; nam modo anorexia, modo addephagia observatur.

V. Frequenter hic suboriri observantur flatulentia, difficilis respiratio, ructus, iique mox sub pastu, mox post eundem, aquorum explosione agri aliquid levare videntur.

VI. Neque etiam infrequenter accidere solent hypochondriacis palpitaciones cordis, tussis, cephalalgia, vertigo, stupor capitis, memoriæ debilitas & augmentum, immo etiam varri alii phantasiæ effectus, non numquam mirifici.

VII. In solita narium siccitas, copiosiores salivæ excretiones haud raro observare licet in eodem ægrorum genere.

VIII. Quod porro ad aspectum hypochondriacorum attinet: ille mox pallidus, mox fuscus, mox etiam ruber esse deprehenditur.

IX. Extrema vero loca corporis modo frigent, modo incalescunt.

X. Urina, quæ excernitur, plerumque tenuis & limpida apparet.

XI. Alvus ut plurimum obstructa esse deprehenditur.

XII. Motus febriles frequentissimi adsunt.

XIII. Moderata diarrhœa, hæmorrhoidum fluxus congruus, febris denique moderata hypochondriacos haud parum levant.

XIV. Verum etiam fieri solet, ut malum hypochondriacum in novas species morborum tam

acutorum, quam chronicorum transeat, quibus tandem pereundum erit miseris. Horum morborum numerum, teste experientia, subeunt graves quædam in visceribus, præcipue abdominalibus, obortæ læsiones, ut sunt infarctus, scirrhi, inflammationes, exulcerationes, atque illis supervenientes calamitates aliæ corporis, ut tabes, affectus hydropici, soporosi, melancholici, maniaci, apoplectici, febres continuæ acutæ vel chronicæ.

§. DCCCXXVIII.

Ex ipsa natura causarum proximarum mali hypochondriaci [§. 332.] sequitur, fieri nimirum posse, ut illarum causarum una producta, indomox suboriatur & altera, hacquæ suborta, primo modo desinat, modo pergat existere; pro differentiâ scilicet gradus, in quo vis inest ejusmodi causis ratione ægrotantium in casibus obviis [§§. 91. 92. 99. 101. 168. 173. 184. 386. 394. 492. 494. 644.]

§. DCCCXXIX.

Quare jam sequentia colligere licebit ex §. anteced.

I. Ob qualitates diversas causarum proximarum mali hypochondriaci necesse erit; ut etiam in hoc morbo prodeant symptomata specie diversa. Ecce rationem diversitatis symptomatum in malo hypochondriaco obviorum [§. 827.]!

II. H.

II. Hypochondriacorum status idem semper apparere nequit; siquidem causarum proximarum morbi reciprocationes & complicationes hic fieri possunt. Unde satis perspicua erit ratio, cur nimirum hypochondriaci se mox melius, mox pejus habere deprehendantur [S. 827.]?

§. DCCCXXX.

Symptomatum itaque in malo hypochondriaco provenientium [S. 827.] qualitates & quantitates ex eo principio, quod in §. anteced. proponitur, distincte intelligi poterunt; si hic imprimis ratio habeatur constrictionum in vasis viscerum abdominalium, & congestionum inter se reciprocantium, illorumque effectuum, qui inde ad alia corporis loca redeunt [§§. 332. 492 & 494.]

§. DCCCXXXI.

Signa pathognomica sufficientia mali hypochondriaci depromenda erunt ex deprehensis illis symptomatibus, quæ describuntur in §. 827. Præcipue vero hic notari merentur incommoda illa, quæ ad costas spurias prodeunt [§. citat. *num.* 1 & 2.], sub specie tamen morbi chronici [§. 331.]

§. DCCCXXXII.

Fundamentum vero prognosis in malo hypochondriaco tibi suppeditare poterunt indicata momenta ad *num.* 13 & 14. §. 827.

CAPUT XLIX.

DE

MALO HYSTERICO.

§. DCCCXXXIII.

PAssioni hystericæ (§. 331.) subijci deprehenduntur virgines puberes; viduæ juniores; feminæ post abortum, vel partum difficilem; aut quibus perturbationes, vel plenariæ cessationes menstruorum oboriuntur; tandemque etiam feminæ, in quibus illæ conditiones obtinent, quæ enarrantur ad §. 825. numer. 2. 3 & 4.

§. DCCCXXXIV.

Propositæ in §. anteced. subjectorum determinationes ortui causarum proximarum mali hystERICI (§. 332.) satis accommodatæ sunt.

§. DCCCXXXV.

In malo hystérico eadem quidem, quam in malo hypochondriaco, provenire observantur symptomata, sed longe acerbiora. Quibus sequentia adhuc accedunt; frequentiores cordis palpitatio-nes; spasmi gulæ; affectus syncoptici; furor uterinus; stranguria & dysuria. Eundem quoque eventum, ut malum hypochondriacum, nancisci solet passio hystérica. Non numquam vero docuit experientia, feminas hystericas ex suffocatione & apoplexia subito periisse.

§. DCCCXXXVI.

Ex notionibus mali hypochondriaci & hysterici constat, quod ambo affectus isti ratione formæ inter se conveniant, nec alio modo a se distinguantur, quam per sexus differentiam (§. 331.) Hinc necesse erit, ut eadem principia hic quoque valeant, quæ de malo hypochondriaco proposita sunt in Cap. præced.

§. DCCCXXXVII.

Quare symptomata mali hysterici ab ejus causarum proximarum diversitate, reciprocatione & complicatione eodem modo derivare conveniet, ac præcipitur in §. 830. (§. anteced.)

§. DCCCXXXVIII.

Si ad hoc principium cognoscendi (§. anteced.) adhuc accesserint aliæ conditiones corporis, quæ quidem in sexu potiore desiderantur, in sequiore vero locum habent, ibique difficilem sanguinis progressum per viscera abdominalia efficere valent; quorum abortus, partus difficilis & menstruorum casus pertinent (§. 833.), una cum nimia feminarum sensibilitate, & vasorum in abdomine numero auctiore, ob uteri existentiam; nullum tunc dubium erit, quin etiam causis illis, a quibus sanguinis motus per vasa viscerum abdominis impeditur (§. 332.), major vis attribui debeat in malo hysterico, quam in hypochondriaco.

§. DCCCXXXIX.

Ut itaque passio hysterica gravitate superet malum hypochondriacum, necesse erit (§§. antecedit & 835.)

§. DCCCXL.

In hystericis insolitam facultatem versus canendi, immo etiam alienas linguas loquendi observatam fuisse, aiunt. Si de hoc phænomeno tam copiose, tamque certo constaret, ut contra illius existentiam nullum prorsus dubium moveri posset; tunc ad momenti hujus explicationem vix alia principia admittenda forent, quam quæ redeunt ad vires imaginationis, in hoc morbo supra modum intensas, atque ad concursum actionum, quæ simul producantur in musculis, inservientibus formandæ loquelæ,

§. DCCCXLI.

Quod denique ad mali hysterici signa tam pathognomica, quam prognostica attinet; illa cum signis mali hypochondriaci congruant, necesse erit (§. 836.) Quibus adhuc ea accedunt, quæ per sexus differentiam necessaria sunt. Hinc jam evolvenda erunt, quæ indicantur in §§. 831. 832 & 835.

CAPUT L.

DE

CARDIALGIA.

§. DCCCXLII.

Cardialgiæ (§. 299.) obnoxia fieri deprehenduntur subiecta sequentis conditionis.

I. Quibus cruditates in ventriculo & intestinis hærent.

II. Quæ flatulentiis exponuntur.

III. Quæ malo hypochondriaco aut hysterico vexantur; concurrente imprimis ataxia hæmorrhoidum vel mensium.

IV. Quæ alvi obstructione laborant.

V. Quæ nimiam ventriculi repletionem admittunt.

VI. Quæ iram, præsertim inter pastum, concipiunt.

VII. Quibus venena aut emetica drastringa offeruntur.

VIII. Quibus refrigerationes scrobiculi cordis, aut ejusdem compressiones, vel contusiones obveniunt.

IX. In quorum intestinis colluvies vermium adest.

§. DCCCXLIII.

Ex iis conditionibus subjectorum, quæ in §. anteced. describuntur, cardialgiæ (§. 299.) ortum intelligere licebit.

§. DCCCXLIV.

Cardialgiæ symptomata observantur esse sequentia

I. Calor & frigus inter se alternant cum sudoribus anxiiis, frigidis.

II. Ægri de tensionibus & pressionibus circa scrobiculum cordis, nec non anxietatibus præcordiorum conqueruntur.

III. Non raro eveniunt lipothymix.

IV. Nausea, ructus, immo vomitus persæpe consequuntur; & ægri multum levaminis ex istis rejectionibus percipere solent.

§. DCCCXLV.

Quum in spasmis motus febriles non deficiant (§. 497.), sequitur, idem quoque symptomata cardialgiæ conjungi debere (§. 299.); idque eo magis ob locorum afflictorum nimiam sensilitatem & concursum illarum causarum determinantium causam proximam morbi, a quibus ventriculus & intestina valdopere afficiuntur [§. 842.]

§. DCCCXLVI.

Quare necesse est [§. anteced.], ut etiam calor & æstus inter se alternent, & sudores anxii, frigidi erumpant [§. 844. *numer. 1.*]

§. DCCCXLVII.

Ob incommoda doloris in partibus a spasmō affectis, & congestiones, quæ inde ad alia quoque loca corporis produci solent [§§. 490 & 492.], in cardialgia oriantur, necesse erit, tensiones & pressiones circa scrobiculum cordis, una cum anxietatibus præcordiorum [§§. 299 & 844. *numer. 2.*]

§. DCCCXLVIII.

Posita cardialgia [§. 299.], poni simul debet respectiva debilitas aliarum fibrarum ventriculi. Hinc nausea, ructus, vomitus [§§. 302. 308 & 844. *numer. 4.*]

§. DCCCXLIX.

Cardialgia supra modum incremente, fieri poterit, ut, congestionibus encephalon versus concitatis [§§. 299 & 492.], inde oriantur fatis conspicuæ imminutiones functionum vitalium & animalium. Unde affectus lipothymici [§§. 349. 350 & 844. *numer. 3.*]

§. DCCCL.

Quid præterea de spasmō in genere prædicatur, illud quoque ad cardialgiam transferre licebit [§. 299.] Hinc salutaris solutio cardialgiæ contingere poterit per excretiones moderatas, easque accommodatas qualitati causæ, a qua origo morbi ducenda est in casu obvio [§§. 483. *num. 5.* 499. 502. 844. *num. 4.*]

§. DCCCLI.

Tensiones & pressiones circa scrobiculum cordis, de quibus æger conqueritur; una cum sensu illo incommodo, quem percipit, ac si bolus sub deglutitione circa cardiam hæreat [§§. 299. & 844. *numer. 2.*], signa cardialgiæ pathognomica sufficientia esse possunt.

§. DCCCLII.

Cardialgiæ vero signa prognostica intelligere poteris ex iis, quæ continentur in §. 850.

CAPUT LI.

DE

VOMITU IN GENERE.

§. DCCCLIII.

Vomitus [§. 307.] accidere deprehenditur subjectis, quorum conditiones ad sequentia momenta redeunt.

I. Quæ atrocissimis cephalalgiis vexantur, aut quibus grave vulnus ad loca capitis inflictum est.

II. Quæ cruditates in ventriculo alunt, aut cardialgiis diuturnis torquentur.

III. Quæ malo hypochondriaco aut hysterico laborant.

IV. Quæ ab obstructionibus viscerum abdominalium, vel calculo renum & vesicæ afficiuntur.

V. Quæ alvi obstructionibus aut flatulentis affliguntur.

VI. Quæ ex rebus auditis, vel visis, vel odore perceptis, ingentem aliquam aversionem patiuntur, aut quæ se in gyrum agunt, vel quæ a tergo sedent, dum curru vehuntur.

VII. Quæ irritationem faucium admittunt.

VIII. Helluones & polyphagi eodem morbo sæpe afficiuntur.

IX. Feminis tandem sensibilibus statim post conceptionem, nec non infantibus difficulter dentientibus vomitus evenire solet.

§. DCCCLIV.

Descriptæ in §. anteced. determinationes subjectorum causam proximam vomitus producere possunt [§. 308.]

§. DCCCLV.

In vomitu sequentia symptomata prodire, experientia testatur: cardialgia; anxietates præcordiorum; crebræ horripilationes; vertiginosæ capitis afflictiones; nausea.

§. DCCCLVI.

Ob respectivam fibrarum ventriculi debilitatem, quæ in vomitu obtinet, cardialgiæ ortus hic facilis erit [§§. 299. 308 & 855.]

§. DCCCLVII.

Anxietates præcordiorum, quæ in vomitu deprehenduntur [§. 855.], pro sui causa agnoscunt tam

cardialgiam [§§. 855 & 844. *numer. 2.*] quam etiam illam caussarum morbi qualitatem, quæ præ reliquis ortui ejusdem symptomatis respondet, exempli causa malum hypochondriacum vel hystericum.

§. DCCCLVIII.

Sub vomitu nascuntur causæ congestionum ad loca superiora corporis producendarum. Quare tunc etiam vertiginosæ capitis afflictiones oboriri poterunt [§§. 355 & 855.]

§. DCCCLIX.

Omnem vomitum nausea antecedere solet: quare & de hujus symptomatis ortu hic constabit [§. 855.]

§. DCCCLX.

Ob cardialgiam, quæ in vomitu oboriri solet [§. 855.], necessariae hic quoque erunt commotiones febriles [§. 845.]. Ut de eo nihil dicatur, quod vomitus produci possit a causis, ubi motus febriles, tamquam effectus necessarii, deprehenduntur, exempli loco malum hypochondriacum, hystericum, flatulentia, hujusque indolis plures aliæ causæ [§. 853.]. Unde jam patebit ratio, quare in hoc morbo crebræ horripilationes fieri animadvertantur [§. 855.]?

§. DCCCLXI.

Per vomitum rejiciuntur massæ, quæ in ventriculo continentur. Habet præterea vomitus sibi so-

ciam musculorum abdominalium actionem intensioris gradus. Ex quibus consequitur, fieri posse, ut vehemens diuque durans vomitus vitæ ægrotantium admodum noceat, ob graves ad loca superiora corporis congestiones [§. 858.]; concoctionem ciborum lædat, eoque modo nutritioni corporis officiat; nocivos illos effectus corpori inducat, qui a nimia compressione viscerum in abdomine proficisci solent, ut exempli loco herniæ productio; tandemque vero se ipsum salutariter solvat, si a cruditatibus ventriculi quibuscumque productus fuerit.

§. DCCCLXII.

Vomitus signa pathognomica sufficientia ex illius definitione [§. 307.] satis manifesta erunt; prognosticorum fundamenta, præter ea, quæ ad §. anteced. exstant, tibi suppeditabunt causarum morbi (§. 853.) qualitates intellectæ.

CAPUT LII.

DE

ANOREXIA ET NAUSEA.

§. DCCCLXIII.

IN hunc morbum [§. 303.] incidere observantur subjecta vitæ sedentariæ dedita; aut quorum ventriculo multæ cruditates inhærent; vel quibus febres, præsertim acutæ, oboriuntur.

§. DCCCLXIV.

Sub enarratis in §. anteced. conditionibus subjectorum, caussarum proximarum anorexiæ & nausæ oritur [§. 304.] ibidem facile fieri poterit.

§. DCCCLXV.

Ob morbi hujus longam durationem necesse erit, ut tandem in ventriculo deficiat massa, ad chyli confectionem necessaria. Dum vel plane nullus, vel saltem ad perexiguam quantitatem assumi solet cibus appetitu deficiente; vel si etiam, reluctante natura, ad majorem quantitatem ingestus esset, vix ita in ventriculo adaptari poterit, ut inde proveniat chylus bonæ indolis, atque ad decentem quantitatem [§. 304.] Ex quibus jam satis constabit de fundamento derivandi symptomata, quæ in hoc morbo contingere possunt; cognitis iis, quæ de chyli usu in physiologicis traduntur.

§. DCCCLXVI.

Anorexiæ & nausæ signa pathognomica sufficientia intelliguntur ex definitione ad §. 303. proposita; prognosticorum vero rationes cognoscere licebit ex §. anteced. & caussarum qualitatibus [§. 863.], a quibus morbus in casu obvio dependet.

CAPUT LIII.

DE

ADDEPHAGIA ET OREXI CANINA.

§. DCCCLXVII.

Hunc morbum [§. 305.] deprehendere licet in infantibus atrophicis; in hypochondriacis & hystericis; in casibus a chronica corruptione feri & lymphæ obortis, ut in scabie; nec non post febrem intermittentem superatam; vel etiam febre hectica ad consummationem fere perducta; tandemque admissio abusu acidorum, aromatum, aut quorumcumque aliorum ingestorum, quæ stimulando ventriculum ejus motum peristalticum admodum augere valent.

§. DCCCLXVIII.

Morbi istius causam proximam [§. 306.] ab enarratis in §. anteced. conditionibus subjectorum derivare licebit.

§. DCCCLXIX.

In addephagia mala concoctio fieri debet. Unde glandularum in intestinis & mesenterio obstructions, atrophia, & qui inde plures alii morbi sequuntur. Quocumque etiam observationes consentiunt.

§. DCCCLXX.

Quoniam orexis canina non nisi majore gradu ab addephagia differt: illius adeoque causæ & effectus in corpore majore vi polleant, necesse erit.

§. DCCCLXXI.

Signa pathognomica sufficientia addephagiæ & orexis caninæ ex suis definitionibus [§. 305.] intelliguntur; de prognosticis autem ex §. 869 & 870. nec non ex recta æstimatione casuum ratione causarum morbi differentium [§. 867.]

CAPUT LIV.

DE

SPASMO OESOPHAGI SIVE GULÆ.

§. DCCCLXXII.

QUæ hic valere possunt principia cognoscendi, illa non alia erunt, quam quæ jam prostant in Cap. de spasmō in genere. Quibus enim recte applicatis ad casum nunc pertractandum, distincta ratione intelligere licebit, quando nimirum spasmus gulæ necessarius sit, cujusque indolis ejus symptomata esse debeant? In idem passim consentientibus observationibus, ut ex sequentibus constabit.

§. DCCCLXXIII.

Spasmo intestinorum vel ventriculi exacerbato; aut modo dictis partibus nimium distensis, spasmus oesophagi oriri potest (§. 494.)

§. DCCCLXXIV.

Quare liquet, cur subjecta hypochondriaca, hysterica, iracunda, flatulenta hunc morbum sæpe patiantur? Quocum congruunt observata.

§. DCCCLXXV.

Si spasmus pectoris, dorsi, brachiorum, temporum, colli fuerit exacerbatus, spasmus in œsophago produci poterit (§. 494.)

§. DCCCLXXVI.

Patet itaque, quare pleuritides, rheumatismi arthriticum, hemicrania spasmus œsophago inferre soleant? Atque huic quoque adstipulantur observationes.

§. DCCCLXXVII.

Ex caussarum externarum admissionibus ad œsophagum, producentium in ejus fibris nimias contractiones, spasmus gulæ necessarius quoque erit (§. 83.)

§. DCCCLXXVIII.

Hinc frigida, acria, austera, hujusque indolis plura alia, quæ vi pollent fibras constringendi, si œsophagum contingunt, spasmus in eodem producere debent. Quocum etiam conveniunt observationes.

§. DCCCLXXIX.

A spasmo œsophagi congestiones ad ventriculum, diaphragma, pectus, pulmones & caput concitari poterunt (§. 492.)

§. DCCCLXXX.

Fieri adeoque poterit, ut a spasmo gulæ oriantur affectus asthmatici, insultus apoplectici, invasiones

catarrhi suffocativi, singultus, immo etiam inflammationes ad diaphragma & ventriculum (§. anteced.) Neque hic etiam observationum consensus deficit.

§. DCCCLXXXI.

Signa pathognomica sufficientia spasmī oesophagi ex eo colligere licebit, quando nimirum bolus inter deglutiendum per oesophagum difficulter descendere atque intra dictum canalem quasi hærere videtur.

§. DCCCLXXXII.

Quod vero ad prognosin in eodem morbo respicit; tunc necesse erit, ut hic ea rite considerentur, quæ exponuntur in §. 502. conferenda cum dictis in §. 880.

C A P U T L V.

D E

F L A T U L E N T I A.

§. DCCCLXXXIII.

Flatulentia (§. 309.) subjecta ad sequentes conditiones redire observantur.

I. Quæ esculenta & potulenta ingerunt, unde intestina redduntur debilia, vel in iisdem vehemens quædam fermentatio suboritur.

II. Quæ multas cruditates in primis viis alunt.

III. Quæ

III. Quæ spasmis ad hæmorrhoides valde afficiuntur.

IV. Feminae male menstruatae, aut quibus fluxus lochialis multis spasmis stipatus oboritur.

V. Quibus tandem humores secreti ad canalem intestinorum copiosius deponuntur, ut exempli gratia serum, bilis.

§. DCCCLXXXIV.

Ab illis conditionibus subjectorum, quæ in §. anteced. describuntur, flatulentia dependere poterit [§. 309.]

§. DCCCLXXXV.

Quare jam intelligere licebit, cur ex refrigeratione corporis, vel vermium colluvie, in intestinis præsentem, flatulentia oriatur? Cur porro hypochondriaci, hæmorrhoidarii, hystericae, puerperæ, tandemque feminae magis, quam viri, huic malo subjiciantur? Quibuscum observationes consentiunt.

§. DCCCLXXXVI.

In flatulentia oboriantur necesse erit commotiones febriles, congestiones ad loca superiora corporis, cardialgia, colica, dyspnœa, anxietates præcordiorum, vertiginosæ capitis afflictiones [§. 309.] Quæ singula cum observatis quoque consentiunt.

§. DCCCLXXXVII.

Sed constat porro ex observationibus, quod in casibus flatulentiae mox adsint pertinaces alvi obstructions, nec non cardialgia & colica intensioris gradus; mox vero alvi excretio satis bene succedat, neque etiam tanto incommodo esse videantur ægro cardialgia & colica.

§. DCCCLXXXVIII.

Necesse igitur erit, ut differentes istæ mutationes in flatulentia (§. anteced.) dependeant vel a differentiis locorum, ubi potius canalis intestinorum distenditur, vel a varietate distensionis, ad quam intestina adiguntur.

§. DCCCLXXXIX.

Consequens ergo erit (§. anteced.), necessarium fore, ut, intestinis tenuibus, atque ex parte intestino colo, a flatibus distensis, alvi obstructiones, una cum majoris gradus cardialgia, suboriantur; colica vero tum acerbior fiat in flatulentia, quando nimirum intestina inæqualiter distendantur.

§. DCCCXC.

Signa pathognomica sufficientia in flatulentia esse possunt strepitus in intestinis & ventriculo percepti, una cum abdominis distensione hic sæpius admodum conspicua.

§. DCCCXCI.

Prognosis tandem flatulentiae sequenti fundamento innititur; nisi mature oboriantur flatuum

cessiones, status ægrotantium periculosus fieri poterit; symptomatibus morbi ad intensiorem gradum productis, quæ exponuntur in §. 886.

CAPUT LVI.

DE

COLICA.

§. DCCCXCII.

Colicæ (§. 314.) obtemperare coguntur, ut observationes docent, subjecta conditionis sequentis.

I. Quæ nimirum in §. 883. describuntur.

II. Quæ nephritide calculosa decumbunt.

III. Quæ refrigerationes abdominis admittunt.

IV. Quibus alvus admodum obstructa est.

V. Quibus partium Saturninarum delationes ad tubum cibarium fiunt.

VI. Quæ ex labe scorbutica ægrotant.

VII. Quorum intestinis vermium colluvies inhæret.

§. DCCCXCIII.

A subjectorum in §. anteced. descripta indolentia colicæ (§. 314.) derivare licebit.

§. DCCCXCIV.

Pro differentia caussarum istarum, quæ in casibus obviis concurrunt ad productionem colicæ ejus species diversæ a Medicis constituuntur. Hinc colica hæmorrhoidalis, hypochondriaca, hysterica, nephritica, biliosa, flatulenta, & sic porro.

§. DCCCXCV.

In quavis colica, præsertim biliosa hæmorrhoidali, hysterica, hypochondriaca, nec non nephritica, possibiles erunt inflammationes intestinorum, anxietates præcordiorum, motus febrilis (§. 314.) Quod etiam ab observationibus confirmatur.

§. DCCCXCVI.

Fieri solet, ut in colica alvi excretiones super modum tantum augeri, quam etiam imminui deprehendantur. Cujus rei rationem necessariam tibi frequentem in modum concipere poteris. Si nempe in colica ita afficiuntur intestina, ut eorum motus peristalticus descendens multoties superet ascendentem; diarrhœa tunc magis consequatur, oportebit. In casu vero contrario magis necessariæ erunt obstructions alvi pertinacissimæ, una cum vomitu, tandemque etiam cum passione iliaca insequentibus.

§. DCCCXCVII.

Colicæ signa pathognomica sufficientia per hanc definitionem (§. 314.) facile constare poterunt.

§. DCCCXCVIII.

Signôrum vero prognosticorum in colica intentione sibi vindicat rectam æstimationem causam morbi (§. 892), ejusque effectuum (§§. 895 & 896.) in casibus obviis.

CAPUT LVII.

DE

PASSIONE ILIACA.

§. DCCCXCIX.

Docent observationes, quod passioni iliacæ (§. 315.) sequentis conditionis subjecta fieri solent obnoxia.

I. Quæ a quacunque alia colica pertinaciter torquentur.

II. Quæ contumacissimas alvi obstructions patiuntur.

III. Quibus herniæ incarceratæ oboriuntur.

IV. Quibus graves quædam contusiones, a causis externis violentis productæ, ad regionem umbilicalem eveniunt.

§. DCCCC.

Hoc morbo defunctorum corporibus dissectis, statu intestinorum sequentia constiterunt.

I. Intestina a sphacelo corrupta reperiuntur, præsertim ad intestini ilei finem, ubi ejus insertio in colon fit.

II. Non numquam etiam intestina inter convoluta fuisse apparebant.

§. DCCCCI.

Obliqua ilei in colon insertio ab ejus ligamentis recte constitutis dependet. Unde jam valvæ sic dictæ coli oritur. Ligamenti itaque istius admodum debilitatis, vel plane solutis, valvæ coli destructio necessaria erit.

§. DCCCCII.

Quia igitur ex iis momentis, quæ indicantur in §§. 899 & 900. colligere licet, quod in partim ligamenta coli debilia reddi aut plane frangi possint; partim etiam motus peristalticus intestinorum descendens valdopere imminui queat, hinc jam patebit ratio necessaria, quare nimirum descripto ibidem hominum generi passio iliaca incidere soleat [§. 316.]?

§. DCCCCIII.

In passione iliaca anxietates præcordiorum, et febres, obstructions alvi longe acerbiores debent, quam in ulla alia colicæ specie [§. 315.]

§. DCCCCIV.

Ubi vero jam prævaluit passio iliaca; ibi eructus, tandemque vomitus stercorii eveni oportebit. [§. 315.]

§. DCCCCV.

Ob symptomatum in passione iliaca qualitatem & quantitatem (§§. 903 & 904.) contingere poterunt graves quædam congestiones ad encephalon; si imprimis æger tædio sibi fuerit maximo, imminuentibus illis foetidis ructibus & vomitibus. Unde affectuum lipothymicorum & convulsivorum accessiones, quas ad præcedentia passionis iliacæ symptomata sæpius fieri, comprobant observationes [§. 350 & 587.]

§. DCCCCVI.

Signa pathognomica sufficientia passionis iliacæ colligere licebit ex obstructionibus alvi pertinacissimis; ex dolore ardente intestinorum, non numquam percepto circa loca umbilici; tandemque ex ructibus foetidis & rejectionibus excrementorum, per vomitum factis [§§. 900. 902. & 904.]

§. DCCCCVII.

Prognosis vero passionis iliacæ sequentia sibi vindicat fundamenta.

I. Quando passio iliaca in casu obvio magis dependet a plenaria ligamentorum coli solutione; illa tum consideranda erit instar morbi majoris, in relatione ad sui ortum ex debilitate eorundem ligamentorum.

II. Quo majoris gradus inflammatio esse deprehenditur in passione iliaca; eo magis periclitabitur vita ægrotantium. Quod etiam de nimis intestinorum convolutionibus tenendum erit.

III. Semel oborta passio iliaca, licet ita fataliter soluta esse videatur, ut iterum per viam ordinariam e corpore secedant excrementa, mox iterum redire observatur; quam primum una atque altera causa flatulentiae ad corpus admittatur.

IV. Quam mediocriter sese etiam habere non numquam videantur res aegrotantium ex hoc morbo; ob ejus tamen frequentem reditum natura in negotio digestionis & confectionis chyli adeo perturbabitur, ut tandem corpori inducatur tabes.

V. Restat, ut hic etiam id singulare momentum ex observationibus notetur. Contigit nimirum in casibus passionis iliacæ, ut feces ex parte exirent per novam aperturam, ex ruptione abscessus exortam in musculis abdominis circa umbilici regionem, per quam pars coli soluti prominebat.

C A P U T LVIII.

D E

O B^o S T R U C T I O N E A L V I.

§. DCCCCVIII.

ALvi obstructions [§. 313.] in corporibus oboriri solent, in quibus una atque altera conditionum sequentium adest: variarum causarum admissiones, unde intestina debilia fiunt; insignes humorum commotiones; validæ sphincte-

is ani constrictiones, aut intestini recti compressiones.

§. DCCCCIX.

A descriptis in §. anteced. subjectorum determinationibus obstructionem alvi derivare licebit (§. 313.)

§. DCCCCX.

Inde jam intelligi poterit (§. anteced.), cur alvi obstructio, ut observationes docent, tam frequenter accidere soleat otiosis; voracibus; cibos concoctu difficiles ingerentibus; multas aquas calidas ingurgitantibus; vino aut potu alio exæstuante, austero abutentibus; prodigis in profundendo semine; affectis a morbis vesicæ spasticis, tandemque feminis gravidis, præsertim ultimis mensibus gestationis.

§. DCCCCXI.

In obstructione alvi nimix intestinorum distensiones fiunt, quæ a mole excrementorum, ibi justo longius commorantium, dependent. Hinc necesse erit, ut hic simul oboriantur difficultates respirandi, anxietates præcordiorum, cardialgia, inflammationes intestinorum, imo etiam passio iliaca, nec non massæ humorum corruptiones. Quibus quoque observationes annuunt.

§. DCCCCXII.

Signa pathognomica sufficientia obstructionis alvinæ ex definitione (§. 313.) patent; prognostica autem hic facile cognoscere licebit ex morbi magnitudine (§. anteced.)

CAPUT LIX.

DE

DIARRHOEA.

§. DCCCCXIII.

QUamcumque diarrhoeam (§. 310.) strepitu in ventre & affectionibus colicis, quamvis differentis gradus, stipatam esse, experientia docet.

§. DCCCCXIV.

In quavis diarrhoea justo major quantitas fluidorum secretorum in canali intestinali adesse debet (§. 310.)

§. DCCCCXV.

Si quæ fluida secreta jam acria fuerint, quæ in canalem intestinalem deponuntur; vel ibi ob moram talia fiant, sive adhuc majoris gradus acrimoniam concipiant: tum strepitus ventris & affectus colici eo acerbiores erunt.

§. DCCCCXVI.

Ex quo intelligi poterit, quare nimirum in diarrhoea biliosa, serosa, aut quæ scorbuticis, vel scabie infectis accidit, hæc incommoda in abdomine vehementiora iis esse deprehendantur, quæ socia sunt diarrhoeæ colliquativæ. (§§. 312 & anteced.) ?

§. DCCCCXVII.

Quid igitur fluidorum depositionem ad intestina promovebit, id etiam diarrhoeæ producendæ interfervire poterit (§. 914.)

§. DCCCCXVIII.

Hinc hecticis, iracundis, sudorum repressiones & causas varias admittentibus, unde ventriculus & intestina debilia redduntur, diarrhoea frequenter oboriatur, necesse erit (§. anteced.) Quod etiam cum observationibus congruum est.

§. DCCCCXIX.

Experientia docet, diarrhoeam lentericam & coeliacam (312.) non nisi aliam diarrhoeæ speciem excipere solere.

§. DCCCCXX.

Lienteria & diarrhoea coeliaca supponunt majorem debilitatem intestinorum, præcipue vasorum tunicæ villosæ (§. anteced.)

§. DCCCCXXI.

Omnis quidem diarrhoea successu temporis atrophiam corpori inducere poterit, quam vero citius ibi suboriri oportebit, ubi ad diarrhoeam producendam in casu obvio adsunt causæ, quibus jam per se consideratis vis inest lædendi nutritionem corporis [§§. 278. 312. & 914.]. Atque id etiam de differentia graduum ratione commotionum febrilium, tamquam præsentium in quavis diarrhoea, [notan-

dum erit. Utrumque hoc momentum congruit cum observationibus.

§. DCCCCXXII.

Signa pathognomica sufficientia diarrhœæ in genere ejusque specierum ex definitionibus ; prognostica vero ex morbi magnitudine illiusque causarum qualitatibus facile cognosci poterunt (310. 312. 316. 318. 320 & 321.)

CAPUT LX.

DE

DEBILITATE VENTRICULI ET INTESTINORUM.

§. DCCCCXXIII.

Nimix ventriculi & intestinorum distensiones & spasmi harum partium iisdem inducere valent debilitatem (§. 20.)

§. DCCCCXXIV.

Subjecta igitur cardialgiis, vomitibus, flatulentis, colicis, obstructionibus alvi, diarrhœis obnoxia, debilitate tandem ventriculi & intestinorum afficiantur, oportebit (§. anteced.) ; in idem passim consentientibus observatis.

§. DCCCCXXV.

Causæ externæ ad intestina & ventriculū admittæ, unde fibrarum in dictis partibus cohæsiō imminui poterit, debilitatem ventriculo & intestinis inducent (§. 20.)

§. DCCCCXXVI.

Quare nimix ventriculi repletiones, ingestiones ciborum difficilis concoctionis, abusus potus aquei calidi atque esculentorum pinguium ad causas quoque debilitatis in ventriculo & intestinis efficiendæ pertinebunt (§. anteced.); idem confirmantibus observationibus.

§. DCCCCXXVII.

Ob ventriculi & intestinorum debilitatem motus peristaltici imminutio in dictis partibus necessaria erit (§. 20.)

§. DCCCCXXVIII.

Ventriculo & intestinis igitur debilitate affectis, mala digestio nascitur; hinc cruditates primarum viarum, indeque plures alii morbi facillime generantur (§. anteced.)

§. DCCCCXXIX.

Signa pathognomica sufficientia debilitatis ventriculi & intestinorum colligi poterunt ex anorexia & ortu perquam facili cruditarum in ventriculo ab ingestis, nec qualitate, nec quantitate peccantibus (§. anteced.) prognostica autem ex morbi magnitudine ejusque causarum conditionibus eruenda erunt (§§. 924. 925 & 928.)

CAPUT LXI.

DE

SODA.

§. DCCCCXXX.

SOda (§. 300.) aggravari observantur subjecta sequentis indolis.

I. Quibus nempe ventriculus debilis est, vel in eodem multæ cruditates continentur.

II. Quibus copiosæ effusiones bilis oboriuntur; aut quibus solemne est, in magna copia ad ventriculum deferre pingua, acida, aromata, nec non valde salita.

§. DCCCCXXXI.

A descriptis in §. anteced. subjectorum determinationibus ortum sodæ deducere conveniet (§. 300.)

§. DCCCCXXXII.

Ex hoc morbo ægrotantes conqueruntur de ardore sub scrobiculo cordis, se non numquam per oesophagum diffundente. Ibidem porro observantur nausea, ructus, immo vomitus.

§. DCCCCXXXIII.

In quavis foda ventriculus debilis reddatur, oportebit (§§. 20 & 300.)

§. DCCCCXXXIV.

Quoniam ex arrosione circa cardiam sodæ existentia putatur (§. 300.); hinc etiam de sensu ardoris satis constabit, quem sub scrobiculo cordis percipiunt, quotquot a soda afficiuntur. Quod vero ad sensus hujus diffusionem per oesophagum attinet, illa ideo fieri poterit, quia in ventriculo, qui hic debilis fit (§. anteced.), massæ ibidem contentæ fermentatio magis increscit, qua efficitur, ut, salibus ad volatilitatem in ventriculo perductis, horum actio ad oesophagum facile penetrare possit.

§. DCCCCXXXV.

Sales vero isti, qui hunc ardoris sensum circa orificium ventriculi superius atque in oesophago excitant (§. anteced.), vel copiose jam insunt esculentis & potulentis, quæ ventriculo ingeruntur, vel mora temporis per fermentationem certi gradus generantur; referendi tandem ad species salium mox acidæ, mox alcalinæ, mox mediæ naturæ.

§. DCCCCXXXVI.

Dum præter insignem massæ in ventriculo contentæ fermentationem, id adhuc in affectu sodæ obtinet, ut fibræ ventriculi in ratione ad se diversa debiles fiant: hinc etiam necesse erit, ut hic suboriantur ructus, vomitus, nausea (§. 932.)

§. DCCCCXXXVII.

Soda vehementioris gradus successu temporis inflammationem ventriculi producere potest [§. 300.)] Quocum etiam observationes consentiunt.

§. DCCCCXXXVIII.

Signa pathognomica sufficientia fodæ esse possunt ardor sub scrobiculo cordis, qui ad oesophagum usque divagatur, maxime sub ructibus [§. 932.]; prognostica vero ex morbi effectibus illiusque caussarum conditionibus facile depromere licebit (§§. 930. 933-937.)

CAPUT LXII.

DE

TENESMO PARALYSI ET PROCIDENTIALI ANI.

§. DCCCCXXXIX.

EX tenesmo oriri possunt ani paralyfis & procidentia [§§. 317. 318. 319. 599. & 601.]. Id quod etiam cum observationibus congruit.

§. DCCCCXL.

Conditionis sequentis esse deprehenduntur subiecta quibus tenesmus oboriri solet.

Quæ scilicet a spasmis vehementioribus circa loca hæmorrhoidalia, sub ortu moliminum ad hæmorrhoides, præcipue externas, comprehenduntur.

II. Qua

II. Quæ a diarrhœis acrioribus torquentur.

III. Quæ a calculo renum & vesicæ urinariæ afficiuntur.

IV. In quorum intestinis vermium colluvies hæret, atque imprimis intestinum rectum inde afficitur; id quod maxime fieri solet, præsentē illa vermium specie, quam ascarides dicunt.

V. Quæ causas externas, unde anus irritari possit, admittunt.

VI. Gravidis tandem idem morbus accidere solet.

§. DCCCCXLI.

Ab enarratis in §. anteced. subjectorum conditionibus tenesmi ortum deducere licebit (§. 317.)

§. DCCCCXLII.

In tenesmo adesse debent frequentes, sed irriti conatus ad defidendum (§. 317.) De quo etiam satis constat per observationes.

§. DCCCCXLIII.

Ex tenesmo stranguriæ & dysuriæ ortus facilis esse poterit, præsertim in sexu potiore (§§. 317. & 324.)

§. DCCCCXLIV.

Tenesmus in gravidis abortum producere poterit (§. 317.); in idem frequenter consentiente experientia.

§. DCCCCXLV.

Sub conditione paralyſis ani neceſſe erit, ut feces alvinæ ſine ullo ſenſu excernantur [§§. 319 & 605.]

§. DCCCCXLVI.

Ex ani procidentia inflammatio ad inteſtinum rectum accedere poterit [§. 318.] Quod etiam conſentaneum eſt cum obſervationibus.

§. DCCCCXLVII.

De ſignis pathognomicis ſufficientibus tenefm ex §. 942. paralyſis vero ani ex §. 945. procidentiae tandem ani ex §. 218. conſtare poterit.

§. DCCCCXLVIII.

Ratione prognofis, in iſdem morbis invenien-
dæ, conveniet ad conditiones cauſſarum [§. 940.]
& effectuum productorum [§§. 942-946.] attendere

CAPUT LXIII.

DE

VERMIBUS.

§. DCCCCXLIX.

AD frequentiffimas] cauſſas morborum, ſpecie
& magnitudine diverſorum, pertinet vermium
colluvies in ventriculo & inteſtinorum canali; i
ſatis docente experientia. Qui vero in his loc
corporis humani reperiri ſolent vermes, illi a

res species reducuntur. Prima nempe species figuram exhibet vermium teretum, rotundorum atque apparentium instar lumbricorum terrestrium; secunda vero latorum, fere ut semina cucurbitina, & tæniæ nomen sibi vindicantium. Ambæ hæ vermium species in intestinis tam tenuibus, quam crassis nidulari, ibidemque hæere observantur vel solitarie, vel ad catenæ modum, cujus singulæ partes sibi innectuntur, vel instar glomeris convoluti; adeo, ut ejusmodi vermium fasciculus, facta cui explicatione, aliquot ulnas superasse deprehensus sit. Ad tertiam denique vermium speciem referuntur ascarides, quo nomine intelliguntur animalcula parva, gracilia, similia illis, quæ in canibus & carnibus putridis reperiuntur. Hæ bestiolæ in intestino recto nidos suos exstruere solent.

§. DCCCCL.

Probabile est, vermes ex ovulis insectorum, vel ope esculentorum aut potulentorum, vel alia ratione ad intestina delatis, ibidem excludi.

§. DCCCCLI.

Quod jam ad illud genus hominum attinet, quorum intestinis vermium colluviem præ reliquis ingenerari experientia edocuit; tunc hoc nomine venient infantes voraces; immo etiam adultiores, morbis ex mala digestionem oriundis affecti; lacticiolorum & dulcium abusum admittentes; femine tandem, quibus mensium suppressiones aut cessationes oboriuntur.

§. DCCCCLII.

Sub conditionibus, in §. anteced. propositis, facilior generatio vermium in intestinis fieri poterit (§. 950.)

§. DCCCCLIII.

Ob vermium colluviam in ventriculo & intestinis facile generari poterunt massæ tenacis, acris & putridæ indolis. Unde diversi gradus distensiones, constrictiones, arrosiones, vasorumque obstructions ibidem efficiantur, necesse erit.

§. DCCCCLIV.

Hinc flatulentia, colica, intestinorum inflammationes, cardialgia, nausea, vomitus, addephagia, alvi obstructio, diarrhœa, massæ humorum depravationes, læsiones viscerum, atrophia, spasmus, paralyxis, varii in corpore effectus ob congestiones ad caput, ut sunt sensuum externorum & internorum vitia diversæ indolis, tandemque etiam convulsiones ad morbos in colluvie vermium frequenter obvios pertinebunt (§. anteced.) Quocum etiam observationes conveniunt.

§. DCCCCLV.

Ascarides tenesmum producere possunt (§§. 317 & 949.); idem etiam probante experientia.

§. DCCCCLVI.

Quoniam ex colluvie vermium corruptiones humorum atque insignia in ventriculo & intestinis incommoda suboriri possunt (§. 954.): necesse ideo-

ue erit, ut, si ad hunc corporis statum accesserit
bris quædam acuta maligna, illa gradu malig-
nitatis increseat, valdeque etiam impediatur, quo
minus salutariter solvi possit. Quod apprime con-
gruit cum observationibus.

§. DCCCCLVII.

Experientia testatur, quod in illis ægrotantibus,
a quorum ventriculo & intestinis vermium collu-
vies adest, deprehendere liceat nares oppletas; pru-
tum narium, præsertim tempore matutino; tan-
emque colorem subcæruleum in tunica albugi-
nea oculorum.

§. DCCCCLVIII.

Annotata in §. anteced. phænomena sufficere
poterunt ad diagnosin colluviei verminosæ in ven-
triculo & intestinis. Ad prognosin vero quod hic
attinet; illam ex qualitate & quantitate effectuum
[§§. 953-956.], in casibus subnatis deprehenso-
rum, facile invenire poteris.

CAPUT LXIV.

D. E

INFARCTU HEPATIS.

§. DCCCCLIX.

DOcent observationes, quod hepatis infarctus
[§. 320.] subjectis accidere soleat indolis
quentis.

I. Quæ diuturnis passionibus hypochondriacis & hystericiis affliguntur.

II. Quæ adstringentibus, emeticis, in febribus præsertim intermittentibus, abutuntur.

III. Quæ potum frigidum corpori nimis calido ingerunt.

IV. Quæ sanguinem spissum alunt.

V. Quæ iræ indulgent, aut varias causas externas violentas ad hypochondrium dextrum admittunt.

VI. Quibus fluxus hæmorrhoidum aut mensium supprimitur.

§. DCCCCLX.

A descripta in §. anteced. subjectorum indole infarctum hepatis derivare licebit [§. 321.]

§. DCCCCLXI.

In infarctu hepatis non alia symptomata prodire poterunt, quam quæ necessaria sunt ob relationem tumoris ad hoc viscus, & nexum, quem istud cum reliquis partibus vicinis habet [§. 320.]

§. DCCCCLXII.

Quare jam fieri poterit, ut in infarctu hepatis, præter dolorem gravantem & obtusum in hypochondrio dextro, adhuc oboriantur cardialgia, anorexia, alvi obstructions frequentes, tussis sicca, motus febriles [§. anteced.] Quæ passim confirmantur ab observationibus.

§. DCCCCLXIII.

Sed ex eodem quoque fundamento, ex quo factum est in §. anteced. ulterius colligere licebit; fieri nimirum posse, ut hepatis infarctus in scirrhum transeat, una cum tabe corporis illum insequente, vel in eodem etiam viscere inflammatio nascatur. Quod similiter observationibus consonum est.

§. DCCCCLXIV.

Signa pathognomica sufficientia infarctus hepatis esse possunt dolor gravativus, obtusus in hypochondrio dextro, nec non tumor mollis ibidem deprehensus [§§. 320 & 962.]

§. DCCCCLXV.

Signorum prognosticorum in infarctu hepatis inventio postulat, ut rite considerentur morbi symptomata [§§. 962 & 963.], una cum illarum mutationum in corpore accessionibus, unde morbi vel imminutiones, vel augmenta provenire possunt. Hic igitur usui esse poterunt propositiones sequentes.

I. Quo magis alvi obstructiones, aut flatulentia invalescunt; eo majora augmenta ad infarctum hepatis accedunt [§. 321.]

II. Quo magis dolor ille obtusus, ad hypochondrium dextrum ab ægrotante perceptus (§. 962.), eidem videatur in pungentem & ardentem commutari; eo magis metuendum erit, fore, ut hepatis infarctus in inflammationem tran-

feat. Quo facto, status ægrotantis periculo non carebit.

III. Tussis moderata in hoc morbo salubris esse poterit [§. 822.] Quod etiam de motibus febrilibus determinati gradus, nec non de fluxu hæmorrhoidum vel mensium valebit [§§. 713 & 735.]

CAPUT LXV.

DE

SCIRRHO HEPATIS.

§. DCCCCLXVI.

Hepatis scirrhus [§. 210.] eidem hominum generi, quod describitur in §. 959. oboriri, per observationes constat.

§. DCCCCLXVII.

Ex allegatis in §. anteced. determinationibus subjectorum scirrhus hepatis oriri poterit.

§. DCCCCLXVIII.

Scirrhus hepatis, in relatione ad ejus infarctum, morbus major erit [§§. 210 & 320.]

§. DCCCCLXIX.

In scirrho hepatis eadem quidem, quæ in ejus infarctu, obtineant symptomata necesse erit, sed paulo acerbiora [§§. 210. 320 961. & 968.] Quocum etiam observata consentiunt.

§. DCCCCLXX.

Sed ad hæc symptomata (§. anteced.) adhuc accedere poterunt icterus, immo etiam tumores hydropici (§§. 248. 250 & 346.); in idem consentiente experientia.

§. DCCCCLXXI.

Signorum pathognomicorum sufficientium scirrhi hepatis cognitio haurienda erit ex dolore gravante & obtuso in hypochondrio dextro, nec non tumore duro ibidem palpabili (§ 210.), tandemque ex symptomatibus deprehensis, quatenus hæc differunt a symptomatibus in infarctu hepatis (§§. 969 & 970.)

§. DCCCCLXXII.

Prognosis vero scirrhi hepatis illis fundamentis superstruenda erit, quæ exponuntur in §§. 455. 965. 969 & 970.

CAPUT LXVI.

DE

INFARCTU LIENIS.

§. DCCCCLXXIII.

Infarctus lienis (§. 320.), experientia teste, in corpora cadit iis similia, quæ jam descripta exhibentur in §. 959.

§. DCCCCLXXIV.

Sub conditionibus subjectorum in §. anteced. citatis oriri quoque poterit lienis infarctus (§. 320.)

§. DCCCCLXXV.

Infarctus lienis, præter dolorem obtusum & gravantem in hypochondrio sinistro, ratione aliorum symptomatum conveniet cum infarctu hepatis [§§. 320. 961. 962 & 963.]

§. DCCCCLXXVI.

Hiscæ symptomatibus in infarctu lienis [§. anteced.] adhuc accedere poterit vomitus cruentus, per quem ille lenitur [§. 679.]

§. DCCCCLXXVII.

Ad signa pathognomica sufficientia in infarctu lienis pertinebit dolor gravans & obtusus in hypochondrio sinistro, una cum tumore molli ibidem deprehenso [§. 320.]

§. DCCCCLXXVIII.

De signis vero prognosticis ejusdem morbi constare poterit ex iis, quæ in §§. 965. 973-976. traduntur.

CAPUT LXVII.

DE

SCIRRHO LIENIS.

§. DCCCCLXXIX.

Lienis scirrhus (§. 210.) eidem generi hominum accidereprehenditur, quorum corpora ad similes conditiones redeunt, quæ enarrantur in §. 959.

§. DCCCCLXXX.

Modo dictæ determinationes subjectorum (§. anteced.] causam proximam excitare poterunt ad producendum in liene scirrhum (§. 210.)

§. DCCCCLXXXI.

Si a gradu vehementiæ discefferis, symptomata scirrhi lienis cum illis conveniunt, quæ in ejus infarctu prodeunt (§§. 210. 320. 975 & 976.)

§. DCCCCLXXXII.

Scirrhi lienis signa pathognomica sufficientia colligere licebit ex dolore gravante & obtuso ad hypochondrium sinistrum, nec non ex tumoris ibidem percepti duritie (210.); quibus adhuc accedere poterit differentia illa, quæ infarctus & scirrhi lienis symptomata intercedit (§. anteced.)

§. DCCCCLXXXIII.

Quæ ad prognosin in scirrho hepatis & infarctu lienis formandam adducuntur principia in §§. 972 & 978., ea quoque in scirrho lienis valebunt (§§. 979. 981.).

CAPUT LXVIII.

DE

OBSTRUCTIONE INFARCTU ET SCIRRHO
GLANDULARUM MESENTERII ET
INTESTINORUM.

§. DCCCCLXXXIV.

MOrbis istis glandularum mesenterii & intesti-
norum frequenter subijci observantur infan-
tes, quibus noctu corpore sudante potus frigidus
offerri solet; vel quibus diarrhœæ improvide cohi-
bentur; vel qui statim post ablaçtationem victu
crudo uti coguntur, aut etiam cibis bonæ alias
notæ, sed in larga quantitate datis opplentur; vel
qui tandem ex vermium colluvie in intestinis ægro-
tant. Sed ne adultior quidem ætas hic eximitur.
Idem enim genus mali juvenibus quoque voraci-
bus, prouti experientia docet, accidere solet; aut
quibuscumque aliis abusum spiritus vini admitten-
tibus, vel morbis obnoxiiis, qui vim aliquam habent
obstructiones inducendi visceribus abdominis, ut ex-

mpli gratia esse possunt hæmorrhoidum vel mensium anomalix; passiones hypochondriacæ & hysteriæ, pertinaces febres intermittentes.

§. DCCCCLXXXV.

Obstructionis, infarctus & scirrhi ortus in intestinorum & mesenterii glandulis deduci poterit ex enarratis in §. anteced. subjectorum determinationibus (§§. 99. 320 & 210.

§. DCCCCLXXXVI.

Docent porro observationes, quod in iisdem affectibus glandularum mesenterii & intestinorum comparere soleant phænomena sequentia.

I. Abdomen turgescit, sæpius etiam induratum esse tactu deprehenditur.

II. Non desunt commotiones febriles, æque post passum exacerbatae.

III. Sed hoc etiam notari meretur, quod plerumque die tertio aut quarto istæ motuum febrilium exacerbationes magis eminere videantur.

IV. Neque hoc loco rara est diarrhœa lenterica vel coeliaca.

V. Atrophia corpori inducitur, prodit rachitis.

VI. Determinati gradus febris, excretiones hæmorrhoidum aut mensium efficiunt quandoque salutarem solutionem morbi, quo alias ita conficiuntur ægrotantes, ut eos tandem necessario occumbere oporteat.

§. DCCCCLXXXVII.

Ad symptomatum in §. anteced. descriptorum rationes quod attinet, eas satis distincte intelligere licebit ex illis locis, ubi nimirum sermo erat tam de causis proximis atrophiae, quam etiam de stasium, obstructionum & congestionum effectibus in genere; singulis hisce ad casum præsentem rite applicatis. Quorum itaque spectabunt §§. 278. 400 & seqq. 404 & seqq.

§. DCCCCLXXXVIII.

Obstructionis, infarctus & scirrhi glandularum mesenterii & intestinorum signa pathognomica sufficientia constare poterunt ex deprehensis illis symptomatibus, quæ describuntur in §. 986. præcipue ad *num.* 1. & 5. Sed & prognosis fundamenta hic rite formandæ apparebunt ex §§. 984. & 986.

CAPUT LXIX.

DE

CALCULO RENUM ET VESICÆ.

§. DCCCCLXXXIX.

TEstantur observationes, calculum renum & vesicæ non nisi in corporibus sequentis conditionis generari.

I. Quæ frequentissimis congestionibus ad renes & vesicam, indeque morbis aliis pertinaci-

bus oriundis subjiciuntur. Hujus loci exempli causa erunt affectus hæmorrhoidum vel mensium, inflammationes renum, mictus cruentus.

II. Quæ spasms acerbissimis ad partes modo dictas, vel alias illis vicinas, affliguntur. Quorsum exempli loco pertinebunt dysuriæ & stranguriæ casus, spasmus Paracelsi fixus, malum ischiadicum, atque affectus alii rheumatico-arthritici.

III. Ubi tandem urinæ excretiones valde impeditas, aut plane suppressas fuisse sæpius apparuit. Huc exempli gratia referri poterunt casus mictionibus studio suppressæ, ischuriæ, stranguriæ, dysuriæ.

§. DCCCCXC.

Calculi renum & vesicæ ratione magnitudinis, figuræ & gradus, quo illorum particulæ inter se cohærent, haud parum inter se differunt; lamellas sibi superstratas exhibent; destillationi tandem subiecti satis notabilem quantitatem salis volatilis & olei empyreumatici suppeditare deprehenduntur.

§. DCCCCXCI.

Ex sectionibus cadaverum constat, renes calculosorum fistulis exesos & materia ulcerosa refertos fuisse.

§. DCCCCXCH.

Factis per intervalla præcipitationibus partium terrearum ex urina & materia ulcerosa in renibus: non poterunt non calculi inde generari, quorum

ortus conditionibus naturæ apprime respondebit
[§§. 989. 990 & 991.]

§. DCCCCXCIII.

Calculus vesicæ partim in vesica generatur, partim ex renibus ibidem delatus majus augmentum capere potest (§. anteced.)

§. DCCCCXCIV.

Consideratis illis conditionibus corporis, sub quibus nempe eidem ingenerari deprehenditur calculus (§. 989.); haud difficulter intelligi poterit ratio, quare etiam viri; maxime arthritici, multo frequentius quam feminæ a calculo renum & vesicæ affici observentur?

§. DCCCCXCV.

Effectus quos renum & vesicæ calculi producere valent, ex horum magnitudine, figura, numero & gradu, quo eorumdem particulæ inter se compinguntur, derivare conveniet; habita nimirum ratione qualitatum & nexus earum partium, quibus calculi insunt.

§. DCCCCXCVI.

Quare fieri poterit, ut a calculo renum suboriantur spasmi circa vertebrae lumbares & dorsales, colica, cardialgia, vomitus, mictus cruentus, inflammationes in renibus partibusque vicinis (§. anteced.) Id quod etiam observationes confirmant.

§. DCCCCXCVII.

§. DCCCCXCVII.

Ex eodem fundamento (§. 995.) licebit quoque colligere: a calculo vesicæ, præter effectus in anteced. indicatos, adhuc prodici posse malum thiadicum, lumbaginem, stranguriam dysuriam, hæmorrhæmum. Quibuscum etiam observationes continentur.

§. DCCCCXCVIII.

Signa diagnostica sufficientia calculorum præsentium in renibus esse poterunt expositi in §. 996. effectus; eorum tamen causis aliis, quæ existere possunt, prius remotis. Calculi autem vesicæ agnoscuntur ex deprehensis illis effectibus, qui continentur in §. anteced. ita tamen, ut ab his effectibus separentur prius causæ aliæ, a quibus iidem effectus proficisci possunt. Quibus adhuc accedere poterit resistentia illa, quam, cathetere per urethram vesicæ immisso observare licebit.

§. DCCCCXCIX.

Prognosis vero in renum & vesicæ calculis ad prædictum æque, ac effectuum, qui inde produci casu obvio deprehenduntur, quantitatem & qualitatem redibit; numquam neglecta ratione prædictarum, per quas calculi excernendi transire debent.

CAPUT LXX.

DE

STRANGURIA ET DYSURIA.

§. M.

STranguriæ & dysuriæ (§. 323.) obnoxia fieri deprehenduntur subiecta indolis sequentis.

I. Quæ spasmis ad hæmorrhoides externas vexantur; præcipue ætate senili accedente.

II. Quæ gonorrhœa maligna, aut fluore albo maligno laborant.

III. Quæ a calculo renum aut vesicæ afficiuntur.

IV. Quæ diureticorum, aphrodisiacorum vel Veneris abusum admittunt.

V. Quæ abdominis vel etiam totius corporis refrigerationes patiuntur.

VI. Quæ flatulentiis, diuturnis diarrhœis paulo vehementius affliguntur.

VII. Quæ tenesmo & pertinacioribus alvi obstructionibus laborant.

VIII. Gravidis tandem circa ultimum gestationis tempus idem quoque incommodi generi accidere solet.

§. MI.

Descriptæ in §. anteced. conditiones subjectorum causam proximam stranguriæ & dysuriæ producere possunt (§. 324.)

§. MII.

Symptomatum ortus in stranguria & dysuria a causarum diversitate, illarumque vi differente dependebit (§§. 324. 1000 & 1001.) Hinc, præter doloris incommoda, commotiones febriles, mictus cruentos, inflammationes partium, in isto morbo præcipue affectarum, hic adesse poterunt, tandemque insequi ischuria, incontinentia urinæ. Quod etiam cum observationibus probe congruit.

§. MIII.

Stranguriæ & dysuriæ signa pathognomica sufficientia ex suis definitionibus satis intelliguntur [§. 323.]

§. MIV.

Neque etiam difficile erit, hic invenire signa prognostica; consideratis nempe symptomatum qualitatibus & quantitativis, nec non illorum relationibus ad causas, unde morbus in casu obvio provenit (§. anteced.)

CAPUT LXXI.

DE

ISCHURIA.

§. MV.

Ischuriæ [§. 323.] subjecta conditionis sequentis esse solent, id testantibus observationibus.

I. Quæ plethoram alunt, atque in ætate juvenili aut puerili adhuc versantur.

II. Quæ stranguriæ & dysuriæ per longum aliquod tempus erant obnoxia; hic præcipue concurrentibus calculis renum & vesicæ.

III. Quæ conatus ad excernendam urinam supprimunt.

IV. Convulsis denique, hydropicis, feminis gravidis idem morbi urinarii genus oboritur.

§. MVI.

Nunc modo recensitæ subjectorum determinationes [§. anteced.] ortui causarum proximarum ischuriæ bene respondent [§. 324.]

§. MVII.

In ischuria [§. 323 & 324.] non deficient spasmi Paracelsi fixus, malum ischiadicum, lumbago, cardialgia, vomitus, dolor premens & ten-

ivus in regione pubis, tandemque commotiones febriles. Quocum etiam conveniunt observationes.

§. MVIII.

Ex ischuria [§§. 323 & 324.] porro nasci poterunt inflammationes renum, ureterum & vesicæ, nec non tumores hydropici. Quod similiter esse congruum cum observationibus deprehenditur.

§. MIX.

Ischuriæ signa pathognomica sufficientia ex illius definitione satis constare poterunt [§. 323.]; prognostica vero hic facile eruere licebit ex acerbitate symptomatum propositorum in §§. 1007 & 1008. Præ reliquis hic in considerationem venient symptomata, quæ indicantur in §. anteced. His enim productis, ægrotantis status periculossimus erit; maxime, si jam urinæ accesserit putrefactio, nimis coacervatæ intra receptacula sua.

CAPUT LXXII.

DE

INCONTINENTIA URINÆ.

§. MX.

Incontinentiam urinæ [§. 326.], prout observationes docent, patiuntur subjecta indolis frequentis.

I. Quorum corpora stranguriæ, dysuriæ, ischuriæ, horumque morborum causis admodum patent.

II. Quibus inflammatio vesicæ oboritur, quæ per apostema solvitur; a quacumque etiam causa illa producta fuerit.

§. MXI.

Ex enarratis in §. anteced. subjectorum determinationibus incontinentiæ urinæ ortum [§. 326.] intelligere licebit.

§. MXII.

Symptomata in urinæ incontinentia ad illos effectus reducere licebit, qui in partibus genitalibus externis, aliisque iisdem vicinis ideo oboriri poterunt, quia ab urina continuo madefiunt. Hinc fieri poterit, ut hic producantur arrosiones, inflammationes, psoriasis, fistula ani, immo etiam similes arrosionis effectus in ipsa vesica; ejus scilicet sphinctere exulcerato, indeque producta causa proxima incontinentiæ urinæ [§. 326.]

§. MXIII.

Signa pathognomica sufficientia incontinentiæ urinæ ex definitione patent [§. 326.]; prognostica vero facile cognosci poterunt ex justa symptomatum morbi, hujusque causarum æstimatione. Quare hic conferre juvabit (§§. 1012. 1013 & 326.)

CAPUT LXXIII.

DE

DIABETE.

§. MXIV.

Diabetes [§. 325.] , experientia teste , illi hominum generi oboritur , ubi nimirum læsio visceris cujusdam , præsertim in abdomine , post morbum quemdam acutum corruptum , obtinuit.

§. MXV.

Docet porro experientia , diabete affectos conqueri de siti immodica , de eximii gradus calore , eoque magis ficco , tandemque tabe perire.

§. MXVI.

Constitit etiam ex observationibus , urinam diabeticorum nullum sedimentum deponere , odorem & saporem subdulcem , colorem vero ad albedinem vergentem referre.

§. MXVII.

Urinæ diabeticorum lymphæ immixta esse videtur [§. anteced.]

§. MXVIII.

Nihil , aut certe parum a vero recedet , si tibi diabetem concipias instar modi cujusdam singularis , quo febres hæcticæ lethaliter solvuntur , in

quibus alias idem consequi solet per sudores colliquativos, aut diarrhoeas colliquativas [§§. 312 325. 1014 & 1017.]

§. MXIX.

Si itaque diabetem, tamquam symptomata febris hecticae jam perductae ad intensiorem gradum considerare liceat [§ anteced.]; tunc etiam facilis erit ad intelligendum ratio, quare nimirum in diabeticiis sitis immodica, ingens magisque ficcus calor, una cum morbi ortu insequente viscerum abdominalium læsiones, productas ab acutorum incongrua solutione, deprehendantur [§§. 1014 & 1015]? Clariora hæc fient ex theoria febrium, suo loco proponenda.

§. MXX.

Quod jam ad signa pathognomica sufficientia in diabete attinet; illa partim ex morbi definitione [§. 325.], partim ex urinæ, quæ a diabeticiis excernitur, supra descriptis qualitatibus [§§. 1016 & 1017.] cognoscuntur.

§. MXXI.

Fundamenta denique prognosis in diabete continentur in §§. 1018 & 1019.

CAPUT LXXIV.

DE

ICTERUS.

§. MXXII.

ICterus [§. 345.] in illis prodire solet subjectis, quibus sequentes conditiones inesse observantur.

I. Quæ fortioribus emeticis in febribus, præcipue intermittentibus, abutuntur, vel potum frigidum corpori admodum calenti immodice ingerunt.

II. Quæ ira excandescunt, eamque præsertim coguntur suppressere.

III. Quibus hæmorrhoidum aut mensium suppressiones oboriuntur.

IV. Quæ ex febre biliosa, vel scirrho hepatis ægrotant.

V. Infantibus addephagis, quin immo adultis, quibus nimiae in ventriculo & intestinis distensiones oboriuntur, icterus haud raro contingit.

§. MXXIII.

A conditionibus subjectorum, quæ in §. anteced. exponuntur, icteri ortum derivare licebit (§. 346).

§. MXXIV.

De ictericis sequentia adhuc ex observationibus annotanda erunt, unde reliqua phœnomena, hic etiam obvia, facile intelligere licebit.

I. Urina sæpius adeo flavescit, ut etiam lintea eidem immersa flavo colore tingantur.

II. Sanguis flavus apparet, instar urinæ jumentorum.

III. Viscera flavo colore imbuta fuisse videbantur.

IV. Infantes ex matre icterica prognati ossa impetrarunt flava.

§. MXXV.

In ictero bilis per omnem massam sanguinis sit diffusa, oportet (§. anteced. *numer.* 2.)

§. MXXVI.

Bilis in corporibus ictericorum fluidis secretis, iisque etiam, quæ in minimis vasis continentur, admixta esse debet (§§. 1025 & 1024. *numer.* 1. §. & 4.)

§. MXXVII.

In ictericis tunica albuginea oculorum flavescere debet (§. anteced.). Quocum observata congruunt.

§. MXXVIII.

Ictericis sapor amarus sit, oportet (§. 1026.) Atque hoc etiam congruum esse deprehenditur cum indicio sensuum.

§. MXXIX.

Hoc supposito ex Physiologicis, quod nempe bilis ciborum digestionem in intestinis promoveat, alvi excretionem juvet, necesse erit, ut in corporibus ictericorum oboriantur læsa digestio, cardialgia, alvi obstructio, quandoque diarrhœa, sed icteritia (312.), siquidem hic viæ consuetæ præcluduntur, per quas bilis ad canalem intestinorum duci solet (§. 346.). Singula hæc cum observationibus probe conveniunt.

§. MXXX.

Fieri etiam poterit, ut in ictero oboriantur perniciosissimæ inflammationes, vel chronicæ viscerum læsiones (§. 1025. 1026. & 1029.); in idem quoque consentientibus observationibus.

§. MXXXI.

Neque igitur febris in ictero deficiet, diversa & gradu, & specie (§§. 1029. & 1030.); idem etiam probantibus observationibus.

§. MXXXII.

Quoniam experientia teste icterum flavum successu temporis niger excipere solet; eodemque suborto, morbi symptomata hætenus proposita majorem simul gradum nancisci deprehenduntur: patebit jam, quid de ictero nigro judicandum sit.

§. MXXXIII.

Signa pathognomica sufficientia icteri flavi esse possunt color flavus in tunica albuginea oculorum

nigri vero præsentiam ex colore ejusdem tunicæ oculorum magis jam ad nigredinem vergente, nec non ex insigni symptomatum morbi augmento colligere licebit (345. 1029 - 1032.)

§. MXXXIV.

Icteri signa prognostica sufficientia invenire poteris, attentus ad morbi magnitudinem illiusque causarum conditiones. Sequentes inde jam provenient propositiones, præ reliquis hic annotandæ.

I. Icterus, qui pro sui causa magis agnoscit graves ad loca hepatis obstructions, illum magnitudine superabit, qui aliis causis originem suam debet.

II. Si in corporibus ictericorum excretiones naturales mox insequi deprehendantur symptomatum morbi decrementa, una cum imminutionibus coloris ictiritii, ratione habitus externi corporis; bonam tunc prædictionem formare licebit.

III. Conveniet hic etiam ad motus febriles animum dirigere suum; maxime in casibus icteri, qui ab obstructionibus in hepate proficiscitur. Quandoque enim contingit, ut hæc causa morbi a febre ex voto subigatur.

IV. Quando vero febris de die in diem magis urgere, icteri symptomata plus increfcere, tandemque coloris flavi commutationes in nigrum potius fieri videntur: tunc tere conclamatum erit; inducta necessitate moriendi vel ex inflammatione, vel ex tabe (§§. 1030. & 1032.)

CAPUT LXXV.

DE

HYDROPE IN GENERE.

§. MXXXV.

QUod ad illud genus hominum attinet, cui generatim hydrops, sive tumoris (§. 39.) ea species oboriri solet, quæ fluido lymphatico-seroso ad certa corporis loca nimis coacervato originem suam ibidem debet: notari jam merentur conditiones illæ, sub quibus hunc morbum corporibus humanis accidisse, ex observationibus multoties constitit. Quorum momenta sequentia pertinebunt.

I. Caussarum illarum ad corpus frequentes admissiones, unde validæ compressiones, aut constrictiones in vasis efficiuntur.

II. Ubi obstructiones in visceribus invaluerunt; imprimis subortæ in casibus febrium intermittentium.

III. Ubi vasa admodum debilia adsunt; prouti exempli gratia in corporibus spongiosi habitus, aut iis, quæ continuo patent aëri humido.

IV. Ubi hæmorrhagias excedentes adfuisse constitit, aut subito suppressas. Præcipue hic in considerationem veniunt illarum hæmorrhagiarum suppressiones, unde visceribus abdominis

facile induci observantur læsiones ; exemplo infarctus aut scirrhi in hepate, vel liene producti ab hæmorrhoidum vel mensium suppressionibus.

V. Ubi porro notabilem quemdam defectum ratione excretionum serosarum deprehendere licuit. Cujus nominis exempli loco sunt urinæ & sudoris diuturnæ interceptiones ; vel etiam exanthematum, præsertim scabiei, repressiones.

VI. Ubi tandem serosa colluvies sanguinis, five nimia feri in sanguine copia obtinuit ; vel etiam massa humorum visciditatem contraxit, eamque potius productam ex abusu spirituosorum.

§. MXXXVI.

Quæ in §.anteced. describuntur subjectorum conditiones, illæ sufficient ad producendas causas proximas hydropis in genere ; pro illarum scilicet ratione diversa ad partes, quibus hydrops inducitur [§§. 39. 248 & 250.]

§. MXXXVII.

Ex observationibus sequentia porro annotanda erunt de affectibus hydropicis generatim.

I. Omnis pars, cui tumor hydropicus inest, pallida & frigida esse deprehenditur.

II. Ejusmodi tumor, qui initio exigui ambitus erat, se tandem ulterius extendit ; ita, ut hydrops, in una parte corporis subnatus, hydropem in alia quoque parte producere videatur.

III. Hydropicis oboriri solent appetitus prostratio, post pastum cardialgia & angustia præcordiorum.

IV. Idem etiam ægrotantium genus difficulter sudat; urinas paucas, easque initio tenues, instar aquæ limpidæ, deinceps vero, auctis nempe motibus febrilibus, densas parumque pellicudas excernit.

V. Proficere solent corporibus hydropicis excretiones naturales, præsertim illæ, quarum ope serum ad notabilem quantitatem evacuari potest, quorsum exempli loco pertinebit diaphoresis, aut diuresis,

VI. Quandoque etiam contingit, ut, productis continui solutionibus in partibus externis, ab hydrope affectis, serum inde effluat in commodum ægrotantium; nisi jam adfuerit valde putrida constitutio humorum.

VII. Alias succedente tempore in tabem corporis transeunt hydropes, vel ob inflammationes iisdem supervenientes adhuc citius enecare solent ægrotantes.

§. MXXXVIII.

Non a sanguine cum impetu ad quædam loca corporis affluente, sed a fluidi lymphatico-serosi ibidem facta coacervatione tumores hydropici producantur. Hinc etiam necesse erit, ut omnis pars hydropica pallida & frigida appareat (§. anteced. numer. I.)

§. MXXXIX.

Suborto tumore hydropico in parte aliqua hujus diffensio perficitur a fluido lymphatico-seroso, quod ibidem coacervatum hæret. Sed hoc fieri non poterit sine compressione vasorum in locis corporis, quæ vicina sunt affectis. Unde jam transibit tumor hydropicus ex una parte ad aliam; idque eo magis, si nempe vasorum compressioni mox accesserint aliæ ejusdem tumoris causæ, ut sunt vasorum debilitas, disrutiones, obstructions (§. 248.) Ex quibus igitur satis constare poterit de ratione, quare nimirum tumores hydropici incrementant, & quasi extendant limites suos (§. 1037. *numer. II.*)?

§. MXL.

Ob nimias fluidi lymphatico-serosi collectiones, quæ in certis locis corporum hydropicorum evenire solent, fieri omnino poterit, ut, hic jam in genere præsentibus causis debilitatis, ventriculus & intestina reddantur quoque debilia, atque ad ipsum succum gastricum accedat segnities. Hinc jam patebit ratio phænomenorum descriptorum ad §. 1037. *numer. 3.*

§. MXLI.

Ut feri e corpore excretiones rite succedant, requiritur inter alia, ne materia evacuanda deficiat in iis locis corporis, per quæ transire debet, neque ipsa organa excretoria comprimantur, aut ad sui orificia constringantur, aut a materia stagnante red-
dantur

dantur impermeabilia; id præcipiente Physiologia. Sed hujus jam conditionis causæ inesse poterunt corporibus hydropicis, a quibus generatim feri e corpore evacuationes, præsertim vero sudoris & urinæ excretiones impediuntur (§§. 248. 250 & 1035.) Exin ideoque cognoscere licebit rationem, quare nimirum in hydropicis sudor difficulter proveniat, urina parce excernatur, eaque initio admodum diluta, saturatior vero sub augmento febris, qua humor lentus & stagnans magis moveri potest (§. 1037. *num.* 4.)?

§. MXLII.

Ex Physiologicis constat, serum esse, quod per sudoris vel urinæ excretionem e corpore secedit; idque ad quantitatem satis notabilem in statu sanitatis. Non poterit igitur fieri, quin etiam feri quantitas in iis locis corporis, ubi illud coacer vatum efformat tumorem, imminuatur, ibidemque productus tumor decreseat; quam primum in hydropicis proveniant liberaliores feri excretiones. Quare etiam perspicua erit ratio phænomeni annotati ad §. 1037. *numer.* 5.

§. MXLIII.

Quia generatim per feri evacuationes e corpore tumor hydropicus imminui potest (§. anteced.): neque ideo mirum erit, quod hydropicis inde levamentum quoddam accedat, quando illis ad loca affecta solutiones continui instar fonticulorum, serum plorantium, oboriuntur (§. 1037. *num.* 6.) Præter causam vero nimix extensionis fibrarum

a qua in locis externis, ab hydropo affectis, ejusmodi solutiones continui proficiuntur, eadem quoque a putrefactione feri ibidem præsentis effici poterunt. Atque hoc si contigerit; tunc necesse erit, ut parum commodi inde ad ægrotantes redeat; siquidem ob liberum aëris externi ad partes solutas accessum feri jam putridi major adhuc fiet corruptio, corporibus hydropicis pessimos inductura effectus. Unde jam liquida erit ratio, cur hydropicis magis nocere deprehendantur ejusmodi excretiones feri e partibus externis, quæ ab illius putrefactione producuntur (§. 1037. *numer.* 6.)?

§. MXLIV.

Præter frequentissimas viscerum læsiones, quæ in affectibus hydropicis, obtinent, ibidem semper aderunt vasorum lymphaticorum in locis quibusdam corporis distensiones, compressiones, constrictiones, obstructiones, immo etiam ipsius fluidi lymphatico-serosi extravasationes, corruptiones, atque inde compluribus partibus solidis illatæ destructiones (§§. 248. 250 & 1035.) Exinde satis jam conspicua erit ratio tristis illius eventus, quem hydropes nancisci solent (§. 1037. *numer.* 7.)

§. MXLV.

Si adhuc alia in affectibus hydropicis symptomata deprehendere licet, præter ea, quæ hætenus exposita sunt; illa magis dependebunt a qualitate partium, quibus hydrops inhæret, ad hujus itaque species magis referenda. Notatu etiam di-

gnum est, hydropicos circa vesp̄eram se pejus habere, quam alio tempore.

§. MXLVI.

Signa pathognomica sufficientia hydropis in genere ex definitione & causis morbi (§§. 39. 1035 & 1036.) intelligi poterunt; vel etiam, si ille magis occupaverit partes externas, ex deprehensa tumoris indole, quæ indicatur ad §. 1037. *num.* 1.

§. MXLVII.

Cognitio vero signorum prognosticorum in affectibus hydropicis generatim petenda erit a morbi magnitudine, causarum conditionibus, nec non a partium, quæ a morbo affliguntur, indole & natura. Hic igitur valebunt propositiones sequentes.

I. Quo magis putrescere deprehenditur fluidum lymphatico-serosum in corporibus hydropicis; eo major morbus erit.

II. Quo plurium vasorum solutiones in corporibus hydropicis fiunt; eo majoris gradus morbus erit.

III. Si etiam hydrops, aut ejus causæ in visceribus locum suum magis habuerint; tunc necesse erit, ut in ejusmodi casibus morbus magnitudine præ reliquis emineat; imprimis hic simul concurrentibus respirandi difficultatibus, aut aliis functionum vitalium læsionibus.

IV. Si hisce fundamentis præsagiendi ea adhuc accedant momenta, quæ jam in §§. 1041-1044. exposita prostant; tunc satis constare poterit de prognosi in affectibus hydropicis.

CAPUT LXXVI.

DE

LEUCOPHLEGMATIA ET ANASARCA.

§. MXLVIII.

Tumor universæ cutis mollior esse & tactui
facilius cedere debet in leucophlegmatia,
quam in anasarca (§. 247.)

§. MXLIX.

In leucophlegmatia & anasarca simul adesse de-
bent hydrocephalus externus, hydrocele & œde-
mata (§§. 247 & 249.)

§. ML.

Præter somnolentiam, perexiguas quoque com-
motiones febriles observare licet in iis, quibus leu-
cophlegmatia vel anasarca oboritur sine prægressis
ascite & tympanite, vel aliis hydropibus internis.
Dum e contrario satis notabiles esse deprehenduntur
motus febriles in leucophlegmatia vel anasarca
quæ ascitem & tympanitem, vel alios hydrope
internos insequitur.

§. MLI.

Ægrotantes adeoque ex leucophlegmatia vel ana-
sarca urinam modo tenuem, modo crassam ex-
cernent; pro ratione nimirum motuum febrilium
ibidem obortorum (§§. 1041 & anteced.) Quo-
cum etiam observationes consentiunt.

§. MLII.

Ascites & tympanites, vel alii hydropes interni, viscerum læsiones supponunt; quemadmodum id ex sequentibus mox constabit. Si jam exinde corpori inducitur leucophlegmatia vel anasarca; morbus tunc erit illo major, qui sine conditione modo indicata suboritur (§. 1047. *numer.* 3.) Quod etiam observationes probant, quarum beneficio constitit, leucophlegmatiam vel anasarcam, ortam sine ascite & tympanite, aut aliis hydropibus internis sibi præviis sponte sæpius cedere, facilisque sanationis esse; refractarium vero morbum esse in casu opposito.

§. MLIII.

Ad signa pathognomica sufficientia leucophlegmatiae & anasarcae quod attinet; tunc priorem morbum dignoscere licebit ex tumore molli, pallido & frigido universae cutis; posteriorem vero ex tumore ad tactum magis resistente, pallido & frigido, ad totum quoque habitum corporis externum oborto (§§. 1037. *numer.* 1. & 1048.)

§. MLIV.

Ad prognosin vero in leucophlegmatia & anasarca sufficient prolata in §§. 1047 & 1052.

CAPUT LXXVII.

DE

ASCITE ET TYMPANITE.

§. MLV.

PER paracentesin institutam in ægrotantibus ex ascite vel tympanite (§. 249.), vel etiam per sectiones, in defunctis hoc morbo susceptas, sequentia innotuerunt.

I. Aqua continebatur modo in duplicatura peritonæi, modo in cavo abdominis peritonæum inter & viscera.

II. Glandulæ mesenterii, pancreas, hepar, lien, partim infarcta a fluido lymphatico seroso, partim etiam scirrhopa facta esse observabantur.

§. MLVI.

Infarctus, scirrhi viscerum abdominalium magis idonei sunt ad ascitem & tympanitem, quam aliam hydropis speciem, producendam (§§. 248. 249 & 250.)

§. MLVII.

Intelligi inde poterit, quare nimirum fieri soleat, ut ascites vel tympanites corpori induci observetur, facto abusu adstringentium in febribus, præcipue intermittentibus; hæmorrhoidibus vel menses suppressis aut excedentibus; vel etiam visceri-

bus abdominalibus admodum debilitatis vel obstructis, quacumque id etiam ratione fiat.

§. MLVIII.

Ex ascite & tympanite facile oriri poterunt hydrocele & pedum oedemata (§§. 249. & 1039.) Quod etiam frequentissimæ observationes probant.

§. MLIX.

In asciticis & tympaniticis dyspnœa adesse debet, eaque sæpius intensioris gradus (§§. 249 & 294.) Atque hoc quoque congruum est cum experientia; siquidem eadem præceptrice innotuit, quod asciticis vel tympaniticis haud raro accidere soleat orthopnœa, sive tanta respirandi difficultas, ut in situ magis elevato & recto servare thoracem & cervicem cogantur miseri, ne suffocandi periculum subeant.

§. MLX.

Quare hic etiam majores angustiae præcordiorum, quam in ulla alia specie hydropis, proveniant, necesse erit (§. anteced. & 1040.); in idem consentiente experientia.

§. MLXI.

In asciticis & tympaniticis admodum insignes esse observantur commotiones febriles.

§. MLXII.

Urinæ igitur asciticorum & tympaniticorum, quæ excernuntur, magis saturatæ erunt (§§. an-

teced. & 1041.); idem etiam probante sensuum
judicio.

§. MLXIII.

Deprehensis ad abdomen turgidum illis indiciis,
unde tumores hydropici generatim cognoscuntur
(§. 1038.), una cum eorum gradu, in quo con-
stituti plus minusve tactui resistunt; constabit jam
de signis pathognomicis sufficientibus in ascite &
tympanite (§. 249.)

§. MLIV.

Ad prognosin vero in ascite & tympanite suf-
ficiet eorum recta applicatio, quæ exponuntur in
(§§. 1047. 1056 & 1059.)

C A P U T LXXVIII.

D E

O E D E M A T E.

§. MLXV.

OEdemata (§. 249.) subiectis evenire solent
naturæ sequentis.

I. Quibus remediorum refrigerantium, ad-
stringentium atque exsiccantium abusus circa
artuum vulnera aut ulcera oboritur.

II. Quæ ad membra aquas frigidas frequen-
ter admittunt.

III. Quibus atrocissimi spasmi in artubus erant perferendi.

IV. Quibus translationes materiæ febrilis ad artus fiunt.

V. Feminis gravidis, atque etiam illis quæ obnoxix sunt mensium perturbationibus, nec non viris, ex suppressione hæmorrhoidum laborantibus, pedum oedemata imprimis familiaria esse deprehenduntur; eademque phthificis sæpius oboriri, iustoque longius stantibus, præcipue in locis humidis, haud raro accidere observantur.

VI. Plura repeti poterunt ex §. 1035. hic quoque notanda.

§. MLXVI.

Ex recensitis in §. anteced. subjectorum determinationibus oedema potius, quam alia hydropis species, nasci poterit (§. 249.)

§. MLXVII.

Sensus ponderis incommodus in partibus, ab oedemate affectis, ulcerum pessimæ indolis productio perquam facilis ad morbi hujus symptomata, præter alia, quæ tumoribus hydropicis communia sunt (1037. *numer.* 6.), pertinebunt (§. 249.) Quod etiam cum sensuum iudicio convenit.

§. MLXVIII.

Oedematis signa pathognomica sufficientia ex illius definitione (§. 249.) cognosces, attentus scilicet ad ea loca corporis, quæ huic speciei hydro-

pis sedem præbent. In artubus itaque conspecto tumore hydropico, quem pallidum & frigidum esse (§. 1038.), & tactui, pro differentia gradus, parum aut nimis resistere oportebit: de oedematis existentia satis constabit.

§. MLXIX.

Oedematum prognosis eadem principia agnoscit, quæ in §. 1048. de hydropo in genere traduntur; iisdem ad casum præsentem convenienter applicatis (§. 249.)

CAPUT LXXIX.

DE

FLUORE ALBO BENIGNO.

§. MLXX.

DOcent observationes, fluorem album benignum (§. 327.) sexui sequiori accidere sub conditionibus sequentibus.

I. Puellæ viro maturæ, venerem supra modum appetentes, hunc morbum facile concipiunt.

II. Viduis quoque junioribus idem mali genus haud raro oboriri solet.

III. Feminis, quibus fluxus menstruus difficilis est, hujus loco fluor albus benignus plerumque evenire deprehenditur.

IV. Neque minus in feminis annosioribus, in quibus jam ob ætatis rationem sanguinis menstrui excretio cessat, fluor albus benignus frequenter provenit, maxime, circa periodos menstruas ipsis antea consuetas.

V. Non numquam etiam impuberes puellæ fluxum hunc patiuntur post phlegmatorrhagiam suppressam, aut scabiem, vel crustam lacteam inconsiderate repulsam.

VI. Feminis gravidis, aut illis, quæ frequentem abortum fecerunt, fluor albus benignus perquam familiaris est.

VII. Idem etiam morbus in feminis conspicuus fit, quæ Venere abutuntur, aërem humidum, calidum ad genitalia crebro admittunt.

VIII. Feminis porro in otio magis viventibus frequentius, quam vitæ mobili deditis, contingere solet fluor albus benignus.

IX. Si his conditionibus insuper accedere observantur in feminis spongiosus habitus corporis, colluvies sanguinis serosa, sudoris atque aliarum feri excretionum suppressiones; prodire tunc quoque solet fluor albus benignus, isque largior.

§. MLXXI.

A determinationibus subjectorum, quæ in §. anteced. describuntur, ortum floris albi benigni derivare licebit (§. 328.)

§. MLXXII.

Fluor albus benignus, generatim consideratus, ad morbos nimiae excretionis pertinebit (§. 327.) Hinc necesse erit, ut hic etiam incommoda quædam ad loca excretoriis vicina proveniant, quæ originem suam debent humorum congestioni, qua morbi auctæ excretionis stipati esse solent. Unde jam patebit ratio gravitatis pedum, de qua præ aliis incommodis feminæ, fluori albo benigno obnoxia, statim sub initio morbi plerumque conqueri deprehenduntur.

§. MLXXIII.

Fieri poterit, ut mucus, qui in fluore albo benigno nondum corruptus excernitur (§. 327.), intra rugas vaginæ uteri coacervatus hæreat, ibidemque ob liberas aëris externi accessiones mora temporis putrescere incipiat; maxime hic simul concurrentibus causis aliis, quæ idoneæ sunt ad massam humorum facile corrumpendam, atque sexui frequenter oboriri solent, ut exempli gratia malum hystericum, læsa viscera. Succedente igitur tempore fluor albus malignus ex benigno (§§. 327 & 328.), præter contagii externi admissiones, oriri poterit. Quod etiam accuratæ observationes quandoque edocuerunt.

§. MLXXIV.

Atque hoc floris albi benigni transitu facto in malignum (§. anteced.) ; necesse omnino erit, ut genitalia, tamquam partes perquam sensiles, adeo pru-

riant, ut feminis sæpius extorqueantur actiones, quibus hunc sensum incommodum lenire conantur; exemplo passuum accurtatorum, quibus tunc temporis incedere observantur.

§. MLXXV.

Auctis excretionibus in locis corporis inferioribus, constrictiones in superioribus oboriri solent. Unde feminarum, fluori albo benigno obtemperantium (§. 327.), pallor in facie, ibi vero magis conspicuus, ubi simul adfuerit feri in sanguine abundantia; hisce annuente sensuum iudicio.

§. MLXXVI.

In fluore albo majoris gradus, quamvis etiam ille benignus fuerit, uterus ejusque vagina a feri colluvie ibidem facta supra modum inundari poterunt (§. 327.) Ineptum jam inde fiet ad imprægnandam feminam semen virile utero injectum, si etiam optimæ notæ foret; neque illud uterus insuper debilis factus retinere valebit, cui erat sub coitu insinuatam. Ex quo cognoscere licebit rationem, cur feminæ plerumque steriles esse deprehendantur, quibus inveteratus est fluor albus benignus?

§. MLXXVII.

Signa pathognomica sufficientia floris albi benigni (§. 327.) ad sequentia potissimum momenta redire poterunt.

I. Ægra humiditatem genitalium insolitam in se deprehendat, necesse erit; sed sine pruritus incommodo, ibidem percepto (§§. 317 & 1074.)

II. Flocculi albicantis coloris, ut in urinis fiant conspicui, oportebit. Nam per lotii excretionem mucus, feminæ genitalibus adhærens, ex parte abstergitur, & candidum colorem exhibet, quando adhuc nullam corruptionem contraxit.

§. MLXXVIII.

Ad prognosin vero in fluore albo benigno recte concipiendam sequentia valebunt.

I. Ut in casibus obviis de morbi magnitudine satis constet; conveniet caussarum conditiones, quibus ille proficiscitur (§§. 1070 & 1071.), rite considerare.

II. Fluor albus benignus, qui initio per intervalla modo prodiit, mox vero continuus fieri observatur, accensendus erit morbis pertinacibus, qui per integros annos durant. Et tunc imprimis eminebunt morbi effectus, supra expositi.

III. Quia fluor albus benignus, tamquam singularis quædam species excretionis serosæ auctæ, considerari potest, & quidem ita, ut fluidum, quod hic excernitur, a corruptione adhuc liberum sit (§. 327.): sequitur, idem etiam hic futurum esse, quod ordinario fieri solet in corpore humano per sudoris universalis accessiones ad particulares feri excretionem auctas. Sed docent observationes, producto sudore universali, alias feri excretionem particulares imminui, quandoque etiam prorsus absorberi. Hinc febris, quæ per largos sudores solvitur, accessiones ad fluorem album benignum, illum imminuere, aut plane e medio tollere poterunt; in idem consentiente experientia.

CAPUT . LXXX.

DE

FLUORE ALBO MALIGNO.

§. MLXXIX.

HUic morbo (§. 327.) subijci observantur feminæ a fluore albo benigno diu vexatæ; vel quibus ulcus putridum in utero est; vel quæ cum mare coëunt, obnoxio gonorrhœæ malignæ, aut jam prorsus inquinato a lue venerea; vel quæ tandem ipsæ a lue venerea inficiuntur per contagium alio modo, præter coitum impurum, ad se admissum.

§. MLXXX.

Nullum est dubium, quin feminis sub illis conditionibus, quæ in §. anteced. exponuntur, fluor albus malignus ingenerari queat (§§. 327. & 328.)

§. MLXXXI.

Putridæ indolis mucus est, qui e genitalibus feminæ, fluore albo maligno inquinatæ, profluit; utpote quo momento se potissimum fluor albus malignus a benigno distinguit, qui præterea cum hoc in eo convenit, ut ambo eidem generi subint, referendi scilicet ad morbum auctæ excretionis serosæ (§§. 327 & 328.) Veritati itaque vel maxime respondebit, si fluoris albi maligni symptomata deducantur a putrida qualitate muci, qui

feminæ partibus genitalibus inest, atque ex iisdem prodit; non neglectis earundem partium relationibus aliis, exemplo nimix sensibilitatis, vel nexus.

§. MLXXXII.

In fluore igitur albo maligno aderunt stranguria, dysuria, atrosiones & inflammationes partium genitalium, una cum variis inde productis effectibus, qui ibidem ac in locis vicinis prodire solent (§. anteced.) Quocum etiam observationes consentiunt.

§. MLXXXIII.

Unde porro consequitur (§. 1081 & 1082.) fieri nimirum posse, ut ægrotantibus ex eodem morbo successu temporis oboriantur ulcera in partibus genitalibus, eaque pessimæ indolis, cancroidea dicta, nec non bubones, hæmorrhoides serpiginosæ, fistulæ ani, uteri & vesicæ, tandemque lues venerea. Quæ singula ab observationibus quoque confirmantur.

§. MLXXXIV.

Quæ in §§. 1082 & 1083. exponuntur symptomata; ea non destituuntur pluribus aliis; sicut id satis constare poterit ex evolutione eorum locorum Pathologiæ, quæ huc pertinent. Hinc floris albi maligni casus inter se different magnitudine.

§. MLXXXV.

Loco palloris illius cachectici, quem in facie feminarum, flori albo benigno obnoxiarum, deprehender

tendere licet [§. 1075.], color ibidem magis luridus, præsertim circa orbitas, prodire observatur, suborto fluore albo maligno.

§. MLXXXVI.

De floris albi maligni signis pathognomicis sufficientibus sequentem in modum constare poterit.

I. Urina, quæ ab ægrotantibus ex fluore albo maligno excernitur, mucum putridæ indolis [§§. 327 & 328.], hinc magis flavum, similemque materiæ ulcerum putridorum, in se continebit, foetoremque sparget.

II. Sub initio morbi, præter insolitam partium genitalium humiditatem, ægra ibidem percipiet pruritus sensum incommodum [§§. 327. 328. 1073. 1074 & 1081.]; morbo vero crescente, ardores atque alia incommoda, quæ indicantur in §§. 1083 & 1084.

§. MLXXXVII.

Signorum vero prognosticorum in fluore albo maligno rationes præcipue redibunt ad momenta, quæ nunc jam sequuntur.

I. Putridæ naturæ materia est, quæ partibus genitalibus feminæ, hoc morbo affectæ, inhæret [§§. 327 & 328.] Si igitur illa inde non removeatur tempestive; certo tunc provenient effectus, qui descripti in §§. 1082-1084. præstant.

II. Hæc materiæ putridæ a partibus genitalibus absterfio [*num.* anteced.] præsertim fieri poterit per urinæ excretionem.

III. Productis vero illis effectibus, qui a prævitæ materiæ fluoris albi maligni tandem oriri solent [§§. 1082-1084.]; tum ex illorum diversitate ratione speciei & gradus, morbi totius eventus præfagiendus erit. Præ reliquis hic animus dirigere conveniet ad inflammationem ejusque differentes solutiones [414.]

CAPUT LXXXI.

DE

GONORRHOEA BENIGNA.

§. MLXXXVIII.

Indolis sequentis esse deprehenduntur mares, quibus gonorrhœa benigna [§. 329.] accidere solet.

I. Qui nimirum spasmodis circa vesicam urinariam vexantur.

II. Qui Venere supra modum abutuntur.

III. Quibus pollutiones nocturnæ frequentiori oboriuntur.

IV. Qui abusum diureticorum & aphrodisiacorum admittunt.

§. MLXXXIX.

Ortui gonorrhœæ benignæ sufficere poterunt conditiones subjectorum, ad §. anteced. prolatae [§. 330.]

§. MXC.

In gonorrhœa benigna paulo majoris gradus lactura satis notabilis fieri potest fluidi, quod, intra corpus retentum, ad sanguinem deferri, atque in corporis nutritionem converti potuisset [§. 329.]; id præcipiente Physiologia. Unde jam corpus debile & macilentum reddatur, oportebit. Quod etiam consonum est cum observatis.

§. MXCI.

Inter alias conditiones, quibus mari necesse est ad coitum fecundum, ea quoque requiritur, ne ipsi oboriatur penuria feminis; id tradente Physiologia. Hinc etiam fieri poterit, ut a gonorrhœa benigna, imprimis inveterata, impotentia tandem virilis proveniat [§. 329.] Quocum similiter observationes consentiunt.

§. MXCII.

Materia gonorrhœæ benignæ per urethram transit, omnis putredinis expers est [§. 329.], neque tam tam facile, quam fieri potest in fluore albo benigno [§. 1073.], subibit; & quidem ideo, quoniam illa a parietibus urethræ per succedentes urinæ excretiones magis abstergitur, neque tantopere patet aëri externo. Ex quibus jam conficiendum erit;

gonorrhœæ benignæ in malignam [§. 330.] transitum spontaneum, si non prorsus impossibile, certo tamen difficilem fore. Quod etiam satis accuratis observationibus respondet.

§. MXCIII.

De signis pathognomicis sufficientibus gonorrhœæ benignæ sequentem in modum constare poterit.

I. Præter insolitam lubricitatem intra præputium & glandem penis, nullo cum sensu pruritus ibidem percepti conjunctam, in urina ægrotantis continebuntur flocculi candidi. Nam integra adhuc est materia atque ab omni putrefactione libera, quæ in gonorrhœa benigna prodit ex urethra [§. 329.], atque intra præputium & glandem penis colligitur.

II. Præsente vero gonorrhœa benigna paulo majoris gradus, materiam albicantis coloris ex urethra egredientem, atque ad hujus orificium exterius apparentem instar guttularum similium albumini ovorum videre licebit; accedente imprimis ad glandem penis compressionem [§. 329.]

§. MXCIV.

Prognosis in gonorrhœa benigna, ob sui convenientiam cum fluore albo benigno [§§. 327 & 329.], ad eadem quoque momenta redibit, quæ jam exstant in §. 1078.

CAPUT LXXXII.

DE

GONORRHOEA MALIGNA.

§. MXCV.

Gonorrhœæ malignæ [§. 329.] vix alii subi-
ciuntur, quam qui contagium venereum
aliunde in corpus receperunt [§§. 330 & 1092.]

§. MXCVI.

Qui feminis, fluore albo maligno, aut labe ve-
neræ infectis, utuntur; vel etiam alio modo, præ-
ter coitum impurum, ad se admittunt contagium
venereum, ita tamen, ut illud statim ad partes ge-
nitales pertingat; illi præ reliquis citius gonor-
rhœam malignam concipient. Sed quorum corpo-
ra contagium venereum aliter, quam modo dictum
est, in se recipiunt; in illis etiam neque prius go-
norrhœa maligna proveniet, quam post inflictam
aliis partibus a materia venerea calamitatem. Ne-
cesse enim est, ut materia maligna ibi prius effectus
suos edat, ubi ejus factæ sunt insinuationes. Qui-
buscum observationes probe consentiunt.

§. MXCVII.

Ex sectionibus cadaverum constitit, in gonor-
rhœa maligna adesse modo tumores, modo exul-
cerationes tam in prostaticis, quam etiam in glan-
dulis urethræ.

§. MXCVIII.

Observare porro licet, gonorrhoeam malignam præcedere pruritum & ardorem in præputio & glande penis.

§. MXCIX.

Contagium venereum per vasa inhalantia præputii & glandis penis defertur ad prostates & glandulas urethræ; suborto nempe casu gonorrhoeæ malignæ, ducentis originem suam a coitu impuro (§§. 1096 & 1098.)

§. MC.

Gonorrhoeæ malignæ & fluoris albi maligni notationibus (§§. 327 - 330.) inter se rite jam comparatis; non poterit non intelligi, quod ad cognitionem symptomatum gonorrhoeæ malignæ idem quoque principium valeat, quod locum habuit ad symptomata in fluore albo maligno evolvenda (§. 1081.)

§. MCI.

In gonorrhoea itaque maligna evenire poterunt stranguria, dysuria, phimosis, inflammationes totius penis & testiculorum, bubones, excrescentiæ in glande penis vel ejus præputio, nec non in urethra (ubi carunculæ venereæ dicuntur), ulcera in penis glande adeo pravæ indolis, ut cancroideæ appellantur, psoriasis, hæmorrhoides serpiginosæ, fistulæ ani & vesicæ, lues denique venerea (§. anteced.) Quibuscum observationes passim conveniunt,

§. MCII.

Proposita in §. anteced. symptomata gonorrhœæ malignæ, complura alia sibi connexa habent. Quare hic etiam simili ratione, prouti factum erat in §. 1084. colligere licebit; fieri nimirum posse, ut gonorrhœæ malignæ casus acerbitate inter se discrepent.

§. MCIII.

Signa pathognomica sufficientia in gonorrhœa maligna (§. 329.) sequentem in modum invenire licebit.

I. Non nisi putridæ indolis materia est, quæ in hoc morbo ex urethra excernitur (§§. 329 & 330.) Unde necesse erit, ut, præter insolitam lubricitatem, quæ intra præputium & glandem penis fit, ibidem oboriatur simul pruritus, ægro magis magisque molestus.

II. Sub morbi vero progressu, materia colore flavo, viridescente, illique simili prædita, quem plerumque ulcerum putridorum materia præ se ferre solet, fatis patebit visui; si imprimis glans penis comprimatur (§. 329.) Comparebunt tunc etiam in urina flocculi flavescents coloris, in illa foetorem excitantes; quia particulæ sunt materiæ putridæ, quæ adhærebant urethræ, unde per succedentem fluxum urinæ abluuntur (§. citat.) Quibus mox accedent morbi effectus alii fatis conspicui, quos exhibet §. 1101.

§. MCIV.

Quod denique ad prognosin in gonorrhœa maligna attinet ; necesse erit , ut illa conveniat cum prognosi fluoris albi (§. 1087.) ; siquidem uterque morbus sibi similis est. Quare hic etiam attendere oportebit ad materiæ putridæ e corpore exterminationem , ope excretionis urinæ potissimum perficiendam ; ad morbi effectus [§. 1101.], specie & gradu differentes , omnium maxime ad inflammationis efficaciam.

CAPUT LXXXIII.

DE

LUE VENEREA.

§. MCV.

Luis venereæ [§. 344.] tres gradus constitui solent. *Primus* nempe *gradus* æstimatur ex fluidi lymphatico-serosi corruptione universali , sed integris adhuc partibus solidis. *Secundus* vero *gradus* supponit solutionem , partibus solidis flexilibus inductam a corruptione totius massæ lymphatico-serosæ. *Tertius* denique *gradus* ex eo dijudicatur , quando jam massæ lymphatico-serosæ tanta corruptio inest , ut inde partes quoque inflexiles , sive ossa solvantur.

§. MCVI.

Historiarum documenta testantur, luem veneream genti Americanæ esse endemiam, nec prius in Europa innotuisse, quam circa illud tempus, ex quo nempe navigationes in Americam institutæ erant ab Hispanis; a quibus jam hoc mali genus in Neapolim prius transportatum, ac inde per universam Europam diffusum fuisse dicitur.

§. MCVII.

Lues venerea inter gentes Europæas generari poterat sine prævio contagio, in Europam aliunde delato (§. 1073. 1083. 1095 & seqq.

§. MCVIII.

Probabile tamen est, corpora Europæorum ex eo tempore majorem impetrasse dispositionem ad luem veneream concipiendam, ex quo inter Europæ & Americæ incolas commercia obtinuerunt (§. 1106.)

§. MCIX.

Sanguis venereorum frigescens lentorem concipere, atque in grana subalbida glutinosa coire, non numquam etiam foetorem spirare observatur.

§. MCX.

Ex §. anteced. fatis clare elucescit veritas eorum, quæ sumuntur ad conficiendam luis venereæ definitionem (§. 344.)

§. MCXI.

Lues venerea vexas suas magis exercebit in glandulis æque, ac partibus aliis, quæ cum illis ratione

humoris lymphatico-ferosi, in se copiosius contenti, conveniunt (§. 344 & anteced.). Quod etiam iudicio sensuum respondere observatur.

§. MCXII.

Si lues venerea ex prægressione fluoris albi maligni, vel gonorrhœæ malignæ oritur, atque ad secundum gradum pertingere conatur: tum necesse erit, ut materia venerea tyrannidem suam in glandulis faucium & palati prius exerceat, quam reliquæ glandulæ & partes aliæ solidæ ab eadem afficiantur. Sin autem virus venereum glandulis faucium & palati prius insinuatur, inde vero ad massam humorum transit, eoque modo suborta lues venerea ad secundum gradum proxime accedere videtur: tunc gonorrhœa maligna in maribus, & fluor albus in feminis, una cum reliquis partium genitalium calamitatibus provenient, antequam complures aliæ partes solidæ corporis subjiciantur efficacîæ miasmatis venerei (§§. 344. 1110 & 1111.). Idem etiam accuratæ observationes probant.

§. MCXIII.

In lue venerea, eaque modo primi gradus, adesse jam poterunt tumores glandularum aliarumque illis similium partium, inflammationes, dolores arthritico-rheumatici, scabies, angina, raucitas, cephalalgia (§§. 344. 1105. 1109 - 1112.). Quod etiam observationes confirmant.

§. MCXIV.

Quibus symptomatibus (§. anteced.) porro accedent ulcera in compluribus locis corporis, eaque

foetida, lardo rancido ac infumato similia, tandemque caries ossium, immo etiam spina ventosa; perducta scilicet lue venerea ad secundum & tertium gradum (§§. 344. 1105 & 1113.). Quocum observationes consentiunt.

§. MCXV.

Indicata in §§. 1113 & 1114. symptomata luis venereæ hujus conditionis erunt, ut inde plures alii effectus in ægrotantibus prodeant, specie & magnitudine diversi; pro ratione scilicet differente locorum corporis præ reliquis afflictorum nec non putrefactionis ibidem subortæ, humorumque eam subeuntium. Hinc perspicuum erit, cur luis venereæ casus ratione individuorum inter se discrepent; & quænam potissimum loca pathologiæ hic conferri mereantur, ut differentia ista plenius intelligatur?

§. MCXVI.

Aegrotantes ex lue venerea, præsertim secundi & tertii gradus, pustulas in fronte habere, insimulque faciem pallidam, vel potius lurescentem præ se ferre deprehenduntur.

§. MCXVII.

Experientia porro docet, venereos noctu se longe pejus habere, quam ullo alio tempore.

§. MCXVIII.

De signis pathognomicis sufficientibus luis venereæ diversorum graduum constare poterit ex definitionibus (§§. 244 & 1105.); ex morbi sympto-

matibus (§§. 1111-1114.); tandemque ex deprehenso illo phænomeno, quod annotatum exstat in (§. 1116.)

§. MCXIX.

Ad prognosin vero luis venereæ inveniendam, necesse erit, ut rationem habeas gradus morbi (§. 1105.), ejus symptomatum, nec non locorum corporis, quæ præ reliquis in casu obvio afficiuntur (§§. 1113-1115). Præter hæc ad excretionem naturalem hic etiam respicere conveniet; utpote quarum ope inhærentes corpori materiæ putridæ ex eodem exterminari solent. Atque hoc si ita contingit, ut mox insequantur symptomatum morbi satis conspicua decrementsa; bonam inde formare licebit prædictionem. Sin autem secus, suborietur successu temporis tabes corporis, ægrum tandem enecatura; nisi forte perniciosæ inflammationis accessiones eventum morbi funestum magis accelerent.

C A P U T LXXXIV.

D E

S C A B I E.

§. MCXX.

SCabiem (§. 225.) concipere observantur subjecta indolis sequentis.

I. Quæ suppressiones hæmorrhagarum, aut aliarum excretionum naturalium patiuntur.

II. Quæ ratione victus cruda, acida, valde facilitata iusto liberalius ad se admittunt.

III. Quibus vita magis otiosa est.

IV. Quibus tandem vel commercium intercedit cum infectis a scabie; vel illis alio modo insinuatur eadem miasmatis species.

§. MCXXI.

Quæ describuntur in §. anteced. subjectorum conditiones, illæ idoneæ erunt, ad scabiem corpori inducendam (§§. 225 & 227.)

§. MCXXII.

Licet ad vesiculas aut pustulas scabiosas circulum aliquem rubentem observare, quo illæ quasi cinguntur.

§. MCXXIII.

Materia, quæ in vesiculis vel pustulis scabiosis continetur, acris esse deprehenditur, ita, ut eadem delata ad cutis loca adhuc integra atque a scabie immunia, ibi mox proveniant pruritus, rubedo, vesiculæ aut pustulæ.

§. MCXXIV.

Quo profundius in cutim penetrat inflammatio: eo citius ex scabie sicca fiet humida (§§. 226 & 1122.); in idem consentiente experientia.

§. MCXXV.

Omnis scabies, per se considerata, indolem morbi maligni præ se fert; sub differente tamen gra-

du malignitatis (§. 77 & 137. *prolegomen.* 227. 1120. *numer.* 4. & 1123.)

§. MCXXVI.

Quo majoris gradus putredo fluidi lymphatico-ferosi fuerit, eo magis eminebit malignitate scabies; qualis exempli causa venereorum, aut scorbuticorum esse solet (§. 137. *proleg.* & *anteced.*)

§. MCXXVII.

Quoniam materia scabiosa hujus efficaciam est, ut ab ejus contactu in iis locis cutaneis novae prodeant vesiculæ aut pustulæ scabiosæ, ubi nullas deprehendere licuit (§. 1123.); consequens ideoque erit, scabiem morbis refractariis accensendam esse. Id quod etiam probe convenit cum observatis.

§. MCXXVIII.

Ob massæ lymphatico-serosæ acrimoniam, quæ in ægrotantibus ex scabie obtinet (§§. 227 & 1123), necesse erit, ut similis etiam conditionis succus gastricus in iisdem secernatur. In hoc igitur ægrotorum genere fames supra modum excedet (306.), ad quam leniendam sæpius tantam ciborum copiam ventriculo ingerere coguntur, quanta ab illius actione subigi nequit. Exinde jam ortis cruditatibus in primis viis, majores ad massam humorum corruptiones accedent, statusque morbi deterior fiet. Quocum etiam observata consentiunt.

§. MCXXIX.

Scabiei materia arrosionis modo agere potest (§§. 227 & 1123.). Aucto igitur illius impetu ad loca

peripherica corporis, necesse erit, ut ibidem proveniant majora pruritus incommoda, tumores, inflammationes, ulcera. Quod pariter cum observationibus convenit.

§. MCXXX.

Ex observationibus abundanter constitit, ex subitaneis scabiei repulsionibus provenisse effectus in corpore, specie & gravitate inter se differentes. Huc scilicet pertinent spasmi, convulsiones, paralysis, tumores glandularum, hydropes, asthma, catarrhus suffocativus, inflammationes partium externarum ac internarum, viscerum obstructions, illorumque læsiones aliæ.

§. MCXXXI.

Necesse est, ut horum effectuum (§. anteced.) ratio dependeat a qualitate materiæ scabiosæ (§§. 227 & 1123.), quatenus delatæ ad differentia loca corporis, pro conditione ægrorum peculiari in casibus obviis.

§. MCXXXII.

Docent porro observationes, scabie infectos permultum commodi percipere ex congruo excretionum naturalium successu. Præsertim utiles hic esse deprehenduntur excretiones seri; atque inter has vel maxime proficere solent illæ, quæ per alvi vel urinæ evacuationem fiunt.

§. MCXXXIII.

Tandem id quoque ex observationibus annotandum erit, quod nimirum scabie contaminati majore

ra morbi incommoda noctu magis perferre soleant, quam diurno tempore.

§. MCXXXIV.

Scabiei signa pathognomica sufficientia ex illius definitione (§. 225.) satis constabunt; prognostica vero facile intelligentur, eorum rite facta applicatione ad casum, quæ exponuntur in §§. 1126-1132.

CAPUT LXXXV.

DE

IMPETIGINE ET LEPRO.

§. MCXXXV.

QUO plures validioresve causæ locum invenient in corpore scabioso, ad inflammationem in cute producendam, eo citius generari poterit impetigo (§. 229.)

§. NCXXXVI.

Ex §. itaque anteced. illos casus in specie intelligere licebit, ubi subortam fuisse impetiginem, frequenter commonstrarunt observationes. Hujus nominis sunt: repellentium, aut humores ad peripheriam corporis valdopere cientium admissiones; materiæ, quæ in vesiculis aut pustulis scabiosis continetur, acrimonia gradus eminentis; spissitudo tan-
dem

dem humorum, magnitudine gradus admodum conspicua.

§. MCXXXVII.

Si etiam ad partem externam, cui inerat ulcus compositum, largius admittantur repellentia; tunc quoque orietur impetigo [§§. 198 & 229.]; in dem consentientibus observatis.

§. DCXXXVIII.

Quoniam elephantiasis ab impetigine tam ampliore sui extensione, quam etiam malignitatis gradu longe eminentiore differt [§. 229.]; hinc necesse erit, ut in corporibus leprosis totius massæ humorum, præcipue lymphatico-ferosorum, corruptio ad insignem gradum obtineat, ut fieri solet exempli causa in lue venerea.

§. MCXXXIX.

Observationes testantur, veram elephantiasin pertinere ad morbos in permultis regionibus admodum raros, frequentiores vero inter Arabes; vim contagii habere; longæ durationis esse; atque incedere sequentibus symptomatibus. Præter foedissimam scabiem in totius corporis cute, tumor quoque adesse ibidem deprehenditur; isque initio mollis, deinde durus, atque ad ingens quoddam volumen increscens, notatus præterea striis aut maculis rubris, quæ se ulterius extendunt, & colorem sæpius induunt, ad nigredinem vergentem. Pruritus & doloris incommoda hic quidem continua sunt, sed differentis gradus. Exhalationes leproforum abo-

minabilem concitant foetorem; præsertim obortis jam gravibus quibusdam exulcerationibus in cute. Ulcera hæc ulterius serpunt; ossa a carie afficiuntur. Sequitur tandem morbi eventus lethalis, quem tabes aut graves quædam inflammationes miseris indicere solent.

§. MCXL.

Lepra spectari potest ut cancer totius cutis [§§. 212. 213. 229. 1138 & 1139.]

§. MCXLI.

Symptomata impetiginis derivanda erunt ab inflammatione cutis, & effectibus arrosionis ac exulcerationis ibidem factis per materiam acrem, contentam in vesiculis aut pustulis scabiosis [§. 229.]

§. MCXLII.

Simili etiam principio uti conveniet [§. anteced.] ad lepræ symptomata explicanda; si majoris malignitatis materiæ ac eorum ratio hic simul habeatur, quæ de affectionibus canceri [§§. 443 & seqq.] jam evicta supra prostant [§§. 229 & 1140.]

§. MCXLIII.

Signa pathognomica sufficientia impetiginis per sui definitionem [§. 229.] facile constabunt; lepræ vero cognosci poterunt partim ex definitione morbi [§. citat.], partim etiam ex illius facta descriptione ad §. 1129.

§. MCXLIV.

Prognosi tandem in utroque morbo inservient principia ad §. 1134. indicata. Quibus insuper adde eorum, quæ in §§. 1141 & 1142. exponuntur, congruam applicationem.

CAPUT LXXXVI.

DE

HERPETE ET ZONA.

§. MCXLV.

SI ad corpus, scabie sicca deturpatum, accedunt causæ, a quibus erysipelas produci potest; vel si ad erysipelas jam productum admittuntur debilitantia, aut inspissantia; vel si erysipelas oboritur subjectis cacochymicis; possibilis tum erit herpes [§. 230.]

§. MCXLVI.

Ex §. anteced. intelligi poterit ratio, quare nimirum scabie infecti serpiginem tunc facile concipiant, quando pruritus diuturna scalptione abstergere conantur, aut ira excandescunt, vel partem scabie affectam calori nimio exponunt? Porro, quare pinguedinum, aut spirituosorum liberaliores applicationes ad loca erysipelacea herpes ibidem insequi soleat? Cur tandem scabiosis, si etiam ex quacumque alia causâ erysipelas conceperint in

parte aliqua corporis, ibidem quoque herpes eveniat?

§. MCXLVII.

Zona [§. 230.] vero magis producitur, teste experientia, in illis subjectis, in quibus una vel altera conditionum sequentium obtinet.

I. Quæ scilicet emplastra vel epithemata acriora, debilitantia, inspissantia ad regionem hypogastricam & hypochondriacam sibi frequenter applicanda curarunt; aut scarificationes in dictis modo partibus consuetas neglexerunt.

II. Quæ passionibus hysteriis, hypochondriacis, multisque spasmodis ad ea loca corporis vexantur, quæ zonæ sedem constituunt, præsertim labe scorbutica insimul concurrente.

§. MCXLVIII.

Causarum, a quibus in genere scabies produci potest; accessione facta ad eas subjectorum conditiones, quæ in §. anteced. describuntur; zonæ ortum intelligere licebit [§. 230.]

§. MCXLIX.

Pro diverso malignitatis gradu materiæ, unus herpes altero malignior esse poterit [§. 1126.] Quod etiam satis probant observationes.

§. MCL.

Herpetis symptomata dependebunt ab inflammatione, arrosione, exulceratione, tamquam affectibus, qui in iis locis, quæ morbus occupavit, a materia acri producuntur [§. 230.]

§. MCLI.

Signa pathognomica sufficientia herpetis & zonæ ex definitionibus suis cognosci poterunt; prognostica vero ex morbi magnitudine & qualitate causarum, nec non iisdem principiis eruere conveniet, quæ generatim ad prognosin in scabie allegata sunt in §. 1134.

CAPUT LXXXVII.

DE

VARIS ET GUTTA ROSACEA.

§. MCLII.

Observatorum fide constat, varos & guttam rosaceam [§. 232.] in subjectis produci indolis sequentis.

I. Quæ ad faciem sudantem causas admittunt, unde sudor reprimitur.

II. Quæ faciem linteis immundis abstergere, aut cosmeticis abuti solent acrioribus, adstringentibus.

III. Quibus largæ profusiones lacrymarum sæpius oboriuntur.

IV. Quæ spirituosis abutuntur, aut causas alias externas admittunt, a quibus congestiones ad faciem determinantur; exemplo caloris ignis,

cui ante focum versantes nimium exponere solent faciem.

V. Quæ pertinaci coryza & morbis aliis chronicis laborant, a quibus congestiones ac sinus frontales fiunt; præcipue, si illi morbi originem suam magis debeant hæmorrhagiis suppressis.

VI. Feminis tandem magis familiaris esse deprehenditur morbus iste.

§. MCLIII.

In corporibus descriptæ indolis (§. anteced.) vari & gutta rosacea facile produci poterunt (§. 232.

§. MCLIV.

Cognosci inde poterit ratio (§. anteced.), quare coquis, fabris atque aliis opificibus, quos antea ignes versari oportet, feminis male menstruatis præcipue honoratioris ordinis, tandemque hominibus, pietatis & religionis exercitia anxie sectantibus, frequenter accidere observentur?

§. MCLV.

Sub conditione cacochymix, accedentis ad viciororum & guttæ rosacæ causas (§§. 1152 & 1153.), id mali genus & citius prodibit in corpore, & pertinacius erit, hoc modo productum (§§. 193 & 232. Quocum observationes probe consentiunt.

§. MCLVI.

Si etiam ad varos & guttam rosaceam causæ accefferint, a quibus ad loca affecta congestionum majora incrementa fieri possunt; necesse tum erit, ut gutta rosacea magis augeatur, & vari modo in furunculos, modo in abscessus pessimi moris degenerent (§§. 175. 176 & 232.) Quod etiam bene congruit cum observationibus.

§. MCLVII.

Obortis porro guttæ rosacæ & varorum repulsionibus subitaneis; insequi tunc solent, teste experientia, morbi oculorum vel aurium, dolores capitis, rheumatismi, immo etiam suffocationes.

§. MCLVIII.

Ad symptomata varorum & guttæ rosacæ quod attinet, illa a partium, quæ huic morbo sedem suppeditant, tumore, inflammatione ac exulceratione deducenda erunt (§. 232.)

§. MCLIX.

Signa pathognomica sufficientia varorum & guttæ rosacæ ex suis definitionibus (§. 232.) satis manifesta erunt; prognostica vero facile erui poterunt ex morbi magnitudine, causarum & effectuum conditionibus (§§. 1152 - 1158.)

CAPUT LXXXVIII.

DE

CRUSTA LACTEA.

§. MCLX.

CRusta lactea (§. 231.) ab iisdem conditionibus corporis provenire poterit, sub quibus generatim scabies oriri solet (§§. 1120 & 1121.); insuper concurrentibus ad caput congestionibus humorum (§. 175.)

§. MCLXI.

Ex §. anteced. cognoscere licebit rationem, cur nimirum hæc morbi species in infantibus tam frequenter observetur? Ætas enim infantilis congestionibus ad caput valdopere patet.

§. MCLXII.

Crusta lactea degenerare potest in ulcus satis putridum (§§. 231 & 1160.) Quod etiam cum observationibus convenit.

§. MCLXIII.

In crusta lactea continui adsunt effectus, a congestione humorum ad caput dependentes, morbumque ipsum magis augentes (§. anteced.) Quod etiam probant observationes.

§. MCLXIV.

Hinc jam facile erit ad intelligendum, cur adeo pertinax esse deprehendatur in infantibus crusta lactea (§. 1161 & 1163.)?

§. MCLXV.

Crustæ lacteæ subitaneas repulsiones, præter effectus in §. 1130. indicatos; in specie excepisse morbos visus & auditus, stupiditatem, scirrhos parotidum & glandularum colli, observationes commonstrarunt.

§. MCLXVI.

Signa pathognomica sufficientia crustæ lacteæ ex ejus definitione patent (§. 231.); prognostica vero inveniri poterunt ex iis, quæ de morbi magnitudine ejusque effectibus dicta modo sunt (§§. 1162-1165.); ulterius conferenda cum principiis allegatis in §. 1134.

CAPUT LXXXIX.

DE

GRAVEDINE CORYZA ET PHLEGMA-
TORRHAGIA.

§. MCLXVII.

HÆ species morborum (§. 281.) in subjectis pro-
dire observantur conditionis sequentis.

I. Quibus nempe sudores, aut aliæ excretiones feri subito supprimuntur.

II. Quorum corporibus sanguinis, præcipue serosi, abundantia inest, ibidemque congestiones humorum frequenter fiunt.

III. Quibus etiam causæ aliæ externæ oboriuntur, nares nimium stimulant.

IV. Feminis tandem atque infantibus iidem morbi serosi frequentius aliis accidere deprehenduntur.

§. MCLXVIII.

A conditionibus subjectorum, quæ in §. anteced. describuntur, gravedinis, coryzæ & phlegmatorrhagiæ originem deducere licebit (§. 282.)

§. MCLXIX.

Durantibus gravedine & coryza, durabunt congestiones humorum ad caput (§§. 175. 281 & 182.); in idem consentiente iudicio sensuum.

§. MCLXX.

Hic igitur simul adesse poterunt commotiones febriles, sternutationes, sensus obtusus capitis, cephalalgia, branchus, raucitas, obnubilationes visus, difficilis auditus, susurrus & tinnitus aurium, animi tandem & corporis torpor (§. anteced.). Quibuscum observata quoque conveniunt.

§. MCLXXI.

Docet porro experientia, coryzam & gravedinem quandoque præ se ferre indolem morbi maligni;

Sed tunc acerbiora quoque symptomata in conspectum prodire observantur.

§. MCLXXII.

Gravedinem & coryzam sæpius fuisse plane sublatas per phlegmorrhagiam, iisdem supervenientem, observationes commonstrarunt. Sed eadem quoque præceptrice, experientia puta, multoties innotuit, singulas istas morborum catarrhalium species salutariter solutas fuisse per sudorem, diarrhœam, nec non largam urinæ excretionem.

§. MCLXXIII.

Signa pathognomica sufficientia in gravedine colligere licebit ex sensu obtuso capitis, ægrotantibus magis circa frontem incommodo; quæ in coryza & phlegmorrhagia ex definitionibus suis facile constare poterunt (§. 281.).

§. MCLXXIV.

Fundamenta vero prognosis in iisdem morborum speciebus inveniendæ, tibi suppeditabunt prolata in §§. 1169 - 1172.

CAPUT XC.

DE

BRANCHO ET RAUCITATE.

§. MCLXXV.

BRanchus (§. 285.), teste experientia, illi generi hominum, qui congestionibus ad pectus, ortis a causis debilitantibus, exponantur, accidere solet.

§. MCLXXVI.

Allegata in §. anteced. indoles subjectorum productioni causæ proximæ branchi respondet (§. 286.).

§. MCLXXVII.

Fieri adeoque poterit, ut post catarrhos suffocativos sæpe redeunt, immo post tusses diuturnas branchus tandem suboriantur (§. anteced.); in idem consentiente experientia.

§. MCLXXVIII.

Qui igitur pertinacibus coryzis, asthmatibus, phthisi pulmonali, tophis pulmonum, atque aliis morbis, a quibus tusses provenire solent, subjiciuntur, illis quoque branchus accidere poterit (§. anteced.). Quibuscum etiam conveniunt observata.

§. MCLXXIX.

Ex observatione satis constat, broncho affectos vocem obtusam habere, difficulter respirare, atque inter respirandum motum muci, similem aquæ ebullienti, in larynge experiri.

§. MCLXXX.

A broncho successu temporis produci poterunt tussis atque affectus anginoidei (§. 286.); idem etiam confirmante experientia.

§. MCLXXXI.

Raucitas [§. 287.] vero evenire observatur sub conditionibus sequentibus.

I. Quando nimirum tussis vehementia adest, vel status cacochymicus in corpore obtinet, unde præ reliquis partibus fauces afficiuntur.

II. Quando etiam variæ causæ externæ ad corpus admittuntur, constrictionibus in trachea producendis idoneæ.

III. Feminis tandem, ex obstructione mensium ægrotantibus, quandoque accidere observatur idem incommodi genus.

§. MCLXXXII.

Valent conditiones subjectorum, quæ in §. anteced. exponuntur, ad producendam raucitatem [§. 287.]

§. MCLXXXIII.

Præter vocem in raucitate magis suppressam, necesse erit, ut hic simul proveniant incommoda alia quæ per spasmodum differentis gradus in larynge subortum fieri possunt [§. 287.]

§. MCLXXXIV.

Signa pathognomica sufficientia branchi & raucitatis cognoscere licebit ex [§§. 1179 & 1183.]

§. MCLXXXV.

Quod vero ad signa prognostica in iisdem affectibus attinet: juvabit hic quoque ea notare, quæ de solutionibus gravedinis, coryzæ & phlegmatorrhagiæ in §. 1173. prolata sunt; sed conferenda cum causarum conditionibus & effectibus in casu obviis (§§. 1175-1183.)

CAPUT XCI.

DE

SCORBUTO.

§. MCLXXXVI.

TEstantur observationes, scorbutum (§. 343.) pertinere ad morbos perquam familiares gentibus septentrionalibus, atque inhabitantibus loca maritima, paludosa; vitam magis sedentariam degenti-

bus præ reliquis accidere ; atque iis corporibus facile ingenerari, quæ plerumque aluntur carnis, fumo induratis, admodum salitis, piscibus ; in illis quoque sæpius prodire, quibus cum afflictionibus hypochondriacis aut hystericis, vel etiam alio morbo colluctandum est, qui sui originem debet obstructionibus viscerum abdominalium ; tandemque per contagium transire ex uno corpore ad aliud.

§. MCLXXXVII.

A conditionibus subjectorum, quæ describuntur in §. anteced. scorbuti ortum derivare licebit [§. 343.

§. MCLXXXVIII.

Docent porro observationes, sanguinem scorbuticorum sub morbi initiis grumosum & nigrum esse, insimulque copiosam aquam pravi odoris & saporis dimittere ; morbo tandem magis progrediente, apparere instar humoris cujusdam admodum tenuis, coccineo colore præditi, excitantis quoque odorem adversum, saporem vero acriorem.

§. MCLXXXIX.

Sanguis itaque in corporibus scorbuticis tarde putrescit [§. anteced.]

§. MCXC.

Neque minus ex observationibus constat, effectus scorbuti tam specie & gradu, quam etiam loco corporis, ubi nempe illi aut citius, aut serius prodeunt, differre. Imminente enim morbo, ægrotantes conqueri solent de lassitudine quadam spontanea, totum quidem corpus, præcipue tamen crura & pe-

des comprehendente. Huic simul accedunt incommoda quædam ad ventriculum & intestina, ut sunt ructus mali odoris & saporis, nausea, conatus vomendi, appetitus prostratus, quandoque supra modum auctus, affectus colici, qui mox mitiores, mox acerbiores sunt, per intervalla plane evanescent, iterum redeunt. Deinceps vero gingivarum caro laxa, tumida apparet, sanguinem foetidum dimittit, ipsaque sæpius ad dentium usque radices consumitur. Proveniunt porro ad femur & tibiam maculæ plus minusve livescentis coloris, initio parvæ, mox vero ad majorem ambitum perductæ. Morbo tandem magis incrementum, ejus quoque effectus latius patebunt; prioribus auctis, novis productis, eorumque omnium similiter facto transitu ad complura alia loca corporis.

§. MCXCI.

Lentæ putrefactioni sanguinis, quæ in malo scorbutico obtinet [§. 1189.], graduum differentia insuper accedit, quam illa servat ratione diversorum plexuum vasorum sanguineorum [§. anteced.]

§. MCXCII.

Ex §§. 1189 & 1191. satis clare intelligere licebit, quantum veritati respondeant ea, quæ in definitione scorbuti [§. 343.] continentur. Quæcumque igitur ex hac definitione de scorbutico colligi poterunt, ea similiter vera erunt, atque observationibus plane congrua.

§. MCXCIII.

§. MCXCIII.

A sanguine fecernuntur reliqua fluida in corpore humano ; id præcipiente Physiologia. Quoniam vero in corporibus scorbuticis massa sanguinea putridæ indolis est [§. 343] : hinc sequitur , ut similem quoque conditionem nanciscantur fluida secreta (§. anteced.)

§. MCXCIV.

Hinc tota massa humorum in corporibus scorbuticis putrida tandem fiet (§. anteced.)

§. MCXCV.

Humoribus in corpore humano putrescentibus crima accedere solet [§§. 190 & 192.] Quoniam etiam acris fiat humorum massa in corporibus scorbuticis , dubitari nequit [§. anteced.]

§. MCXCVI.

A putrido itaque & acri , quod massæ humorum in corporibus scorbuticis inest , effectus scorbutici , specie & gradu inter se differentes , derivare conveniet [§. anteced.]

§. MCXCVII.

Hinc cognosci poterit , cur in scorbuto , præter effectus jam enarratos ad §§. 1188 & 1190. plures etiam alii provenire observentur ? Quorsum nempe spectabunt afflictiones variæ hypochondriacæ ac hysteriæ ; viscerum infarctus & scirrhi ; tumores hydropici ; multiplices affectus spastici , convulsivi ; difficultates respirandi ; partium exter-

narum ac internarum dolores, iique mox vagi, mox fixi, excretiones admodum foetidæ; inflammationes perniciosissimæ; livescentis coloris ulcera foetidissima; sanguinis profluvia supra modum excedentia sæpius, non numquam etiam in locis insolitis corporis prodeuntia; scabiei aut purpuræ exanthemata; virium prostrationes; affectiones lipothymicæ; motus febriles, iique degenerantes modo in febrem intermittentem, modo inflammatoriam, modo malignam, modo lentam & hecticam [§. 1196.]

§. MCXCVIII.

Poteris ideoque scorbutum tibi concipere instar morbi maligni, qui de tempore in tempus magis increfcit, stipatus varietate effectuum in corpore, quod ab illo afficitur, ita provenientium, prouti nempe ægotantes inter se differant vel ratione morbi, quo putridum massæ humorum importatur, adeoque aut prius ortum in ventriculo & canali intestinali, indeque delatum ad sanguinem, aut per contagium aliunde receptum; vel etiam ratione ætatis, sexus, status præteritarum determinationum corporis, morborum aliorum jam præsentium in corpore, quibus scorbutus accedit, aut quarumcumque aliarum conditionum corporis, quæ ad differentias sic dictas individuales referri solent: adeo, ut, nisi humorum massa ope excretionum naturalium, congrue succedentium, a putrido mature liberetur, ægotantibus ex hoc morbo dirissimo perireundum tandem sit vel ob tabem corporis subortam, vel ob frequentes, quæ hic fieri solent, ac

cessiones variarum affectionum acutarum [§§. 1186-1197.]

§. MCXCIX.

Scorbuti signa pathognomica sufficientia tibi sup-
 peditare poterunt prolata in §§. 1188. 1190 &
 1197. Præsertim vero hic jam valere poterunt in-
 commoda illa, de quibus ægrotantes conqueri so-
 lent, ac si totum quidem corpus, præter omnem
 causam manifestam, adeo lassum foret, præ reliquis
 vero crura & pedes, ut ipsis deficere videatur poten-
 tia obambulandi; maculæ livescentes ad femur &
 tibiam imprimis conspicuæ; dentium & gingiva-
 rum pruritus, oris foetor, stomacace, sive sangui-
 nis putridi ex gingivis effluxus; sudores tandem
 putridi.

§. MCC.

Prognosis vero scorbuti innititur omnium illo-
 rum effectuum, quos in hoc morbo deprehendere
 cet, accuratæ considerationi, atque inde ratioci-
 niis recte efformatis. Qua in re tibi jam facere
 præferent ea, quæ in peculiaribus quibusdam §§.
 ejus Cap. de scorbuto evicta traduntur.

CAPUT XCII.

DE

HERNIIIS.

§. MCCI.

Uli hominum generi herniæ [§. 251.] accidere
 observantur, quorum corpora ad conditiones
 quædam redeunt.

I. Ubi nimirum validæ intestinorum distensiones, aut quicumque alii tumores abdominis obtinent; exempli gratia casus flatulentia, aut oborti in abdomine hydropis.

II. Quando etiam ad illa loca corporis, quæ concipiendis herniis idonea sunt, læsiones fiunt, productæ a variis causis externis, quandoque etiam internis.

III. Neque minus hic pertinebunt illi casus, ubi abdomen valdopere concussatur, aut partium, intra illius cavitatem contentarum, nimia compressiones fiunt a diaphragmate & musculis abdominalibus; exemplo equitationis, saltationis, tussis, clamoris, inflationis tubarum susceptæ.

§. MCCII.

Herniarum productiones a recensitis in §. anteced. subjectorum conditionibus derivare licebit (§§. 251 - 255.)

§. MCCIII.

Ex quacumque hernia vera fieri potest spuria & in vicem versam (§§. 251-255.) Quod etiam observationibus respondet.

§. MCCIV.

Præter exomphalum, nulla alia hernia ab omni to tam facile formari poterit (§. 252.)

§. MCCV.

Ex bubonoccele oriri facile poterit oscheoccele ; habita nimirum ratione ad sexum (§. 252.) Id quod sæpius evenisse observationes docuerunt.

§. MCCVI.

Symptomatum in herniis ortus a partium , hoc loco affectarum , & vasorum , illas ingredientium , extensionibus compressionibusque derivandus erit (§. 251.) Hinc fieri poterit , ut , præter alios effectus , hic proveniant intestinorum inflammationes , passio iliaca ; si imprimis hernia vera fuerit. Quocum etiam observationes consentiant.

§. MCCVII.

Herniarum tam in genere , quam in specie signa pathognomica sufficientia haud difficulter intelligi poterunt ex §§. 251 & 254.

§. MCCVIII.

Ad signa vero prognostica herniarum quod attinet , ne hæc quidem occulta tibi esse poterunt ; rite intellecta morbi magnitudine , pro casus differentia. Conveniet hic igitur ea perpendere , quæ prostant in §. 1206.

CAPUT XCIII.

DE

DOLORE GENERATIVUM.

§. MCCIX.

QUo propius continuum nervosum ad plenariam sui solutionem accedit, eo major esse debet dolor (§. 195.)

§. MCCX.

In omni dolore, teste experientia, menti obversatur idea ingrata. Deprehenduntur porro, si dolor ad gradum paulo majorem accesserit, motus febriles, convulsiones, inflammationes, eæque mox pronæ in gangrænam, affectus lipothymici.

§. MCCXI.

Ex mutatione illa, quæ continuo nervoso solvendo infertur, motus ad cerebrum propagetur, necesse est (§. anteced.)

§. MCCXII.

Hinc opus est, ut nervi adhuc inter se cohæreant (§. anteced.)

§. MCCXIII.

Si continuum nervosum partis cujusdam dolentis planæ fuerit solutum: tunc fieri non poterit, ut pars ista ulterius doleat; indeque menti obversetur

idea illa ingrata (§. 195 & 1210.). Quod etiam cum observationibus congruit.

§. MCCXIV.

Sæviante dolore, actio nervorum intensa esse debet; eandem simul insequentibus in aliis partibus corporis fibrarum viribus, supra modum initio auctis, deinceps vero imminutis [§. 1210.]

§. MCCXV.

Ex conditione caussarum doloris [§. 196.] perspicuum quoque esse poterit, quibusnam ille morbis necessario accedere debeat. Exempli loco hic pertinebunt luxationes, fracturæ, vulnera, ulcera, spasmī, plethora, humorum spissitudo eorundemque corruptiones variæ, tumorum varia genera.

§. MCCXVI.

Doloris signa pathognomica sufficientia ex effato ægri constabunt, aut eruenda erunt beneficio definitionis ex deprehensis doloris caussis, vel aliis mutationibus, in corpore ægrotante satis manifestis [§§. 195. 196. 1210. & 1215.]

§. MCCXVII.

Signa vero prognostica doloris inventurus animum dirigere debet ad morbi magnitudinem, nec non caussarum morbi & partium, quæ afficiuntur, condiciones (§. 196. 1209. 1210. 1213. 1214 & 1215.)

CAPUT XCIV.

DE

CEPHALALGIA.

§. MCCXVIII.

CEphalalgia (§. 358.) oriri potest ab humorum ad caput congestionibus (§. 404.)

§. MCCXIX.

Perspicua inde est ratio (§. anteced.), quare, teste experientia, comitem sibi habere soleant cephalalgiam morbi primarum viarum; spasmi partium inferiorum, nec non capiti vicinarum; malum hypochondriacum aut hystericum; hæmorrhagiæ atquæ aliæ excretiones naturales suppressæ; plethora; tandemque etiam causæ variæ externæ ad corpus admissæ, unde congestiones ad caput efficiuntur, quales exempli gratia esse possunt observationes in aëre fervente, refrigerationes pedum, pathemata animi, capitis contusiones aut vulnerationes.

§. MCCXX.

Quoniam dolor ibi magis augebitur, quo major sensibilitas locorum affectorum fuerit, vasorumque ad eadem decurrentium talis conditio, ut congestionum causæ (§§. 176 & 1219.) ibidem gradu & numero facile incrementum possint: tunc etiam necesse erit, ut dolor ad intensiorem gradum perveniat.

Consequens ideoque erit, fore, ut ex cephalalgia mitiore mox acerbior fiat; ad illius productionem imprimis concurrente humorum spissitudine vel acrimonia.

Solet etiam iste intensior gradus doloris in capite *cephalaea* dici.

§. MCCXXI.

Sexus sequior præ potiore magis cephalalgiae, & quidem ad intensiorem gradum, subjici observatur; præsertim sub concursu mali hysterici.

Qua occasione notandum erit illud vocabulum, quo uti solent ad summam cephalalgiae acerbitatem in feminis hystericis indicandam. Ea nempe vocatur *clavus hystericus*; quia vix alius acerbior illo esse judicatur dolor, quem efficeret clavus capiti infixus.

§. MCCXXII.

Rite intellectis iis, quæ jam supra in peculiari-
bus capitibus de congestionibus & dolore tradita
sunt, neque difficilis erit symptomatum in cepha-
lalgia cognitio (§§. 358 & 1218.). Hinc inter alia
provenire hic poterunt sensuum externorum ac in-
ternorum varia vitia, affectus soporosi & apoplec-
tici; nisi matura productione illarum mutationum
in corpore, quæ congestionibus ad loca capitis
imminuendis sufficere possunt, cephalalgia discutia-
tur.

§. MCCXXIII.

Cephalalgiae signa pathognomica sufficientia per ejus definitionem (§. 358.) & prolata in §. 1216. constabunt; prognostica vero cognosci poterunt ex §§. 1217 & 1222.

CAPUT XCV.

DE

ODONTALGIA.

§. MCCXXIV.

EX carie dentium, variisque causis aliis, quæ humorum congestiones ad loca dentium efficere valent, oriri potest odontalgia (§. 358.)

§. MCCXXV.

Unde jam ratio constabit (§. anteced.), quare odontalgia accidere soleat, ut observationes docent, cacochymicis, præsertim scorbuticis, feminis magis, quam viris, tandemque in sputa cruenta pronis, nec non obnoxiiis variis affectibus spasticis?

§. MCCXXVI.

Odontalgiae symptomata ad ea principia redibunt, quæ in illis capitibus jam prostant, ubi de congestionibus, carie ossium & dolore in genere actum erat (§. 1224.); horum omnium decenter facta applicatione ad casum præsentem. Atque eodem quo-

que modo intelligi poterit, cur dentium dolor per
putum cruentum sæpe leniatur? in idem consen-
tientibus observationibus.

§. MCCXXVII.

De signis vero pathognomicis & prognosticis
odontalgiae ex ejus definitione (§. 358.) & citatis
in §. anteced. principiis satis constare poterit.

C A P U T X C V I.

D E

L I P O T H Y M I A E T S Y N C O P E.

§. MCCXXVIII.

Quibus animi defectiones (§. 349.) oboriri so-
lent, in illis præcedere observantur lan-
guor artuum atque insolita virium infirmitas;
non numquam oscitationes & pandiculationes; an-
xietates præcordiorum; pulsus inæqualis, magis
magisque obscurus; vertigo, aurium tinnitus &
fusurrus, una cum subitanea coloris faciei in pal-
lidum mutatione.

§. MCCXXIX.

Congestiones itaque humorum ad cordis & capi-
tis loca antecedunt in affectibus lipothymicis vel
syncopiticis (§. anteced.)

§. MCCXXX.

Hinc fieri poterit, ut inde cordi, cerebro ac cerebello inferatur debilitas (§. anteced.).

§. MCCXXXI.

Huic igitur morbo obnoxiiis actiones cordis, cerebri ac cerebelli, artuum aliarumque partium, quæ imperio animæ subjacent, imminutæ esse debent (§§. 349 & 1230.)

§. MCCXXXII.

Unde etiam patebit ratio[§. anteced.], cur artuum languores, oscitationes, pandiculationes statim initio morbi necessariæ sint (§. 1228.)?

§. MCCXXXIII.

In lipothymia aderunt pulsus admodum debilis, tremor cordis, respiratio obscura; quæ singula multo majorem gradum in syncope nanciscuntur, adeo, ut hic omnia fere vestigia respirationis aut motus arteriarum & cordis abesse, atque extrema corporis, ut in demortuis, frigefacta esse videantur (§§. 349 & 1231.)

§. MCCXXXIV.

Causæ, quæ congestiones humorum cor & caput versus efficiunt, pro illarum æque, ac corporum, ubi ingruunt, conditionibus, modo lipothymiam, modo syncopen producere valebunt (§§. 349. 350. 1229 & 1230.)

§. MCCXXXV.

Intelligi inde jam poterit (§. anteced.), quare lipothymiam aut syncopen post se trahere observentur hæmorrhagiæ, vel etiam aliæ excretiones naturales modo excedentes, modo suppressæ; exanthematum ad loca interiora corporis regressiones; plethora; spissitudo sanguinis; gravia vulnera; contusiones partium sensilium; dolores atrocissimi; affectus spastici ac convulsivi; malum hypochondriacum & hystericum; pathemata animi; res variæ in sensus fortiter agentes, si imprimis nimia ægrotantium sensilitas fuerit; tandemque febres, præsertim malignæ?

§. MCCXXXVI.

Syncope est status morti similis (§§. 349 & 1233.)

§. MCCXXXVII.

Lipothymia & syncopes signa pathognomica sufficientia ex suis definitionibus (§. 349.) & prolati in §. 1233. cognoscuntur; prognostica vero patebunt ex morbi magnitudine & causarum conditionibus rite consideratis (1234 - 1236.)

CAPUT XCVII.

DE

AFFECTIBUS SOPOROSIS.

§. MCCXXXVIII.

Sectiones institutæ in mortuis ex affectibus soporosis [§. 351.] commonstrarunt, vasa intra meninges modo a sero, modo a sanguine spisso admodum distenta fuisse; vel ibidem etiam adfuisse tumores, scirrhus, abscessus; vel denique feri per cerebri substantiam diffusiones adfuisse.

§. MCCXXXIX.

Docuit porro experientia, canes denudato in illis cranio, factaque cerebri compressione, in soporem incidere. Quod etiam in homine evenire observationes testantur. Hominis enim cujusdam, qui casu magnam cranii partem perdiderat, quoties denudatum cerebrum leviter comprimebatur, toties sequebantur oculorum obscurationes; & continuata hac compressione, producebantur aurium tinnitus & susurrus, vertigo, sopor; illaque tandem sublata, cessabant hæc omnia phænomena.

§. MCCXL.

Præter hæc observantur affectus soporosos antecedere lassitudo corporis, vertigo, tremor capitis ejusque dolor gravativus, in occipite potissimum, visus obrubilis, aurium denique tinnitus & susurrus.

§. MCCXLI.

Posita cerebri compressione certi gradus , ponitur sopor [§. 1239.]

§. MCCXLII.

In affectibus soporosis non deficiunt humorum congestiones ad caput [§. 1238.]

§. MCCXLIII.

Hinc fieri poterit , ut a causis , humorum congestiones ad caput producentibus , affectus quoque soporosi proficiantur (§. 351. 1241 & 1242.)

§. MCCXLIV.

Unde jam de ratione constabit [§. anteced.] , quare nimirum affectus soporosi apoplexiam præcedere soléant? in febribus acutis , post deliria , capitis contusiones ac vulnera ; nec non hæmorrhagias suppressas proveniant ? plethoricis , ebrietati deditis , opiatorum abusum admittentibus , aëri humido ac calido corpus suum nimie exponentibus familiares sint?

§. MCCXLV.

Affectuum soporosorum signa pathognomica sufficientia , una cum prognosticis , ex illorum definitionibus , magnitudine ac causarum conditionibus facile intelligere licebit [§§. 351. 353. 1241-1244.]

CAPUT XCVIII.

DE

OPHTHALMIA ET LIPPITUDINE.

§. MCCXLVI.

HOc incommodi genus [§§. 354 & 356.], teste observatione, illis oboriri solet, quibus una atque altera conditionum sequentium inest.

I. Oculorum fatigationes per nimias lucubrationes, aut ad eisdem frigoris aut caloris nimii, vel aliarum causarum externarum, quæ ibidem irritationem, rosionem, læsionem, debilitatem, vasorum constrictionem producere valent, factæ admissiones.

II. Humor ad caput congestiones productæ a variis causis, quales exempli gratia esse possunt compressiones colli, exanthematum, imprimis crustæ lacteæ recessiones ad interiora, hæmorrhagiæ suppressæ.

III. Status corporis cacochymicus; ætas infantilis.

§. MCCXLVII.

A recensitis in § anteced. determinationibus subsectorum ophthalmiam & lippitudinem derivare licebit [§§. 354 & 356.]

§. MCCXLVIII.

§. MCCXLVIII.

Ex ophthalmia lippitudo, atque ex lippitudine ophthalmia oriri poterit (§§. 354 & 356.); in idem consentiente quoque experientia.

§. MCCXLIX.

Ab ophthalmia & lippitudine successu temporis fieri poterit transitus ad cæcitatem (§§. 354. 356 & 357.); idem similiter probantibus observationibus.

§. MCCL.

Quæ hic porro de ophthalmiæ & lippitudinis symptomatibus dici possent explicatius, ea redibunt ad illa momenta, quæ jam supra in peculiaribus quibusdam capitibus de inflammatione & congestionibus generatim exstant; sed recte habita ratione partium, quæ hic afficiuntur (§§. 354 & 356.)

§. MCCLI.

Ophthalmiæ & lippitudinis signa pathognomica sufficientia ex definitionibus suis (§§. 354 & 356.) patent; prognostica vero haud difficulter colligi poterunt ex eorum affectuum causis atque efficacia (§§. 1246-1250.)

CAPUT XCIX.

DE

CAECITATE.

§. MCCLII.

PRæter varietatem caussarum externarum, quibus vis quædam inest destruendi organon visus, cæcitatæ causæ aliæ ab humorum congestionibus ad oculos dependere poterunt (§. 357.); maxime sub concursu status cacochymici in corpore.

§. MCCLIII.

Constat inde ratio [§. anteced.], quare nimirum cæcitatem post se traxerint casus sequentes? Quorum exempli gratia pertinebunt spasmi imi ventris; partus difficilis; crebra & gravis hemicrania; pertinax grayedo & coryza; vertiginis atque apoplexiæ insultus; hæmorrhagiarum atque aliarum excretionum naturalium suppressiones; exanthematum ad interiora regressiones; scirrhi aut abscessus ad aures; orgasmi venerei supra modum excedentes; pathemata animi; ebrietas; ophthalmia & lippitudo.

§. MCCLIV.

Ex observationibus constitit, cæcitatem modo perennem fuisse, modo etiam per aliquod tempus durasse, denuo rediisse, morbique periodici speciem quandoque præ se tulisse.

§. MCCLV.

Pro differentia caussarum proximarum cæcitatæ (§. 357.), productarum a remotis (§§. 1252 & 1253.), necesse omnino erit, ut casus cæcitatæ modo constantis, modo temporariæ, modo etiam periodicæ suboriantur. (§. anteced.)

§. MCCLVI.

Ut cæcitatæ signa pathognomica sufficientia ex illius definitione patent: ita etiam prognostica facile inveniri poterunt ex consideratione caussarum, quæ in casu obvio obtinent (§§. 357. 1252. & 1253.)

CAPUT C.

DE

VERTIGINÆ.

§. MCCLVII.

Vertiginem (§. 355.) hæmorrhagias efferas insequi; illaque etiam in animalibus ex instituto concitata, eorumque cranio statim aperto, vasa cerebri sanguine turgida apparere, observationes docent.

§. MCCLVIII.

Quibus morbi aut causæ quæcumque aliæ accidunt, unde humorum congestiones ad vasa cerebri fiunt; aut eadem inæqualiter distenduntur: illis

quoque oboriri poterit vertigo (§§. 355 & anteced.)

§. MCCLIX.

Hinc jam intelligi poterit (§. anteced.), quare vertigo ad casus sequentes accedere deprehendatur? Tales sunt morbi primarum viarum; spasmi partium inferiorum; nimiae intestinorum distensiones; hypochondriorum, thoracis ac colli compressiones; hæmorrhagiarum suppressiones; plethora, humorumque validæ commotiones, aut eorum ad caput decubitus; febrium, apoplexiæ vel affectuum sopororum invasiones.

§. MCCLX.

Ex vertigine successu temporis apoplexia oriri potest (§§. 628 & 1258.); in idem consentiente experientia.

§. MCCLXI.

Signa pathognomica sufficientia vertiginis ex ejus definitione cognoscuntur (355.); prognostica vero facile colligere licebit ex morbi magnitudine causarumque in casu obvio præsentium indole (§§. 1258-1260.).

CAPUT CI.

DE

OTALGIA.

§. MCCLXII.

AB humorum congestionibus ad aurem produci potest otalgia (§. 358.)

§. MCCLXIII.

Unde perspicuum erit [§. antecéd.], quare, ut observationes commonstrant, otalgia insequi soleat hæmorrhagiarum vitia, affectus spasticos, tussis acerbitatem, morbos varios tubi cibarii, tumores pone aures, caloris nimii aut frigoris ad caput admissiones, febrium, præcipue acutarum, aggressiones?

§. MCCLXIV

Si quæ aliæ causæ externæ rodentes, aut alio modo solutionem continui in meatu auditorio producentes ad aurem admittuntur; otalgia similiter necessaria erit (§. 358.).

§. MCCLXV.

Hinc patet (§. antecéd.), quemadmodum observationes docuerunt, cur ab insectorum in aurem involatu, vel ceruminis ex aure exemptionibus improvidis otalgia producta sit?

§. MCCLXVI.

Fieri potest, ut ad otalgiam acerbissima quædam cephalalgia, immo etiam deliria accedant (§. 358.); in idem consentiente experientia.

§. MCCLXVII.

Otalgix signa pathognomica sufficientia æque ac prognostica ex illius definitione, magnitudine ac causarum indole perquam facile colligere licebit (358. 1262-1266.)

CAPUT CIL

DE

SUSURRU ET TINNITU AURIUM.

§. MCCLXVIII.

SI aër externus cum impetu ad tympanum allidit; aut cum vi quadam notabili in tubas Eustachii irruit; aut tubæ nunc modo dictæ comprimuntur; aut vala quædam in meatu auditorio valdopere distenduntur; tunc facile fieri poterit, ut modo susurrus, modo tinnitus in auribus producat (§. 359.)

§. MCCLXIX.

Necesse igitur erit, ut hoc incommodi genus proxime adstantibus ad tormenta bellica tonitruantia vel campanas sonantes accidat; vel etiam oboriatur obnoxiiis maxillæ inferioris spasmis, contusio-

nibus, luxationibus ; vel tandem in corporibus prodeat, quæ nimis humorum congestionibus ad caput, vel variis morbis, unde illæ producuntur, patent [§. anteced.] Quæ singula cum observationibus bene conveniunt.

§. MCCLXX.

Ad aurium susurrus & tinnitus signa pathognomica & prognostica invenienda sufficere poterit definitionis eorumque recta ad casum. obvium applicatio, quæ ad conditiones differentes causarum, unde istud incommodi genus originem suam duxit, respiciunt [§§. 359. 1268 & 1269.]

CAPUT CIII.

DE

SURDITATE.

§. MCCLXXI.

Fieri potest, ut succedente tempore oriatur ex otalgia, aurium susurru ac tinnitu surditas (§§. 358. 359. 360. 1268 & 1269.). Id quod etiam cum observationibus congruit.

§. MCCLXXII.

Docent porro observationes, surditatem illi hominum generi sæpius accidere, quibus aëris humidi ad corpus frequentes fiunt admissiones ; quibus apo-

stases febriles pone aures eveniunt; quibus crustæ lacteæ repressiones, aut ceruminis in aure prope tympanum indurationes oboriuntur; quibus tandem pertinacibus humorum congestionibus obtemperandum est.

§. MCCLXXIII.

Recensitis in §. anteced. conditionibus subjectorum attribuere licebit surditatis originem (§. 360.)

§. MCCLXXIV.

Surditatis signa pathognomica sufficientia, una cum prognosticis, ope definitionis ac eorum facile inveniri poterunt, quæ ex conditionibus causarum morbi in casu præsentè existentium sequuntur [§§. 360. 1271 - 1273.)

CAPUT CIV.

DE

OLFACTUS DEFECTU.

§. MCCLXXV.

Olfactus deficere solet in iis hominibus, quorum corporibus una atque altera conditionum sequentium inesse observatur.

I. Ubi nimirum coryzæ contumacia obtinet.

II. Ubi narium hæmorrhagiæ supra modum excedere, vel etiam difficulter succedere deprehenduntur.

III. Ubi cavitates narium exulcerantur.

IV. Ubi sternutatoriorum abusus fit.

V. Ubi in genere excretiones sanguineæ aut aliæ naturales in anomalam degenerant; imprimis concurrente corporis dispositione ad affectus paralyticos.

§. MCCLXXVI.

Enarratæ in §. anteced. conditiones subjectorum idoneæ sunt ad derivandum inde olfactus defectum [§. 361.]

§. MCCLXXVII.

Sicuti ex absentia perceptionis, quæ statim subsequi solet illorum corporum admotionem ad nares, quæ præ reliquis vi gaudēt olfactus sensum excitandi, tuto conicere licet, quod sensus iste organo olfactus deficiat: ita etiam de prognosis hoc loco formandæ fundamentis congruis tibi satis constare poterit, morbi magnitudine illiusque causarum conditionibus in casu obvio rite perpenſis [§. 361. 1275 & 1276.].

CAPUT CV.

DE

GUSTUS DEFECTU.

§. MCCLXXVIII.

HOminum conditiones corporis, sub quibus, teste experientia, gustus defectus oboriri videtur, ad momenta redeunt sequentia.

I. Vel adest catarrhi pertinacia.

II. Vel non deficient salivæ & muci in ore inspissationes, a variis causis productæ.

III. Vel etiam non desiderantur anginx affectus frequentes invasiones.

IV. Vel denique in lingua partibusque eidem proximis deprehenduntur exulcerationes, aut aliæ ibidem factæ læsiones, ut tumores duri, paralytica debilitas.

§. MCCLXXIX.

Enarratæ in §. anteced. subjectorum conditiones satis respondent defectui gustus [§. 362.]

§. MCCLXXX.

Ut gustum deficere exinde certo colligere poteris, quando in illius organo, licet eidem applicentur ea corpora, quæ vi saporem movendi inter complura alia sunt conspicua, nulla ejusmodi perceptio producitur: sic etiam de signis prognosticis ejus-

dem morbi certus fies, probe attentus ad ejus magnitudinem ac causas, unde idem in casu subnato provenit, naturam (§§. 362. 1278 & 1279.)

CAPUT CVL

DE

APHONIA.

§. MCCLXXXI.

A Phonix [§. 363.] subjecta deprehenduntur esse sequentis conditionis.

I. Quæ ab arthritide vâga vexari solent.

II. Quæ vehementer convelluntur.

III. Quibus crustæ lacteæ, aut quorumcumque aliorum exanthematum, nec non sudoris regressiones introrsum eveniunt.

IV. Quibus vermium colluvies in intestinis est.

V. Quibus apoplexiæ oboriuntur invasiones.

VI. Quibus lingua exulceratur, aut alio modo destruitur.

VII. Quibus lingua non satis mobilis est ob frenuli ad ejus apicem magis adhærentis nimiam densitatem; quemadmodum iste casus aphonix in infantibus frequenter obtinere solet.

§. MCCLXXXII.

Descriptæ in §. anteced. conditiones subjectorum satis accommodatæ sunt productioni aphonix [§. 363.]

§. MCCLXXXIII.

Aphonix signa pathognomica sufficientia ex illius definitione [§. 363.] satis clare patent; prognostica vero facile inveniri poterunt, affectus hujus magnitudine & causis, a quibus ille in casu suborto dependet, accurate consideratis [§§. 1281 & 1282.]

CAPUT CVII.

DE

MELANCHOLIA.

§. MCCLXXXIV.

Observationes testantur, in melancholiam [§. 367.] incidere homines indolis sequentis.

I. Quibus ex malo hypochondriaco aut hysterico, eoque magis inveterato, decumbendum est.

II. Quibus læsiones ad viscera abdominalia, imprimis scirrhi, oboriri solent.

III. Quibus hæmorrhagiarum salutarium suppressiones eveniunt.

IV. Quibus solemne est, animi pathematibus nimium indulgere.

V. Quibus admissa sunt facultatum animæ inferiorum exercitia supra modum excedentia.

VI. Quibus ex parentibus melancholicis nasci contigit.

VII. Quibus sanguis admodum spissus inest; aut iisdem quæcumquæ aliæ causæ oboriuntur, quæ vim habent ad encephali vasa sanguinem congerendi, ejusdemque stasin ibidem producendi.

§. MCCLXXXV.

Deprehenduntur porro in melancholicis sequentia phænomena prodire.

I. Extrema corporis frigent.

II. Habitus corporis externus palescit.

III. Adfunt palpitationes cordis insignes, anxietates præcordiorum, respiratio profunda & mirum in modum præclusa.

IV. Sequitur capitis dolor aut saltem sensus gravativus.

V. Atque tum paululum rubescere incipiunt genæ, itidemque in labiis major rubor comparet.

VI. Lacrymæ frequenter effunduntur; somnus adest inquietus.

VII. Aliis terrifica, aliis grata ac jucunda oboriuntur phantasmata: unde etiam tales actiones patrare conantur, quæ natis in mente repræsentationibus respondent.

VIII. Excretiones naturales vel prorsus suppressæ esse, vel admodum languescere deprehenduntur.

IX. Quod vero ad melancholicorum sanguinem attinet, ille niger apparet, atque ex vena incisa difficulter effluere sæpius observatur.

§. MCCLXXXVI.

Hic etiam annotanda erunt de melancholicis ea quæ per sectiones cadaverum innotuerunt. Atque illa jam ad sequentia momenta redibunt.

I. Vasa in cerebro distenta videbantur a sanguine aterrimo.

II. In aliis etiam feri sanguinei intra meninges satis notabiles extravasationes reperiiebantur.

III. Quædam insuper loca in cerebro tumida dura, sicca apparebant.

IV. Bilis perquam atrum colorem præ se ferre valdeque glutinosa esse deprehendebatur.

§. MCCLXXXVII.

In melancholicis fiunt humorum congestiones ad caput; adest sanguinis spissitudo satis eminens [§. 1285. num. 4. 5. 9. & §. 1286.]

§. MCCLXXXVIII.

Ex hoc principio [§. anteced.] non solum plura alia phænomena, quæ in historia melancholicorum describuntur [§. 1285.], explicari poterunt; sed inde etiam affectus melancholici causam proximam

mam [§. 368.], ejusque ortum ab illis conditionibus subjectorum, quæ in §. 1284. enarrantur, derivare licebit.

§. MCCLXXXIX.

Sequitur inde porro [§§. 1287. & 1288.]; fieri nimirum posse, ut productis iis mutationibus in corporibus melancholicorum, per quas humorum congestiones circa caput tempestive discutiantur, melancholia salutariter solvatur. Quorsum imprimis pertinebunt, teste experientia, exanthemata; diarrhoea; hæmorrhoidum aut mensium fluxus; motus febriles determinati gradus.

§. MCCXC.

Sed ex iisdem quoque rationibus (§§. 1287 & 1288.) intelligere licebit, unde scilicet fiat, ut melancholia in apoplexiam, epilepsiam, inflammationem meningum, nec non statum corporis hecticum transeat, soleatque ideo lethalem eventum nancisci? Quod multoties probarunt observationes.

§. MCCXCI.

Melancholiæ signa pathognomica sufficientia ex illius definitione satis erunt perspicua; prognostica vero facile colligi poterunt ex morbi magnitudine causarumque conditionibus [§§. 1284 - 1288.], nec non iis, quæ jam prostant in §§. 1289 & 1290.

CAPUT CVIII.

DE

MANIA.

§. MCCXCII.

EX observationibus constitit; maniam [§. 367.] eidem quoque hominum generi accidere, quod in §. 1284. describitur; conditionibus, quæ ibidem enarrantur, ita comparatis, ut iisdem in relatione ad ægrotantem in casu præsentē major quædam vis inesse videatur, ad sanguinem commovendum, eundemque cum impetu coacervandum circa encephalon.

§. MCCXCIII.

Prodire etiam observantur in hoc ipso hominum genere phænomena sequentia.

I. Oculi sanguine suffusi apparent.

II. Pallet facies; quæ vero magis rubet in delirio phrenitico.

III. Extrema ita calent sæpius, ut miseri ne acerbissimum frigus persentiant, nec ex ejus admissione ad corpus notabile quoddam damnum reportare videantur.

IV. Audaciam quoque in vultu præ se ferunt videntur; ob quam rem mira suscipiunt. Alii enim impudicas & lascivas, alii petulantes ac hilaris, alii denique truculentas actiones patrant.

V. Quando motus convulsivi, a quibus maniaci sæpius valdopere torquentur, remittunt, omnisque paroxysmus jam deferbuisset videtur: stupidi tunc esse apparent, atque de languore corporis conqueri solent.

§. MCCXCIV.

Cerebri quoque statum in maniacis illi similem fuisse, quem apud melancholicos invenire licuit (§. 1286.), sectiones cadaverum docuerunt.

§. MCCXCV.

Ob similitudinem subjectorum maniae ac melancholiae (§§. 1292 & 1294.) necesse erit, ut hic quoque transferantur ea, quæ prostant in §§. 1287-1290. Porro. Quam facilis etiam erit transitus melancholiae in maniam, & maniae in melancholiam! prouti nempe vel augeatur vel immutetur vis illarum causarum, a quibus dependent sanguinis commotiones ejusdemque coacervationes ad loca encephali. Quibuscum etiam observationes probe conveniunt.

§. MCCXCVI.

Maniae definitio (§. 367.) sufficiet ad illius signa pathognomica intelligenda; prognosticorum vero conventioni eadem principia, quæ in §. 1291. indicantur, satis erunt accommodata (§. anteced.)

CAPUT CIX.

DE

NOCTAMBULATIONE.

§. MCCXCVII.

Hunc singularem affectum (§. 376.) in iis prodidiisse, observationes multoties docuerunt quibus una atque altera illarum conditionum, quas in §§. 1284 & 1292. describuntur, inest, aut morbi primarum viarum oboriuntur; hic imprimis concurrente vermium colluvie in intestinis.

§. MCCXCVIII.

Noctambuli observantur quandoque ad loca quævis alta & periculosa eniti. Alii tantum consuetas actiones suas noctu repetunt, quas de die perpetrare solebant; deinde in lectum se conferunt, unde egressi erant, nihil ante actorum conscii, dolentes tamen de capitis temulentia fere continua. Admiratione tandem dignum esse videtur, quod noctambulationis affectus lunæ phasibus plerumque respondeat.

§. MCCXCIX.

Docuit porro experientia, noctambulationem vel in epilepsiam, vel in aliam melancholiæ speciem transiisse.

§. MCCC.

Ex parte hic quoque valebunt ea, quæ continentur in capitibus de melancholia & mania.

§. MCCCII.

Noctambulationis signa pathognomica sufficientia ex illius definitione (§. 376.) constant; prognostica vero cognosci poterunt, intellectis iis, quæ ad §§. 1291 & 1292. allegantur, una cum causarum conditionibus (§. 1297.)

CAPUT CX.

DE

NOSTALGIA.

§. MCCCIII.

EX observatis constat, nostalgiam (§. 377.) populis regiones montosas inhabitantibus esse præ reliquis familiarem; ut exempli gratia Helvetis, ex parte etiam Hungaris. Eidem porro affectui subjici deprehenduntur nautæ, mutato vitæ genere.

§. MCCCIII.

Sed in nostalgiam incidere quoque observatur illud hominum genus, quod valde sensibile est, quod domi erat molliter ac effeminate educatum; sub accessionibus variarum calamitatum, in regionibus peregrinis perferendarum.

§. MCCCIV.

Licet vero in istiusmodi ægris sequentia observare.

I. Adest animus inquietus, una cum tædiæ vitæ præsentis.

II. De patriæ moribus ejusque prærogativis quavis data occasione loquuntur.

III. Quo minor spes illis affulget salutandæ oras patrias; eo citius melancholia in maniam, aut delirium acutum transire deprehenditur.

IV. Appetitus prostermitur; male digeritur; noctes a somno vacuæ transiguntur; pulsus inæqualitas sæpe fit admodum conspicua; commotiones febriles sæpius urgent, degenerant tandem in febres acutas vel hæcticas.

§. MCCCV.

Nostalgia initia sua ducere videtur a boni, quod domi quondam perceptum erat, reminiscencia, eaque a perceptionibus ingratis excitata (§§. 1302 - 1304.)

§. MCCCVI.

Ea hic etiam locum habebunt suum, quæ proponuntur in capitibus de melancholia & mania.

§. MCCCVII.

Nostalgia signa pathognomica sufficientia ex illius definitione (§. 377.) apparent; ad prognostica vero cognoscenda juvabit descriptorum in

. 1304. effectuum morbi, illorumque principiorum decens consideratio, quæ proponuntur in §§. 1291 & 1296.

CAPUT CXI.

DE

HYDROPHOBIA.

§. MCCCVIII.

DOcent observationes, sequentia in hydrophobis (§. 374.) fieri.

I. Loca corporis, quibus infligitur morsus a cane, lupo, aut alio quodam animali rabido, statim incipiunt vehementer dolere.

II. Obortus ibidem dolor de die in diem non solum magis augetur, sed etiam per alia loca corporis vagatur.

III. Sub ipsis etiam mali initiis conqueri solent miseri de artuum lassitudine & gravitate.

IV. Tristes deinde fiunt, somnum habent turbulentum, solitudinem quærere videntur, convelluntur.

V. Oboriuntur iisdem anxietates præcordiorum, respiratio difficilis, horror ad conspectum liquidorum aut splendentium.

VI. Quod si vero tentaveris hydrophobos liquidis assuefacere, eaque illorum ori admove-
re,

tunc semper consequi solent incredibiles anxietates, tremores, convulsiones immanes, vomitus frequentes, quibus materia glutinosa, vel bilis porracea ejicitur.

VII. Febris, quæ jam initio morbi comparet, mirum in modum augetur, quando descripta ad numer. præced. phænomena deprehenduntur.

VIII. Tunc etiam conatus sese exserunt, quævis obvia morfu aggrediendi.

IX. Plerumque inter atrocissimas convulsiones perire solet hoc hominum genus miserum.

X. Notatu porro dignum est, quod morsus hydrophoborum, aliis inflictus, vim contagii sæpius habuerit.

XI. Quod etiam quandoque evenisse observatum erat ex contactis instrumentis, quibus animal rabidum occisum erat; vel ex vestibus, post annum ad corpus admotis, quas dilaceraverat caniculus rabidus.

XII. Sectiones cadaverum viscera inflammata, imprimis pulmones, visui offerebant.

§. MCCCIX.

Per morsum animalis rabidi materia quædam corpori humano insinuat, a qua non solum congestiones humorum caput versus producuntur, quæ sufficiunt delirio excitando (§§. 1287. 1288 & 1295.), sed etiam a qua tam facile inflammantur viscera [§. anteced.]

§. MCCCX.

Multum hic etiam valebunt ea, quæ in capibus de melancholia & mania prostant.

§. MCCCXI.

Hydrophobiæ signa pathognomica sufficientia ex illius definitione [§. 374.] intelliguntur; prognostica vero ab iisdem principiis, quæ in §. 1291 & 1296. indicantur, nec non ab illis fonticis effectibus, quos morbi historia enarrat [§. 1308.], derivanda erunt.

CAPUT CXII.

DE

TARANTISMUS.

§. MCCCXII.

EX observatis constat, quod in isto ægrorum genere [§. 373.], post tarantularum ictum, sequentia evenire soleant.

I. In parte affecta insignis quidam dolor, qui se amplius extendit, cum circulo mox flavo, mox nigricante deprehenditur.

II. Statim vires deficere videntur, tristitia concipitur, hominum consortia fugiuntur, solitaria loca quærantur.

III. Eorum quidam ululant, vestimenta dilacerant, cœno corpus suum committunt, aut

quæcumque alia indecora fuscipiunt; quidam vero immobiles jacent, instar demortuorum.

IV. Alios iste, alios alius color delectare solet; excepto tamen colore nigro, quem summo opere abhorrent a tarantulis puncti.

V. Instrumentis quoque musicis modo his, modo aliis delectantur, atque ad saltandum compelluntur; adeo, ut, corpore per motum satis exercitato, sudores fundant, seque melius habere incipiant.

VI. Instrumentorum vero sonos dissonantes summæ anxietates, immo etiam convulsiones insequi solent, tamque diu in hoc misero hominum genere durare videntur, donec instrumentis iterum excitentur soni harmonici.

VII. Non quovis tandem anni tempore, sed diebus tantum æstivis, præcipue canicularibus, ictus tarantularum hos noxios effectus edere observantur.

§. MCCCXIII.

Hujus quoque conditionis materia ab ictu tarantularum corpori humano importari videtur, quæ, productis humorum ad caput congestionibus, delirium producere valet [§§. 1287. 1288. 1295. & 1312.]

§. MCCCXIV.

Similiter hujus quoque loci erunt ea, quæ in capitibus de melancholia & mania exhibentur.

§. MCCCXV.

Tarantismi signa pathognomica sufficientia illius definitio (§. 373.) tibi suppeditabit; prognostica vero facile colligere poteris partim ex iisdem principiis, quæ in §§. 1291 & 1296. adducuntur, partim ex illorum effectuum recta consideratione, quos annotatos in se comprehendit historia morbi (§. 1312.).

CAPUT CXIII.

DE

CHOREA S. VITI.

§. MCCCXVI.

Dicunt hoc singulare incommodi genus (§. 372.) primum observatum fuisse in quibusdam Sueviæ incolis; eosdemque sub illius accessione dona obtulisse S. Vito, ac institutis ad ejus sacellum saltationibus solemnibus non solum liberatos fuisse a malo præsentē, sed etiam ab eodem in posterum tempus defensos. Notari porro meretur, quod præcipue deprehensus fuerit idem affectus in feminis hystericiis.

§. MCCCXVII.

Atque hic quoque locum inveniunt suum ea, quæ in capitibus de melancholia & mania continentur.

§. MCCCXVIII.

Signa pathognomica choreæ S. Viti ex ejus definitione (§. 372.) patent ; prognostica vero ad eadem principia redibunt, quæ jam citata prostant in §§. 1291 & 1296.

CAPUT CXIV.

DE

FURORE POETICO.

§. MCCCXIX.

EX observatis apparuit, furorem poëticum (§. 375.) in illo hominum genere prodiisse, quod exercitationibus poëticis diu noctuque inhæret, aut saltem tanta animi mollitie præditum est, ut a carminibus supra modum flectatur ; his insuper accedente una atque altera illarum conditionum, quæ proponuntur in §. 1284.

§. MCCCXX.

A descripta hominum indole (§. anteced.) haud incongrua ratione derivare licebit furorem poëticum (§. 375.).

§. MCCCXXI.

In raptu poëtico versantes spasmo cynico aut risu sardonio affecti, nec non oculis plerumque clausis ac ore spumante canere observantur.

§. MCCCXXII.

Juvabit hic quoque ea transferre, quæ exponuntur in capitibus de melancholia & mania.

§. MCCCXXIII.

Signa pathognomica furoris poëtici ex ejus definitione (§. 375.) & prolatis in §. 1221. facile cognoscuntur; prognosticis vero inveniendis eadem principia respondebunt, quæ exponuntur in §. 1291 & 1296.

CAPUT CXV.

DE

EROTOMANIA ET FURORE UTERINO!

§. MCCCXXIV.

SI causæ ad corpus admittuntur, siue illæ externæ fuerint, siue internæ, a quibus appetitus ad venerem in tanto gradu concitatur, ut vel ideo, vel aliunde simul producantur caput versus humorum congestiones, æque sufficientes perturbandis facultatibus animæ inferioribus: tunc etiam necessaria erit erotomania (§. 371.)

§. MCCCXXV.

Hinc etiam patet ratio [§. anteced.], quare nimirum homines erotomaniaci (§. 371.), fiant, vel ob philtum oblatum, vel ob abusum diureticorum, vel ob ejusmodi morbos, quibus jungi solet

sensus titillationis in partibus genitalibus, cum earum in majus volumen incremento, ad hæc accedente pathematum animi vehementia? Porro: quare sexus amabilis, ob conversationem cum maribus, accedentibus insuper anomaliis mensium, vel passione hysterica, vel etiam clitoridis insolita longitudine, corripitur soleat a furore uterino [§. citat.]? Quibuscum observationes congruunt.

§. MCCCXXVI.

Quo etiam loco ex parte repeti poterunt ea, quæ traduntur in capitibus de melancholia & mania.

§. MCCXXVII.

Ut erotomania ac furoris uterini definitionis [§. 371.] recta applicatio ad casum signis pathognomicis inveniendis sufficere poterit: ita etiam prognosticorum cognitioni satis hic respondebunt proposita in §§. 1291 & 1296. principia, una cum decente contemplatione causarum, quæ hoc loco concurrere possunt [§. 1324 & 1325.]

CAPUT CXVI.

DE

MOROSI ET DEBILITATE MEMORIÆ.

§. MCCCXXVIII.

Nervis in cerebro supra modum debilitatis: tam morosis in genere, quam etiam in specie debilitas memoriæ produci poterit (§§. 365. 369 & 379.)

§. MCCCXXIX.

Cognosci ideoque poterit [§. ant.] ratio illorum casuum, ubi hoc mali genus prodiisse multoties deprehendere licuit. Quorsum exempli gratia spectant a causis externis cerebro inductæ læsiones; morbi capitis vehementes ac diuturni; facultatum animæ inferiorum summæ intensiones; insultus apoplectici; senectus tandem, imprimis decrepita.

§. MCCCXXX.

Moria carebit illis commodis, quæ, præcipiente Physiologia, a functionibus animalibus rite comparatis, ad quas etiam sensuum internorum functiones pertinent, redire solent ad alia functionum corporis humani genera (§. 365.)

§. MCCCXXXI.

Quoniam marasmus senilis morosin generatim involvit, quæ connectitur cum universali quadam coildorum debilitate, eaque simul tali, qualis est,

quæ a majore fluidi aquei in illorum elementis defectu, quam qui in casu rigiditatis obtinet, proficiscitur, ac ordinario senibus decrepitis accidere solet [§. 381.]; consequens omnino erit, quod præter stupiditatis effectus [§. anteced.], hic etiam illi in considerationem veniant, qui nunc modo indicatæ solidorum debilitati originem suam debent, ac facile intelligi poterunt ex §. 386.

§. MCCCXXXII.

Conveniente ad casum applicatione definitionum [§§. 365 & 379.] facile dignoscere licebit morosum ac debilitatem memoriæ; prognosis vero hic derivanda erit ab affectus magnitudine ac causarum conditionibus [§§. 1328 & 1329.]

CAPUT CXVII.

DE

FEBRIBUS IN GENERE.

§. MCCCXXXIII.

Consideratis hucusque morborum tot speciebus diversis; eoque jam modo præmissis principiis quibusdam, ad febrium doctrinam facilius intelligendam necessariis; ordo tractationis postulat, ut nunc etiam de febribus agatur, & quidem prius in genere, deinceps in specie.

§. MCCCXXXIV.

Inter tot tamque diversa in febribus occurrentia phænomena, ea præ reliquis, quæ in febris definitione [§. 238.] exhibentur, referri poterunt ad constantia, magisque propria febribus, quam aliis morborum speciebus, immo etiam idonea pluribus aliis inde facilius deducendis, quæ in corporibus febrientibus fieri deprehenduntur; id quod ex subsequentiis satis clare patebit. A spasmō itaque peripherico & pulsu, qui eum sequitur, celeri ac frequente, notæ redibunt sufficientes, ad febris definitionem recte componendam [§. citat.]

§. MCCCXXXV.

Probe attentus ad symptomata in febribus obvia, hanc ibidem deprehendes differentiam satis notabilem. Quædam nimirum febres, a sui initio usque ad sui plenariam solutionem, in eodem vehementiæ gradu, ratione symptomatum suorum perseverant; quædam verò, priusquam plenarie solvantur, ita comparatæ sunt, ut illarum symptomata imminui videantur; quædam denique ejus conditionis esse deprehenduntur; ut illarum symptomata ad tempus aliquod cessare videantur, seu in quibus tempus vacuum a motibus febrilibus observetur, antequam suum decursum prorsus absolvant.

§. MCCCXXXVI.

Febris remittere dicitur, si illius symptomata intra tempus plenariæ suæ solutionis imminui observantur. Tunc vero *febris intermittit*, quando intra tempus plenarii decursus sui symptomatum fe-

brilium per aliquod tempus cessationes, five ubi tempus aliquod vacuum a motibus febrilibus oboriri, deprehendere licet [§. anteced.]

§. MCCCXXXVII.

Febris continens est febris, quæ nec remittit, nec intermittit; five cujus symptomata a suo principio, usque ad sui plenariam solutionem in eodem gradu vehementiæ perdurant. Dicitur etiam hæc febris *continua non remittens*, aut *synocha simplex*, vel etiam *synochus imputris*. Febris vero *continua* vocatur, quæ remittit. Febris denique *intermittens* erit, quæ intermittit [§. anteced.]

Febrium itaque facta reductione ad tria genera: illarum quoque aliæ divisiones proponendæ erunt, eæque imprimis petendæ tam a differentibus morbi conditionibus, quæ in febribus conspicuæ fiunt, quam etiam a typo morbi. Cujus rei præcipua momenta in se jam continebunt §§. sequentes.

§. MCCCXXXVIII.

Erunt *febres* tam *acutæ*, quam *chronicæ*; prouti nempe in illis compareat schema morbi vel acuti, vel chronici [§. 46. proleg.]

§. MCCCXXXIX.

Febres quoque esse poterunt vel *benignæ*, vel *malignæ*, immo etiam *contagiosæ*; pro indole morbi modo benigni, modo maligni ac contagiosi, quam præ se ferre in casu obvio deprehenduntur [§. 77. proleg.]

§. MCCCXL.

§. MCCCXL.

Prouti febribus in casu præsentē respondeat notio morbi endemici, aut epidemici (§. 82. proleg.): illæ tunc etiam dici poterunt mox *endemica*, mox *epidemica*.

§. MCCCXLI.

Solent etiam ad febres designandas nomina morborum certæ speciei, quibuscum illæ connectere deprehenduntur, transferri. Hinc *febris catarrhalis* dicitur, quæ cum catarrho (§. 347.), *inflammatoria*, quæ cum inflammatione (§. 116.) connectitur: & sic porro.

§. MCCCXLII.

Tandem ratione typi; *febres* erunt vel *typicae*, sive *regulares*; vel *atypicae*, sive *irregulares* (§. 64. proleg.)

§. MCCCXLIII.

Frequenter accidere solet inter homines, ut duo, aut plures simul incipiant conqueri de sensu quodam molesto tensionis vel gravitatis, quem ad spinam dorsi aut artus percipiunt; eidem mox junctis pluribus aliis incommodis. Quorsum scilicet pertinebunt sanguinis quasi ebullientis circa præcordia perceptiones, respirationis difficultates quædam, pandiculationes ac oscitationes, capitis dolor vel gravitas, visus obnubilationes, tandemque inertia quædam in exercitio motuum voluntariorum corporis. Præter hæc in eodem ægrotantium genere observabis habitum corporis externum tibi paulo

emaciatum videri, præcipue ad faciem; vasa ad frontem, ad tempora, ad manuum dorso, quæ alias conspicua ibidem satis erant, nunc jam evanuisse; pulsum denique parvum ac debilem, sed celerem simul & frequentem apparere. Longioris durationis ac gradus majoris hæc omnia in illis esse videntur, quibus ad corporis extrema frigus simul oboritur, quam quibus hoc ibidem deficit. Deprehendes porro fieri, ut vasa in conspectum iterum prodeant, quæ visum tuum paulo ante subterfugebant; habitus corporis externus, qui antea extenuatus esse videbatur, magis turgescat & incalcescat; difficultates circa respirandum, una cum incommodis ad peripheriam corporis & præcordia subortis, imminuantur; pulsus nunc quidem ad magnitudinem, duritiem ac vehementiam prius accedere, deinceps vero indolem his contrariam, inter augmenta transpirationis, nec non fitis incommoda, adipisci, servare tamen videatur constanter celeritatem suam ac frequentiam.

MCCCXLIV.

Consideratis illis phaenomenis, quæ in §. anteced. describuntur, iisdemque probe inter se collatis, tuto colligere licebit ad febris existentiam, simulque intelligere, quod non nisi ab observatis rite abstracta notio definitionem febris (§. 238.) ingreditur.

§. MCCCXLV.

Ex spasmi vero peripherici & pulsus, qui illud sequitur, celeris ac frequentis notione notio fe-

ris componitur; hæcque eorum foecunda esse dicitur, quæ ad febris naturam penitus cognoscendam facili studio inde erui possint (§§. 238. & 334.) Ostendendum itaque jam erit, quod hæc um vero ita congrua sint, ut iisdem quoque observationes passim respondeant.

§. MCCCXLVI.

A spasmo peripherico produci simul poterunt contractiones fibrarum in vasis tam venosis, quam arteriosis, quæ ad corporis peripheriam excurrunt. (§. 237.) Unde efficitur, ut circa cor magis tunc temporis hæreat sanguis.

§. MCCCXLVII.

Quare tunc etiam sensus ebullitionis circa præcordia, respirationis incommoda, angores cordis, mandiculationes ac oscitationes producantur, atque ad majorem gradum perveniant, necesse erit, quo major nempe fuerit spasmus periphericus (§ anteced.) Quod per observata quoque confirmatur.

§. MCCCXLVIII.

Sanguinis influxu expedito in partes solidas corporis humani opus esse ad calorem ibidem producendum, ex Physiologicis satis constat. Sed hoc fieri non poterit, fibris arteriarum a spasmo affectis. Consequens igitur erit: spasmus periphericum (§. 237.) in febricitantibus eo majoris gradus fore, quo majus in iisdem frigus ad extrema corporis apprehendatur.

§. MCCCXLIX.

Ex eo, quod corpus humanum magis immobilitate factum esse deprehenditur, ad illius quoque rigorem, qui sæpius originem suam pertinacibus spasmodis debet, colligere solemus. Hinc necesse jam erit, ut in corporibus febrientibus majoris gradus adsit spasmus periphericus, quæ rigent; utpote quibus tunc etiam ad extremitates suas oboriri simul deprehenditur frigus satis validum, una cum augmento illorum incommodorum, quæ in (§. 1347.) indicantur.

§. MCCCL.

Deprehensis circa febris invasionem horribus, sive horripilationibus: deprehendi quidem solet frigus ad extrema corporis, sed lene, brevis durationis, non numquam etiam intra momentanea quasi intervalla aliquoties recurrens. Neque ideo tanti gradus erit spasmus periphericus in febricitantibus, quibus modo sub febris accessione horripilationes oboriuntur, quanti in illis est, qui tunc temporis admodum frigent, aut rigent (§§. 1348. & 1349.)

§. MCCCLI.

Quoniam porro per ipsam naturam spasmi necesse est, ut, eodem in illis locis corporis humani oborto, vasa, alias conspicua ibidem, visui subtrahantur, ipsaque caro in arctius quasi spatium cogatur: non poterit non spasmo peripherico tribui, quare sub invasione febris vasa fiant evanida ad frontem, ad tempora, ad manuum dorso, atque externi

habitus corporis apparentes prodeant extenuationes?
Quocum etiam observationes conveniunt.

§. MCCCLII.

Unde simul de ratione constabit, quare phænomena ista in illis febricitantibus, quibus modo sub febris accessione oboritur sensus tensionis vel gravitatis membrorum, tamquam effectus spasmii peripherici levioris gradus, observentur non adeo distincte prodire, quam in illis, qui inhorrescunt; atque omnium maxime conspicua fieri in iis, qui tunc temporis validum frigus, aut rigorem perpetiuntur? (§§. 1348 1351.) Quæ etiam cum observationibus consentanea sunt.

§. DCCCLIII.

Quia circulo sanguinis respondet pulsus (§. 124.); isque celer ac frequens est in febre (§. 238.); atque hæc simul spasmum periphericum sibi vindicat (§. citat.), sub cujus duratione sanguis circa cor magis hæret, nata ad arteriarum extremitates ac circa pulmones resistantia (§. 1346.): inde jam sequitur, fore, ut, præsentē spasmio peripherico, circulus sanguinis in corporibus febrientibus celer quidem dici possit, sed debilis.

§. MCCCLIV.

Hinc jam cognoscere licebit, quare nimirum in hocce febris stadio pulsus appareat parvus ac debilis (§§. 127. 128. 135. 136. 1343 & 1353.)?

§. MCCCLV.

Ex Physiologicis constat, sanguinem per carotides copiatim adire encephalon, unde ille per venas jugulares, admodum dilatabiles, tandem deducitur ad cordis ventriculum dextrum. Quoniam vero celer est in febre sanguinis circulus: tunc etiam increfcet in vasis encephali sanguinis quantitas, illiusque coacervationes ibidem fieri facile poterunt. Unde jam prodibit in encephalo febricitantium status similis statui congestionum sanguinis ad caput (§. 175.).

§. MCCCLVI.

Satis vero notum est, quam diversi effectus in corpore humano producantur a sanguinis congestionem, ad differentes gradus encephalon versus facta. Quin igitur ejusmodi effectibus febricitantium corpora subjiciantur, dubitari nequit (§. anteced.).

§. MCCCLVII.

Poteris jam inde cognoscere, unde caligo illa visus, capitis dolor vel gravitas, impotentia ad motus voluntarios, tamquam incommoda, de quibus ex febre ægrotantes conqueri solent, originem suam ducant (§. anteced.). Atque ex eodem fundamento tibi porro constabit, fieri quandoque posse, ut, accedentibus hic præcipue causis validis, sive illæ externæ, sive internæ fuerint, magisque accommodatæ indoli febris certæ speciei, suboriantur pervigilia, affectus soporosi, deliria, convulsiones, lipothymia. Quibus etiam observationes respondent.

§. MCCCLVIII.

Inter multiplices illos effectus, qui in febricitantibus a diversi gradus congestione sanguinis ad caput dependent (§. 1356.), referri quoque poterit intensa cordis actio; manifesto illorum exemplo, quibus insultus apoplectici accidere solent. Fieri adeoque poterit, ut vis cordis ex febre ægroantium increseat.

§. MCCCLIX.

Aucta vi cordis, augebitur quoque sanguinis motus in arteriis. Ergo fieri poterit, ut etiam fortis circulus sanguinis in febricitantibus locum inveniat (§. anted.).

§. MCCCLX.

Sanguinis circulus fortis vim cordis auctam sibi vindicat, qua efficitur, ut sanguis majore cum vi in arterias impellatur, easdemque ad majorem diastolen ac systolen cogat; effectibus istis ad minimas quoque arterias atque a corde remotissimas tandem redeuntibus. Quo igitur modo superari jam poterit omne id, quod spasticum foret vel in arteriis, vel in partibus, quas illæ adeunt; idque multo magis, quum etiam venæ tunc temporis turgidæ fieri incipiant a sanguine, ipsis commisso ab arteriarum sibi vicinarum ramusculis. Ex quibus itaque colligitur: fieri omnino posse, °ut, suborto in febricitantibus circulo sanguinis forti, spasmus periphericus sensim sensimque solvatur.

§. MCCCCLXI.

Hinc ulterius conficitur (§. anteced.): tunc etiam futurum esse, ut in febricitantibus corporis habitus externus turgescat, & vasa in locis periphericis alias conspicua, quæ paulo ante visum subterfugiebant, iterum prodeant in conspectum (§. 1351.); calor ad extrema loca corporis redeat,isque auctus (§. 1348.); respiratio liberior reddatur, producto simul levamine circa præcordia (§. 1347.); pulsus fiat fortis, durus, ad magnitudinem, ad mollitiem accedat (§§. 129. 137 & 1354.); tandemque transpirationis augmenta accitis incommoda subsequantur.

§. MCCCCLXII.

Omnes isti effectus, qui in febricitantibus a circulo sanguinis forti produci possunt (§§. 1360 & 1361.), in iisdem quoque prodire observantur (§. 1343.). Nullum igitur dubium erit, quin tunc etiam sanguinis circulus fortis, præter celerem, febricitantibus attribui debeat; quum ab effectu ad causam omnino valeat consequentia.

§. MCCCCLXIII.

Atque ita in omni febre prius ad cor magis ducitur sanguis, ejus circulo tunc existente celeri ac debili; deinceps vero ad loca corporis extrema expeditius fluit, illius circulo forti ad celerem accedente (§§. 1346. 1353. 1360. 1361 & 1362.) Vel ut in scholis Medicorum dici solet: duplex in quavis febre motus sanguinis obtinebit, alter scilicet

peripheria ad centrum, alter vero a centro ad peripheriam.

§. MCCCLXIV.

Sufficient etiam hucusque prolata, ad febris gradia hæcce diversa (§. anteced.) facile dignoscenda: Quorum sequentes imprimis pertinebunt (§§. 1347 - 1354. 1360 - 1362.

§. MCCCLXV.

In Physiologicis evictum datur, a sanguinis delationibus ad organa secernentia in corpore humano dependere secretiones, hisque ceteris paribus respondere excretiones. Sed in febricitantibus circulus sanguinis celer ac fortis locum habet (§. 1362.). In quibus adeoque secretionum ac excretionum augmenta evenire poterunt. Quod etiam cum observationibus congruit.

§. MCCCLXVI.

Pro fluidorum secretorum diversitate, moderatione qualitatis suæ, modo quantitatis, delatorum ad organa excernentia, præcipue illa, quæ in alias partes hiant, easque similes vasis in genere; atque pro harum partium differente conditione: diversi etiam in febre occurrent effectus (§. anteced.). Idem similiter probant observationes.

§. MCCCLXVII.

Quoniam in febricitantibus sanguinis circulus celer ac fortis non desideratur (§. 1362.); iisdem-

que excretiones auctæ oboriri possunt (§. 1365.) : hinc effici poterit, ut humorum massa in corporibus febrientibus & resolvatur, & inspissetur. Quibus etiam observationes respondent.

§. MCCCLXVIII.

Quare in corporibus febrientibus stases ac obstructions resolvi, novæ produci, vel jam præsentibus augeri poterunt (§. anteced.) in idem consentientibus quoque observatis.

§. MCCCLXIX.

Singulis his diligenter consideratis, quæ de febris affectionibus hucusque tradita sunt : poteris tibi jam concipere febrem, tanquam complexum morborum cordis, pulmonum, encephali, sensuum internorum externorumque, vasorum omnis generis & partium quas illa ingrediuntur, sanguinis tandem ac reliquorum fluidorum (§§. 1346-1368.)

§. MCCCLXX.

Hinc veritati apprime respondebunt ea, quæ jam a tot annis docuerunt Medici, dicentes : in omni febre lædi functiones vitales, animales, naturales [§. anteced.].

§. MCCCLXXI.

Probe attendenti ad eos casus, in quibus generatim febris [§. 238.], cujuscumque conditionis illa fuerit, prodire observatur, non poterit non innotescere, ejusdem ortum non sibi ibidem fieri,

ubi de stasium ac obstructionum in corpore existentia te satis certum facere possunt principia pathologica. Ut itaque febris in genere causa proxima educi posse videatur ad stases ac obstructiones.

Peccata rerum sex non naturalium, res aliæ ad corpus admissæ, morborum denique species variæ magis pertinebunt ad causas remotas febris; si hæc iisdem supervenire observetur. Ab ejusmodi vero causis remotis febris ejus causa proxima, quæ in §. indicatur, ita jam oriri poterit, ut hic permultæ simul obtineant differentiæ, æque magis petendæ mox a diversitate modi, quo stases ac obstructiones generantur (§§. 100 & 174.); mox a locorum corporis, ubi illæ existunt, diversis conditionibus; mox a materiæ ipsius, a qua stases ac obstructiones perficiuntur, discrepantibus qualitatibus; mox denique ab horum omnium diversis aliis ad se relationibus. Quæ si rite perpendantur in casibus febris subortæ, tunc facile discuti poterit dubium illud; quod speciem veri præ se ferre videtur, ac si nimirum vix fieri possit, ut ad tantam simplicitatem causa febris in genere redeat; cujus tamen tot species existunt, quæ tanta symptomatum multitudine, varietate & acerbitate conspicuæ sunt (sicuti id ex capitibus subsequentibus satis constabit), ut longe aliam quoque sui conditionem requirere videatur febris in genere causa proxima. Constituuntur vero genera a specièrum, & hæc a singularum similitudine, ac utraque agnoscuntur per genesin rerum, sub iis contentarum. Clariora hæc omnia reddentur in prælectionibus.

§. MCCCLXXII.

Fieri poterit, ut febris se ipsam salutariter solvat; vim quandoque habeat remedii cujusdam salutaris in compluribus morbis; novos morbos corpori inducat, vel augeat antiquos; tandemque ex una sui specie in aliam degeneret [§§. 1368 & 1371.]. Quod etiam ab observationibus confirmatur.

§. MCCCLXXIII.

Febrium solutiones ita fieri observantur, ut eadem vel pedetentim eveniant ac fere quotidie, vel subito contingant statim quasi die. In casu *priore febris* solvi dicitur per *lysin*; in *posteriore* vero per *crisin*.

§. MCCCLXXIV.

Crises vel lyses in febribus fieri possunt vel per productionem novi morbi; vel per reditum sanitatis; vel per mortem [§§. 52. *proleg.* & *anteced.*].

§. MCCCLXXV.

Crises febribus acutis, in quibus nullæ, aut saltem perexiguæ remissiones observantur, hinc continentibus & quibusdam modo continuis competent; lyses vero omnibus chronicis atque iis continuis acutis magis propriæ erunt, ubi admodum notabiles remissiones deprehenduntur [§§. 1337. 1338 & 1373.].

§. MCCCLXXVI.

Crises bonæ esse dicuntur, quæ fiunt per ortum sanitatis, aut morbi minoris morbo solvendo;

nale autem appellantur, quæ per morbi majoris morbo solvendo productionem, vel per mortem fiunt. Atque ita quoque *lyses* dividi poterunt.

§. MCCCLXXVII.

Ad formam solutionum, quæ in febribus contingere solent, quod attinet: sequentia hic jam annotanda erunt momenta ex observationibus. Materia nempe febrilis modo a febre ita mutatur; ut talem iterum nanciscatur indolem, ne corpori amplius nocere possit, intra idem retenta; modo etiam vi corporis febrientis extra hujus terminos proscribitur; modo denique ex uno loco corporis ad alium defertur. In casu *primo* dicitur *febris solutio* fieri per *assimilationem*; in *secundo* per *eccrism*; in *tertio* tandem per *metastasin*.

§. MCCCLXXVIII.

Crises ac *lyses* fieri poterunt modo per *assimilationem*; modo per *eccrism*; modo per *metastasin* (§§. 1373 & anteced.).

§. MCCCLXXIX.

Qui crises & *lyses* in febribus rite dijudicare vult: illum oportebit animum dirigere suum ad quantitatem & qualitatem materiæ febrilis; ad loca corporis, ubi vel *eccrism*, vel *metastasis* febrilis fit; ad functionum in corpore febriente, præcipue vitalium, indolem; tandemque ad alias speciales in casu obvio ægrotantis conditiones (§§. 92. 93. 94. 135. *proleg.* 1378.).

§. MCCCLXXX.

Veteres Medici, præclara illa acuminis in observando exempla, in corporibus febricitantium certas mutationes, easque valde notabiles sensibusque admodum conspicuas, statis quibusdam diebus intra illud tempus, quo febris ad naturalem decursum suum uti solet, contingere ac crisin præcedere observarunt; hosque etiam dies dignos esse voluerunt, qui nominibus suis notentur, atque a reliquis distinguantur. Juvabit adeoque horum dierum diagramma hoc jam loco exhibere; præmissis tamen prius, majoris claritatis causa, definitionibus sequentibus.

§. MCCCLXXXI.

Dies criticus erit, quo crisis fit. *Dies indicatorii*, seu *indicantes*, seu *contemplabiles*, sive *contemplantes* dicuntur illi, quibus talia phænomena observantur in febribus prodire, unde ad criseos futuræ conditionem tuto colligere licet: sive, ubi symptomata in febribus eveniunt, quatenus sunt signa prognostica criseos. *Dies intercalares*, sive *intercidentes*, sive *provocatorii* appellantur illi, qui diebus indicatoriis ex parte aliqua similes esse deprehenduntur. Sed diebus indicatoriis ac intercalaribus opponi jam solent *dies vacui*, sive *medicinales*, sive *non decretorii*. *Dies tandem pseudocriticus*, seu *tyrannicus* vocatur ille dies febris, qui gravissimis morbi exacerbationibus stipatus esse, ac proxime antecedere solet diem criticum, præcipue primum & quartum.

§. MCCCLXXXII.

Diagramma criticum.

SEPTENARIUM I.

SEPTENARIUM IV.

Dies

Dies

I.	Vacuus.	-
II.	Vacuus.	-
III.	Intercalaris.	-
IV.	Indicatorius.	-
V.	Intercalaris.	-
VI.	Pseudocriticus.	-
VII.	Criticus.	-

XXI.
XXII.
XXIII.
XXIV.
XXV.
XXVI.
XXVII.

SEPTENARIUM II.

SEPTENARIUM V.

VIII.	Vacuus.	-	XXVIII.
IX.	Indicatorius (sæpe exitialis).	-	XXIX.
X.	Vacuus.	-	XXX.
XI.	Indicatorius.	-	XXXI.
XII.	Vacuus.	-	XXXII.
XIII.	Intercalaris.	-	XXXIII.
XIV.	Criticus.	-	XXXIV.

SEPTENARIUM III.

SEPTENARIUM VI.

XIV. *	-	XXXIV.
XV. Vacuus.	-	XXXV.
XVI. Vacuus.	-	XXXVI.
XVII. Indicatorius.	-	XXXVII.
XVIII. Vacuus.	-	XXXVIII.
XIX. Intercalaris.	-	XXXIX.
XX. Criticus.	-	XL.

Ex diagrammate isto apparet, quod descriptæ ibidem rationes numerandi in iis modo febribus locum magis obtinere videantur, quæ minimum ad sui decursum uno septenario utuntur. Nonne vero ejusdem diagrammatis usus ad eas quoque febres trans-

ferri poterit, quæ brevius uno septenario decurrunt, aut illas chronicas, quæ, licet durationis admodum longæ sint, non numquam tamen acutarum naturam affectant, similiter distributo tempore, intra quod febres istæ decursum suum absolvunt? Id quod a vero non ita alienum esse, in prælectionibus probabitur congruis argumentis; simul additis quorundam vindiciis contra recentiorum dubia, quibus veterum Medicorum impugnari solet auctoritas & fides in doctrina de crisi febrium.

§. MCCCLXXXIII.

Signa pathognomica sufficientia febris in genere per hujus definitionem (§. 238.), ad casum rite applicatam, constare poterunt.

§. MCCCLXXXIV.

Ad signorum vero prognosticorum cognitionem in febribus generatim quod attinet: hic jam conveniet singulos febris effectus, in peculiaribus §§. supra expositos, probe considerare, eosdemque inter se conferre; causarum rectam habere rationem; inde ad morbi magnitudinem accurate colligere; cum his omnibus denique comparare phænomena, febris solutionem indicantia. Quare hoc loco notandæ erunt propositiones sequentes.

I. Quo magis in corpore febriente organa vitalia afficiuntur; & quo plures in eodem lædi comprehenduntur functiones vitales: eo magis periculosus erit status.

II. Quo majora virium decrementa in febricitantibus, illaque magis subito fieri observantur; eo magis metuendum erit, fore, ut natura morbo succumbere cogatur.

III. Quo minus etiam causæ febris subigendæ respondere videantur conamina naturæ; eo minus sperari quoque poterit bonus eventus febris.

IV. Sed e contraria parte boni prælagii erunt in febre; functionum vitalium læsiones admodum exiguæ, aut initio quidem graves, mox vero mitiores factæ virium constantia quædam; his denique omni ex parte accommodatæ mutationes, quæ ad morbi solutionem salutarem efficiendam in corpore febris obnoxio prodire solent.

CAPUT CXVIII.

DE

FEBRIBUS CONTINENTIBUS IN GENERE.

§. MCCCLXXXV.

IN hoc febrium genere (§. 1337.) prodire observantur sequentia phænomena.

I. Invasio febrilis fieri solet primo mane, cum tensionis, gravitatis & quasi contractionis membrorum; non numquam etiam horroris sensu.

II. Æstus, qui statim initio morbi comparet, in eadem vehementia perdurat usque ad febris decursum.

III. Præter pulsum celerem ac frequentem ; tamquam singulis febrium speciebus communem, ille hic etiam magnus est.

IV. Facies inflata ac rubicunda apparet ; adfunt cephalalgiae satis graves ; non deficiunt vertiginis, tinnitus ac susurrus aurium incommoda deliria intercurrent ; somnus fere nullus apprehenditur ; vel etiam affectus soporosi quandoque provenire videntur.

V. Generatim febres istæ ad inflammationes corpori induendas admodum pronæ sunt : quibus concitatis, status ægrotantium longe periculosior redditur.

VI. Sed earum quoque salutare solutiones consequi solent vel per sudores copiosos ; vel per hæmorrhagias largas, easque in specie, quæ sanguinis effluxu e naribus absolvuntur ; vel etiam per abundantes urinæ admodum saturatæ excretiones.

VII. Longissimum denique tempus, quo febres continentes ad sui decursum uti solent, uno septenario terminatur.

§. MCCCLXXXVI.

Constat porro ex observatis, febres continentes non nisi in corporibus plethoricis nasci, ubi sequentes conditiones locum inveniunt.

I. Gravia nimirum pathemata animi ; ingentis caloris ad corpus accessiones ; abusus spirituosorum, vel caussarum aliarum, a quibus sanguis supra modum commovetur, admissiones.

II. Hæmorrhagiarum naturalium suppressiones, vel artificialium intermissiones.

III. Vigiliarum nimix ac frequentes protractiones; corporis valde calidi vehementes refrigerationes.

§. MCCCLXXXVII.

Febres continentes sub specie acutarum incedunt, ac pro sui causa plethoram, eamque commotam & producentem stases ac obstructions, agnoscunt (§§. 1337. 1338. 1371. 1385 & 1386.)

§. MCCCLXXXVIII.

Ex §. anteced. vocatis hic simul in subsidium iis, quæ jam prostant in capitibus generalibus de plethora, congestionibus ac febre, haud difficulter intelligi poterunt rationes eorum, quæ in historia febrium continentium proponuntur (§. 1385.)

§. MCCCLXXXIX.

Signa pathognomonica sufficientia febrium continentium in genere cognoscuntur ex illarum definitione (§. 1337.); ad casum recte applicata, necnon ex pulsus magni ad celerem ac frequentem accessione (§. 1385. *numer.* 3.); tandemque etiam ex tempore & modo, quo hic fieri solent invasiones febriles (§. 1385. *numer.* 1.)

§. MCCCXC.

Sed ad prognosin in eodem febrium genere quod spectat; tunc hic quoque valebunt ea, quæ in §. 1384. traduntur; iisdem insuper accedentibus illis momentis, quæ ad §. 1385. *num.* 5 & 6. enarrantur.

CAPUT CXIX.

DE

FEBRE CONTINENTE PER
EMINENTIAM TALI.

§. MCCCXCI.

F*ebbris continens per eminentiam talis vocatur illa febris continentis species, quæ ad plenarium sui decursum uno septenario utitur.*

§. MCCCXCII.

Sequentia momenta ex observationibus notanda erunt, quæ ad hanc febris speciem pertinent.

I. Symptomata, quæ in genere omnibus febribus continentibus competunt (§. 1385.), hic in eminentiore gradu sunt conspicua; ad quæ insuper accedere videntur nimix circa respirationem angustix, una cum pectoris oppletionibus & suffocandi metu.

II. Die quarto, tamquam indicatorio, signa apparent imminentis hæmorrhagiæ narium, quæ etiam mox subsequitur, iterum reditura die septimo, ceu critico; nisi eadem ab incongruis causis hic concurrentibus impediatur.

III. Prodire tunc etiam solet incommodus quidam pruritus sub cute.

IV. Febris hujus solutio salutaris die septimo contingere solet, & quidem eodem modo, qui jam indicatus est ad §. 1385. *num.* 6.

V. Homines ætatis consistentis & decrefcentis huic febris speciei præ aliis obtemperare coguntur; sub earum nempe conditionum accessionibus, quæ exponuntur ad §. 1386.

§. MCCCXCIII.

Corporibus ætatis consistentis vel decrefcentis fibræ competunt magis densæ. Hinc etiam non deerunt ibidem difficultates tam ratione diaphoresis, quam profluvii sanguinei; utpote quo excretionum genere imprimis opus est ad febris hujus salutarem solutionem (§. anteced.) Ex quo jam cognoscere licebit rationem, quare febris ista symptomatibus longe acerbioribus stipata incedere, atque ad sui decursum plus temporis, quam aliæ febrium species, sub eodem quoque genere contentæ (ut mox ex subsequentiis patebit), ad sui decursum requirere soleat (§. citat.)?

§. MCCCXCIV.

Febris continentis in specie talis signa pathognomica sufficientia redibunt ad ea, quæ jam exposita prostant in §. 1389. iisdem insuper accedente gravitate symptomatum febris continentis in genere, eaque magis deprehensa in corporibus ætatis consistentis vel decrefcentis (§§. 1392 & 1393.)

§. MCCCXCV.

Prognosis vero in eadem febris specie ab illis quoque principiis petenda erit, quæ in §§. 1390 & 1393. indicantur.

CAPUT CXX.

DE

FEBRE EPHEMERA SIMPLICE SEU DIARIA.

§. MCCCXCVI.

F*ebbris ephemera simplex* dicitur illa febris continentis species, quæ intra viginti quatuor horas decursum suum absolvit.

§. MCCCXCVII.

Docent observationes, descriptis quidem symptomatibus (§. 1385.), sed paulo levioribus incedere diariam simplicem; eamque maxime familiarem esse junioribus, in quibus vero conditiones obtinent supra propositæ [§§. 1386 & 1387.]

§. MCCCXCVIII.

Quoniam in corporibus junioribus, ob maiorem fibrarum laxitatem, febrium continentium salutaris solutio [§. 1385.] facilius consequi potest, quam in adultioribus; neque ideo obscura erit ratio, quare nimirum febres istæ tam leves, tamque bre-

vis decursus in junioribus esse deprehendantur [§§. 1396 & 1497.]?

§. MCCCXCIX.

Febris ephemeræ simplicis signa pathognomica sufficientia constare poterunt ex §§. 1389. 1397. & 1398.

§. MCCCC.

Conditionem vero signorum prognosticorum in eadem febre tibi satis jam poterunt indicare prolata in §§. 1390. 1397 & 1398.

C A P U T C X X I .

D E

FEBRE EPHEMERA PLURIUM DIERUM.

§. MCCCCI.

Febbris ephamera plurium dierum appellatur illa febris continentis species, quæ quidem brevioris decursus est, quam febris continens per eminentiam talis [§. 1391.], longioris vero, quam ephamera simplex [§. 1396.]

§. MCCCCII.

Longissima febris hujus duratio sese ad diem quartum vel quintum extendere observatur. Idem etiam hominum genus huic febre obnoxium fieri

deprehenditur, quod ab ephemera simplice corripi solet [§. 1397.]; hic tamen paulo validius agentibus illis causis, quibus in genere originem suam debent febres continentes [§§. 1386 & 1387.]

§. MCCCIII.

Sub enarratis in §. anteced. conditionibus necesse erit, ut suborta febris continens se quidem mitius gerat, ac citius decurrat synocho in specie tali; acerbior tamen fiat ac longior ephemera simplice (§§. 1393 & 1398.)

§. MCCCIV.

De signis pathognomicis sufficientibus in febre ephemera plurium dierum certus fieri poteris per ea, quæ traduntur in §§. 1389. 1401 - 1402.

§. MCCCIV.

Satis etiam te edocere valebunt de prognosis in eadem febris specie fundamentis propolita ad §§. 1390. 1402 & 1403.

CAPUT CXXII.

DE

FEBRIBUS CONTINUIS IN GENERE.

§. MCCCCEVI.

QUOD ad hoc febrium genus (§. 1337.) attinet: observantur ibidem satis conspicua fieri phenomena sequentia.

I. Accessio febrilis fit cum frigoris aut horroris sensu, perseverante vix longius, quam ad dimidiam horam.

II. Sequitur tum æstus, hunc excipit diaphoresis, & febris ipsa aliquantum mitescere videtur.

III. Hæc remissio a febre non numquam ad aliquot horas protrahitur, & satis notabilis est; non numquam vero durationis admodum brevis est, nec adeo conspicua fit.

IV. Ejusmodi remissiones a febre hujus jam exacerbationes sequuntur. Ordinarie id contingere solet circa illud tempus, quo prima invasio febrilis facta erat.

V. Post diem quartum paroxysmi febriles antecedentibus leviores fieri solent.

VI. Durante frigore vel horrore febrili, majoris cujusdam doloris aut gravitatis sensus in certa parte corporis prodit.

VII. Febres continuæ speciem morborum mox acutorum, mox chronicorum præ se ferunt. Priores intra duo aut tria septenaria plerumque decurrunt, ac raro esse solent longioris extensionis: posteriores vero secus se habere videntur ratione solutionis suæ.

VIII. Pronissimæ tandem febres istæ sunt ad producendas in visceribus læsiones, immo productas magis augendas.

§. MCCCCVII.

Sub invasione febrium continuarum ad certa loca corporis provenire observantur incommoda quædam doloris aut gravitatis sat sensilia (§. anteced. *numer.* 6.) Videtur adeoque causa febrilis istas partes corporis febrientis magis occupare (§§. 176 & 237.)

Clariora hæc fient ex capitibus sequentibus, in quibus jam species febrium continuarum pertractabuntur. Unde etiam uberius constabit de modo, forma ac tempore solutionum, in hoc febrium genere contingentium; nec non de causarum conditionibus; quum hic ea sufficere videantur, quæ de eodem argumento jam dicta sunt in capite de febribus in genere.

§. MCCCCVIII.

Signorum pathognomicorum sufficientium cognitionem in febribus continuis in genere ab earum definitione (§. 1337.) facile derivare licebit; habita insuper ratione illius momenti, quod indicatur ad §. 1406. *numer.* I.

§. MCCCCIX.

Ratione vero prognosis in eodem febrium genere notari merentur sequentia.

I. Quo longioris durationis fieri videntur remissiones febriles; eo felicius exitus erunt febres continuæ.

II. Hic etiam omni attentione dignum esse debet illud momentum, quod exhibetur ad §. 1405. numer. 8.

III. Neque tandem hoc loco prætervidenda erunt illa fundamenta, quæ exponuntur ad §. 1384.

CAPUT CXXIII.

DE

FEBRIBUS INFLAMMATORIIS GENERATIM.

§. MCCCCX.

Febbris inflammatoria est febris continua, acuta, quatenus connexa cum inflammatione.

Febres inflammatoriæ dici quoque solent *secundaria*, vel *symptomata*, quia ab inflammatione, tamquam morbo alio, dependent, consequenter ejus symptoma (§. 32. proleg.) esse debent. Nonne verò idem nominis genus simili jure ad alias quoque febrium species transferre licebit? Quod fieri posse, patet in genere ex §. 1371. collato cum §§. 100 & 174.

§. MCCCCXI.

Quoniam febris inflammatoria originem suam debet inflammationi (§. 1410.); atque hæc stases ac obstructions in vasis sanguineis, vel etiam sanguinis e suis vasis copiosiores egressiones ad cellulosa supponit (§. 408.); sequitur, fieri posse, ut causis istis in una atque altera parte corporis humani productis, ibidem quoque producatur inflammatio, febrem ejusdem nominis accensura.

§. MCCCCXII.

Ex §. anteced. patebit jam ratio illorum casuum, in quibus febres inflammatorias frequenter obortas fuisse, observationes docuerunt. Quorum exempli loco pertinebunt permultæ aliæ febrium species; plethora, humorum spissitudo, cacochymia, varia solutionum continui genera; præcipue sub earum causarum accessionibus, quæ orgasmos humorum producere valent.

§. MCCCCXIII.

Febris inflammatoria in genere requirit inflammationem in una atque altera parte corporis humani obortam (§. 1410.) Hinc etiam necesse erit, ut ne in febre nunc modo dicta desiderentur inflammationis effectus. Qua de re notanda hic erunt ea, quæ jam supra in peculiari quodam capite de hoc argumento generatim prolata sunt.

§. MCCCCXIV.

Sequentia de febribus inflammatoriis in genere ex observationibus notare conveniet.

I. Exacerbationes ac remissiones febriles hic quidem pro more aliarum febrium continuarum eveniunt, solet tamen accidere, ut spasmus periphericus, quo febres istæ invadunt, gradu differre videatur; præcipue in relatione ad earum species.

II. Dolorem illum ardentem & pulsum fortem, tamquam solita incommoda, quæ prodeunt ad loca corporis inflammata, magis incrementum videntur ægris, durante spasmio peripherico.

III. Membris libero aëri expositis ægrotantes horrore quasi percelluntur; iisdem vero obsecutis & ab aëris liberi accessionibus probe defensis, æstum sibi quandoque intolerabilem sentire videntur.

IV. Quo vehementiores hæ febres sunt; eo majoris quoque gradus deliria in iisdem prodire videntur.

V. Intra unum septenarium plerumque decurrunt; aliæ adhuc citius, aliæ vero serius.

VI. Inflammationis differentes illas solutiones (§. 414.) in febribus inflammatoriis generatim sequentem in modum cognoscere licebit. Diffusionem nempe polliceri solent sudores, hæmorrhagiæ, nec non urinæ saturatæ excretiones copiosæ. Suppurationis vero aut scirrhi ortum indicabunt doloris ardentis ad loca inflammata corporis imminutiones, lento gradu pro-

cedentes, nec non febris ipsius longiores protractiones, ejusque tandem ex acuta in chronicam apparentes commutationes. Transitus denique in gangrænam & sphacelum, hinc eventus morbi funestus, ex eo satis constabit, quando doloris supra modum aucti in locis inflammatis perceptiones subito evanescent, symptomata tamen febrilia, quæ pro sui causâ agnoscunt sanguinis circa cor ac encephalon coactiones (§§. 1346 & 1355.), valdopere urgent.

§. MCCCCXV.

Differentia quorumcumque effectuum in febribus inflammatoriis generatim dependebit a magnitudine inflammationis; a conditionibus partium inflammatarum; a modo tandem diverso, quo solvitur inflammatio (§§. 1410 & 1413.).

§. MCCCCXVI.

Signa pathognomica sufficientia febris inflammatoriae in genere componuntur ex signis inflammationis ac febris continuæ acutæ (§. 1410.); & facile cognoscuntur ex §§. 420 & 1408.

§. MCCCCXVII.

Similis hic quoque compositionis erunt signa prognostica (§. 1410.); eaque facili studio intelligenda ex §§. 421. 1409. 1414. *num.* 6. 1415.

CAPUT CXXIV.

DE

PHRENITIDE.

§. MCCCCXVIII.

Phrenitis est febris inflammatoria, connexa cum inflammatione meningum.

§. MCCCCXIX.

Ex observatis apparet, phrenitidem antecedere vigilias fere continuas, immo etiam affectus soporosos; somnum inquietum, multisque phantasmibus plenum; capitis stuporem aut dolorem; urinæ & alvi suppressiones; oblivionem rerum paulo antea actarum.

§. MCCCCXX.

Sed ipsa jam febre phrenitica præsentē, sequentia prodire observantur symptomata.

I. Vasa capitis valde turgent, & artiarum circa tempora & collum eximie fiunt pulsationes.

II. In vultu ferociæ ac truculentia signa quædam conspiciuntur.

III. Lingua arida & aspera, quandoque etiam nigra fieri videtur.

IV. Non desunt deliria, eaque sæpius acutissima, dentium stridores, spasmus cynicus, risus sardonius, convulsiones.

V. Solutio morbi intra idem tempus, eoque modo, quo in genere fieri solet in febribus inflammatoriis [§. 1414.], hic quidem consequi poterit; non prætervidenda tamen erunt hoc loco momenta sequentia, quæ in specie ad phrenitidis solutionem pertinent. Hujus nominis erunt hæmorrhagiæ narium; hæmorrhoides fluentes; sanguinis e genitalibus feminarum effluxus; diarrhœæ: quippe quæ excretiones phrenitidis solutionem exoptatam promittunt. Transitus vero inflammationis in abscessum vel scirrhum, phreniticis indicabit affectus melancholicos aut maniacos, vel etiam apoplecticos imminere, quibus tandem perire coguntur.

§. MCCCCXXI.

Sanguine ad partem aliquam nimis congesto, necesse erit, ut vasa ibidem distendantur, distensa partim comprimant alia, partim reddantur ipsa debilia; oriuntur ideoque causæ, a quibus stases, obstructions & congestionum augmenta in iisdem locis corporis produci poterunt [§§. 100. 174 & 176.] Tunc igitur fieri poterit, ut ibidem inflammatio generetur [§. 408.], initio ambitus quidem exigui, deinceps vero majoris extensionis [§. 409.] Unde jam satis constabit, quod a validis congestionibus sanguinis ad encephalon phrenitis accendi possit [§. 1418.]

§. MCCCCXXII.

§. MCCCCXXII.

Patebit jam ratio illorum casuum, quibus phrenitidem supervenisse observationes multoties docuerunt (§. anteced.) Quorsum exempli gratia spectant febres aliæ acutæ; nimix sanguinis in corporibus plethoricis exagitationes; læsiones capitis; atque aliarum caussarum ad corpus admissiones, a quibus graves sanguinis congestiones caput versus proficiscuntur.

§. MCCCCXXIII.

Ob qualitatem locorum corporis, quibus in phrenitide inflammatio adhæret (§. 1418.), febris ista admodum gravibus sanguinis congestionibus ad caput stipata erit. Intelligendæ hinc jam erunt rationes eorum phænomenorum, quæ in hujus febris historia recensentur (§§. 1419 & 1420.)

§. MCCCCXXIV.

Phrenitidis signa pathognomica sufficientia constabunt ex signis febris inflammatoriæ in genere (§. 1416.), & phænomenis illis in ægrotante simul deprehensis, quæ febris hujus historia in se continet (§§. 1419 & 1420.); e quibus præcipue notari merentur productiones vasorum turgidorum ad tempora & subsultus arteriarum ibidem æque, ac circa collum sitarum.

§. MCCCCXXV.

Prognosi vero in eadem febre fatis respondere poterunt principia, quæ ad §. 1417. jam existant; considerato hic simul momento illo, quod enarratur ad §. 1420. *numer. 5.*

CAPUT CXXV.

DE

ANGINA VERA.

§. MCCCCXXVI.

Angina vera dicitur ea febris inflammatoriæ species, quæ connexa est cum inflammatione laryngis, pharyngis, vel aliarum iisdem vicinarum partium intra fauces contentarum.

§. MCCCCXXVII.

In angina vera, teste observatione, sequentia prodire solent symptomata.

I. Dolor ardens in faucibus, tandemque plenaria impotentia deglutiendi.

II. Faciei insolitus rubor ac inflatio.

III. Vasa quoque circa tempora turgescere, immo sæpius ophthalmiæ indicia admodum conspicua fieri videntur.

IV. Raucitas, non numquam etiam vocis clangores.

V. Tantæ sæpius difficultates circa respirationem, ut suffocandi periculum immineat.

VI. Convulsiones haud infrequentes, nec rara deliria, eaque sāt gravia.

VII. Solutio morbi intra unum septenarium, & quidem more huic febrium generi consueto (§. 1414.) plerumque fieri solet. Quibus insuper addenda erunt, tamquam specialia; sputum cruentum, narium hæmorrhagiæ, hæmorrhoidam fluxus in feminis excretiones sanguinis e genitalibus; utpote quo excretionum genere inflammationis discussio hic perfici solet. Obortum hic vero abscessum, vel scirrhum sequi haud raro solent ulcera pessimæ indolis.

§. MCCCCXXVIII.

Factis gravibus sanguinis congestionibus ad ea loca corporis, quæ inflammantur in anginæ affectu (§. 1426.); necessaria quoque ibidem erit inflammatio satis vehemens, & quidem ob similes rationes, quæ adducuntur in §. 1421. A causis itaque validas congestiones sanguinis producentibus circa laryngem, pharyngem, vel etiam partes alias iisdem vicinas, contentas tamen intra fauces, anginæ veræ ortum derivare licebit (§. 1426.)

§. MCCCCXXIX.

Exinde jam intelligi poterit (§. anteced.), quare nimirum observationes multoties docuerint, hanc febrem accessisse morbis catarrhalibus, morbis pul-

monum, iisque præcipue, qui gravibus humorum congestionibus, ibidem factis, ortum suum debent; colli etiam luxationibus; tandemque faucium variis læsionibus; nec non illarum irritationibus multiplicibus, modo per clamores, modo per corporum rodentium ad easdem admissiones, vel quacumque alia ratione factis?

§. MCCCCXXX.

Cognitis earum partium, quæ in hac febre inflammantur (§. 1426.), conditionibus, una cum inflammationis magnitudine ac modo, quo illa solvitur; haud difficulter intelligere licebit rationes eorum phænomenorum, quæ in historia anginæ veræ enarrantur (§. 1427.)

§. MCCCCXXXI.

Anginæ veræ signa pathognomica sufficientia esse poterunt ea, quæ generatim feбри inflammatoriæ (§. 1416.) competunt; his insuper accedente doloris ardentis in faucibus perceptione (§. 1427. *numer. 1.*)

§. MCCCCXXXII.

Ad prognosin vero in eadem febre cognoscendam sufficient principia, quæ exponuntur ad (§§. 1417 & 1427. *numer. 7.*)

CAPUT CXXVI.

DE

PERIPNEUMONIA.

§. MCCCCXXXIII.

Peripneumonia est febris inflammatoria, connexa cum inflammatione pulmonum.

§. MCCCCXXXIV.

Præter communia cum aliis febribus inflammatoriis symptomata (§. 1414.), sequentia insuper adesse in ista febre deprehenduntur.

I. Vertiginis incommoda, dolores capitis.

II. Insignes anxietates circa præcordia.

III. Respiratio continuo dolorifica & tussica.

IV. Hisce sæpius accedere solent deliria.

V. Plerumque contingere solet, ut febris ista intra unum septenarium solvatur; idque modo aliis febribus inflammatoriis sollemni. In specie hic notari merentur sputa cruenta, quæ circa diem quartum inchoari & diebus sequentibus continuari solent; & quidem eo cum effectu, ut, rejectionibus istis sanguineis tussiendo magis promotis, dolores in pectore imminui ac inflammationis discussæ phænomena magis prodire videantur.

§. MCCCCXXXV.

Sequentis conditionis homines peripneumoniarum obnoxii fieri observantur.

I. Qui in aëre humido, frigido, calido & sicco magis versantur.

II. Qui violentas pectoris concussiones admittunt.

III. Qui renissus validos sub oneribus gestandis adhibent.

IV. Qui sævientibus ventis validos corporis motus exercent.

V. Quibus gravissimæ vexationes ab angina oboriuntur.

V. Quibus chylus admodum viscidus feceratur.

VII. Quibus tandem morbi alii pulmonum oboriuntur.

§. MCCCCXXXVI.

Sub conditionibus, in §. anteced. enarratis, peripneumoniarum ortus fieri poterit; hic præcipue concurrentibus illis conditionibus corporis, sub quibus generatim febris inflammatoria accendi solet (§§. 1411. 1412 & 1433.)

§. MCCCCXXXVII.

Inflammatione in peripneumonicis soluta per scirrhum vel abscessum, oriuntur topi vel vomiti.

æ pulmonum (§§. 290 & 291.) Tunc igitur horum morborum chronicorum, qui in casu nunc modo proposito ortum suum debent præcedenti morbo acuto, effectus considerare conveniet, jam supra explicatos in peculiaribus capitibus.

§. MCCCCXXXVIII.

Quia in peripneumonia inflammatio pulmones occupat [§. 1433.]; ideoque impedimenta hic adfunt, quo minus libere transeat sanguis per istud viscus, tamquam respirationis organon; hinc jam satis constare poterit de ratione necessaria respirationis dolorificæ & anxietatum circa præcordia in peripneumonicis [§. 1424. *numer. 2. & 3.*]

§. MCCCCXXXIX.

Peripneumonix signa pathognomica sufficientia cognoscuntur ex signis febris inflammatorix in genere [§. 1416.], nec non ex anxietatibus circa præcordia simul deprehensis, una cum dolore ardente, qui continuus est in pectore, atque etiam sub brevi respiratione ibidem ab ægrotante percipitur [§. anteced.]

§. MCCCCXL.

Ratione vero prognosis in febre peripneumonica; tunc huic scopo satis inservire poterunt principia, quæ exstant ad [§§. 1417. 1424. *numer. 5. & 1427.*]

CAPUT CXXVII.

DE

PLEURITIDE VERA.

§. MCCCCXLI.

Pleuritis vera est febris inflammatoria, connexa cum inflammatione in pleura.

§. MCCCCXLII.

Præter generalia febris inflammatoriæ symptomata [§. 1414.], ea insuper in pleuritide vera prodire observantur.

I. Capitis dolores intensioris gradus sæpius adesse solent.

II. Dolor ille ardens, qui ad loca inflammata suboritur, primum ad mamillarum vicinitatem percipi, mox vero locum suum mutare videtur; facta sui extensione modo superius, modo inferius.

§. MCCCCXLIII.

Febri pleuriticæ homines sequentis indolis, ut observationes docent, obtemperare coguntur.

I. Quibus admodum validæ pectoris concussiones, aut causæ variæ oboriuntur, quæ productioni gravium sanguinis congestionum ad thoracem sufficere possunt.

II. Quibus id contingit, ut frigoris admissiones fiant ad pectus valdopere calens.

III. Citioris efficaciae solent jam esse nunc modo annotata momenta, sub accessione unius atque alterius conditionis, quae febris inflammatoriae generatim producendae fauet [§§. 1411 & 1412.]

§. MCCCCXLIV.

A corporis humani conditionibus, in §. anted. enarratis, derivare licebit ortum pleuritidis verae (§. 1441.)

§. MCCCCXLV.

Quoniam inflammatio exigui ambitus se mox ad majus spatium extendere potest (§. 409.); hinc jam patebit ratio phaenomeni, annotati ad §. 1441. *num.* 2.

§. MCCCCXLVI.

Partes inflammatæ dolent; quibus insuper extensis, causæ doloris ibidem magis incrementum (§. 196.) Necesse ideoque erit, ut sub ampla thoracis dilatatione pleuriticus majora augmenta doloris in pectore percipiat; e contraria parte se magis ab illo levatum fieri sentiat sub brevi respiratione.

§. MCCCCXLVII.

Signa pathognomica sufficientia pleuritidis verae esse poterunt signa febris inflammatoriae in genere (§. 1416.), una cum doloris ardentis ad pectus existentia, illiusque levamine, sub brevi respiratione percepto (§. anted.)

§. MCCCCXLVIII.

Inveniendæ vero prognosi in eadem febre satis erunt accommodata principia, quæ indicantur ad §. 1417.

CAPUT CXXVIII.

DE

PARAPHRENITIDE.

§. MCCCCXLIX.

P*araphrenitis* est febris inflammatoria, connexa cum inflammatione diaphragmatis.

§. MCCCCL.

Observationes docent, paraphrenitidi sequentia symptomata magis esse propria.

I. Spasmus periphericus, quo febris hujus invasiones fiunt, tanti sæpius esse solet gradus, ut frigus inde satis validum producat.

II. Mox insequitur æstus supra modum augmentus, cum delirio perquam acuto.

III. Ægrotantes de dolore ardente, quem sub scrobiculo cordis & transversim ad pectus percipiunt, adeo conqueruntur, ut eum vix perferri posse putent.

IV. Iste dolor mirum in modum augetur sub inspiratione, tussi, sternutatione, repletione ven-

triculi, vomitu, intestinorum distensione, tandemque abdominis compressione.

V. Respiratio brevis est ac celer.

VI. Haud raro prodeunt vomitus & singultus.

VII. Reliqua hic etiam locum habent, quæ jam continentur in historia februm inflammatarum in genere (§. 1414.) Quibus insuper accedit momentum sequens, quod in specie ad paraphrenitidis solutionem referendum erit. Fieri nempe solet, ut in paraphreniticis vomitus oboriatur, quo materia puri similis rejicitur, cum morbi levamine apparente.

§. MCCCCLI.

Huic febris inflammatoriæ speciei subjici observantur homines, quibus, præter generales illas conditiones (§§. 1411 & 1412.), oboriuntur caussarum violentarum admissiones ad eam partem, quæ in paraphrenitide afficitur; aut quibus inflammationes ad ventriculum & hepar eveniunt.

§. MCCCCLII.

Sub conditionibus, in §. anteced. descriptis, paraphrenitis facile oriri poterit; sed & in vicem versam ab eadem febre originem quandoque ducere licebit inflammationis in ventriculo & hepate (§§. 409 & 1449.)

§. MCCCCLIII.

Paraphrenitis adeoque pertinebit ad morbos opinionione vulgari frequentiores (§. anteced.)

§. MCCCCLIV.

Ob incrementa caussarum doloris, quæ ad partem inflammata ex ejus compressione aut distensione accedunt; ipsius quoque doloris exacerbationes necessariæ erunt. Hinc jam patebit ratio phænomeni, quod indicatur ad §. 1450. *num. 4.*

§. MCCCCLV.

Quum etiam evitare soleamus ea, quæ nobis dolorem magis exacerbare videntur; cognoscere inde licebit rationem, cur respiratio brevis & celer esse observetur in paraphreniticis (§. 1450. *numer. 5.*)?

§. MCCCCLVI.

Posita inflammatione in diaphragmate ad illam præcipue partem, quam penetrat oesophagus; fieri poterit, ut singultus caussis (§. 298.) ex insuper accedant, quæ vomitum producere valebunt (§. 308.) Unde jam ortus phænomenorum, annotatorum ad §. 1450. *numer. 6.*

§. MCCCCLVII.

Paraphrenitidis signa pathognomica sufficientia esse poterunt signa febris inflammatoriæ in genere [§. 1416.], una cum dolore ardente ad loca diaphragmatis percepto [§. 1449.], eodemque magis aucto sub inspiratione, tussi, aut compressione abdominis [§. 1450. *numer. 4.*]

§. MCCCCLVIII.

Cognitioni vero prognosis in eadem febris inflammatoriæ specie sufficient jam exposita ad §§. 1417 & 1450. *numer.* 7.

CAPUT CXXIX.

DE

H E P A T I T I D E.

§. MCCCCLIX.

H*Epatitis* vocatur ea febris inflammatoriæ species, quæ connectitur cum inflammatione hepatis.

§. MCCCCLX.

Docent observationes, hanc febrem sequentibus symptomatibus incedere.

I. Invasio febrilis quandoque fit cum frigoris validi sensu.

II. Sequitur deinceps æstus vehementissimus.

III. Neque deficiunt mentis alienationes, quandoque satis notabiles.

IV. Ægrotantes dolorem ardentem in hypochondrio dextro, circa costam septimam vel octavam perferunt, magis exacerbatum sub inspiratione, tussi, vel repletionem ventriculi.

V. Quandoque nausea & vomitus biliosi proveniunt.

VI. Ægrotantium adfectus sæpius ictericus esse videtur.

VII. Haud raro cum hepatitide aliorum quoque viscerum inflammationes conspirant.

VIII. Inflammationis solutionem per modum discussionis hic sæpius afferre solent hæmorrhoides fluentes, vel in feminis excretiones sanguinis ex utero.

IX. Præter hæc vero notanda hic quoque erunt reliqua momenta, descripta in generali febrium inflammatoriarum historia [§. 1414.]

§. MCCCCLXI.

Ex observationibus constitit, hepatitidem facile oboriri hypochondriacis ac hysteriis, eandemque insequi infarctum vel scirrhum hepatis, nec non causas externas violentas varii generis, admissas ad hypochondrium dextrum; præcipue hic accedentibus corporis conditionibus, sub quibus in genere febris inflammatoria produci solet [§§. 1411 & 1412.]

§. MCCCCLXII.

Descriptæ in §. anteced. conditiones corporis apprimè respondent ortui hepatitidis [§. 1459.]

§. MCCCCLXIII.

Inflammatione magis oborta ad hepatis partem concavam, aut circa vesicam felleam, vel poros biliaris; fieri tunc poterit, ut ventriculus ad sui extremitatem dextram & marginem anteriorem ma-

gis comprimatur; bilis cystica copiosius in intestinum duodenum effundatur; ad poros vero biliarios majores accedant compressiones. Unde nausea, vomitus, icterus [§. 308 & 346.] Quare jam satis constare poterit de ratione phænomenorum, indicatorum ad §. 1460. *numer.* 5 & 6.

§. MCCCCLXIV.

Vena portarum sanguinem suum in hepar revehit, non destituta nexu cum vasis aliorum viscerum abdominis. Cognosci ideoque poterit inflammationis in aliis visceribus abdominalibus ex hepatitide ortus [§. 1460. *numer.* 7.]

§. MCCCCLXV.

Ob similes rationes, quæ exponuntur in §. 1454. necesse erit, ut doloris exacerbationes ad hypochondrium dextrum in hepatiticis sub inspiratione, tussi, aut repletionem ventriculi proveniant [§§. 1459 & 1460. *numer.* 4.]

§. MCCCCLXVI.

Signa pathognomica sufficientia hepatitidis redibunt ad signa febris inflammatoriæ in genere [§. 1416.], & dolorem ardentem circa costam septimam vel octavam hypochondrii dextri, magis exacerbatum sub inspiratione [§. 1460. *num.* 4.]; his non numquam accedente colore icterico ægrotantium ex hac febre [§. 1460. *numer.* 6.]

§. MCCCCLXVII.

Ad prognosin vero in eadem febre cognoscendam satis te juvare poterunt ea, quæ significantur ad §§. 1417. 1460. *numer.* 7. & 8.

CAPUT CXXX.

DE

SPLEENITIDE.

§. MCCCCLXVIII.

S*plenitis* est febris inflammatoria, cum inflammatione lienis connexa.

§. MCCCCLXIX.

In hac febris specie provenire deprehenduntur symptomata sequentia.

I. Invasio febris plerumque fieri solet cum frigoris sensu satis conspicuo.

II. Æstus subsequens non adeo insignis gradus videtur esse.

III. Non numquam deliria interveniunt, sed parvi momenti.

IV. De dolore ardente in locis hypochondrii sinistri conqueruntur ægrotantes; eoque magis aucto sub inspiratione, aut ventriculi vel intestinorum distensione.

V. Vomitus cruentus, hæmorrhoidum fluxus, nec non in feminis sanguinis excretiones e genitalibus.

talibus hic suboriri solent; idque cum eventu febris salutari.

VI. Sed ea hic quoque valebunt, quæ jam de febre inflammatoria generatim annotata sunt (§. 1414.).

§. MCCCCLXX.

Splenitidi obnoxium fieri observatur illud hominum genus, quod, præter generales illas conditiones (§§. 1411 & 1412.), causas varias ad se admittit, a quibus hypochondrium sinistrum contunditur, comprimitur, constringitur, imo etiam valdopere relaxatur; quod lienis infarctum aut scirrhum fovet; nec non a passionibus hypochondriacis ac hystericis vexatur.

§. MCCCCLXXI.

Recensitæ in §. anteced. conditiones corporis satis erunt accommodatæ ortui splenitidis (§. 1468.)

§. MCCCCLXXII.

Signa pathognomica sufficientia splenitidis erunt signa febris inflammatoriæ in genere [§. 1416.], nec non dolor ardens, isque sub inspiratione magis exacerbatus, quem ad hypochondrium sinistrum percipiunt ægrotantes ex ista febre [§. 1469. numer. IV.]

§. MCCCCLXXIII.

Sed hic etiam facile inveniri poterit prognosis; iis nempe principiis ad casum præsentem recte applicatis, quæ exhibentur in §§. 1417 & 1469. *numer. 5.*

CAPUT CXXXI.

DE

NEPHRITIDE.

§. MCCCCLXXIV.

N*ephritis* est febris inflammatoria, connexa cum inflammatione renum.

§. MCCCCLXV.

Hæc species febris inflammatoriæ, ut observationes testantur, præter communia cum aliis ejusdem generis febrium speciebus symptomata [§. 1414.], sequentem habet conditionem.

I. Levis quidem horror est, quo invasio febrilis fit, eum tamen excipere solet æstus satis molestus.

II. Conqueruntur ægrotantes de dolore ardente ad regionem lumbarem.

III. Prodire hic etiam solent varia incommoda circa ventriculum ac intestina; neque minus spasmus Paracelsi fixus, malum ischiadicum, lumbago, ischuria, dysuria, stranguria.

IV. Mictus cruentus non numquam suboritur, tamquam excretio accommodata, inflammationi in renibus discutiendæ. Quod si vero ea magis in abscessum transisse videatur, tunc calculi ibidem prodire solent.

V. Ea tandem momenta hic quoque consideranda erunt, quæ generatim exposita sunt in febrium inflammatoriarum descriptione [§. 1414.].

§. MCCCCLXXVI.

Docent porro observationes, quod nephritidi subijci soleant ea hominum corpora, quibus, præter conditiones ad febrem inflammatoriam generatim producendam idoneas [§§. 1311 & 1312.], sequentium una atque altera attribui potest. Quorsum nempe pertinebunt incommoda spastica ab hæmorrhoidibus & calculis renum: abusus Veneris & diueticorum; caussarum diversarum externarum, quæ violenter agunt, ad regionem lumbarem admissiones; in maribus gonorrhœæ præsertim malignæ, longa duratio ac vehementia; in feminis vero fluxibus albi, imprimis maligni, pertinacia, nec non catameniorum ataxia.

§. MCCCCLXXVII.

Ab enarratis in §. anteced. subjectorum determinationibus deducere licebit nephritidem [§. 1474.].

§. MCCCCLXXVIII.

Habita ratione situs, quem renes habent, & nexus, qui inter eos atque alias partes intercedit:

intelligi tunc facile poterit ortus illorum symptomatum, quæ in nephritide prodire solent, atque indicantur ad §. 1475. *numer. III.*

§. MCCCCLXXIX.

Nephritidis signa pathognomica sufficientia constabunt ex signis febris inflammatoriæ in genere (§. 1416.), & doloris ardentis circa regionem lumbarem perceptione (§. 1475. *numer. II.*).

§. MCCCCLXXX.

De signorum vero prognosticorum in eadem febre rationibus constare poterit ex §§. 1417 & 1475. *numer. IV.*

C A P U T C X X X I I.

D E

FEBRE INFLAMMATORIA UTERINA.

§. MCCCCLXXXI.

Febbris inflammatoria uterina dicitur ea species febris inflammatoriæ quæ connexa est cum uteri inflammatione.

§. MCCCCLXXXII.

In hac febre sequentia observare licet symptomata.

I. Ad frigoris usque productionem spasmus periphericus sub febris invasione comparet.

II. Sequitur deinde æstus, isque vehementissimus; una cum deliriis fatis conspicuis.

III. Ægia conqueritur de dolore ardente, quem vel in inguine, vel circa internam ossis sacri superficiem percipit.

IV. Quandoque hic adsunt obstructiones alvi, dolores intestinorum, dysuria, stranguria, ischuria.

V. Anxietates præcordiorum, cardialgia, malum ischiadicum, spasmus Paracelsi fixus, lumbago, atque alia spasmorum incommoda ægram non parum torquent.

VI. Quibus haud raro accedere solet temporibus nostris purpura.

VII. Hæmorrhoidum fluxus, vel sanguinis ex utero excretiones hic oboriri solent. in commodum inflammationis, per discussionem solvendæ.

VIII. Sed & reliqua momenta hic locum habebunt suum, quæ de febribus inflammatoriis generatim annotata prostant ad §. 1414.

§. MCCCCLXXXIII.

Incidere in hanc febrem observantur feminæ sequentis indolis.

I. Quæ quidem admodum falaces sunt, Veneris tamen usu carere coguntur.

II. Quæ suppressione fluxus menstrui laborant.

III. Quæ fluore albo, præcipue maligno inquinantur.

IV. Imprimis puerperæ, quibus fluxus lochialis non rite succedit; vel quæ partum valde difficilem expertæ erant; aut quibus etiam abortus perpetiendus erat.

V. Quæ aphrodisiacis, aut emmenagogis fortioribus abutuntur; vel quibus etiam causæ aliæ externæ violentæ ad loca uterina admittuntur.

VI. Neque etiam prætervidenda hic erunt ea momenta, quæ jam proposita exhibentur in §§. 1411 & 1412.

§. MCCCCLXXXIV.

Fieri potest, ut propositis in §. anteced. feminarum conditionibus originem suam debeat febris inflammatoria uterina (§. 1481.).

§. MCCCCLXXXV.

Pro locorum inflammatorum in utero differentia, necesse erit, ut in hac febre doloris ardentis perceptiones modo circa inguen, modo circa internam ossis sacri superficiem, una cum symptomatibus diversis, proveniant (§. 1482. *numer. 3. §.*)

§. MCCCCLXXXVI.

Ex §. 1483. apparet, fieri posse, ut in casibus febris inflammatoriæ uterinæ generetur in ut o materia putridæ indolis; cujus delatione facta ad massam humorum, hæc quoque corrumpatur.

ur, atque eo modo febris maligna (§. 1339.)
uboriatur. Exinde jam patebit generatim ratio
phænomeni annotati ad §. 1482. *numer. VI.*

§. MCCCCLXXXVII.

Poterit etiam facile fieri, ut ex inflammatione uteri,
soluta per abscessum vel scirrhum, oriantur ibidem
ulcera pessimæ indolis & cancro similia (§§.
433. 443.)

§. MCCCCLXXXVIII.

Signa pathognomica sufficientia febris inflamma-
toriæ uterinæ constabunt ex signis febris inflamma-
toriæ in genere (§. 1416.) nec non ex doloris ar-
dentis ad loca uterina, quæ ad §. 1482. *numer. 3.*
describuntur, perceptionibus.

§. MCCCCLXXXIX.

Signis tandem prognosticis, in eadem febre
inveniendis, sufficient prolata ad §§. 1417. 1482.
numer. 6 & 7. 1486 & 1487.

CAPUT CXXXIII.

DE

FEBRE INFLAMMATORIA EX INFLAMMATIONE VESICÆ ET URETERUM.

§. MCCCCXC.

Febbris inflammatoria vesicæ & ureterum est illa febris inflammatoriæ species, quæ cum partium nunc modo dictarum inflammatione connectitur.

§. MCCCCXCI.

Hanc febris inflammatoriæ speciem sequentibus incedere symptomatibus, observationes testantur.

I. Atque hic sæpius fieri solent invasiones febriles cum tanto spasmo peripherico, ut validi frigoris sensus prodeat.

II. Sequuntur deinde satis gravia incommoda æstus.

III. Aegrotantes conqueruntur de dolore ardente ad pubem.

IV. Adfunt stranguria, dysuria, ischuria, tenesmus, alvi obstructions; una cum variis incommodis intestinorum ac ventriculi, ut colica, cardialgia, vomitu.

V. Solutio inflammationis per discussionem hic quandoque perficitur ope mictus cruenti, vel

hæmorrhoidum fluentium, vel excretionis sanguineæ ex utero.

VI. Conveniet præterea hoc etiam loco notare generalia febrium inflammatoriarum (§. 1414)

§. MCCCCXCII.

Præter descriptæ conditionis homines (§§ 1411 & 1412.), huic feбри imprimis subijci observantur hæmorrhoidarii fenes; ad mictum cruentum proclives; diureticis abutentes; nephritide calculosa, gonorrhœa maligna, aut fluore albo maligno laborantes.

MCCCCXCIII.

Sub conditionibus, in §. anteced. descriptis facile oriri poterit inflammatio in vesica & ureteribus; atque ideo febris ejusdem nominis (§. 1490.)

§. MCCCCXCIV.

Ex consideratione decente situs partium in hac febre inflammatarum (§. 1490.), earumque nexu cum aliis, satis intelligi poterunt rationes illorum symptomatum, quæ significantur ad §. 1491. numer. 4.

§. MCCCCXCV.

Ortæ febris inflammatoriæ ex vesicæ & ureterum inflammatione signa pathognomica sufficientia cognoscuntur ex deprehensis signis febris inflammatoriæ in genere (§. 1416.); iisdem simul junctis ad pubem doloris ardentis incommodis (§. 1491. numer.

3.), imo etiam symptomatibus illis, quæ describuntur ad §. citat. *numer.* 4.

§. MCCCCXCVI.

Cognitionem vero signorum prognosticorum sufficientium in eadem febris inflammatoriæ specie tibi suppeditare poterunt ea, quæ exstant ad §§. 1416. 1491. *numer.* 5.

C A P U T CXXXIV.

D E

FEBRE INFLAMMATORIA INTESTINALI.

§. MCCCCXCVII.

F*ebbris inflammatoria intestinalis* vocatur ea febris inflammatoriæ species, quæ cum intestinorum inflammatione connectitur.

§. MCCCCXCVIII.

Testantur observationes, in hac febre sequentia prodire symptomata.

I. Aggressiones fieri solent cum spasmo peripherico tanti gradus, ut hic non deficient frigoris incommoda; ea mox insequente æstu acutissimo.

II. Doloris urentis in intestinis perceptiones, angustis prius terminis circumscriptæ, mox amplius extenduntur.

III. Non desiderantur anxietates præcordiorum, obstructions alvi, passio iliaca, cardialgia, vomitus, diarrhoea.

IV. Vix uno septenario ad sui decursum utitur, & solvi quandoque solet per diarrhoeam modo cruentam, modo etiam purulentam.

V. Ea tandem notanda hic quoque erunt, quæ generatim exposita sunt in febrium inflammatoriæ historia (§. 1414.)

§. MCCCCXCIX.

Hanc febrem illis hominibus sæpius accidisse, observationes docuerunt, quorum corporibus conditiones sequentes, præter indicatas in §§. 1411 & 1412. attribuere licuit. Quorsum nempe spectabunt.

I. Venenorum ad ventriculum ac intestina de-lationes; purgantium drasticorum usus; contusiones atquæ aliæ causæ externæ violentæ, ad intestina admissæ, vel aliarum ibidem contentarum materiarum.

II. Acrimonia bilis, aut succi, qui in intestinis fecernitur, vel aliarum ibidem contentarum materiarum.

III. Alvi obstructions, pertinacissimæ.

IV. Mesenterii obstructions, vel spasmodorum atrociora circa negotium hæmorrhoidale, vel menstruum.

§. MD.

Sub conditionibus, quæ in §. anteced. propo-

nuntur, intestinorum inflammatio, & per eam febris ejusdem nominis oriri facile poterit [§. 1497.]

§. MDI.

Ratione illorum symptomatum, quæ ad §. 1498. *numer.* 3. enarrantur: ea facili studio cognoscere licebit ex inflammationis relatione ad intestina, tamquam partes, quibus causa inest febris hujus [§. 1497.]

§. MDII.

Signa pathognomica sufficientia in hac febre componuntur ex signis febris inflammatoriæ in genere [§. 1416.] nec non doloris ardentis in canali intestinorum perceptionibus [§. 1498. *numer* 2.]

§. MDIII.

Quod denique ad prognosin in eadem febre attinet: huic etiam scopo sufficere poterunt principia, quæ jam indicata exhibentur ad §§. 1417 & 1498. *numer.* 4.

CAPUT CXXXV.

DE

CAUSO.

§. MDIV.

C*Ausus* & febris inflammatoria, connexa cum ventriculi inflammatione. Dicitur etiam *febris ardens per eminentiam talis*.

§. MDV.

Docent observationes, conditionem symptomatum, quæ in hac febris inflammatoriæ specie provenire solent, ad momenta redire sequentia.

I. Ne hic quidem spasmi peripherici ille gradus deficit, sub quo invasio febrilis cum frigoris sensu fit.

II. Subsequitur æstus intensioris gradus, cum deliriis, quæ interveniunt, perquam acutis.

III. Conqueruntur ægotantes de dolore, quem sub scrobiculo cordis percipiunt, admodum urente ac pungente.

IV. Concurrent cardialgia, singultus, fitis inextinguibilis, vomitus, a quo doloris sub scrobiculo cordis exacerbationes majores fieri videntur.

V. Quandoque etiam contingit, ut dolor ille ardens, sub scrobiculo cordis tantum perceptus, ad oesophagum quoque transeat; angina producat; lingua appareat aspera, obsita furunculis, quos aphthas vocare solent.

VI. Neque insolitus hic esse deprehenditur inflammationis in ventriculo ad intestina transitus; quo facto, majora ad febrem accedunt augmenta, eaque tunc etiam symptomata fieri solent conspicua, quæ in historia febris inflammatoriae intestinalis descripta prostant [§. 1498.]

VII. Brevissimi decursus hæc febris inflammatoriae species est; utpote quæ vix unum septenarium superat, & pro more aliarum febrium inflammatarum solvi solet.

VIII. Hoc denique loco valorem quoque habebunt suum ea, quæ in generali febrium inflammatarum descriptione continentur [§. 1414.]

§. MDVI.

Ad eas porro conditiones corporis quod attinet, sub quibus hanc febris inflammatoriae speciem provenisse, observationes demonstrarunt: præter ea, quæ in genere ad febrem inflammatoriam spectant [§§. 1411. & 1412.), sequentia in specie notanda erunt momenta.

I. Accessiones caussarum, quæ inflammationem in intestinis, una cum febre, quæ ideo oriri potest, producere valent (§§. 1499 & 1500.)

II. Bilis, aut aliarum varii generis materiarum acrium in ventriculo nimiae coacervationes ac commorationes.

III. Febrium malignarum accessiones ad ventriculi cruditates.

§. MDVII.

Descriptæ in §. anteced. conditiones corporis sufficere poterunt, ad causi ortum inde derivandum (§. 1504.)

§. MDVIII.

Sedem inflammationis in causo suppeditat ventriculus (§. 1504.). Quod si itaque ad partis hujus affectæ situm & nexum, quo illa cum aliis gaudet; decenter respicias, faciles tunc erunt tibi ad intelligendum rationes eorum phænomenorum, quæ in causo prodire observantur (§. 1505 *numer.* 3 - 6.]

§. MDIX.

Fieri quandoque poterit, ut vomitus salutarem causi solutionem promittat; tempestive factis per hanc excretionem rejectionibus vel sanguinis, vel puris, vel bilis, vel alius materiæ acris, in ventriculo hærentis (§§. 1506 & 1507.].

§. MDX.

Causi signa pathognomica sufficientia constabunt ex signis febris inflammatoriæ in genere [§. 1416.] nec non ex perceptionibus doloris ardentis, oborti prius sub scrobiculo cordis, deinceps vero ad oesophagum, vel intestinorum loca [§. 1505. *numer.* 3. 5. & 6.]

§. MDXI.

Prognosi tandem, in eadem febre inveniendæ, eorum principiorum, quæ commemorantur ad §§. 1417 & 1509. recta applicatio sufficiet.

CAPUT CXXXVI.

DE

FEBRIBUS INFLAMMATORIIS EX OPH-
THALMIA, OTALGIA, ET ODONTALGIA
ORTIS.

§. MDXII.

A conditionibus partium, quibus inflammatio adhæret, proficiscuntur febrium inflammatoriæ species [§. 1415.]; id quod etiam tot exempla probant, in peculiaribus capitibus hucusque prolata. Supponit vero ophthalmia oculorum inflammationem [§. 354.]; neque dubitari potest, quin etiam à productionibus inflammationis ad auri, vel circa dentium loca; dependeat otalgia, vel odontalgia [§. 358.]; vel ad eadem incommoda, licet ab aliis causis proficisci videantur, accedat tandem inflammatio [§. 1210.]. Fieri adeoque poterit, ut febres, in casibus nunc modo dictis obortæ, inflammatoriæ in genere numerum subeant, earumque species quasdam peculiæres constituent; quæ ad analogiam græcam dici possent *ophthalmitis*, *otitis* & *odontitis*.

§. MDXIII.

Ex observationibus constitit; in hisce febrium inflammatoriæ speciebus præter illa, quæ cum reliquis communia sunt [§. 1414.] sequentia insuper produci symptomata.

I. Hor-

I. Horrore magis vago invadere videntur febres istæ.

II. Æstus etiam, qui deinceps insequitur, volaticus esse apparet.

III. Adsunt sæpius cephalalgia sat graves, una cum deliriis intercurrentibus.

IV, Dolor ille ardens, tamquam inflammationibus proprius, pro ratione partis inflammatae, modo in oculo, modo in aure, modo circa dentium loca percipitur:

§. MDXIV.

Deprehenduntur eadem febrium inflammatoriarum species illis oboriri, quibus, præter indicatas in §§. 1411 & 1412. conditiones corporis, accidere solent causæ variæ, tam internæ, quam externæ, producentes humorum congestiones in partibus; quæ ab inflammatione in hisce febribus occupantur (§. 1512.) Quo insuper loco repetere conveniet ea, quæ de hoc argumento disputata jam prostant in peculiaribus capitibus de ophthalmia, otalgia ac odontalgia.

§. MDXV.

Fieri poterit, ut sub conditionibus, in §. anteced. propositis, oriantur species febrium inflammatoriarum supra dictæ (§. 1512.)

§. MDXVI.

Si in hisce febrium inflammatoriarum speciebus (§. 1512.) solutio inflammationis alio modo, quam

per discussionem, contigerit (§§. 414 & 1414.); facile tunc fieri poterit, ut ophthalmiam excipiat cæcitas (§§. 354 & 357.); otalgiam sequatur surditas (§§. 358 & 360); odontalgia tandem post se trahat cariem dentium, vel ulcera fistulosa in locis sibi vicinis (§§. 46. 47. 201 & 461.) Quod etiam cum observationibus probe convenit.

§. MDXVII.

Signa pathognomica sufficientia in hisce febrium inflammatoriarum speciebus (§. 1512.) reducere licebit ad signa febris inflammatoriæ in genere (§. 1416.); cum iisdem simul connexis perceptionibus doloris ardentis in illis partibus, quarum inflammationem nunc modo dictæ febres sibi vindicant (§§. 1512 & 1513. *numer. 4.*)

§. MDXVIII.

Ad prognosin denique in iisdem febrium inflammatoriarum speciebus sufficientia quoque erunt ea principia, quæ exhibentur in §§. 1417 & 1516.

CAPUT CXXXVII.

DE

FEBRIBUS INFLAMMATORIIS CUM ERYSIPELATE ET PHLEGMONE CONNEXIS.

§. MDXIX.

CUM erysipelate vel phlegmone (§. 221.) connexæ esse poterunt febres, quæ sub inflammatoriarum genere, tamquam peculiare species, continebuntur (§§. 1410 & 1415.); prouti compluribus exemplis, quæ jam in singularibus capitibus, hætenus pertractatis, exstant, idem quoque comprobatur. Solent istæ febrium inflammatoriarum species communiter quidem vocari *erysipelaceæ* & *phlegmonodeæ*; quæ vero analogiæ Græcæ magis convenienter appellandæ forent *erysipelaticæ* & *phlegmonicæ*.

§. MDXX.

Febris erysipelaticæ aut phlegmonicæ symptomata, præter ea, quæ jam annotata continentur in generali febrium inflammatoriarum descriptione [§. 1414.], redibunt, ut observationes testantur, ad momenta sequentia.

I. Horror vagus est, quocum invasiones febriles hic fieri solent.

II. Æstus, qui deinceps sequitur, magis etiam volaticus esse deprehenditur.

III. Dolor in parte cutis affecta adest urens & pungens.

IV. Quandoque contingit, ut inflammatio magis tendat ad loca corporis interna, externis relictis, quæ prius occupaverat; quo facto, vita ægrotantium non mediocri discrimen subire videtur.

V. Inflammationem hic solutam per abscessum, vel scirrhum, sequi tandem solent ulcera pessimæ indolis.

§. MDXXI.

Quod porro ad eas conditiones corporis attinet, sub quibus nempe istas febrium inflammatoriæ species provenisse, observationes docuerunt; tunc ad ea momenta, quæ generatim exposita jam prostant in §§. 1411 & 1412. insuper accedunt casus vel imminantium, aut jam productorum exanthematum; vel etiam diversarum materiæ translationum, quæ in febribus malignis ad loca quædam externa corporis quandoque fieri solent.

§. MDXXII.

Ortui erysipelatis aut phlegmones [§. 221.], consequenter etiam febris, quæ inde nomen suum fortitur [§. 1519.], satis respondere poterunt enarratæ in §. anteced. conditiones corporis.

§. MDXXIII.

Signa pathognomica sufficientia febris erysipelaticæ aut phlegmonicæ [§. 1519.] conveniunt

cum signis febris inflammatoriae generatim [§. 1416.]; insimul facta ad eadem accessione doloris ardentis & pungentis in cute [§. 1520. numer. 3.]

§. MDXXIV.

De signis vero prognosticis, hoc loco invenien-
dis, satis quoque constare poterit ex §§. 1417
& 1520. numer. 4 & 5.

CAPUT CXXXVIII.

DE

FEBRE VULNERARIA.

§. MDXXV.

F*ebbris vulneraria* dicitur ea febris inflammato-
ria, quæ connexa est cum partium vulnerata-
rum inflammatione.

§. MDXXVI.

Non aliud itaque hominum genus febris vulne-
rariae subjici poterit, quam cui vulnera oborun-
tur [§. anteced.]

§. MDXXVII.

Ad naturam febris vulnerariae eo penitus in-
telligendam, opus erit, ut ea, quæ jam in pecu-
liari capite de vulneribus generatim proposita ex-
stant, simul considerentur [§. anteced.]

§. MDXXVIII.

Sed quia febris vulneraria inflammatoriæ species est, quæ sui originem debet inflammationi, vulneribus supervenienti [§. 1525.]; neque hoc loco negligenda erunt ea, quæ in eo capite pertractata continentur, ubi sermo erat de febrium inflammatoriarum doctrina generali.

§. MDXXIX.

Ob differentiam igitur vulneris ac inflammationis, tam ratione partium, quæ inde afficiuntur, quam etiam ratione gradus, qui circa productum vulnus eidemque junctam inflammationem conspicuus fit; febrium quoque vulnerariarum casus inter se valdopere discrepabunt [§§. 1525-1528.]

§. MDXXX.

Ex §. anteced. simul etiam constabit, fieri posse, ut circa febres vulnerarias oboriantur casus, quos ad unam atque alteram speciem febrium inflammatoriarum, hucusque pertractatarum, facilioris intelligentiæ causa, reducere licebit.

§. MDXXXI.

Febris vulnerariæ [§. 1525.] signa pathognomica sufficientia cognoscuntur in genere ex signis febris inflammatoriæ & vulneris [§§. 423 & 1416.]

§. MDXXXII.

Ad signa vero prognostica, in eadem febre intelligenda, satis quoque accommodata erunt illa principia, quæ indicantur in §§. 429. 1417 & 1530.

CAPUT CXXXIX.

DE

FEBRE CHOLERICA SEU BILIOSA.

§. MDXXXIII.

F*Ebris biliosa*, sive *cholericæ* vocatur febris continua, acuta, eaque connexa cum bilis ad ventriculum ac intestina delationibus & commorationibus nimis.

§. MDXXXIV.

Docent observationes, hanc febrem sequentibus symptomatibus stipatam incedere.

I. Invasio febrilis cum horrore satis notabiliter fieri solet; sub quo sensus quidam incommodus ad ventriculi ac intestinorum loca magis prodire ab ægrotantibus percipitur.

II. *Æstus* deinde sequitur, cum deliriis haud raro intervenientibus.

III. Adfunt anxietates præcordiorum, fœdæ cardialgia, colica, vomitus, diarrhœa.

IV. Sæpius etiam apparent icteri phænomena.

V. Neque infrequentes hic solent esse inflammationes in ventriculo ac intestinis ; quibus subortis , provenient jam febrium inflammatoriarum species quædam , & status ægrotantium multo periculosior tunc fiet.

VI. Intra unum aut duo septenaria hæc febris plerumque decurrit , & solvi solet salutariter per bilis excretiones , factas modo per vomitum , modo per diarrhœam , modo per sudores , modo etiam per mictiones.

VII. Reliqua hic etiam transferantur ex historia febrium continuarum in genere [§. 1406.]

§. MDXXXV.

In hanc febrem illud hominum genus communiter incidere , observationes testantur , quod nimirum sensibile valde est , ac variis causis patet , a quibus sanguinis exæstuationes (produci solent ; quod iracundas animi commotiones , præcipue sub pastu , aut etiam eo tempore admittit , quando in ventriculo ac intestinis copiosæ continentur massæ , quæ admodum facilis fermentationis sunt ; quod denique passionibus hypochondriacis & hystericis , aut aliis similis conditionis incommodis obnoxium est.

§. MDXXXVI.

Conditionibus corporis , in §. anteced. descriptis , attribuere licebit ortum febris cholericæ [§. 1533.]

§. MDXXXVII.

Febris biliosæ symptomata (§. 1534.) intelligi poterunt; habita nimirum ratione partim eorum locorum corporis, quæ a bile imprimis occupantur; partim etiam acrimoniæ bilis ipsius, quæ ob fermentationis accessiones hoc loco majora augmenta capit (§§. 1533. & 1535.)

§. MDXXXVIII.

Signa pathognomica sufficientia febris cholericæ redibunt ad febris continuæ acutæ signa (§. 1408.); cum iisdem simul existentibus sodæ, saporis amaricantis, atque aliis incommodis, circa ventriculum ac intestina a bile productis (§§. 1533. & 1534. *numer.* 3-5.)

§. MXXXIX.

Signorum vero prognosticorum in eadem febre cognitioni satis inservire poterunt illorum principiorum, quæ significantur in §§. 1409. 1533. 1534. *numer.* 5 & 6. & 1537. accuratæ applicationes.

CAPUT CXL.

DE

FEBRE CATARRHALI BENIGNA.

§. MDXL.

F*ebbris catarrhalis benigna* est febris continua, acuta, benigna, connexa cum catarrho (§. 347.)

§. MDXLI.

Docent observationes, huic feбри sequentia symptomata magis esse propria.

I. Invasiones febriles circa tempus vespertinum fiunt, & quidem cum sensu frigoris ac tensionis ad membra & spinam dorsi.

II. Insequitur deinde æstus; hunc jam primo mane excipiunt remissiones a febre, durantes usque ad tempus vespertinum; quo iterum prodire solent exacerbationes febriles.

III. Non deficiunt hinc ea incommoda, quæ necessaria sunt, pro differente catarrhi specie (§. 347.); ac facile intelligi poterunt ex iis capitibus, ubi de hoc argumento supra disputatum erat.

IV. Quandoque etiam concurrunt impedimenta deglutitionis atque anginae incommoda alia; una cum notabili febris incremento.

V. Urinae ægrotantium ex hac febre mucum sibi innatantem exhibent.

VI. Sub quavis remissione febrili largiores excretiones sudoris provenire solent, cum febris decremento subsequente.

VII. Sed & salutari ejusdem febris solutioni respondent frequentes alvi dejectiones, nec non excretiones urinæ saturatæ.

VIII. Hæc ipsa febris plerumque decurrit intra duo septenaria, imo etiam citius.

IX. Quo etiam loca par erit notare ea, quæ continentur in febrium continuarum descriptione generali (§. 1406.)

§. MDXLII.

Quoniam ad febris catarrhalis productionem catarrhus requiritur (§. 1540.); sequitur, necesse omnino fore, ut ad febris hujus naturam recte cognoscendam ratio habeatur eorum omnium, quæ jam in peculiaribus capitibus proposita exstant, in quibus nempe de catarrhi speciebus actum erat. Quo etiam modo simul constabit tam de conditionibus corporis, quod huic feбри obnoxium fieri potest, quam etiam de differentia casuum, qui circa eandem febris speciem oboriri possunt.

§. MDXLIII.

In catarrho non deficiunt ad loca quædam peculiariora corporis seri coacervationes ac restagnationes (§. 347.) Unde facile patebit ratio, quare etiam in febre catarrhali provenire possint anginae incommoda; iisdemque productis febris ipsa augeri videatur; e contraria vero parte salutariter solvi

deprehendatur per evacuationes feri e corpore factas (§§. 1540. 1541. *numer.* 6 & 7.)?

§. MDXLIV.

Signa pathognomica sufficientia febris catarrhalis benignæ constabunt ex signis febris continuæ, acutæ, benignæ; ex catarrhi phænomenis; tandem ex muco, qui urinæ innatat (§§. 1337. 1338. 1339. 1408. 1540 & 1541. *numer.* 5.)

§. MDXLV.

Ad prognosin vero in eadem febre cognoscendam sufficere poterunt ea, quæ notata prostant ad §§. 1409. 1541. *num.* 4. 6-8. 1543.

CAPUT CXLI.

DE

FEBRIBUS MALIGNIS IN GENERE.

§. MDXLVI.

DEprehenduntur quandoque febres continuæ, acutæ indolem morbi maligni præ se ferre; quæ ideo nomen *februm malignarum* sibi vindicabunt.

§. MDXLVII.

Testantur observationes, prodire in febribus magnis, præter jam annotata in §. 1406. phænomena sequentia.

I. Non ita insignis gradus spasmus periphericus est, quo hic fieri solent invasiones febriles. Nam præter horroris ac tensionis ad membra sensum, vix constans aliquod ac validum frigus percipitur; nisi adfuerint simul morbi viscerum, aut partium internarum inflammationes.

II. Horrorem excipit æstus, isque satis moderatus.

III. Jam ante horroris adventum anxietates præcordiorum adsunt, quæ vero magis augentur sub illius duratione.

IV. Eximiæ hic deprehenduntur virium prostrationes.

V. Pulsus observatur esse debilis, parvus, quandoque etiam mirum in modum obscurus.

VI. Neque insoliti hic sunt affectus lypothymici, convulsivi.

VII. Neque etiam hic deficiunt vertiginis incommoda, stupor capitis vel dolor, obliuioſæ mentis affectiones, deliria.

VIII. Exhalationes ægrotantium ex hoc febrium genere spirant odorem volatilem, eumque mox alio, mox urinæ putridæ similem, mox vappidum, mox subdulcem, mox subacidum.

IX. Febres malignæ eo citius finiuntur, & vix uno septenario ad sui decursum uti solent, quo major vel etiam minor gradus malignitatis in iisdem fuerit conspicuus.

X. Solvi salutariter solent per feri evacuationes, præcipue eas, quæ per sudorem fiunt; vel etiam per exanthematum productionem; vel denique per metastasin ad loca corporis externa, præsertim ad glandulas ibidem sitas.

XI. Circa tempus solutionis pulsus fortior fieri observatur.

XII. Sed etiam pronissimum est hoc februm genus ad inflammationes corpori inducendas, quæ in sphacelum subito ruere solent. Quo facto, totius morbi eventus lethalis omnino erit necessarius.

XIII. Remittere tandem solent hæ febres horis matutinis, pomeridianis vero exacerbari.

§. MDXLVIII.

Observationum fide porro constat, corpora eorum, quibus ex febribus malignis moriendum erat, statim post mortem foetere, turgescere, livescere, nec secus putrescere, ac si in liquamen resolvi videantur.

§. MDXLIX.

Quoniam febres malignæ numerum subeunt morborum malignorum (§. 1546); sequitur volenti harum februm naturam recte intelligere omnem operam dandam esse, ut satis constet de mix-

tione massæ humorum variisque conditionibus materiæ malignæ in corporibus eidem febrium generi obnoxiiis (§. 81. *proleg.*)

§. MDL.

Quod si itaque putrida massæ humorum constitutio in febribus malignis obtineat; necesse erit, ut putrefactio intensioris gradus hîc adsit; alias febres istæ non haberent indolem morbi acuti (§. 46. *proleg.*) cujus tamen speciem præ se ferunt (§. 1546.)

§. MDLI.

Experimenta chemica probant, quod massæ, putrefactioni subjectæ, eo magis rarefiant, quo major putrefactio fuerit. Nullum igitur dubium erit, quin etiam massæ humorum, in corpore animali vivo ad gradum paulo majorem putrescenti, rarefactio simul competat.

§. MDLII.

Corpora, febribus malignis subjecta, exhalant materiam odoris admodum volatilis (§. 1547. *num.* 8.), ut fieri solet in massis putrescentibus, originis præcipue animalis. Ibidem etiam prodeunt statim post mortem non levis putrefactionis phænomena (§. 1548.); id quod tam subito contingere non posset, nisi jam adfuisset in vivis istis corporibus putrida massæ humorum indoles. Ex quibus itaque consequitur; massam humorum in febribus malignis & putridam esse, & rarefactam (§§. 1550 & 1551.)

Hoc utrumque momentum aliis quoque observationibus ac experimentis comprobari potèrit. Sanguis, qui e corporibus, huic febrium generi obnoxiiis, vel sponte, vel beneficio artis quandoque excerni solet, haud parum tenuis apparet, justo serius coagulatur, foetorem edit, eumque mox auctiorem; manifesto documento, quod in massa humorum rarefactio obtineat, præter illius putredinem. Qua occasione notabilem aliquem casum silentio præterire non possum, qui mihi aliquot abhinc annis in exercitio artis salutaris ob-
tigit. Vocatus nempe eram ad ægrum aliquem sanandi causa, in quo satis manifesta deprehendi poterant signa febris pleuriticæ ac peripneumonice, complicatæ cum maligna. Congruis ad sanationem remediis adhibitis, ægri hujus status in melius ire videbatur. Deliria enim mitiora fieri observabantur; intra febris diem tertium & quartum suboriebantur sputa cruenta, cum insigni quodam levamine doloris in pectore ardentis; intra diem vero quartum & quintum purpura alba & petechiæ proveniebant, imprimis ad loca thoracis; simulque etiam urina excernebatur turbida, ut esse solet ea, quæ coctionis signa præ se ferre videtur. Accidit vero ex imprudentia ministrorum casus quidam, quo æger iste valdopere perterritus erat, ita, ut morbus subito nancisceretur eventum funestum, qui paulo ante erat satis boni prælagii. Vix enim admissio terrore, vocatus quidem ad ægrum statim comparui, sed eum jam in articulo mortis constitutum esse inveni. Extrema enim corporis erant frigida; pulsus intermissiones satis notabiles deprehendebantur; exanthematum, quæ in locis corporis supra indicatis satis distincte videri poterant, ne vestigia quidem amplius aderant; respiratio erat foetida, admodum oppressa,
cum

cum stertore non secus conjuncta, ac fieri solet in catarrho suffocativo eminentis gradus. Jam quidem actum erat cum vita ægri hujus: fieri tamen solet, ut adstantium ejulatu quandoque extorqueantur consilia a Medicis, ubi etiam poterat facile prævideri, omnia artis tentamina fore jam irrita. Jussi ideoque frictiones artuum cum linteis asperis & calidis in ægro isto, vel potius jam agonizante, institui. Qua vero operatione vix incepta: auditur a singulis quotquot circa moribundum adstabant, fragor quidam ad loca capitis prodire, similis chordæ cum impetu crepanti; illum actutum insequente largo sanguinis e naribus effluvio, cum vitæ interitu plenario. Describenda jam erunt phænomena, circa hunc sanguinem excretum deprehensa. Erat nempe illius color intense rubens; consistencia admodum tenuis; foetor singulis adstantium videbatur esse abominabilis; his insuper accedente sensu illo arrosionis, quem actutum producebant in dorso dextræ meæ, explorantis pulsus in moribundo, sanguinis ejusdem aliquot guttæ, ibidem illapsæ, quamvis abstersæ illico fuerint; mox sequebatur ad eadem loca erysipelas; hoc purpuræ ibidem productio, una cum doloribus rheumaticis, sese amplius extendentibus. Ex casus hujus descriptione satis evidenter apparet, quanti gradus putredo ac rarefactio massæ humorum in febribus malignis sit, quantaque ideo morbi malignitas! Neque etiam indignum hoc loco mihi esse videtur experimentum illud commemorare, quod in præsentia amicorum, eorumque artis salutaris peritorum, multoties institui; dum exinde tuto colligere licebit tam ad putrefactionem, quam in febribus malignis humorum massa in gradu satis aucto subit, quam etiam ad materialium hic productarum qualitates. Acido nimirum vitriolico volatili ad vario-

larum, nondum suppuratarum, materiam, linteo carpto exceptam, ita admoto, ut effluvia ex utrifque massis se in aëre contingerent: actutum prodiiſſe videbatur fumus quidam. Atque eodem acido vitriolico volatili, ſimili ratione, ut factum erat in experimento præcedenti, admoto ad collum leniter ſudans ægrotantis cujuſdam ex pleuritide, complicata cum purpura alba & petechiis: ſatis diſtincte videri hic quoque poterat fumus in aëre ortus. Unde jam cognoscitur ſatis certo, quod materia, quæ in caſibus modo enarratis per exhalationes e corporibus ægrotantium ex febribus malignis in auram abiit, referenda ſit ad alcali volatile, ſive ſalem urinoſum: cujuſ veſ maximâ copia ex massis animalibus, ad paulo majorem gradum putreſcentibus, ut Chemia præcipit, generari ſolet; neque etiam ejuſdem ortum hic concipere licebit aliter, quam nunc modo dictum erat. Nonne vero, præter ſales alcalicos volatiles, aliæ inſuper materiæ generari poterunt in corporibus, malignitati febrium ſubjacentibus? Quod probabile eſſe videtur, ob diverſitatem odoris, quem exhalationes ægrotantium ex hoc morbi genere ſpargunt, præter illum, qui urinæ putridæ ſimilis eſſe ſolet [§. 1547. num. 8.]. Pro differentia enim gradus, quem motus inſteſtinus, ad producenda in massis animalibus differentibus nova mixta idoneus, nanciſcitur, fieri omnino poterit, ut ibidem quoque prodeat una atque altera materia, quæ diverſa eſſe apparet a ſalibus alcalicis volatilibus. Conſentanea hæc paſſim ſunt cum principiis Chemicorum veri nominis. Conſirmant idem etiam experimenta, quæ cum materia ulceris cancroſi inſtituta deſcribuntur in §. 448. una cum iis, quæ inde colliguntur in §. 451. Unde exhalationum in febribus malignis odores ſubacidi, & pro ratione modo phlogiſti, modo

terræ calcariae ad acidum accedentis, subdulces, vappidi (§. 1546. *numer.* 8.). Sed quid jam de odore alliato sentiendum erit, qui ibidem etiam prodire quandoque deprehenditur? Subestne tunc arsenicalis quid? Nec prorsus a vero alienum foret, hoc asserere velle. Supposito enim (ut Chemicorum communis fert sententia), quod salis communis acido arsenicalis quid insit: nonne illud liberum fieri poterit ope motus intestini? Nam de acidi hujus existentia in mixtione animali vel ex hoc unico experimento, inter plurà alia, satis constare poterit. Solve nimirum argentum purissimum in spiritu nitri purissimo, & factæ huic solutioni adde fluidum animale, nondum corruptum, quodcumque velis: præcipitari videbis argentum ex solutione, non secus, ac si eidem affudisses salem culinarem in aqua solutum, aut illius acidum; ac præcipitatum gaudere deprehendes iis qualitatibus, quas lunæ corneæ attribuere solent Chemicæ. Præter hæc etiam notatu dignum esse videtur, quod in iisdem casibus, ubi scilicet exhalationes ægrotantium ex febribus malignis odorem allio similem spargunt, urina demittere soleat materiam albicantis coloris, ac instar flocculorum niveorum comparentem; morbusque cum vitæ interitu tunc plerumque finiatur. Plura alia in prælectionibus proferentur, ad integri hujus argumenti illustrationem majorem facientia.

§. MDLIII.

Ex §. anteced. satis constare poterit de conditione causæ proximæ febrium malignarum in genere.

Agnoscit vero hæc causa proxima sui ortum latere in causis variis remotis; iisque modo externis, modo internis, ita tamen agentibus, ut tan-

dem in massa humorum proveniat tam putrida indoles, quam rarefactio. Quorsum exempli gratia pertinebunt contagia aliunde recepta; impedimenta excretionum naturalium in corporibus cacochymicis; morbi varii in corpore præsentés, quibus vis quædam inest deteriore reddendi mixtionem humorum; commorationes in locis, aëre putrido inquinatis, usus esculentorum ac potulentorum putridæ indolis; peccata alia rerum sex non naturalium aut causæ quæcumque aliæ febriles, si admittuntur ad corpus, cui jam inest massa humorum eminentis dispositionis ad putrescendum. Observantur præterea febrium malignarum grassationes plerumque fieri circa æquinoctii tempus.

§. MDLI.

Ad symptomatum in febribus malignis (§. 1547.) rationes quod attinet; eas facile intelligere licebit partim ex doctrina febrium generali; partim ex massæ humorum putredine ac rarefactione (§§. 1552 & 1553.).

§. MDLIV.

Febrium malignarum in genere (§. 1546.) signa pathognomica sufficientia constabunt ex signis febrium continuarum, acutarum [§. 1408.]; cum illis phænomenis simul conjunctis, quæ in §. 1547. præcipue ad *numer.* 3 - 5. describuntur.

§. MDLVI.

Ad prognosin vero in febribus malignis generatim quod pertinebit; erunt jam notanda sequentia.

I. Hic ea probe considerentur, quæ indicata ad §. 1409. jam exstant.

II. Conditio symptomatum, quæ in hoc febrium genere prodire solent [§. 1547.], atque imprimis eorum, quæ ad §. citat. *numer.* 3-7. significantur, diligenter perpendenda erit. Nam exinde licebit tuto colligere ad morbi in casu obvio magnitudinem.

III. Læsiones functionum vitalium, post diem quartum in hoc febrium genere magis auctæ, eventum plerumque ancipitem præsignificare solent.

IV. Si iis mutationibus, quæ ad §. 1547. *numer.* 10. commemorantur, urinæ, quæ facile turbida fit, excretiones accedere deprehenduntur, una cum redeunte vigore pulsus; idque imprimis diebus indicatoriis contingere observatur: plerumque evenire tunc solet bona harum febrium solutio diebus proximis criticis. Alias vero pulsus fortitudo suspecta est, atque inflammationem indicare solet, sive jam præsentem, sive imminentem.

V. Exanthemata si cum impetu, si copiose erumpunt; si nimium pruritus & ardoris sensum in cute producere videntur: illa non adeo bonæ prædictionis erunt. Tunc enim fieri solet, ut, concitatis spasmodis in locis corporis externis, putridum ad interiora repellatur iterum; id quod non ab omni periculo vacabit.

VI. Si qua in febre alia necesse fore videatur

ut eorum locorum corporis rationem habeas, ubi vel ecrisis, vel metastasis febrilis fit [§. 1379.]: hoc vel maxime de febribus malignis notandum erit.

VII. Mali porro ominis esse solent in eodem febrium genere horripilationes crebræ, frigoris ad extrema corporis perceptiones frequentes, una cum sudoribus frigidis. Hæc enim indicant modo spasmi peripherici pertinaciam, modo cordis vires admodum debilitatas.

VIII. Tandem animus dirigendus hic etiam erit ad caussarum externarum accessiones, quæ salutaris febrium malignarum solutioni valdopere nocent, tam producendo spasmus periphericum, quam nimis commovendo sanguinem.

C A P U T CXLII.

D E

FEBRE CATARRHALI MALIGNA ET PETECHIZANTE.

§. MDLVII.

Febbris catarrhalis maligna est ea species febris malignæ; quæ cum catarrho [§. 348.] connec- titur; diciturque *petechizans*, si in ea eminens qui- dam gradus malignitatis conspicuus fiat, illique præ- fertim similis, qui deprehendi solet in febre pete- chiali.

§. MDLVIII.

Docent observationes, in hac febre adesse symptomata sequentia præter ea, quæ jam annotata generatim exponuntur in historia febrium malignarum (§. 1547.).

I. Satis manifesta hic fiunt phænomena, catarrhum significantia (§. 1541. *numér.* 3. & 5.)

II. Horrorem, quo febris ista invadit, paulo auctior æstus excipit, quam fieri communiter solet in aliis malignis.

III. Concurrunt deliria sat gravia, angina, aphthæ, peripneumonia, pleuritis.

IV. Nec diarrhœæ deficiunt, quibus hæc quidem febris solvitur, tamen cum metu inflammationis intestinorum; optima vero ejus solutio est, quæ per sudorem fit.

V. Totius febris decursus se vix ulterius, quam ad duo septenaria, extendere solet.

VI. Die quinto sæpius prodeunt maculæ; & tum periculosior redditur status ægrotantis.

§. MDLIX.

Huic febre subjici observatur illud hominum genus, quod ad catarrhos pronum, quod cacoehymicum est; quod causis patet, a quibus auctior putredinis gradus ad massam humorum transit: quales exempli gratia sunt commorationes in locis paludosis, aëre putrido repletis, aquarum putridarum usus, atque hujus indolis alia.

§. MDLX.

Sub conditionibus, quæ ad §. preced. exponuntur, ortum præcipue febris catarrhalis malignæ fieri, poterit facile intelligi [§§. 1546. 1552. 1553 & 1557.]

§. MDLXI.

A catarrhi conditionibus ac ea massæ humorum indole, quæ in febribus malignis generatim obtinet [§. 1552.], symptomatum rationes in febre catarrhali maligna derivandæ erunt [§. 1557-1560.]

§. MDLXII.

Signa pathognomica sufficientia in febre catarrhali maligna [§. 1557.] constabunt ex signis catarrhi & febris malignæ, atque intelligi poterunt ex §§. 1555 & 1558. *numer. 1.*

§. MDLXIII.

Signorum vero prognosticorum cognitio ab iisdem principiis petenda erit, quæ in §. 1556. exposita leguntur: hîc simul consideratis iis momentis, quæ indicata prostant ad §. 1558. *numer. 3 - 6.*

CAPUT CXLIII.

DE

DYSENTERIA SIVE FEBRE DYSENTERICA.

§. MDLXIV.

F*ebbris dysenterica* est febris maligna, connexa cum diarrhœa. Dicitur etiam *febris ad intestina*.

Dividi solet *dysenteria* in *cruentam*, & *non cruentam*, sive *albam*; prouti nempe feces, quæ per alvum ejiciuntur, vel a sanguine tinctæ, vel permixtæ esse appareant cum materia, ulceri putrido simillima. Satis exinde patet, dysenteriam albam cruenta pejorem esse.

§. MDLXV.

Ex observatis constat, quod dysenteria, præter symptomata communia cum aliis generis sui febribus [§. 1547.], sequentibus stipata incedere soleat.

I. Solito majoris gradus in hac febris malignæ specie & horror est, & æstus, qui illum deinceps subsequitur.

II. Statim percipiuntur alvi lubricationes, mox in diarrhœam plenarie abeuntes.

III. Sentiuntur tormina ventris, dolores colici, anxietates præcordiorum vehementissimæ, pruritus ani, tenesmus.

IV. Materia per alvi dejectiones secedens foetorem spirat abominabilem, eique haud dissimilem, qui prodire solet ex ovis perquam putridis.

V. Sitis statim sub initio morbi admodum aucta.

VI. Faciles hinc esse solent intestinorum inflammationes.

VII. Quandoque etiam anginae, aphtharum petechiarum aut purpuræ accessiones hinc fiunt.

VIII. Plerumque decurrere solet intra unum septinarium, atque omnium optimæ solvitur per sudorem.

§. MDLXVI.

Observatur porro dysenteria magis grassari tempore æstivo, mensibus scilicet Julii, Augusti ac Septembris; quando imprimis dies æstuosissimi, noctes vero perquam frigidæ ingruunt. Neque aliud hominum genus ab hoc morbo corripitur deprehenditur, quam illud, cui nimix sanguinis resolutiones per validos corporis motus, sudorisque ideo copiose producti repressiones oboriuntur; his simul accedente largo usu fructuum horæorum, aut aliorum esculentorum ac potulentorum, facilem in ventriculo ac intestinis fermentationem efficientium. Sed hoc etiam ex observationibus innotuit, quod dysenteria spectari debeat instar morbi, cujus grassationes inter homines rusticanos plerumque incipere, e pagis deinceps ad urbes penetrare solent; cujus denique ortus tunc temporis faciliior ac pernicies major est quando nimirum constitit, admissum fuisse usum fructuum horæorum, rubigine corruptorum.

§. MDXVII.

Ex §. anteced. vocatis simul in subsidium iis, quæ in doctrina generali febrium malignarum continentur [§§. 1552 & 1553.], dysentericæ genesin intelligere licebit.

§. MDLXVIII.

Hoc considerato, quod dysenteria ad febres malignas pertineat, ubi a materiæ malignitate imprimis afficiuntur intestina [§. 1564.]: tunc esse poterunt satis perspicuæ rationes illorum symptomatum, quæ in historia morbi hujus describuntur [§. 1565.]

§. MDLXIX.

Signa pathognomica sufficientia febris dysentericæ [§. 1564.] erunt signa febrium malignarum in genere [§. 1555.], nec non symptomata morbi descripta in §. 1565. præsertim ea, quæ significantur ad §. citat. *numer.* 2-4.

§. MDLXX.

Ad prognosin vero in eadem specie febris malignæ cognoscendam sufficient propofita in §. 1556. principia, conferenda cum iis momentis, quæ præcipue indicantur ad §. 1565. *numer.* 6-8.

CAPUT CXLIV.

DE

FEBRE CASTRENSI SIVE HUNGARICA.

§. MDLXXI.

F*Ebris castrensis* dicitur febris catarrhalis admodum petechizans, epidemice grassans.

§. MDLXXII.

Prodire in hac febre observantur eadem quidem symptomata, quæ in historia febris catarrhalis petechizantis describuntur [§. 1558.], sed ad gradum longe iminentiorem conspicua. Quibus insuper statim sub initio morbi accedunt ardores sub scrobiculo cordis; linguæ siccitas una cum ejusdem tumore; major in pulsu impetus; celerior febris decursus; remissionis tempus perquam breve.

§. MDLXXIII.

Observationes testantur, hanc febrem deprehensam fuisse in militibus, quos oportebat in castris ad loca paludosa fitis degere; aquis putridis loco potus uti; subitaneis refrigerationibus corpus committeres quod validis exercitiis nimis incaluit; atque ejusdem conditionis causas alias admittere.

§. MDLXXIV.

Sub causarum, in §. anteced. descriptarum, vel etiam aliarum iisdem similium, accessionibus factis

no tempore ad plurimum hominum, in certo loco
egentium, corpora: febris castrensis ortus cog-
nosci poterit satis distincte [§§. 1552. 1553. 1557-
560 & 1571.]

§. MDLVXX.

Quoniam in ista febris malignæ specie longe
major gradus malignitatis obtinet, quam ille ordi-
nario adesse solet in febre petechizante [§. 1571.]:
hinc etiam patebit ratio, quare nimirum inflamma-
tiones tam cito hîc producantur, atque ideo pulsus
sub ipso fere initio febris fortis compareat, tan-
temque acerbitas symptomatum febrilium summa
sit [§. 1572]?

§. MDLXXVI.

Ad signa sufficientia, tam pathognomica, quam
prognostica, quod attinet in febre castrensi [§. 1571]:
tunc illa quidem convenient cum signis catarrhalis
malignæ [§§. 1562 & 1563.]; neutiquam tamen
negligenda hîc erit differentia partim etiam ratione
epidemicæ grassationis, partim etiam ratione ma-
lignitatis supra modum auctæ, effectuumque inde
prodeuntium [§§. 1571. 1572 & 1575.]

CAPUT CXLV.

DE

FEBRE SCARLATINA.

§. MDLXXVII.

F*Ebris scarlatina* est febris maligna, connexa cum maculis scarlatinis [§. 241.]

§. MDXXLVIII.

De hac febre sequentia notanda erunt ex observationibus.

I. Admodum exigui momenti deprehenduntur hîc esse ea symptomata, quæ in historia febrium malignarum in genere enarrantur [§. 1547.]

II. Ægrotantes vero magis conqueruntur de oppletione pectoris, dyspnœa, tussicula sicca.

III. Die febris quarto facies intumescit, prurit, quasi obsita apparet maculis scarlatinis, primo parvis, deinde se amplius extendentibus.

IV. Hæ maculæ paulo post prodeunt quoque in pectore, ad femora atque alia loca corporis externa ubique servata eadem lege, ut ad *numer. præced.*

V. Circa illud tempus, quo maculæ eædem erumpere solent, in quibusdam hæmorrhagiæ narium eveniant, & quidem cum magno morbi levamine.

VI. Ordinario finitur hæc febris intra unum septenarium, & quidem salutariter; id quod colligere licebit e diaphoresis successu & cutis desquamationibus.

§. MDLXXIX.

Docent porro observationes, febrem scarlatinam familiarem esse puellis, quibus mensium emissiones oboriuntur; aut feminis, quæ obnoxiae sunt fluxus menstrui suppressionibus; tandemque abutentibus etiam potu spirituosissimo vel cibis, aromatibus justo liberalius conditis, ideoque sanguinem supra modum exæstuantibus.

§. MDLXXX.

Videtur fieri posse, ut maculae scarlatinæ considerentur instar erysipelatis maculosi, quod conspiciendum fit ad quædam loca corporis externa [§. 1578. *numer.* 3 & 4.]

§. MDLXXXI.

Simul etiam ex §§. 1579 & 1580. constare poterit, quare nimirum in hac febre hæmorrhagiarum proveniat, eaque salutaris [§. 1578. *numer.* 5.]?

§. MDLXXXII.

Febris scarlatinæ signa pathognomica sufficientia redibunt ad momenta sequentia. Ubi jam conspiciuæ fuerint maculae scarlatinæ [§. 241.], ibi recta definitionis applicatio ad casum sufficiet [§. 1577.]. Sed in casu opposito conveniet magis ad ea atten-

dere, quæ in [§§. 1578. *numer.* 1-3. & 1579.]
annotata sunt.

§. MDLXXIII.

Prognosi vero hîc cognoscendæ sufficere poterunt proposita in §. 1556. sed conferenda cum iis, quæ indicantur ad §. 1578. *numer.* 1. & 6.

CAPUT CXLVI.

DE

FEBRE PURPUREA URTICATA.

§. MDLXXIV.

F*ebbris purpurea urticata* dicitur febris maligna, connexa cum ea specie purpuræ, quam dicere solent urticatam [§. 242.]

§. MDLXXV.

Ad descriptionem phænomenorum, quæ in hac febris specie prodire observantur, quod jam attinet: tunc annotare conveniet sequentia.

I. Quamvis sub exiguo gradu syniptomata, febribus malignis generatim competentia [§. 1547.], hîc conspicua fieri plerumque soleant; ita, ut in eo febris purpurea urticata cum scarlatina convenire videatur [§. 1578. *numer.* 1.): quandoque tamen innotuerunt casus purpuræ urticatæ satis eminentis malignitatis; imprimis tempore

tempore epidemicæ grassationis febrium malignarum.

II. Sub æstu febrili statim proveniunt in peripheria corporis vesiculæ; in cute ea conditio prodit, quæ respondere solet ustioni, ab urticis ibidem peractæ, simulque ardor adest ac rubor, ut in erysipelate.

III. Hæ vesiculæ urunt; scalptionis desiderium in ægrotantibus excitant; horis matutinis evanescere, aut saltem tanto non esse incommodo videntur.

IV. Diebus quarto & quinto hoc exanthema exsiccari solet; subsequuntur cutis desquamationes; totiusque febris solutio salutaris, continuatis urinæ turbidæ ac sudoris excretionibus, communiter oboritur die septimo, aut paulo post.

§. MDLXXXVI.

Præ reliquis illud hominum genus huic febris speciei obnoxium fieri deprehenditur, cui serosa colluvies sanguinis inest.

§. MDLXXXVII.

Ratione signorum pathognomicorum sufficientium in febre urticata id tenendum erit; facta jam eruptione purpuræ urticatæ, definitio morbi (§. 1584.), eaque ad casum rite applicata, hic sufficiet; alias vero opus erit, ut rationem quidem habeas eorum signorum, unde generatim dignosci solet febris maligna (§. 1555.), cum iis tamen

compares ea, quæ exponuntur ad §§. 1585. num.
I. & 1586.

§. MDLXXXVIII.

De prognosi vero in eadem febris specie te satis certum facere poterunt dicta in §. 1556. quæ tamen conferre cum iis conveniet, quæ exstant ad §. 1585.

C A P U T CXLVII.

D E

FEBRE PURPURATA RUBRA ET ALBA.

§. MDLXXXIX.

F*ebbris purpurata rubra* est febris maligna, connexa cum purpura rubra (§. 242.) Dicitur etiam *febris miliaris*. Nomen vero *febris purpuratæ albæ* transferri solet ad eam febris malignæ speciem, quæ connexa esse deprehenditur cum purpura alba (§. 243.)

§. MDXC.

Historia febris purpuratæ tam rubræ, quam albæ, sequentia sibi vindicat momenta, ex observationibus annotanda.

I. Utraque hæc febris symptomata quidem habet cum aliis febribus malignis communia, descripta in §. 1547. quæ vero gradu diffe-

runt, ita, ut communiter eadem longe graviora sint in febre purpurata alba, quam in rubra.

II. Prævio pruritu, circa diem quartum vel septimum purpura in conspectum prodit; & quidem ita, ut in alba appareat rubefacta esse cutis.

III. Morbi decursus ad duo septenaria plerumque protrahi, ejusque solutio fieri solet salutariter per diaphoresin ac exsiccationem exanthematum.

IV. Fide etiam observationum constitit, purpuræ exanthemate nullum aliud facilius ad loca corporis interiora regredi, regressumque magis nocere vitæ ægrotantium; si imprimis adfuerit purpura alba.

§. MDXCI.

Testantur porro observationes, febres purpuratas nostris temporibus frequentes esse, nec raro ad alias febrium species accedere; sæpius obiri hæmorrhoidariis, scorbuticis, puerperis, feminis tandem, quæ ex utero parum bene purgantur.

§. MDXCII.

Signa pathognomica sufficientia in febre purpurata rubra & alba cognoscere licebit per signa febrium malignarum in genere (§. 1555.); per morbi definitionem (§. 1589.), atque ea momenta, quæ ad §§. 1590. numer. 2. & 1591. enarrantur, ad casum recte applicata.

§. MDXCIII.

Tandem ratione prognosis, sufficere hic poterunt ea, quæ exponuntur in §. 1556. cum iis conferenda, quæ commemorantur ad §. 1590. numer. 3 & 4.

CAPUT CXLVIII.

DE

FEBRE MORBILLOSA.

§. MDXCIV.

F*Ebris morbillosa* est febris maligna, connexa cum morbillis (§. 240.)

§. MDXCV.

Ad communia cum aliis febribus malignis symptomata (§. 1547.) insuper accedere in hac febris specie observantur sequentia.

I. Adest tussis, quæ vehemens esse ac febrem non numquam octo, immo plures dies jam antecedere solet.

II. Concurrunt quandoque incommoda diarrhoeæ, vomitus.

III. Prodit difficilis ac dolorifica deglutitio; facies & cilia intumescunt; nares opplentur.

IV. Die tertio vel quarto erumpunt morbilli.

V. Die tandem septimo vel nono febris salutariter soluta esse plerumque deprehenditur; factis sudoris excretionibus & cutis desquamationibus.

§. MDXCVI.

Docent porro observationes, hanc febrem tempore verno & autumnali epidemice grassari; magis occupare corpora infantilia ac juvenilia; ejus denique conditionis singularis esse, ut rarissime ad corpora eorum hominum redeat iterum, qui semel illam superarunt.

§. MDXCVII.

Probabile esse videtur corporibus, in ætate infantili aut juvenili constitutis, inesse dispositionem aliquam eminentem, ad hanc speciem febris malignæ facilius concipiendam, qua semel superata, illa quoque aboletur.

Constabit in prelectionibus de ratione hypothesium, quas excogitarunt Medici, ad hanc dispositionem explicandam.

§. MDXCVIII.

Febris morbillosæ signa pathognomica sufficientia ad eadem redibunt, ex quibus febris maligna generatim dignosci solet (§. 1555.); si iisdem insuper accesserint tumoris apparitiones in facie & ciliis, narium oppletiones (§. 1595. *numer.* 3.), quæ præsertim sub epidemica grassatione morbillorum provenire deprehenduntur in ægrotantibus ætatis infantilis aut juvenilis, non subjectis antea

huic febris speciei (§. 1596.); vel jam conspicua
fatis fuerint morbillorum exanthemata (§. 1594.)

§. MDXCIX.

De signorum vero prognosticorum in eadem
febre fundamentis satis constare poterit ex §§. 1556
& 1595. numer. 5.

CAPUT CXLIX.

DE

FEBRE VARIOLOSA.]

§. MDC.

F*Ebris variolosa* est febris maligna, connexa cum
variolis (§. 239.)

§. MDCL.

Docent observationes, in hac febre sequentia
symptomata prodire, præter communia illa, quæ
in febrium malignarum descriptione generali (§.
1547.) commemorantur.

I. Adfunt nimirum oppletiones pectoris, tussis.

II. Nares hic etiam oppletæ apparent, una
cum ciliorum & faciei intumescencia, prouti
in morbillis.

III. Die tertio vel quarto erumpere incipiunt
variolæ; atque hæc eruptio finitur circa diem
septimum, placidissima diaphoresi stipata.

IV. Fiunt hæc, quæ indicantur ad *numer. præced.* cum magno febris decremento.

V. In quibusdam sub horum exanthematum eruptione oboriri deprehenduntur copiosæ excretiones salivæ.

VI. Variolæ; quæ initio planæ apparere solent, de die in diem magis elevantur.

VII. Comparet die septimo circulus quidam ruber, quo quævis pustula variolosa cingitur; idque cum notabili incremento febris.

VIII. Atque ex eo tempore, ut ad *numer. præced.* describitur, ægrotantis corporis habitus externus in majus quoddam volumen increfcere videtur, ut fieri solet in partibus tumentibus; variolæ albicantis coloris fieri, magis magisque suppurare deprehenduntur, insimulque spargere odorem nauseosum.

IX. Circa diem vero undecimum evenire observatur variolarum ruptio. Emanat tunc e variolarum pustulis materia purulenta; oboriuntur illarum exsiccationes; eschara inde efformata decidit; atque ægrotans pristinae sanitati circa diem decimum quartum, vel paulo post, restitui denuo observatur.

X. Sed fieri etiam solet multoties, ut, negotio isto suppurationis ac exsiccationis variolarum inconvenienter succedente, vel producantur, partium variarum corruptiones a sphacelo aut ulceribus; vel etiam in visus organo vitia diversa.

§. MDCII.

Docent porro observationes, febrem variolosam, in relatione ad febrem morbillosam, plerumque esse maligniorem, cum hac tamen in eo convenire, ut eidem scilicet subjiciantur magis corpora juniora; ut plerumque grassetur epidemice tempore verno & autumnali; ut tandem rarissima esse soleant exempla illorum hominum, ad quos hæc ipsa febris plus una vice rediisset, superata semel.

§. MDCIII.

Qua de causa hic eadem quoque consequentia valebit, quæ de febre morbillosa in §. 1597. deducta est (§. anteced.)

§. MDCIV.

Fieri poterit, ut intra oris cavitatem variolæ generentur; quibus ibidem obortis, organa salivam excernentia non mediocriter cogantur ad illam copiosius dimittendam. Unde jam patebit ratio phænomeni, annotati ad §. 1601. *num.* 5.

§. MDCV.

Quoniam variolæ pustularum suppurascentium numerum subeunt (§. 239.); puris vero ortus considerari debet instar effectus inflammationis (§. 414.); atque hæc febrem sibi comitem habet (§. 1410.); hinc jam conspicua erit ratio, quare nimirum febrem jam mitescentem ejus incrementa mox insequantur, una cum circulis rubentibus circa variolas, harumque conversionibus in apostemata (§. 1601. *numer.* 7-9.)?

§. MDCVI.

Febre itaque inflammatoria certi gradus, eaque opportune suborta, opus erit ad variolarum convenientem suppurationem, totiusque febris variolosæ salutarem eventum (§. anteced.)

§. MDCVII.

Febris variolosæ signa pathognomica sufficientia ex iisdem constabunt, per quæ febris morbillosa cognosci solet (§. 1598.); sed hic habita simul ratione majoris malignitatis, aut jam producti in conspectum exanthematis variolosi (§§. 1600 & 1601.)

§. MDCVIII.

Prognosi vero hic cognoscendæ satis quoque respondebunt ea momenta, quæ continentur ad §§. 1556. 1601. *numer.* 7-10. & 1606.

CAPUT CL.

DE

FEBRE PETECHIALI

§. MDCX.

Febbris petechialis est febris maligna, connexa cum petechiis (§. 244.)

§. MDCX.

De hac febris malignæ specie sequentia notanda erunt ex observationibus.

I. Symptomata, quæ in febrium malignarum historia generatim describuntur (§. 1547.), hic prodeunt ad eminentem gradum.

II. Levissimum horrorem; quocum invasio- nes febriles circa vesperam fiunt, excipere solet æstus non adeo insignis gradus; sub quo tamen adesse deprehenduntur dolores capitis supra modum excedentes, pulsus admodum obscurus, validæ anxietates præcordiorum, affectus lipothymici, non numquam etiam convulsivi.

III. Deliria vero, quæ hic proveniunt, non ita gravia esse solent.

IV. Sæpius etiam concurrunt ardores faucium.

V. Intra febris diem tertium, quartum & quintum petechiarum eruptiones fiunt.

VI. Solutio tandem morbi salutaris die septimo evenire solet; decenter factis excretionibus sudoris ac exanthematum exsiccationibus.

§. MDCXI.

Observatur porro ista febris circa æquinoctia epidemice grassari.

§. MDCXII.

Febris petechialis signa pathognomica sufficientia redibunt ad signa febrium malignarum in genere (§. 1555.), nec non petechiarum, jam productarum in apicem, deprehensiones (§. 1609.) Alias vero ad gradum malignitatis eximium in febre, ejus symptomata ac epidemicam grassationem (§§. 1610 & 1611.) animum convertere oportebit.

§. MDCXIII.

Prognosi tandem, hoc etiam loco inveniendæ, satisfaciunt principia, §§. 1556. 1610 & 1611, indicata.

C A P U T C L I.

D E

FEBRE PESTILENTIALI SEU
DE PESTILENTIA.

§. MDCXIV.

F*Ebris pestilentialis* dicitur ea febris malignæ species, quam ad morbos omnium maxime contagiosos referre licet (§. 77. *proleg.*), & quæ simul connexa esse deprehenditur vel cum bubonibus (§. 223.), vel cum vibicibus (§§. 234.), vel cum carbunculis (§. 235.); five junctim adfuerint nunc modo allegata exanthemata, five separate.

§. MDCXV.

Quæ de conditione symptomatum in febre pestilentiali per observationes innotuerunt; ea jam redibunt ad momenta sequentia.

I. Februm malignarum symptomata, generatim in §. 1547. descripta, ita obtinent in hac febris malignæ specie, ut respondeant summo malignitatis gradui.

II. Horror præterea levissimus est, quo febris pestilentialis invadere solet, illumque sæpius excipit æstus moderatissimus.

III. In pulsu summa adest debilitas, summa obscuritas deprehenditur.

IV. De summis cordis angoribus ac palpitationibus, vel potius tremoribus, conqueruntur ægrotantes.

V. Deliria aliis, aliis sopores oboriuntur.

VI. Ardores circa scrobiculum cordis sæpius urgent.

VII. Prodit nausea, mox sequitur vomitus, quo materia biliosa teterrima ejicitur.

VIII. Statim secundo aut tertio die febris proveniunt vibices, carbunculi, aut bubones.

IX. His jam productis exanthematibus, ægrotantium status in melius ire videtur. Alias vero omnia in perniciem ruunt.

X. Omnium optimam pestilentiae solutionem eam fuisse, experientia docuit, quæ nimirum facta erat per bubonum productionem, ad glandulas præcipue inguinales.

§. MDCXVI.

Ex observationibus porro constat, febrem pestilentialem morbum esse non adeo rarum inter incolas Ægypti aliorumque in Asia locorum, præsertim paludosorum ac sitorum ad maria; inde per contagium, (quo nihil unquam potentius esse potest ad inficiendum) deferri ad regiones alias.

§. MDCXVII.

Febris pestilentialis signa pathognomica sufficientia constare poterunt ex signis febrium malignarum in genere (§. 1555.); hic simul accedentibus iis, quæ ex hujus febris malignissimæ definitione (§. 1614.) & historia (§§. 1615 & 1616.) facile intelligere licebit.

§. MDCXVIII.

Prognosis etiam inventioni in eadem febre satis accommodata erunt principia, proposita in §. 1556. eorum omnium facta collatione cum iis, quæ existant ad §§. 1614-1616.

CAPUT CLII.

DE

FEBRE LENTA ET HECTICA.

§. MDCXIX.

Observationum testimonio comprobatur, oboriri etiam febres continuas (§. 1337.), easque chronicas (§. 1338.), in quibus virium consumptiones totiusque corporis extenuationes satis manifestæ fiunt, de die in diem magis incrementes. Descriptæ conditionis febres, una cum effectibus suis nunc modo indicatis, prodire poterunt modo ad *gradum minorem*, modo *majorem*. In casu *priore* adesse dicitur *febris lenta*; in *posteriore* autem *hectica*.

§. MDCXX.

Docent observationes, in febribus lentis ac hecticis symptomatum conditiones ad sequentia reduci posse momenta.

I. Invasiones febriles fieri hic solent plerumque a meridie, & quidem magis cum frigoris sensu, tamen non perseverante diutius, quam consuetum est in febribus continuis in genere (§. 1406. *numer. I.*)

II. Sequitur deinceps æstus, iisque magis fictus in lenta, in hectica vero cum productione sudoris visceris & quasi glutinosi.

III. Nullus adest somnus reficiens.

IV. Ægrotantes frigida magis appetunt.

V. Sæpius exacerbari videtur æstus post paustum, & quidem horrore semper prævio.

VI. Excernitur urina rubicunda, quæ in febre lenta pinguis, in hectica vero cuticula quadam albicante obducta esse apparet.

VII. Quo magis febris hectica invaluit; eo magis excretiones colliquativæ, sive tales oboriri deprehenduntur, quales esse solent ex, per quas ingens lymphæ copia e corpore secedit; quod communiter per excretionem sudoris aut alvi, quandoque etiam urinæ fit.

VIII. Sub continuatione harum excretionum, quæ ad *numer. præced.* indicantur, corpus tandem viribus, succis, carne adeo privatur, ut vitæ jactura prorsus inevitabilis fieri videatur.

IX. Sed & alius casus oboriri hic solet æque perniciosus. Accidit quandoque, ut ad febres lentas ac heclicas febrium acutarum accessiones fiant, præcipue inflammatoriarum aut malignarum. Atque id si contigerit, heclicis tunc eo citius ingruit dies fatalis.

§. MDCXXI.

Febres lentas ac heclicas in casibus provenire, observationes docent, ubi de infarctus, scirrhi, exulcerationis existentia in uno atque altero viscere, vel etiam in partibus aliis, abundantibus vasis omnis generis, satis constat.

§. MDCXXII.

Ex §. anteced. colligere licebit; fieri nimirum posse, ut febres lentæ & heclicæ alias febres, quarum solutio facta erat per metastases, insequantur; abusum adstringentium admissum in compluribus morbis, præsertim in febribus intermittentibus, excipiant; post excretionum naturalium inconvenientem successum fiant conspicuæ; tandemque facile generentur in corporibus debilibus. Quod etiam cum observationibus bene congruit.

§. MDCXXIII.

Pro differentia partium, quæ ab infarctu, scirrhi, exulcerationibus afficiuntur; pro diversitate gradus, ad quem affectus isti prodeunt; necesse etiam erit, ut febrium lentarum ac heclicarum casus inter se discrepent, atque unus altero periculosior sit (§. 1621.) Quocum etiam observationes consentiunt.

§. MDCXXIV.

Ad casus itaque febrium lentarum ac hecticarum eo melius intelligendos, juvabit hoc loco ea conferre, quæ in peculiaribus capitibus de ulceribus, scirrhis ac morbis viscerum prolata jam sunt [§. antec.]

§. MDCXXV.

Signa pathognomica sufficientia in febre lenta & hectica facile licebit cognoscere per definitionis [§. 1619.] accuratam applicationem ad casum; nec non eorum deprehensionem, quæ in §. 1620. enarrantur, præcipue ad ejus *numer. 6 & 7.*

§. MDCXXVI.

Ad signorum vero prognosticorum cognitionem quod hic attinet; notari tunc poterunt sequentia.

I. Quo breviores fieri deprehenduntur in febre lenta remissiones febriles; eo certius est, fore, ut mox immineat ejus transitus in febrem hecticam.

II. Quo nobiliores fuerint partes, quæ sedem infarctui, scirrho aut ulceribus suppeditant; quo major etiam fuerit gradus istarum afflictionum; eo periculosior quoque erit status ægrotantium.

III. Quo magis in febribus lentis ac hecticis prodire observantur tremores artuum ac labiorum, varia organorum sensoriorum externorum vitia, obliuioſæ mentis affectiones aut ejus alienationes; iisdemque insuper accedit status corporis indicatus ad §. 1620. *numer. 7-9.* eo minus dubitari poterit, futurum esse, ut eventum funestum nanciscatur morbus.

IV. Sed conferri hic etiam merentur ea, quæ jam commemorata existant ad §. 1409.

CAPUT

CAPUT CLIII.

DE

FEBRIBUS INTERMITTENTIBUS
IN GENERE.

§. MDCXXVII.

Hoc febrium genus [§. 1337.] vindicare sibi observatur phænomena sequentia.

I. Spasmus periphericus, quo hic fieri solent invasiones febriles, & durationis longissimæ est, & gradus maximi; utpote a quo febrientes per unam, imo duas, quandoque etiam tres horas ita afficiuntur, ut non solum corporis extrema ad tactum frigida percipiantur, sed & totum corpus a frigore quasi concuti, obrigescere tandem videatur.

II. Oscitationes ac pandiculationes hic frequentissimæ sunt.

III. Sub frigore febrili sentiunt ægrotantes tensionem aliquam prodire circa scrobiculum cordis vel regionem modo epigastricam, modo hypogastricam, modo hypochondriacam.

IV. Tunc etiam respirationis oppressiones; cordis angores ac palpitationes oboriuntur.

V. Solent porro cardialgiæ, vomitus, quandoque etiam diarrhoeæ incommoda prodire.

VI. Frigus febrile tandem sequitur æstus, qui sensim sensimque increscit.

M m

VII. Æstus sudores excipiunt.

VIII. Absolvuntur hæc omnia intra quinque aut sex horas, vel quod etiam supra foret quandoque: tunc jam febris intermittit, relicta debilitate corporis; denuo redit, stipata descriptis symptomatibus.

IX. Redire quidem ordinario solet febris circa eandem horam, qua ejus prima invasio facta erat; sæpius tamen accidit, ut febriles isti recursus fiant mox serius, mox citius.

X. Fieri etiam solet, ut febris inuasiones subsequentes appareant plerumque leviores antecedentibus, quandoque vero graviores.

XI. Solutiones morbi salutare in hoc febrium genere sequi deprehenduntur determinati gradus excretiones sudoris ac urinæ, alvi delectiones, vomitum.

XII. Sed fieri etiam solet multoties, ut febres intermittentes in lentas, acutas, vel etiam in affectus hydropicos transeant; si illæ imprimis fuerint nimie durationis aut acerbitatis, vel ad illas accesserint causæ quæcumque, efficientes sanguinis validas commotiones, aut vehementes adstrictiones in primis & secundis viis.

XIII. Hoc tandem notari quoque meretur, quod febres intermittentes sæpius observentur per complures menses durare; quod quandoque epidemice grassari ac graviores esse deprehendantur autumnales, sive illæ, quæ intra mensem Augustum & Februarium incidunt, quam vernaes, sive

illæ , quæ intra mensem Februarium & Augustum provenire solent.

§. MDCXXVIII.

Docent porro observationes , febres intermittentes ad illud hominum genus accedere , de quo satis constitit , quod corporis primæ & secundæ viæ vel a materia quadam viscida oppletæ sint , vel debilitate affectæ , sive id a causis internis , ut morbis variis præcedentibus , producat ; sive ab externis , ut varietate peccatorum circa res sex non naturales.

§. MDCXXIX.

Apparebit inde causa febrium intermittentium generatim [§. anteced.]

§. MDCXXX.

Attentus ad ea , quæ in corpore humano vivo sponte quidem fiunt , sed certo tempore magis oboriri solent , deprehendes , ea videri ibidem evenire ex consuetudine quasi contracta.

§. MDCXXXI.

Nonne ideo fieri etiam poterit , ut fluida in primis & secundis viis tempore quasi constituto per consuetudinis legem magis secernantur atque excernantur (§. anteced. ?)

§. MDCXXXII.

Atque hoc jam supposito , quod in §. anteced. indicatum est : fieri omnino poterit , ut stato quodam tempore major etiam diffensio vasorum in primis & secundis viis obtineat.

§. MDCXXXIII.

Quoniam vasa admodum debilitata ideo distenduntur facile, quia fluidis parum resistere valent, quæ in illorum cavitatibus continentur; istæque vasorum distensiones augeri debent, ob materiæ viscidæ accessiones ibidem factas: hinc etiam sequitur, fore, ut, oborta simili conditione in vasis primarum & secundarum viarum, simile quid ibidem eveniat.

§. MDCXXXIV.

Vasorum igitur in primis & secundis viis distensione, quæ sui originem consuetudini corporis debet, accedente ad illam, quæ ab eorum debilitate & materia viscida, ibidem hærente, dependet: necesse omnino erit, ut tunc etiam vasa ibidem distendantur ad gradum longe majorem. (§§. 1630. 1633.)

§. MDCXXXV.

Exinde intelligere jam licebit [§. anteced.] quare nimirum in febribus intermittentibus satis verhemens sit spasmus periphericus, ac prodire soleat cum tensionibus quibusdam eminentibus circa scrobiculum cordis & regionem vel epigastricam, vel hypogastricam, vel hypochondriacam [§. 1627. *nunquam* 1 & 3?]

§. MDCXXXVI.

Quare tunc etiam febris accedet; intermittet deinceps, ejus causa imminuta; sed redibit iterum temporis intercapedine accedentibus ad ejus causam novis augmentis [§§. 1632, 1635.]

Magis hæc illustrabuntur in prælectionibus; ibidemque de conditione aliarum hypothesium differetur, quæ in scholis Medicorum obtinuerunt, ad explicandas intermissiones febriles, quibus se distinguit hoc febrium genus a reliquis.

§. MDCXXXVII.

Quod si ea, quæ de effectibus febrium generatim in peculiari quodam capite evicta jam prostant, rite applicentur ad febrium intermittantium genus; utpote quod & comitem sibi habet spasmus periphericum maximi gradus, & pro sui causa agnoscit tam debilitatem in visceribus abdominalibus, quam materiam viscidam, quæ ibidem hæret. [§§. 1628 & 1629:] tunc etiam cognosci satis poterunt rationes eorum symptomatum, quæ in historia febrium intermittantium in genere describuntur [1627;] maxime, si ea hic conferantur simul, quæ de morbis viscerum abdominalium in diversis capitibus prolata exhibentur, neque etiam causæ externæ negligantur, quarum accessione ad ægrotantium corpora febris commutationes momenti satis magni sæpius effici solent.

§. MDCXXXVIII.

Quoniam febrium intermittantium species per durationem intermissionis, sive tempus novæ accessionis febrilis a se ipsis distingui solent; neque ejusmodi quid aliunde magis provenire potest, quam a differentia partium, quæ præ reliquis sedem causæ febrilis hic suppeditant [§§. 1628 & 1629:] hinc jam patebit, quorsum scilicet in febrium intermittantium doctrina speciali respiciendum sit.

§. MDCXXXIX.

Cognitio signorum pathognomicorum sufficientium in febribus intermittentibus generatim redibit ad momenta sequentia. Quod si jam aliquoties factæ fuerint in casu obvio invasiones febriles : tunc usus definitionis harum febrium sufficiens esse poterit , ad signa ista invenienda [§§. 1336 & 1337.] Quando vero sub prima accessione febrili scire jam certo velles , futurum esse , ut febris , quæ nunc modo invadit , subeat febrium intermittentium genus : tum id vel maxime cognoscere licebit ex vehementia & diuturnitate spasmi peripherici , quo febres intermittentes præ reliquis invadere solent ; nec non ex illis tensionibus , quæ durante hoc spasmio peripherico prodeunt ad scrobiculum cordis vel regionem modo epigastricam , modo hypogastricam , modo hypochondriacam [§. 1627, *num.* 1 & 3 ;] tandemque etiam ex deprehensis illis conditionibus corporis , sub quibus febrium intermittentium fieri solet ortus [§§. 1628 & 1629.]

§. MDCLX.

Ad signa vero prognostica in eodem febrium genere cognoscenda, conveniet jam notare sequentia.

I. Hic etiam valebunt ea principia , quæ commemorata exstant ad §. 1384 , eaque conferenda cum iis , quæ enarrantur in §. 1627.

II. Quo majores , quo diuturniores respirationis oppressiones adesse deprehenduntur sub frigore febrili : eo periculosiores fieri poterunt febres intermittentes.

III. Quo major, quo longior æstus fuerit, qui frigus febrile insequitur; quo difficilius proveniat sudor, isque vel nimium parcus, vel largus fuerit: eo peior conditio febrium intermittantium esse solet.

IV. Quo magis etiam fieri hic observetur, ut accessiones febriles admodum varient ratione temporis, earumque posteriores tam acerbitate, quam diuturnitate superare videantur antecedentes: tunc plerumque febres intermittentes transire solent in continuas.

V. Præflagitionis quoque parum bonæ erunt in febribus intermittentibus incommoda vertiginis, graves dolores capitis, vigiliæ, affectus soporosi, lipothymici, alienationes quædam mentis, aut ejus obliuiosæ affectiones, nimia virium jactura.

VI. Bonus vero eventus in hoc febrium genere sperandus erit, si constantia quædam temporis observetur ratione invasionum febrilium; si istæ semper breviores ac leviores fieri deprehendantur, sub moderato successu illarum excretionum, quæ indicantur ad §. 1627. *numer. II.*

CAPUT CLIV.

DE

FEBRE QUOTIDIANA.

§. MDCXLI.

Febbris quotidiana est febris intermittens, quæ quotidie redit, ita tamen, ut accessionis febrilis tempus sibi non videatur respondere alternis diebus.

Ex eo enim, quando nimirum in febre intermittente, licet ea quotidie redeat, id accidere observatur, ut ejus invasiones ratione temporis, quæ illæ fiunt, alternis tantum diebus inter se conveniant, *tertiana* adesse putatur *duplex*, sive *duplicata*.

§. MDCXLII.

Docent observationes, in febre quotidiana apparere phænomena sequentia.

I. Invasio febrilis tempore matutino fieri solet, & quidem hora sexta vel septima, imo adhuc citius in illo hominum genere, quod jentaculis uti adsuevit.

II. Durante frigore febrili, tensiones ac oppressiones quædam incommodæ circa scrobiculum cordis magis oboriri sentiuntur ab ægrotantibus.

III. Reliqua, quæ hic quoque annotanda forent, repetantur ex febrium intermittentium descriptione generali [§. 1627.]

§. MDCXLIII.

Febris quotidianæ causa in ventriculo præsertim latere videtur [§§. 1628 , 1629 , 1638 & 1642, *numer. 2.*]

§. MDCXLIV.

Ea hic quoque valebunt , quæ in capite de febribus intermittentibus in genere proposita exstant.

§. MDCXLV.

Febris quotidianæ signa pathognomica sufficientia cognosci poterunt ex ejus definitione [§. 1641 ;] ex incommodis illis , quæ sub scrobiculo cordis , durante frigore febrili , percipiuntur [§. 1642. *numer. 2 ;*] non neglectis etiam hic iis , quæ in §. 1639. exponuntur.

MDCXLVI.

Prognosi vero in eadem febris intermittentis specie fatis quoque respondebunt ea , quæ prolata jam sunt ad §. 1640.

CAPUT CLV.

DE

FEBRE TERTIANA.

§. MDCXLVII.

F*Ebris tertiana* dicitur ea febris intermittens species, quæ quovis die tertio iterum redit; sive, ubi duas invasiones febriles intercedere observatur unus dies a febre vacuus.

§. MDCXLVIII.

De conditione phaenomenorum, in eadem febris intermittens specie prodeuntium sequentia ex observationibus constant.

I. Accessiones febriles solent hic fieri ante meridiem, & quidem circa solitum tempus prandendi.

II. Sub frigore febrili ægrotantes percipiunt tensionum incommoda, quæ initio in regione magis epigastrica, vel hypogastrica, vel hypochondriaca adesse, deinceps vero ad cordis quoque scrobiculum sese extendere videntur.

III. Supereft, ut ea hic quoque notentur, quæ generatim descripta febrium intermittens historia in se continet [§. 1627.]

§. MDCXLIX.

Sedes causæ febris tertianæ in duodeno iisque visceribus, quæ cum vena portarum nexum subeunt,

collocanda esse videtur [§§. 1628, 1629, 1638 & 1648. *numer. 2.*]

§. MCDL.

Ex observationibus etiam cognoscere licuit multoties, febrem tertianam, largiter admissis causis, quæ valida vi adstringendi pollent, facile transisse in hydropem, scirrhus viscerum; eandemque a gravibus sanguinis commotionibus in varias febrium inflammatarum species quandoque commutatam fuisse.

§. MDCLI.

Atque hoc quoque loco ea valorem habebunt suum, quæ in capite de febribus intermittentibus in genere continentur.

§. MDCLII.

Febris tertianæ signa pathognomica sufficientia esse poterant, præter generalia, quæ in §. 1639. annotata sunt, ejus definitio [§. 1647;] incommoda tensionum sub frigore febrili, percepta prius ad regionem epigastricam, vel hypogastricam, vel hypochondriacam, deinde vero circa scrobiculum [§. 1648. *numer. 2.*]

§. MDCLIII.

Signa vero prognostica in eadem febre satis poterunt cognosci ex §§. 1640 & 1650.

CAPUT CLVI.

DE

FEBRE QUARTANA.

§. MDCLIV.

F *Ebris quartana* vocari solet ea febrium intermittientium species, quæ quovis die quarto iterum redit; sive, ubi inter duas accessiones febriles biduum interjici deprehenditur a febre vacuum.

§. MDCLV.

Testantur observationes, quod in febre quartana, præter ea, quæ jam indicata exhibentur in generali febrium intermittientium descriptione [§. 1627,] sequentia prodire soleant phænomena.

I. Invasiones febriles a meridie intra horam quartam & sextam fiunt; atque hunc typum quartana servat constantius, quam aliæ febrium intermittientium species.

II. Sæviente frigore febrili, prodeunt tensiones ad vertebrae prius lumbares, mox extenduntur ad vertebrae dorsales; neque etiam deficiunt similibus tensionum molestæ perceptiones ad hypochondria atque in profundo abdominis.

§. MDCLVI.

Febris quartanæ causa residere videtur in mesenterio, nec non in aliis visceribus, cum vena por-

tarum connexis (§§. 1628, 1629, 1638 & 1655. numer. 2.)

§. MDCLVII.

Observationum quoque testimonio sæpius comprobatum est, quod febris quartana deprehensa fuerit proficua hypochondriacis, histericis, infantibus atrophicis; quod eadem degeneraverit in febrem lentam ac hecticam, similisque tandem conditionis cum ea fuerit, quæ de febre tertiana annotata est in §. 1650.

§. MDCLVIII.

Neque etiam minus ea hic valebunt, quæ in capite quodam peculiari de febribus intermittentibus generatim exposita sunt.

§. MDCLIX.

De signis pathognomicis sufficientibus in febre quartana satis constare poterit partim ex iis, quæ ratione horum signorum in febribus intermittentibus generatim prolata sunt in §. 1639, partim ex hujus speciei febris definitione, recte ad casum applicata (1654;) partim ex invasionis tempore, quod eadem febris species præ reliquis constanter servare solet (§. 1655. numer. 1;) tandemque etiam ex tensionibus illis, quæ sub ejusdem febris accessione vertebrae lumbares occupare prius, deinceps ulterius progredi observantur (§. citat. numer. 2.)

§. MDCLX.

Prognosis vero cognitioni in eadem febris intermittens specie satis respondebunt ea, quæ continentur in §§. 1640 & 1657.

CAPUT CLVII.

DE

FEBRIUM INTERMITTENTIUM SPECIEBUS RARIORIBUS.

§. MDCLXI.

EX observationibus constitit, obortas quandoque fuisse febres intermittentes, quarum accessionibus duabus plures dies, quam duo interveniebant vacui a febre: tres nimirum, vel quatuor, aut his etiam plures. Pro ratione adeoque numeri hujus, solito auctioris, ad quem in casibus febrium intermittantium reducere licebit intercedentes dies a febre vacuos: prodibunt inde earundem febrium species quædam peculiæ (§. 1638,) jam dicendæ, mox *quintanæ*, mox *sextanæ* & sic ulterius.

§. MDCLXII.

Observationibus haud parum respondere videtur, si ejusmodi febrium intermittantium species (§. antec.) ad quotidianam reducantur, quæ post sui primam invasionem soluta quidem est, sed intervallo trium, quatuor aut plurium dierum, ab accedenti-

bus causis internis, vel externis iterum excitata (§. 1643.)

§. MDCLXIII.

Quæ hic dicenda forent de effectibus, diagnosi ac prognosi in istis febrium speciebus: ea intelligi poterunt ex antecedentibus capitibus, ubi de febribus intermittentibus, tam in genere, quam in specie sermo erat.

C A P U T C L V I I I .

D E

COMMOTIONIBUS SIVE MOTIBUS
FEBRILIBUS.

§. MDCLXIV.

Commotiones febriles momentaneæ quasi durationis febrem supponunt, fiuntque per existentiam unius atque alterius, quod ad febrem requiritur [§. 238,] conspicuæ. Necesse igitur erit, ut, subortis motibus febrilibus, phænomena febris, mox prodeant, mox evanescant, mox etiam possint iterum redire.

§. MDCLXV.

Quo frequentius incidunt commotiones febriles; quo longioris durationis eadem fieri deprehenduntur: eo minus dubitandum erit fore, ut inde prodeat certa species febris, quam reducere licebit ad

unum atque alterum capitum antecedentium, in quibus de speciebus febrium differentibus actum erat [§§. 1368, 1371 & 1372.] Quod etiam observationes confirmant.

§. MDCLXVI.

Quibus vero morbis se adungere soleant commotiones febriles: id satis cognitum esse poterit ex iis, quæ hætenus de morborum tot speciebus proposita jam sunt in compluribus capitibus. Etenim huc spectabunt præcipue morbi, qui ad spasmodum genus pertinent; qui ex viscido, spisso, putrido, acri oriuntur; qui in primis viis resident; qui denique supervenire solent congestionibus humorum solutionibus continui, excretionibus auctis, imminutis aut plane suppressis.

§. MDCLXVII.

Hinc jam facile colligere licebit ad commotionum febrilium effectus varios, signa tam pathognomica, quam prognostica [§§. 1665 & 1666.

Libri secundī de morbis compositis.

FINIS.

LIBER TERTIUS

DE

MORBIS COMPLICATIS.

CAPUT I.

DE

MORBIS COMPLICATIS IN GENERE.

§. MDCLXVII.

Fieri potest, ut morbi chronici cum chronicis, acuti cum acutis, chronici cum acutis, acuti cum chronicis complicantur; sive illi fuerint maligni, sive benigni (§§. *proleg.* 37, 46 & 77.)

Continetur in hoc §. fundamentum, cui inniuntur morborum complicatorum notiones efformandæ, quarum ope illos reducere liceret ad sua genera & species. Quoniam vero hoc studium ad systema magis completum Pathologiæ, quam ejus elementa, pertinet: eo potius nunc enitendum erit, ut, stabilitis antea principiis quibusdam generalibus, quæ inservire poterunt cognitioni morborum complicatorum magis augendæ, de eorundem notioribus ac satis frequentibus speciebus agatur; talique modo fides data simul liberetur (§. 43. *proleg.*)

§. MDCLXIX.

Si cum uno vel altero morbo chronico maligno complicatur unus vel alter morbus acutus benignus : iste quoque malignitatis aliquid præ se feret : atque eo malignior erit, si ad eundem producendum aliæ simul causæ, præter morbum malignum chronicum, accesserint (§§. *proleg.* 37, 46, 77, 126, 132.)

§. MDCLXX.

Videre exinde licebit (§. *anteced.*) quorsum scilicet referri debeant febres acutæ scorbuticorum, venereorum, scabie infectorum, aut ulceribus putridis obnoxiorum ; præsertim tempore epidemicæ grassationis.

§. MDCLXXI.

Si cum morbo chronico benigno complicatur morbus acutus malignus : necesse tum erit, ut in illis partibus, quæ a morbo chronico benigno præcipue afficiebantur, inflammatio oriatur ; eaque suborta species quædam febrium inflammatoriarum generentur ; atque ideo incrementum complicationes morborum acutorum (§§. *proleg.* 37, 46, 77, 80, 81.)

§. MDCLXXII.

Ex §. *anteced.* conspicua jam erit ratio ; unde fiat, ut, oborta nimirum febre acuta maligna, hypochondriaci ac hysterica tam facile subjaceant hepatitidi, splenitidi, nephritidi, causo, feбри inflammatoriæ intestinali aut mesentericæ ; vel phrenitis

prodire soleat in eo hominum genere, quod frequentibus humorum congestionibus ad caput obtemperare cogitur; vel febris inflammatoria uterina haud raro eveniat puerperis, aut etiam feminis aliis, quæ obnoxiae sunt hæmorrhagiis uteri, vel fluxus menstrui anomaliis.

§. MDCLXXIII.

Si duo aut plures morbi, five chronici, five acuti, iique vel benigni, vel maligni, inter se complicantur; quorum autem quilibet per se consideratus rationem sufficientem unius vel alterius symptomatis in se continet: tunc erit necesse, ut ista symptomata communia eo acerbiora fiant, quo plures morbi ad sui complicationem accesserint (§§. *proleg.* 37, 46, 77.)

§. MDCLXXIV.

Ex §. anteced. intelligi facile poterit ratio, quare scilicet effectus ab humorum congestionibus ad caput eo magis angere soleant ægrotantes, quo plures in iisdem febrium species oboriuntur; aut febres cum aliis morbis complicantur, in quibus non deficiunt humorum congestiones ad caput, exemplo plethoræ, spasmodum, pluriumque aliorum morborum.

§. MDCLXXV.

Ex duorum aut plurium morborum idiopathiarum compositione constat morbus complicatus (§. 37. *proleg.*) Hinc fieri poterit, ut pro differentia tam temporis, quo unus morbus idiopathicus ad alium accedit, quam etiam generis, cui subsunt

morborum idiopathicorum species, quæ ad complicationem concurrunt, morbus complicatus quandoque apparet atypicus esse (§. 64. *proleg.*) ob morborum nempe idiopathicorum, qui ad complicationem in casu efficiendam conveniunt, typos inter se collidentes. Sed tunc exceptiones erunt necessariae, quæ ad typum morbi complicati pertinebunt (§. 68. *proleg.*) Unde jam perspicuum satis erit, quod ad notionem completam morbi complicati consequendam requiratur, ut ejus typum intelligas; quo etiam modo cognitionem istam tibi comparare debens (§. 69. *proleg.*)

§. MDCLXXVI.

Morborum solutiones naturales (§. 45. *proleg.*) considerari debent instar effectuum, qui ab iisdem in corporibus ægrotantibus sponte provenire solent. Si itaque complicatio ex morbis oritur, quorum quilibet uno eodemque modo solvitur: solutio morbi ita complicati majorem gradum nanciscetur, quo plures ejusmodi morbi idiopathici ad formandam complicationem concurrunt; quum illorum unus huic speciei solutionis sufficeret. Sin autem complicatio ex morbis constat, quorum quilibet proprio sibi modo solvitur: tunc morbi hujus complicati solutiones sensim sensimque fient, nec incrementum; nisi forte id contingat, ut vel admittantur causæ quædam externæ, vel unius morbi idiopathici symptomata quædam ad certum gradum perveniant, quibus ad alterius morbi idiopathici, qui in casu præsentis complicationis adest, solutionem magis promovendam, auctæ quasi vires accedunt; quibuscum observationes probe conveniunt.

§. MDCLXXVII.

Morborum complicatorum signa sufficientia tam pathognomica, quam prognostica, in genere constabunt ex signis iisdem, a quibus cujuslibet morbi idiopathici, nunc jam præsentis in complicatione, diagnosi & prognosis petitur. Quare ex libro præcedente, in quo de morbis compositis sermo erat, hîc pertinentia loca conferenda erunt; non neglectis iis, quæ de morborum complicatorum solutionibus generatim dicta sunt in §. anteced.

CAPUT II.

DE

FEBRIBUS COMPLICATIS IN GENERE.

§. MDCLXXVIII.

F*ebbris complicata* dicitur in genere febris composita ex duabus aut pluribus sui speciebus.

§. MDCLXXIX.

Differunt febres inter se tam ratione generum (§§. 1337, 1385, 1406 & 1627,) quam etiam ratione specierum, quæ ita generibus suis substant, ut earum una, in relatione ad alteram, spectari possit tamquam morbus modo major, modo minor (§. 72. *proleg.*) id quod satis evidens fieri poterit ex illorum capitum comparatione accurate inter se instituta, ubi libro præcedente disputatum erat de febrium diversis speciebus. Unde jam con-

sequitur : fore , ut febrium complicatarum casus ratione gravitatis , vel levitatis inter se discrepent mirifice ; semper vero reduci possint ad generale principium constituendi , genera ac species morborum complicatorum [§. 1668.]

§. MDCLXXX.

Quoniam febris complicata duas aut plures sui species requirit , quæ simul adesse debent in corpore ægrotante [§. 1678 :] sequitur , ut illum oporteat febris indolem quoad singulas sui species probe perspectam habere , qui velit recte febrium complicatarum naturam intelligere. Huic igitur studio inservire quoque poterunt ea , quæ in peculiaribus capitibus libri præcedentis de febrium generibus ac speciebus proposita jam existant.

§. MDCLXXXI.

Duabus aut pluribus febrium speciebus in corpore quodam ægrotante simul existentibus , major quoque morbus ibidem aderit [§. 62. *proleg.*] quam si una tantum ex iisdem speciebus febrium adesset. Omnis itaque febris complicata , quæ in casu quodam obvio suboritur , erit morbus major febre simplice [§. 1678.]

§. MDCLXXXII.

Quare etiam symptomata majoris gradus erunt in febribus complicatis , quam in febribus simplicibus [§. anteced.]

§. MDCLXXXIII.

Omnis morbus causam aliquam sibi præsentem vindicat; qua cessante, cessabit quoque morbus, qui ab illa dependebat; & morbo isto adhuc existente, perdurare etiam debet ejus causa [§§. proleg. 133 & 134.] Singularum itaque specierum febris, quæ ad formandam sui complicationem in corpore ægrotantis cujusdam concurrunt, causæ ibidem inesse debent [§. 1678,] quibus cognitis, cognoscere quoque licebit febris complicatæ casum obortum. Quare hîc conferre juvabit libri præcedentis ea capita, in quibus de febrium speciebus diversis actum erat.

§. MDCLXXXIV.

Febris complicata homogenea, five *ejusdem ordinis* erit illa, quæ ex meris febrium speciebus componitur, eidem generi substantibus. Huic feбри opponere jam licebit *febrem complicatam heterogeneam*, five *diversi ordinis*.

§. MDCLXXXV.

Febris complicata harmonica, five *consona* dici poterit, si singulæ febris species, quæ complicationi insunt, hujus conditionis fuerint, ut earum invasiones febriles uno semper tempore fieri deprehendantur. Cujus indolis feбри opponenda jam erit *febris complicata dissona*, five *minus harmonica*.

§. MDCLXXXVI.

Febris complicata synchrona, five *synchronica* vocanda erit febris, sub cujus statim initio omnes atque singulas species febrium, quæ complicationi insunt, ortas esse deprehendere licet. Sed hujus condi-

tionis febris opponi jam poterit *febris complicata heterochrona*, sive *polychronica*.

§. MDCLXXXVII.

Spasmus periphericus, quocum invasiones febri-
les fieri solent, ad majorem gradum prodibit in
febre complicata harmonica, quam in dissona
(§. 1685, una cum effectibus, qui inde in cor-
pore febriente dependent, similiter auctis (§§.
1346, 1347, 1681 & 1682.)

§. MDCLXXXVIII.

Reditus spasmi peripherici in febre complicata
dissona sæpius fiet intra quemcumque paroxysmum,
quam una vice; contraria vero ratione se res habe-
bit cum ejusdem spasmi reversione in febre compli-
cata consona (§. 1685.)

§. MDCLXXXIX.

Hinc necesse erit, ut in ægrotantibus ex febre
complicata dissona interrumpatur series illorum effe-
ctuum, qui in secundo stadio febrili prodire solent
(§. 1363 & 1364.

§. MDCXC.

Quare tunc etiam fieri poterit (§. anteced.) ut
ob frequentes istas reversiones spasmi peripherici in
febris complicatis minus harmonicis sæpius obo-
riantur transpirationis suppressiones; nec raro de-
prehendantur sudores frigidi, una cum caloris &
frigoris per vices successibus.

Hujus loci videtur esse febris illa, quam dicere solent *horridam*, sive *algidam*, & in qua frigoris ac caloris incommoda frequenter inter se alternare observantur.

§. MDCXCI.

Quod si febris complicata dissona ex illis febrium speciebus constaret, quarum solutio salutaris non nisi per eccrismam vel metastasim periphericam fieri potest, tunc erit necesse, ut hæc solutio febris impediatur ad complicationem istam febrilem majora accedant augmenta; totus denique morbus eventum funestum eo facilius nanciscatur, si in hoc complicationis casu simul adfuerit una atque altera species febris malignæ (§. anteced.)

§. MDCXCII.

Duas aut plures febrium species, quæ in casu quodam simul adesse debent, sibi vindicat febris complicata (§. 1678.) Cujus ideoque typus necessario erit compositus.

§. MDCXCIII.

Typus febris complicatæ harmonicæ respondebit typo febris simplicis [§. 1685;] præcipue, si illa simul fuerit homogenea [§. 1684.]

§. MDCXCIV.

Omnis vero febris complicata dissona, in relatione ad typum febris simplicis, tibi apparebit tamquam febris atypica [§. 1685;] idque eo magis, si illa simul fuerit heterogenea [§. 1684.]

§. MDCXCV.

Singulæ febrium species, concurrentes ad producendam febrem complicatam dissonam, inter se collident [§. anteced.] Ex collisionibus vero nascuntur exceptiones; quarum complexus utique pertinebit ad typum febris complicatæ minus harmoniæ in casu obvio [§. 68. *proleg.*] Atque ita omnis febris complicata dissona erit revera febris typica; quamvis eadem simul fuerit diversi ordinis.

§. MDCXCVI.

Typus in febre complicata synchrona statim prodibit sub morbi initio; in heterochrona vero non nisi sub ejus progressu [§. 1686.]

§. MDCXCVII.

Si igitur ab illa relatione discefferis, quam febres complicatæ synchronæ vel heterochronæ ad tempus habent, quo eadem scilicet utuntur ad sui decursum: tunc in earum typo nihil mutari deprehendes; quamvis eadem referantur ad casus, in §§. 1693 & 1694. propositos.

§. MDCXCVIII.

Febris complicatæ typo distincte intellecto, illius quoque initium, incrementum, statum & declinationem recte cognoscere licebit [§§. 62. *proleg.* 64. *proleg.* 1692.]

§. MDCXCIX.

Quo magis itaque typus febris complicatæ cum typo febris simplicis in casibus obviis deprehenditur

convenire : eo magis illa quoque consentiet ratione initii, incrementi, status ac decrementi cum febre simplice. Quo magis vero typus febris complicatæ a typo febris simplicis abhorrere videtur in casibus subnatis : eo major hîc quoque differentia obtinebit, nec difficultate tunc carebit, cognoscendi initium, incrementum, statum & declinationem febris complicatæ (§. anteced.)

§. MDCC.

Aliter itaque comparatum erit cum initio, incremento, statu ac decremento in febre complicata homogenea, harmonica, synchrona, alter in heterogenea, dissona, heterochrona. In casu priore cognitio istius rei facilius erit; difficilior vero in casu posteriore (§§. 1692, 1699.)

§. MDCCI.

Signa pathognomica sufficientia febris complicatæ componuntur ex signis singularum febris specierum, concurrentium ad illius ortum (§. 1678.)

§. MDCCII.

Ex §. anteced. satis intelligere licebit, quibus nempe fundamentis innitatur cognitio signorum pathognomicorum sufficientium in febribus complicatis generatim [§. 1680.]

§. MDCCIII.

Signa vero prognostica febris complicatæ generatim inventurus, ut illius qualitatem & quanti-

tatem recte intelligat, omnem det operam (§. 1678,)

§. MDCCIV.

Quare jam ex §. anteced. constare satis poterit, quod, præter singularum febris specierum, existentium in casu complicationis, solidam cognitionem, opus sit, ut ad symptomatum acerbitatem, quæ generatim major est in febribus complicatis (§. 1682,) quam in simplicibus, animum dirigas tuum; ut rationem habeas organorum vitalium, quantum scilicet illa inde afficiantur; ut hæc singula denique compares cum iis locis, in quibus de solutionibus harumque variis commutationibus, quæ generatim in febribus complicatis aliisque morborum complicationibus oboriri solent, sermo intercurreret [§. 1676 & 1691.] Unde jam fluent propositiones sequentes, præ reliquis hinc notandæ,

I. Quo magis in febribus complicatis adesse observantur respirationis oppressiones, vigilæ, affectus soporosi, deliria, virium debilitas: eo magis periculosus erit status ægrotantium.

II. Quo magis excretiones illæ febriles, quarum ortus in febre simplice ejus solutionem salutarem efficere solet, in febribus quoque complicatis deprehenduntur inter se convenire ratione ejusdem speciei, decentis quantitatis & temporis, quo fiunt: eo melior conditio ægrotantium erit.

III. Febres complicatæ, quæ simul sunt homogeneæ, harmonicæ ac synchronæ, indolis melioris erunt, in relatione ad sibi oppositas [§§. 1684, 1686.]

CAPUT III.

DE

SYNOCHO PUTRIDA.

§. MDCCV.

S*ynochus putrida* est febris complicata, constans ex febre continente, atque una vel altera specie febris continuæ acutæ.

§. MDCCVI.

Symptomata, quæ in synocho putrida prodire solent, inter se different, tam respectu magnitudinis quam qualitatis; neque aliunde dependebit hæc diversitas symptomatum, quam a diversis speciebus februm, tam continentium, quam continuarum acutarum, quæ in casu suborto inter se complicantur [§. anteced.]

§. MDCCVII.

Synochi putridæ casus different quidem inter se, pertinebunt vero omnes ad morborum acutorum complicationes cum acutis, iisque mox benignis, mox malignis [§. 1705.]

§. MDCCVIII.

Quæcumque in peculiaribus quibusdam [§§. dicta jam sunt de symptomatum communium in morbis generatim complicatis exacerbationibus [§§. 1673 & 1674;] de solutionibus, quæ in

eodem morborum genere evenire solent [§. 1676;] de symptomatibus febrium complicatarum in genere majoris gradus §. 1682,] de earundem febrium causa (§. 1683;] de rariore aut frequentiore reditu spasmi peripherici, qui ibidem fieri potest, illiusque efficacia [§§. 1687, 1691;] de typi tandem conditionibus in eodem febrium genere [§§. 1692, 1700:] ea omnia de casibus quoque synochi putridæ [§. 1705.] in specie notare conveniet.

§. MDCCIX.

Synochi putridæ solutio longissime intra unum septenarium contingit, & quidem ita, ut febres continuæ acutæ, hic simul existentes, soluta febre continente, vel statim absorbeantur, vel solæ intra sequens septenarium solvendæ relinquantur (§§. 1385. *numer. 7.* 1406. *numer. 7.* 1705.)

§. MDCCX.

Quod si in synocho putrida una atque altera species febrium continuarum acutarum adfuerit, de qua constitit, eandem salutariter solvi per largos sudores; iique jam subsequantur, & quidem in primo septenario; fieri tunc poterit, ut integræ hujus complicationis febrilis simul oboriatur solutio salutaris (§. 1385. *numer. 6 & 7.*)

§. MDCCXI.

Quando una atque altera species febrium inflammatoriarum ad synochum putridam in casu ali-

quo efficiendam concurrit: obortis intra tempus primi septenarii copiosis sudoribus, aut larga hæmorrhagia, tota hæc complicatio febrilis uno tempore solvi poterit salutariter (§§. 1385. *numer.* 6 & 7. 1414. *numer.* 5 & 6.)

§. MDCCXII.

Existente febre maligna in ea complicatione febrili, quæ synochum putridam constituit: fieri poterit, ut hæmorrhagia ibidem oborta facile excedat; neque exigua impedimenta inde redeant ad salutarem solutionem febris malignæ, præsertim exanthematicæ (§§. 1385. *numer.* 6. 1552, 1553, 1691 & 1705.)

§. MDCCXIII.

Ad casum itaque in §. anteced. propositum, facilis erit accessio febris inflammatoriæ, qua plerumque effici solet, ut tota hæc morbi complicatio funestum eventum nanciscatur (§. 1547. *numer.* 12.)

§. MDCCXIV.

Synochi putridæ signa pathognomica sufficientia in genere erunt pulsus magni in principio morbi deprehensiones; nullæ remissiones paroxysmorum febrilium, spasmus periphericus intra viginti quatuor horas rediens; una cum signis februm continuarum acutarum supra evictis, tam in genere, quam in specie [§§. 1389, 1408 & 1705.] Quare præter pulsum magnum in principio febris observatum, remissiones paroxysmorum fe-

brilium nullas, tandemque spasmus periphericum intra viginti quatuor horas redeuntem, in synochi putridæ casibus phænomenorum sequentium deprehendere licebit unum atque alterum. Si hîc nempe adfuerit febris inflammatoria, tunc in urinis cuticula cærulea apparebit, neque simul deficient doloris ardentis perceptiones (§. 1416;) si biliosa, prodibunt sodæ ac saporis amaricantis incommoda (§. 1538;) si catarrhalis, non deerunt catarrhi phænomena (§. 1544;) si maligna, conspicuæ tunc satis erunt virium prostrationes, nec non anxietates præcordiorum; una cum exaltationibus putridis, quæ prodeunt e corporibus febrientibus (§. 1555.)

§. MDCCXV.

Ad prognosin denique quod in synocho putrida latinet: hic jam sufficere poterit eorum recta ad casum applicatio, quæ proposita exstant in §§. 1703, 1704, 1709, 1713.

CAPUT IV.

DE

FEBRIBUS COMPOSITIS EX ACUTA
PERIODO.

§. MDCCXVI.

F*Ebres compositæ ex acuta periodo dicuntur febres complicatæ, quæ ex conjunctione febrium continuarum acutarum vel inter se, vel cum febre continente, prodeunt.*

§. MDCCXVII.

Quarum febrium symptomata inter se quoque discrepabunt, partim quoad gradum, partim etiam quoad qualitatem; hujusque differentiæ ratio sita erit in diversis speciebus febrium acutarum, tam continuarum, quam continentium, quæ ad sui complicationem in casu obvio concurrunt (§. anteced.)

§. MCCXVIII.

Omnes itaque casus febrium compositarum ex acuta periodo referendi erunt ad morborum complicatorum genus, quod oritur ex conjunctionibus duorum aut plurium morborum acutorum inter se; sive iidem fuerint benigni, sive maligni (§. 1716.)

§. MDCCXIX.

Sed ille casus febrium compositarum ex acuta periodo, qui febris continentis ad se accessionem sibi

vindicat, per phænomena febris continuæ acutæ ea antecedentia, quæ feбри continenti competunt, a synocho putrida distinguitur; utpote in qua febris continentis phænomena prius prodire debent, quam febris continuæ acutæ (§§. 1705 & 1716.)

§. MDCCXX.

Obortis illis casibus febrium compositarum ex acuta periodo, in quibus, præter febres continuas acutas, febris continens simul adesse deprehenditur; ejusdem accessio ad febres prioris indolis post istarum initia mox fiat, necesse erit (§§. 1385. *num.* 7. 1387. 1406. *num.* 7.) Quocum etiam observationes consentiunt.

§. MDCCXXI.

Si in eo casu complicationis, qui ad febres compositas ex acuta periodo pertinet, adfuerit maligna cum biliosa, hujusque causa oboriatur diarrhœa; facile tunc fieri poterit, ut, febre inflammatoria intestinali accensa, tota hæc morbi complicatio per mortem solvatur (§§. 1534. *numer.* 5 & 6 1547. *numer.* 12.)

§. MDCCXXII.

Poterunt hic quoque locum habere suum casus, propositi in §§. 1710 - 1713.

§. MDCCXXIII.

Simulque etiam ea hîc transferenda erunt, quæ annotata in §. 1708. jam existant.

§. MDCCXXIV.

Februm in genere compositarum ex acuta periodo signa pathognomica sufficientia, redibunt ad eadem, per quæ tam febres continentes, quam etiam continuæ acutæ generatim dignoscuntur (§§. 1389. 1408. 1716.) In specie vero hîc notari meretur, quod febris continentis, si eadem adfuerit in isto februm complicatarum genere, dignotio ex pulsu magno tunc fieri soleat maxime conspicua, quando febres continuæ acutæ, hîc æque existentes, remittunt; atque harum signa cum iis quoque conveniant, quæ citantur ad §§. 1714. & 1719.

§. MDCCXXV.

Prognosi vero in eodem februm complicatarum genere sufficere poterunt accuratæ eorum applicationes ad casum, quæ indicantur in §§. 1704. 1715 & 1721.

CAPUT V.

DE

FEBRE TERTIANA CONTINUA.

§. MDCCXXVI.

F*ebbris tertiana continua* est febris complicata, constans ex febre tertiana & continua quacumque.

§. MDCCXXVII.

Ergo tertiana continua spectari poterit ut morbus complicatus, qui oritur ex conjunctione vel morbi chronici cum chronico, vel chronici cum acuto, eoque aut benigno, aut maligno (§§. 1406. *numer.* 7. 1546 & 1726.)

§. MDCCXXVIII.

Differentes ideoque casus erunt febris tertianæ continuæ; pro ratione nimirum diversa specierum febrium continuarum, quæ hîc cum certa aliqua febris intermittens specie complicantur (§§. 1726 & 1727.)

§. MDCCXXIX.

Quoniam longe majoris gradus ac durationis esse observatur spasmus periphericus in febribus intermittens, quam in continuis (§§. 1406. *num.* 1. & 1627. *num.* 1.); sequitur, fore, ut spasmus periphericus, qui in tertiana continua alternis diebus oboritur, duratione & magnitudine illum superet, qui quotidie prodire solet, ob febris continuæ in eodem complicationis casu existentiam (§. 1726.) Quod etiam probatur sensuum iudicio.

§. MDCCXXX.

Hinc etiam illo tempore, quo spasmi hujus peripherici vehementia fit conspicua (§. anteced.), angores cordis multo majoris gradus erunt, quam alias; iique supra modum excedentes, si febris maligna in complicationis casu eodem simul adfuerit

(§§. 1346. 1347. 1352. 1547. *num.* 3.) Atque id quoque congruum est cum judicio sensuum.

§. MDCCXXXI.

Si in tertiana continuâ adfuerit una vel altera species febris continuæ acutæ, salutariter solvendæ per sudores; necesse tum erit, ut ista salutaris solutio impediatur (§. 1729.) Quod similiter probant observationes.

§. MDCCXXXII.

Quando tertianæ continuæ una atque altera species febris malignæ, præcipue exanthematicæ, juncta esse deprehenditur; metuendus tunc erit inflammationis facilis ortus in iis locis corporis, quæ sedem suppeditant causæ febris tertianæ (§§. 1649. 1671.) Quibus apprime respondent observationes.

§. MDCCXXXIII.

Tunc igitur increfcet hæc febris complicatio; ob accedentes ad eam febrium inflammatoriarum species nunc jam ortas; eventu morbi funesto plerumque insequente (§§. 1547. *num.* 12. & 1732.)

§. MDCCXXXIV.

Observationum fide constitit, in casibus febris tertianæ continuæ plerumque fieri, ut morbus magis increfcet, existente nimirum in complicatione febre continua chronica; salutariter vero solvatur, febre continua acuta, quæ ibidem aderat, bene soluta.

§. MDCCXXXV.

Quæ in §. 1708. annotata exhibentur, ea hîc quoque transferenda erunt.

§. MDCCXXXVI.

Signa pathognomica sufficientia in febre tertiana continua suppeditabunt spasmi peripherici fortioris perceptiones alternis diebus obortæ, una cum tensionibus tunc simul prodeuntibus in regione epigastrica, hypogastrica, deinde vero occupantibus quoque loca ad scrobiculum cordis (§. 1652.) Quibus insuper accedere debent signa, per quæ febres continuæ tam in genere, quam in specie, a reliquis distinguuntur (§. 1726.) Quare hoc jam loco conferenda erunt ea, quæ indicantur in §§. 1408. 1416. 1538. 1544. 1555 & 1625.

§. MDCCXXXVII.

Ratione tandem prognosis satis cognoscendæ in febre tertiana continua; notanda jam erunt, quæ sequuntur.

I. Opus erit, ut de vera conditione casus, oborti circa hanc febris complicationem, certus fias; id quod ita obtineri poterit, si efficias, ut tibi per signa convenientia, eaque in §. anteced. allegata, satis constet de febrium continuarum speciebus, præsentibus in casu complicationis (§§. 1726-1728.)

II. Quo jam modo cognita comparentur cum principiis, quibus febrium continuarum ac in-

termittentium innititur prognosis (§§. 1409 & 1640.); iisdem porro reductis ad ea, quæ in §. 1704. exponuntur.

III. Tandem & ea hîc considerare oportebit, quæ indicantur in §§. 1729 - 1734.

CAPUT VI.

DE

FEBRE QUARTANA CONTINUA.

§. MDCCXXXVIII.

F*Ebris quartana continua* est febris complicata, constans ex febre quartana & continua quacumque.

§. MDCCXXXIX.

Quæ in capite præcedente de febre tertiana continua traduntur, ea quoque febri quartanæ continuæ passim competunt; nisi quod post interpositum biduum, adeoque die semper quarto, spasmi peripherici major gradus hic prodeat; eoque tandem præsentem, tensionum incommoda prius oboriantur circa vertebrae lumbares, mox vero se extendant ulterius (§§. 1654. 1655 & 1738.)

CAPUT VII.

DE

FEBRE QUOTIDIANA CONTINUA.

§. MDCCXL.

F*ebbris quotidiana continua* vocatur ea febris complicatae species, quæ oritur ex conjunctione febris quotidianæ cum continua quacumque.

§. MDCCXLI.

Ceterum, hanc quoque febris speciem reducere licebit ad caput febris tertianæ continuæ; ea tamen cum differentia, ut spasmus ille periphericus auctioris gradus hic quotidie compareat, cum tensionum molestiis, circa scrobiculum cordis magis provenientibus [§§. 1641. 1642 & 1740.]

Ex conjunctione febris vel quotidianæ continuæ cum tertiana, vel continuæ cujuscumque cum tertiana duplici, oriri quandoque observatur febris, quæ *hemitritæa*, sive *semitertiana* dici solet; unde patet, quorsum hæc febris referenda sit. In prælectionibus vero explicatius dicetur de ejusmodi reductionibus earumque utilitate eximia, quæ inde generatim redit ad morborum complicatorum doctrinam.

Libri Tertii de Morbis Complicatis

F I N I S.

LIBER QUARTUS.

DE MORTE.

CAPUT I.

DE

PRINCIPIORUM CONDITIOE AD MORTEM PRÆSAGIENDAM IN MORBIS.

§. MDCCXLII.

Observantur in corpore hominis viventis actiones prodire, quæ per illius structuram fieri possunt; quorum exempli gratia pertinebunt motus cordis ac arteriarum, respiratio, sensuum effectus, motus voluntarii corporis, hujusque generis plura alia. Quamdiu harum actionum una atque altera certo fit in corpore humano; tamdiu etiam vitam eidem inesse judicamus. Simul atque vero constiterit, nullam prorsus earundem actionum ibidem oboriri; ad mortis tunc existentiam colligere solemus. Erit adeoque *mors* status corporis vitæ oppositus; sive absentia omnium plane actionum corporis humani, per ejusdem structuram possibile.

§. MDCCXLIII.

Qui animum induxit suum, mortem certo præ-
 sagire in morbis; illum oportebit omnes atque sin-
 gulas actiones corporis humani, quæ per ejus struc-
 turam fieri possunt, cognitæ habere; earum ne-
 xum mutuum & rationes, quas præcipue habent
 ad vitam, intelligere; tandemque eas mutationes
 in corporibus ægrotantibus præ reliquis sibi nota-
 re, unde tuto colligere licebit, vel iam adesse ibi-
 dem actiones vitales supra modum læsas, aut futu-
 rum esse, ut illæ lædantur adeo, ut morbus, in
 casu obvio sibi relictus, eventum funestum necessa-
 rio consequi debeat (§. anteced.)

CAPUT II.

DE

MORTIS PROGNOSI IN MORBIS
GENERATIM.

§. MDCCXLIV.

SI quæ in morbis obveniant, unde conjici possit,
 fore, ut actiones cerebelli, cordis, vel pulmo-
 num auferantur; ea omnia signa esse poterunt
 mortis certo futuræ [§. anteced.]

§. MDCCXLV.

Quare morbi, qui statim initio dictas ad §. præ-
 ced. actiones valdopere lædunt, citius eventum

lethalem nanciscuntur, quam alii, qui prius succedente tempore vini causæ obtinent, ad tantas læsiones iisdem actionibus inducendas (§. anteced.)

§. MDCCXLVI.

Quo plures causæ ad lædendas actiones cerebelli, cordis vel pulmonum concurrunt; quo validius illæ in hæc partes agunt; eo citior quoque mors subsequetur (§. anteced.)

§. MDCCXLVII.

In casu adeoque subnato singula morbi symptomata, sive ille compositus, sive complicatus fuerit, accurate ponderanda erunt; ut satis constet de actionum vitalium læsionibus, earumque gradu (§. anteced.)

§. MDCCXLVIII.

Neque minus considerandæ hîc etiam erunt causæ externæ, a quarum accessionibus ad corpus ægrotantis, ubi jam adesse deprehenduntur actionum vitalium læsiones, hæc sæpius increscunt supra modum.

§. MDCCXLIX.

Signa vero læsarum actionum cerebelli, cordis & pulmonum sufficientia esse poterunt; motus convulsivi, imprimis conjuncti cum morbo quodam sensuum internorum, nec non insigni quadam debilitate corporis; motus cordis inæqualis & pulsus intermittens; respiratio valde intercepta, una cum gravibus humorum congestionibus ad caput.

§. MDCCL.

Prodire tunc solent (§§. 1744 & 1749.) in corporibus ægrotantium multiplicia phænomena, quæ in sensus adstantium valdopere incurrunt, eaque omnino habenda pro signis prognosticis mortis; simul atque constiterit, eadem quoque verum nexum subire cum morbo, qui adest in casu præfente.

Quandoque enim unum atque alterum horum phænomenorum ægrotantis consuetudini originem suam magis debere videtur, quam morbo. Cautione itaque opus hic erit in judicando. Singula hæc in prælectionibus magis illustrabuntur.

Libri quarti de morte

FINIS.



INDEX

RERUM NOTABILIORUM NUMERUS PARAGRAPHUM INDICAT.

A

- A**bscessus 207. ej. caus. prox. 208
Abundantia partium solidarum morbi genus ej.
 caus. prox. *ibid.*
Achor. vid. *crusta lactea.*
Acrimonia humorum 190. ej. divisio 191. caus. prox. 192
Addephagia 305. ej. caus. prox. 306. remot. symptom.
 signa pathog. & progn. 867-871
Aetas crescens 91. *proleg.* consistens 91. *proleg.* decre-
 cens 91. *proleg.* infantilis. *ibid.* puerilis *ibid.* juvenilis
ibid. virilis *ibid.* senilis *ibid.*
Amaurosis, vid. *cæcitas.*
Ambusio partium solidarum 28. ej. caus. prox. 29
Anamnesticum signum morbi, vid. signum morbi recor-
 dativum.
Anasarca 247. ej. caus. prox. 248. vid. *leucophlegmatia.*
Anevrysma spurium 142. verum. 140. ej. caus. prox. 141
Angina spuria, sive *notha* 284. vera 1426. ej. caus.
 sympt. signa pathogn. & progn. 1427-1432
Angor cordis, vid. *anxietas præcordiorum.*
Animi deliquium vel defectio, vid. *lipothymia.*
 — morbus 364
Anorexia 303. ej. caus. prox. 304. remot. symptom.
 signa pathogn. & progn. 863-866
Anthrax 235. in specie pestilentialis *ibid.*

I N D E X.

<i>Anxietas præcordiorum</i> 146. ej. caus. prox.	150
<i>Aphonia</i> 363. ej. caus. <i>ibid.</i> symptom. signa pathogn. & progn.	1281-1283
<i>Apoplexia</i> 274. ej. divisio <i>ibid.</i> caus. symptom. signa pathogn. & progn.	625-632
<i>Apostema</i> , vid. abscessus.	
<i>Aridura</i> , 277. ej. caus. prox.	278
<i>Arrosio</i> partium solidarum 30. ej. caus. prox.	31
<i>Arthritis</i> 259. ej. divisio	<i>ibid.</i>
<i>Ascites</i> 249. ej. caus. prox. 250. remot. symptom. signa pathogn. & progn.	1055-1064
<i>Asthma convulsivum</i> f. spasticum 265. ej. caus. symptom. signa pathogn. & progn.	572-583
- - <i>defectivum</i> 273. ej. caus. symptom. signa pathogn. & progn.	615-624
- - <i>humidum</i> & <i>siccum</i>	273
<i>Athonia</i> 219. ej. caus. prox.	220
<i>Atrophia</i> in genere 277. ej. caus. prox.	278
<i>Auricularum</i> cordis actiones auctæ & debiles 152. <i>car.</i> caus. prox.	154

B.

<i>Branchus</i> 285. ej. caus. prox. 286. remot. symptom. signa pathogn. & progn.	1175-1185
<i>Bubo</i> in genere & in specie 223. ej. caus. prox. <i>ibid.</i> divisio in malignum & benignum	224
<i>Bubonocèle</i>	252

C.

<i>Cacochymia</i> 193. ej. caus. prox. 194. symptom. signa pathogn. & progn.	397-399
<i>Cachexia</i> 256. ej. caus. prox.	257
<i>Cecitas</i> 357. ej. caus. prox. <i>ibid.</i> remot. symptom. signa pathogn. & progn.	1252-1256
<i>Calculus</i> renum & vesicæ. ej. origo, effectus, diagnosi & prognosis	989-999

I N D E X.

- Cancer occultus* 212. ej. caus. prox. 213. symptom. signa pathogn. & progn. 443-453. 456. & 457
- - *apertus* 212. ej. caus. prox. 213. materia 448-452
- Carbunculus*, vid. anthrax.
- Carcinoma*, vid. cancer apertus.
- Cardialgia* 299. ej. caus. prox. *ibid.* remot. symptom. signa pathog. & progn. 842-852
- Cardiagnus*, vid. cardialgia
- Caries ossis* 46. ej. caus. prox. 47. remot. symptom. signa pathogn. & progn. 458-466
- Carus* 353
- Catalepsis* 263
- Catameniorum fluxus*, vid. fluxus menstruus.
- Cataracta*, vid. cæcitas.
- Catarrhus* generatim & speciatim 347. *suffocativus* 289
ej. caus. proxim. *ibid.* remot. symptom. signa pathogn. & progn. 796-806
- Causa morbi* 98. *proleg.* efficiens. *ibid.* efficiens sufficiens, *ibid.* proxima & remota 102. *proleg.* materialis & immaterialis 103. *proleg.* externa & interna 104. *proleg.*
- Causarum morbi diversæ relationes* 105. & seq. *proleg.* occultarum investigatio quomodo 160. *proleg.*
- Causus* 1504. ej. caus. symptom. signa pathogn. & progn. 1505-1511
- Cephalalgia* 358. ej. caus. symptom. signa pathogn. progn. 1218-1223
- Chirargra* 261. ej. caus. symptom. signa pathogn. & progn. 555-571
- Chorea S. Viti* 372. ej. caus. symptom. signa pathogn. & progn. 1316-1318
- Circulus causarum internarum morbi* 141. *proleg.*
- Cirsocele* 254
- Colica* 314. ej. caus. prox. *ibid.* remot. symptom. signa pathogn. & progn. 892-898

I N D E X

- Collabecentia* f. *collapsio* vasorum 96. ej. caus. prox. 97
Coma somnolentum 353. vigil. *ibid.*
Commotiones febriles 238. 1664-1667
Compressio vasorum 101. ej. caus. prox. 102
Concaussæ morborum efficientes 101. *proleg.* earum di-
 versæ relationes 125. & seq. *proleg.*
Concrescentia vasis f. *concretio* vasis 107. ej. caus. prox.
 108
Congestio humorum 175. ej. caus. prox. 176. symptom.
 signa pathogn. & progn. 404-407
Constrictio vasorum 92. ej. caus. prox. 93
Contagium 77. *proleg.*
Contractura 266
Convulsio 267. ej. caus. prox. 268. remot. symptom. signa
 pathogn. & progn. 584-598
Coryza 281. ej. caus. prox. 282. vid. *gravedo*.
Clavus hystericus 1221
Crisis 1373. bona 1376. mala, *ibid.* ej. forma 1377
Crusta lactea 231. ej. caus. prox. *ibid.* symptom. signa
 pathogn. & progn. 1160-1166

D.

- Debilitas* memoriæ 379. vid. *morosis*.
 - - *solidorum* 20. ej. caus. prox. 22. symptom. signa
 pathogn. & progn. 386-388. ventriculi & intestinor.
 caus. symptom. signa pathogn. & progn. 923-929
Declinatio seu *decrementum* morbi 62. *proleg.*
Defectus partium solidarum, morbi genus 38. ej. caus.
 prox. *ibid.*
Deficiens augmentum in partibus solidis, morbi genus 40
 ej. caus. prox. *ibid.*
Delirium in genere 365. in specie, sive maniacum 366.
 melancholicum 366. acutum, sive phreniticum 367.
 chronicum 367. ej. caus. prox. 368
Densitas humorum nimia, vid. *spissitudo* humorum.
Depletio

I N D E X.

<i>Depletio vasorum</i> 168. ej. caus. prox.	169
<i>Diabetes</i> 325. ej. caus. prox. <i>ibid.</i> remot. symptom. signa pathogn. & progn.	1014-1021
<i>Diagramma criticum</i>	1382
<i>Diarrhœa</i> 310. ej. caus. prox. <i>ibid.</i> remot. symptom. signa pathogn. & progn. 913-922. ei. different. spec.	311-312.
<i>Dies critic.</i> 1381. indicatorius <i>ibid.</i> intercalaris <i>ibid.</i> vacuus <i>ibid.</i> pseudocriticus seu tyrannicus	<i>ibid.</i>
<i>Dislocatio</i> 34. ej. caus. prox.	36
<i>Dyspnœa</i> 294. ej. caus. prox.	<i>ibid.</i>
<i>Dispositio corporis ad morbum</i> 49. proleg.]	
<i>Distentio vasorum</i> 94 ej. caus. prox.	95
<i>Distorsio</i>	58
<i>Dysuria</i> 323. ej. caus. prox. 324. vid. stranguria	
<i>Dolor</i> 195- ej. caus. prox. 196. remot. symptom. signa pathogn. & progn.	1209-1217.
<i>Dyscrasia humorum</i> , vid. caco-chymia.	
<i>Dysenteria</i> 1564. ej. divis. in cruentam & albam, <i>ibid.</i> caus. symptom. signa pathogn. & progn. 1565-1570	

E.

<i>Elephantiasis</i> , vid. lepra.	
<i>Empyema</i> in genere & in specie 292. ej. caus. prox. 292- remot. symptom. signa pathogn. & progn. 791-795	264
<i>Epilepsia</i>	267
<i>Erysipelas</i> 221. ej. caus. prox.	<i>ibid.</i>
<i>Erotomania</i> 371. ej. caus. prox. symptom. signa pa- thogn. & progn.	1324-1327
<i>Evexia</i>	256
<i>Exanthemata</i> 245. eor. caus. prox. 246. divis.	<i>ibid.</i>
<i>Excrescentia cartilaginis</i>	75
<i>Exomphalus</i>	257

Extensio fibræ

85

Extravasatio 179. *ej.* caus. prox.

180

F.

Fatuitas, vid. morosis

Febris in genere 258. *ej.* divis. in genera & species 1337. & seq. caus. symptom. signa pathogn. & progn. generatim. 1343-1384. ardens vid. caufus, biliosa 1533. castrensis 1571. *ej.* caus. symptom. signa pathogn. & progn. 1572-1576. catarrhal. benign. 1540. *ej.* caus. symptom. signa pathogn. & progn. 1541-1545. catarrhal. malign. 1557. *ej.* caus. symptom. signa pathogn. & progn. 1558-1563. cholericæ vid. biliosa, continens in genere, *ej.* caus. symptom. signa pathogn. & progn. 1385-1390. continens per eminent. 1391. *ej.* caus. symptom. pathogn. & progn. 1392-1395. continua in genere *ej.* caus. symptom. signa pathogn. & progn. 1406-1409. complicata in genere 1678. *ej.* caus. symptom. signa pathogn. & progn. 1679-1704. composita ex acuta periodo 1716. *ej.* caus. symptom. signa pathogn. & progn. 1717-1725. diaria vid. ephemer. simpl. dysenterica vid. dysenteria, ephemer. simpl. 1396. *ej.* caus. symptom. signa pathogn. & progn. 1397-1400. ephemer. plur. dier. 1401. *ej.* caus. symptom. signa pathogn. & progn. 1402-1405. erysipelat. 1519. *ej.* caus. symptom. signa pathogn. & progn. 1520-1524. hæmitrit. 1741. in *schol.* hectica vid. lenta. hungarica vid. febr. castrensis. inflammator. in genere 1410. *ej.* caus. symptom. signa pathogn. & progn. 1411-1417. *ej.* spec. 1418. 1426. 1433. 1441. 1449. 1459. 1468. 1474. 1481. 1490. 1497. 1504. 1512. 1519. 1525. inflammator. ves. 1490. *ej.* caus. symptom.

signa pathogn. & progn. 1491-1496. intestinal.
 1497. *ej.* caus. symptom. signa pathogn. progn.
 1498-1503. uterin. 1481. *ej.* caus. symptom. signa
 pathogn. & progn. 1482-1489. intermit. in genere
ej. caus. symptom. signa pathogn. & progn. 1337.
 1627-1640. *ej.* spec. 1641. 1647. 1654. rarior.
 1661. lenta 1619. *ej.* caus. symptom. signa pathog.
 & progn. 1620-1626. malign. in genere 1546. *ej.*
 caus. symptom. signa pathogn. & progn. 1547-1556.
ej. spec. 1557. 1564. 1571. 1577. 1584. 1589.
 1594. 1600. 1609. 1614. miliar. vid. febr. purpur.
 rubr. morbillos. 1594. *ej.* caus. symptom. signa pa-
 thogn. & progn. 1595-1599. pestilentialis 1614.
ej. caus. symptom. signa pathogn. & progn. 1615-
 1618. petechial. 1609. *ej.* caus. symptom. signa
 pathogn. & progn. 1610-1613. petech. vid. febr.
 castrens. malign. phlegmon. vid. febr. erysipelat.
 purpur. rubr. & alb. 1589. *ej.* caus. symptom. signa
 pathogn. & progn. 1590-1593. purpur. urtic. 1584.
ej. caus. symptom. signa pathogn. & progn. 1585-
 1588. quartana 1654. *ej.* caus. symptom. signa pa-
 thogn. & progn. 1655-1660. quartan. contin. 1738.
ej. caus. symptom. signa pathogn. & progn. 1739.
 quotidian. 1641. *ej.* caus. symptom. signa pathogn.
 & progn. 1642-1644. quotidian. contin. 1740. *ej.*
 caus. symptom. signa pathogn. & progn. 1741. scar-
 latina 1577. *ej.* caus. symptom. signa pathogn. &
 progn. 1578-1583. semitertiana vid. hemitrit. ter-
 tian. 1647. *ej.* caus. symptom. signa pathogn. &
 progn. 1648-1653. tertian. contin. 1726 *ej.* caus.
 symptom. signa pathogn. & progn. 1727-1737.
 tertian. dupl. 1641. in *schol.* vulneraria 1525. *ej.*
 caus. symptom. signa pathogn. & progn. 1526-1532
Fissura 53. *ej.* caus. prox. 54. divis. in complicat &

I N D E X

- simplic. 55. symptom. signa pathogn. & progn. 467-475
Fistula. vid. *ulcus fistulosum.*
Flatulentia 309. ej. caus. prox. *ibid.* remot. sympt. signa pathogn. & progn. 883-891
Fluor albus 327. ej. divis. in benign. & malign. 327. ej. caus. prox. 328. remot. sympt. signa pathogn. & progn. 1070-1087
Fluxus hepaticus 312. ej. caus. symptom. signa pathogn. & progn. 757-764. lochialis 340. ej. caus. prox. 341. remot. symptom. signa pathogn. & progn. 721-729. menstruus 338. ej. caus. prox. 341. remot. symptom. signa pathogn. & progn. 700-714
Fractura ossis 52. ej. caus. prox. 54. divis. in complicat. & simplic. 55. symptom. signa pathogn. & progn. 467-475
Fragilitas ossis 43
Frigus febrile vid. *spasmus periphericus*
Furor poëticus 375. ej. caus. prox. symptom. signa pathogn. & progn. 1319-1323. uterinus 371. vid. *erotomania.*
Furunculus 215. ej. caus. prox. 216

G.

- Gangrena* 116. ej. caus. prox. 117. symptom. signa pathogn. & progn. 412-421
Gibbus dorsi 59. pectoris 61
Glandularum mesenterii & *intestinorum obstruct. infarct.* & *scirrhus.* caus. symptom. signa pathogn. & progn. 984-988
Glaucoma vid. *cæcitas.*
Gonagra 261. ej. caus. sympt. signa pathogn. & progn. 555-571

I N D E X.

- Gonorrhœa* 329. ej. divis. in benignam & malignam
 329. ej. caus. prox. 330. remot. sympt. signa pa-
 thogn. & progn. 1088-1104.
Gravedo 281. ej. caus. prox. 288. remot. signa pa-
 thogn. & progn. 1167-1174.
Gustus defectus 362. ej. caus. 362. symptom. signa
 pathogn. & progn. 1278-1280.
Gutta rosacea 232. ej. caus. prox. *ibid.* vid. vari. *sere-*
na vid. *amaurosis*

H

- Habitualis morbus*, vid. *morbus inveteratus*
Hæmoptysis 297. ej. caus. prox. remot. sympt. signa
 pathogn. & progn. 658-670.
Hæmorrhagia 181. ej. caus. prox. 182. remot. sympt.
 signa pathogn. & progn. 633-650. *narium* caus.
 symptom. signa pathogn. & progn. 651-657. *uteri*
in specie talis 339. ej. caus. prox. 341. remot.
 symptom. signa pathogn. & progn. 715-720.
Hæmorrhoidalis serpigo vel sudor, vid. *hæmorrhoides*
serpiginosæ
Hæmorrhoides *cæcæ* 336. caus. prox. 337. *dolentes*,
furentes 336. caus. prox. 337. *turgentes* 336. caus.
 prox. 337. *in genere* 333. divis. 333. caus. prox.
 337. *fluentes externæ* 333. caus. prox. 337. re-
 mot. sympt. signa pathogn. & progn. 738-744-
mucidæ s. *ferosæ*, s. *albæ* 335. caus. prox. 337. re-
 mot. sympt. signa pathogn. & progn. 745-747. *ser-*
piginosæ 335. caus. prox. 337. remot. symptom.
 signa pathogn. & progn. 752-756.
Hemicrania 262. ej. caus. sympt. signa pathogn. &
 progn. 503-516.
Hemiplegia s. *hemiplexia* 272.

I N D E X.

- Hepatitis* 1459. ej. caus. symptom. signa pathogn. & progn. 1460-1467
- Hernia* 251. ej. divis. 251. 253. caus. prox. 255. remot. symptom. signa pathogn. & progn. 1201-1208. abdominalis vid. hypogastrocele, inguinalis vid. bubonocoele, scrotalis vid. oscheocoele, umbilicalis vid. exomphalus.
- Herpes* 230. ej. caus. prox. *ibid.* remot. symptom. signa pathogn. & progn. 1145-1151
- Historia morbi* 14. proleg. ej. divis. 15. proleg. quam esse debeat in Pathologia 16. proleg. ej. requisita 17 proleg.
- Horripilatio* f. *horror febrilis* vid. spasmus periphericus.
- Humiditas in solidis corporis humani* 12
- Hydatides pulmonum* 293. caus. prox. 293
- Hydrocele* 254
- Hydrocephalus externus* 249. ej. caus. prox. 250
- Hydromphalus* 254
- Hydrophobia* 374. ej. caus. symptom. signa pathogn. & progn. 1308-1311
- Hydrops* in genere 209. caus. symptom. signa pathogn. & progn. 1035 - 1047. pectoris 293. ej. caus. prox. 293. ad matulam. vid. diabetes.
- Hypogastrocele* 252

I.

- Icterus* 345. ej. caus. prox. 346. remot. symptom. signa pathogn. & progn. 1022-1024
- Impetigo* 229. ej. caus. prox. *ibid.* remot. symptom. signa pathogn. & progn. 1134-1144
- Incontinentia urinae* 326. ej. caus. prox. 326. remot. symptom. signa pathogn. & progn. 1010-1013
- Incrementum morbi* 62 proleg. partium solidarum, morbi genus 39. ej. caus. prox. *ibid*

I N D E X.

- 265
- Incubus*
- Incurvatio ossis* species dislocationis 60. ej. caus. prox. 62.
- Infarctus hepatis* 320. ej. caus. prox. 321. remot. sympt. signa pathogn. & progn. 959 - 965. lienis 320. ej. caus. prox. 321. remot. sympt. signa pathogn. & progn. 973-978
- Inflammatiō* 116. ej. caus. prox. 117. sympt. signa pathogn. & progn. 408-421.
- Inflatio hepatis* vid. infarctus.
- Initium morbi* 62. proleg.
- Ionthi* vid. vari
- Irregularis morbus* vid. morbus atypicus
- Ischuria* 323. ej. caus. prox. 324. remot. sympt. signa pathogn. & progn. 1005-1009

L.

- Laxitas* vid. athonia.
- Lepra* 229. ej. caus. prox. *ibid.* vid. impetigo. 353
- Lethargus*
- Leucophlegmatia* 247. ej. caus. prox. 248. remot. sympt. signa pathogn. & progn. 1048-1054
- Lipothymia* s. *lipopsycha* 349. ej. caus. prox. 350. remot. sympt. signa pathogn. & progn. 1228-1237
- Lippitudo* 356. ej. caus. prox. 356. vid. ophthalmia
- Lues venera* 344. ej. caus. prox. 344. remot. sympt. signa pathogn. & progn. 1105-1119
- Lumbago* 262. ej. caus. sympt. signa pathog. & prog. 537-542
- Luxatio* 56. ej. caus. prox. 57. divisio 58. sympt. signa pathogn. & progn. 476-481
- Lycantropia* 374
- Lysis* 1373. bona 1376. mala *ibid.* ej. forma 1377.

I N D E X

M.

- Macula* 233. scarlatinæ 241. ear. divisio 241
- Malum hypochondriacum* 331. ej. caus. prox. 332. remot. sympt. signa pathogn. & progn. 825-832. hystericum 331. ej. caus. prox. 332. remot. symptom. signa pathogn. & progn. 833-841. neapolitanum vid. lues venera. ischiadicum 261. ej. caus. sympt. signa pathogn. & progn. 543-554
- Mani* 367. ej. caus. sympt. signa pathogn. & progn. 1292-1296
- Marasmus senilis* 381. ej. caus. prox. 382. effectus hic considerandi 1331
- Materia maligna* 77. proleg.
- Melancholia* 367. ej. caus. symptom. signa pathogn. & progn. 1284-1291
- Memoriale signum morbi*, vid. signum morbi recordativum
- Menses decolores* 338. eor. caus. prox. 341
- Mensium fluxus* vid. fluxus menstruus
- Miasma* vid. mater. malign.
- Mictus cruentus* 342. ej. caus. prox. 342. remot. sympt. signa pathogn. & progn. 692-699
- Miserere mei* vid. passio iliaca.
- Mollities ossis* 44
- Morbilli* 240. eor. divis. ibid.
- Morbus* ej. definitio 2. proleg. realis & nominal. quando conficienda 22. proleg. acutus 46. proleg. ætatum 89. proleg. atypicus 64. proleg. benignus 77. proleg. chronicus 46. proleg. comitialis vid. epilepsia. complicatus 37. proleg. ej. in genere caus. sympt. signa pathogn. & progn. 1668. - 1677. compositus 30. proleg. contagiosus 77. proleg. elementaris in partibus solidis possibilis 14. endemicus 82. proleg. epidemicus 82. prol. erraticus 71. prol. fluidorum 29. prol. ej. fundamentum generale 163. hæreditarius 49. prol.

I N D E X.

Idiopathicus 32. *proleg.* inveteratus 47. *proleg.* lethalis 55. *proleg.* major 67. *proleg.* malignus 77. *proleg.* minor 62. *proleg.* pandemius f. pandemicus 84. *proleg.* periodicus 71. *proleg.* recens 48. *proleg.* recidivans 95. *proleg.* salutaris 60. *proleg.* sensuum internorum 364. *proleg.* sexus 89. *proleg.* simplex 30. *proleg.* solidorum 29. *proleg.* solvi quando dicatur 44. *proleg.* sporadicus 84. *proleg.* symptomaticus 32. *proleg.* temperamentorum 94. *proleg.* typicus 64. *proleg.* vitæ generis 93. *proleg.* vitiatæ structuræ 94. *proleg.*

Moria vid. morosis.

Morosis 365. *ej.* caus. prox. 369. remot. sympt. signa pathogn. & progn. 1328-1332

Mors ad solutiones morbi pertinet 53. *proleg.* *ej.* præfagitiones in morbis quibus principiis initantur 1743. *ej.* prognosis in morbis generatim. 1744-1750

Motus febriles vid. commotiones febriles.

N.

Nausea 303. vid. anorexia.

Nephritis 1474. *ej.* caus. sympt. signa pathogn. & progn. 1475-1480. calculosa. 322

Noctambulatio f. noctisurgium 376. *ej.* caus. sympt. signa pathogn. & progn. 1297-1301

Noli me tangere, vid. cancer. occultus. 1302-1307

Nostalgia 377. *ej.* caus. sympt. signa pathogn. & progn. 1302-1307

O.

Obstructio alvi 313. *ej.* caus. prox. *ibid.* remot. sympt. signa pathogn. & progn. 908-912. vasis 99. *ej.*

I N D E X

- caus. prox. 100. sympt. signa pathogn. & progn. 400-403
- Odontalgia* 358. ej. caus. sympt. signa pathogn. & progn. 1224-1227
- Odontitis* vid. ophthalmitis.
- Oedema* 249. ej. caus. prox. 250. remot. sympt. signa pathogn. & progn. 1065-1069
- Olfactus defectus* 361. ej. caus. proxima 361. sympt. signa pathogn. & progn. 1275-1277
- Omphalocele* vid. exomphalus.
- Ophthalmia* 354 ej. caus. *ibid.* sympt. signa pathogn. & progn. 1246-1251
- Ophthalmitis* 1512. ej. caus. sympt. signa pathogn. & progn. 1513-1518
- Opisthotonus* 264
- Orexis canina* 305. vid. addephagia
- Orgasmus humorum* 170. ej. caus. prox. 171. *Oscheocele* 252
- Offificatio cartilaginis* 69
- Otalgia* 358. ej. caus. sympt. signa pathogn. & progn. 1262-1267
- Oritis* vid. ophthalmitis
- Ozæna* 283

P.

- Palpitatio cordis* 145. ej. caus. prox. 149 remot. sympt. signa pathogn. & progn. 765-771
- Papula* vid. *Pustula*.
- Paralysis* 270. ej. divis. *ibid.* caus. prox. 271. remot. sympt. signa pathogn. & progn. 599-614. ani 319 vid. tenesmus ej. caus. prox. 319
- Paraphimosis* vid. *Phimosis*.
- Paraphrenitis* 1449. ej. caus. sympt. signa pathogn. & progn. 1450-1458
- Paraphleg.* f. *praplexia* vid. 272

I N D E X

- Paroxysmus* 72. *proleg.*
- Passio iliaca* 315. *ej.* caus. prox. 316. remot. sympt. signa pathogn. & progn. 899-907
- Pathognomicum signum* vid. signum demonstrat.
- Pathognomicum signum* vid. signum proprium morbi.
- Pathologia* *ej.* definitio 1. *proleg.* circa quæ versatur 3. *proleg.* de quo ibid. agendum 4. *proleg.* *ej.* asserta demonstranda 5. *proleg.* de causis morborum *ibid.* agendum, & de quibus 6-8. *proleg.* agendum de signis morborum 10 *proleg.* generalis & specialis quænam 12. *proleg.* quænam præcedere debeat 23 *proleg.* *ej.* fontes 19. *proleg.* *ej.* studia subsidaria 20. *proleg.* qua methodo tractanda 21. *proleg.* eam discentis conditio 27. *proleg.*
- Peripneumonia* 1433. *ej.* caus. sympt. signa pathogn. & prgn. 1434-1440
- Pestilentia* vid. febris pestilentialis.
- Petechiæ* 244
- Phimosi* 222. *ej.* caus. prox. 222
- Plegmatorrhagia* 281. *ej.* caus. prox. 282. vid. gravedo 221
- Phlegmone* 221. *ej.* caus. prox. 221
- Phrenitis* 1418. *ej.* caus. sympt. signa pathogn. & prog. 1419-1425
- Phthisis pulmonalis* 291. *ej.* caus. prox. 292. remot. sympt. signa pathogn. & progn. 772-778
- Phyma* vid. tuberculum
- Plethora* 164. *ej.* caus. prox. 165. divis. 166. sympt. signa pathogn. & progn. 389-393
- Pleuritis spuria* 262. *ej.* caus. sympt. signa pathogn. & progn. 517-525. vera 1441. *ej.* caus. sympt. signa pathogn. & progn. 1442-1448
- Pneumatocèle* 254
- Pneumatomphalus* *ibid.*
- Podagra* 261. *ej.* caus. sympt. signa pathogn. & prog. 555-571

I N D E X

<i>Procidentia ani</i>	318.	vid. tenesmus	<i>ej. caus. prox.</i>	318
<i>Psoriasis</i>	228.	<i>ej. caus. prox.</i>		<i>ibid.</i>
<i>Pulsus</i>	124.	celer.	125. <i>ej. caus. prox.</i>	133.
		debilis		
	128.	<i>ej. caus. prox.</i>	136.	durus 129. <i>ej. caus. prox.</i>
	137.	frequens 126. <i>ej. caus. prox.</i>	134.	fortis 128.
		<i>ej. caus. prox.</i>	136.	inæqualis 130. <i>ej. caus. prox.</i>
	138.	intermittens 130.	latus 127.	longus <i>ibid.</i>
		mag-		
	nus 127. <i>ej. caus. prox.</i>	135.	mollis 129. <i>ej. caus.</i>	
	prox. 137.	obscurus 131. <i>ej. caus. prox.</i>	139.	par-
	vus 127. <i>ej. caus. prox.</i>	135.	rarus 126. <i>ej. caus.</i>	
	prox. 134.	tardus 125. <i>ej. caus. prox.</i>		133
<i>Purpura alba</i>	243.	scorbutica 242.	rubra f. miliar.	
	242.	urticata		<i>ibid.</i>
<i>Pus</i>	207.	<i>ej. caus. prox.</i>		208
<i>Pustula</i>	215.	<i>ej. caus. prox.</i>		216
<i>Putredo humorum</i>	177.	<i>ej. caus. prox.</i>		178
<i>Putrefactio partium solidarum</i>	26.	<i>ej. caus. prox.</i>		27

R.

<i>Rabies canina</i>				374
<i>Ramex</i>	vid. hernia,	<i>ramex varicosus</i>	vid. cirfocele.	
<i>Raptus poëticus</i>	vid. furor poëticus.			
<i>Raucedo</i> f. raucitas	vid. branchus 287.	<i>ej. caus. prox.</i>		<i>ibid.</i>
<i>Raciduus morbus</i>	vid. morbus recidivans.			
<i>Regularis morbus</i>	vid. morbus typicus.			
<i>Rerum sex non natural.</i>	vitia sunt caus. morbor. sed non			
omnes				158. proleg.
<i>Resolutio nervorum</i>	vid. paralyfis.			
<i>Rhachitis</i>	66. <i>ej. caus. prox.</i>			67
<i>Rheumatismus</i>	260. <i>ej. divisio</i>			<i>ibid.</i>
<i>Rigiditas</i>	17. <i>ej. caus. prox.</i>	19. sympt.	signa pathogn.	
& progn.				383-385
<i>Risus sardonius</i>				264

I N D E X.

Ructus 301. ej. divis. *ibid.* caus. prox. 302
Ruptio fibræ 79. ej. caus. prox. 80

S.

Sanguis sugillatus 234. ej. caus. prox. *ibid.*
Sarcocele 254
Sarcomphalus *ibid.*
Scabies 225. ej. divis. 226. caus. prox. 227. remot.
 sympt. signa pathogn. & progn. 1120-1134
Scirrhus 210. ej. divis. *ibid.* caus. prox. 211. remot.
 sympt. signa pathogn. & progn. 440-442. 454 &
 455. hepatis ej. caus. symptom. signa pathogn. &
 progn. 966 - 972. lienis ej. caus. sympt. signa pa-
 thogn. & progn. 979-983
Scorbutus 343. ej. caus. prox. *ibid.* remot. sympt. signa
 pathogn. & progn. 1186-1200
Scotoma vel *scotomia* vid. vertigo.
Serpigo vid. herpes.
Siccitas elementor. in solid. corp. human. 11
Signum morb. & caus. morb. 163. proleg. ej. signat.
ibid. est natur. 165. proleg. commune morb. vel ej.
 caus. 168. proleg. demonstrat. f. diagnost. 167. pro-
 leg. prognost. *ibid.* propr. morb. vel ej. caus. 169.
 proleg. recordat. 167. proleg. suffic. morb. vel ej.
 caus. 169. proleg. insuffic. morb. vel ej. caus. 169.
 proleg.
Signorum fundamenta & conditio in Pathologia 170-
 183. proleg.
Singultus 298. ej. caus. prox. *ibid.*
Soda 300. ej. caus. prox. *ibid.* remot. sympt. signa pa-
 thogn. & progn. 930-938
Solutio continui 24. ej. caus. prox. 25. non conjuncta
 cum element. mutata mixt. 32
Solutiones morb. & divis. 45. proleg.

I N D E X.

Somnambulatio vid. noctambulatio.

Soporosi affectus 353. ej. sp. *ibid.*

Spasmus 83. ej. caus. prox. 84. remot. sympt. signa pathogn. & progn. 482-502. cynicus 264. œsophagi f. gulæ caus. sympt. signa pathogn. & progn. 872-882. paracelsi fixus 262. ej. caus. sympt. signa pathogn. progn. 526-536. peripherer. 237. ej. caus. prox. *ibid.*

Sphacelus 118. 413. & seq.

Spina ventosa 48. ej. caus. prox. 49. grad. divers. eor. caus. 50. & 51. sympt. signa path. prog. 464-465

Spissitudo humorum 184. ej. caus. prox. 185. sympt. signa pathog. progn. 394-396

Splenitis 1468. ej. caus. sympt. signa pathogn. progn. 1469-1473

Sputum cruentum 288. ej. caus. prox. *ibid.* rem. sympt. signa pathogn. 683-691

Stasis 173. ej. caus. prox. 174. sympt. signa pathog. progn. 400-403

Status morbi 62. proleg.

Stranguria 323. ej. caus. prox. 324. remot. sympt. signa pathogn. progn. 1000-1004

Stupiditas vid. morosis.

Subluxatio 58

Superossatio 63. ej. caus. prox. 64

Surditas 360. ej. caus. *ibid.* symptom. signa pathogn. progn. 1271-1274

Susurrus 359. ej. caus. *ibid.* symptom. signa pathogn. progn. 1268-1270

Symptoma vid. morbus symptomaticus.

Syncope 349. caus. prox. 350. vid. lipothymia.

Synochus simplex, f. imputris, f. febris synocha, vid. febr. continens. putrida 1705. ej. caus. sympt. signa pathogn. progn. 1706-1715

I N D E X.

T.

- Tarantismus* 373. ej. caus. sympt. signa pathogn.
progn. 1312-1315
- Tenesmus* 317. ej. caus. prox. *ibid.* remot. sympt. signa
pathogn. progn. 939-948
- Tensio febrilis* vid. *spasmus peripher.*
- Tenuitas humor.* 188. ej. caus. prox. 189
263
- Tetanus*
- Timitus* 359 ej. caus. *ibid.* vid. *fusurru.*
- Tophi pulmonum* 290. cor. caus. prox. *ibid.* remot.
sympt. signa. pathogn. progn. 780-785
- Tremor auricularum cordis* 153. ej. caus. prox. 155.
cordis 147. ej. caus. prox. 151
- Tuberculum* 214. ej. caus. prox. 216
- Tumor* 39. sanguin. lymphatico-feros. hydropic. 209
vid. *hydrops. tunicat. sive faccatus.* 217
- Tussis* 295. ej. divis. *ibid.* caus. prox. 296. remot.
sympt. signa pathogn. progn. 807-824
- Tympanites* 249. ej. caus. prox. 250. vid. *ascites.*
- Typus morbi* quid *req.* 65-70. *proleg.*

V.

- Vagus morbus* vid. *morbus erraticus.*
- Vari* 232. cor. caus. prox. *ibid.* remot. sympt. signa pa-
thogn. progn. 1152-1159
- Varices* 143. caus. prox. 144.
- Varicocele* vid. *cirfocele.*
- Variola* 239. ear. divis. *ibid.* vid. febr. variolos.
- Vermes* cor. origo in inest spec. effect. diagnos. progn.
949-958
- Vertigo* 355. ej. caus. prox. *ibid.* remot. sympt. signa
pathogn. progn. 1257-1761
- Vesicule* 215. ear. caus. prox. 216.

I N D E X.

<i>Vibices</i> 234. ear. caus. prox.	<i>ibid.</i>
<i>Vibratio vasorum</i>	115
<i>Visciditas humorum</i> 186. ej. caus. prox.	187
<i>Ulcus</i> 198. ej. divis. gener. <i>ibid.</i> caus. prox. 202 sympt. signa pathogn. progn. 430-439. callos. 199. ej. caus. prox. 203. sinuos. 200. ej. caus. prox. 204. fistul. 201. ej. caus. prox.	205
<i>Vocis defectus</i> vid. aphonia	
<i>Vomica pulmonum</i> 291. ej. caus. prox. <i>ibid.</i> remot sympt. signa pathogn. progn.	786-790
<i>Vomitus</i> 307. ej. divis. <i>ibid.</i> caus. prox. 308. remot. sympt. signa pathogn. progn. 853-862. cruentus 307. ej. caus. prox. 308. remot. sympt. signa pathogn. progn.	671-682

Z.

Zona 230. ej. caus. prox. *ibid.* vid. herpes.



